

ÛHIHINYKÖU AE TEB ÛNYI

ANYIN

TUHÖTA, AT A OMELI ÖTA

IESU KERISO.

ADRE WIA KA HNYI

HWEN IAL.

London :

BRITISH AND FOREIGN BIBLE SOCIETY.

1901

MATAIO.

HNYIMAKAN 1.

TUSI hnân aú je dö anyi Iesu Keriso, mátrâni Davita, mátrâni Aberahama.

2 Aberahama ame hnöku Isaaka; Isaaka ame hnöku Jakob; Jakob ame hnöku Juda, me je liamekeiny mē; 3 Juda ame hnöku Farez me Zera únyi ga Tamara; Farez ame hnöku Ezerona; Ezerona ame hnöku Ram; 4 Ram ame hnöku Aminadaba; Aminadaba ame hnöku Nasona; Nasona ame hnöku Salemona; 5 Salemona ame hnöku Boaza únyi ga Rakaba; Boaza ame hnöku Obed únyi ga Rutha; Obed ame hnöku Jese; 6 Jese ame hnöku Davita a than.

Davita a than ame hnöku Solomona únyi ge öiö Uria; 7 Solomona ame hnöku Reoboama; Reoboama ame hnöku Abija; Abija ame hnöku Asa; 8 Asa ame hnöku Jehosafata; Jehosafata ame hnöku Jorama; Jorama ame hnöku Uzia; 9 Uzia ame hnöku Jotham; Jotham ame hnöku Ahaza; Ahaza ame hnöku Hezekia; 10 Hezekia ame hnöku Manase; Manase ame hnöku Amona; Amona ame hnöku Josea; 11 Josea ame hnöku Jekonia me je liamekeiny mē, hnyi úen adre hum ödra hnyin Babulona ai.

12 Ke hwaban dö hna hum ödra Babulona ai, haba Jekonia ame hnöku Sealetielä; ke Sealetielä ame hnöku Zerubabela; 13 Zerubabela ame hnöku Abiuda; Abiuda ame hnöku Eliakima; Eliakima ame hnöku Azora; 14 Azora ame hnöku Sadoka; Sadoka ame hnöku Akeimo; Akeimo ame hnöku Eliuda; 15 Eliuda ame hnöku Eleazara; Eleazara ame hnöku Mathana; Mathana ame hnöku Jakob; 16 Jakob ame hnöku Josefa öiö Maria, momo ame hnöku Iesu, adre me hwenyi ien Keriso.

17 Ke haba ta je dö hia hwân ga Abera-

hama ke ne o but kö Davita, me fotin ta je dö; ke hwân ga Davita ke ne o but hnyi hna hum ödra Babulona ai, me fotin ta je dö; ke hwân hnyi hna hum ödra Babulona ai ke ne o but Keriso me fotin ta je dö.

18 Ke walang hwakecin hua hnöku Iesu Keriso: Haba hnyi úen ame úkocö hinyen a Maria me Josefa, ke ödru tiga ca tha laba bi, me manen dut a ga erkin dut hnen Hanu Kap. 19 Ke at ae wisa Josefa a áiân, k' ame ca beweny he ka omanená hwakecin hnyi hnyimakan tavat, me e ame únykúme he ka degec duöngâ e. 20 Ke e ame tiga únykúme ta je únyi eling, me wâ bi ame manen dut kâu angela anyin Than hnyi bwi, ame ha, ka habe, Josefa nöku Davita lö, ca ot he ka hum Maria áiâm; anyin a erkin dut hnen Hanu Kap. 21 Ke e ame he ka hnokoâ da, ke u me he ka hwenyi ien Iesu; anyin a e at ame he ka omelö lakeiny únyi hnyi anyidra ta je hulö. 22 Ke adre me ányâ ta je únyi hia thithö e, me me hwâdâ hna ha hnen Than a deny perofeta, ame ha, ka habe, 23 Wâ bi, ame he hlu ka erkin, me hnokoâ da,

K' adre me he ka hwenyi ien Emanuela;

walang bongon, E but unyita Khong. 24 Haba Josefa ame todrö úheny hnyi hna mokut, me ányâ helâ me hna húna kâu ge angela anyin Than, me e ame hom áiân; 25 ke e ame ca tha e mē ke ne o but e ame hnokoâ nokon a da: ke e ame hwenyi ien Iesu.

HNYIMAKAN 2.

ADRE me hnöku Iesu hnyi Bethleema hnyi hnyei Juda hnyi ta je bongu Heroda a than, ke wâ bi, ame o but ta je magoi hnyi Jerusalema úhedrin jimeyö, 2 ke haingödrin, ka habe, Ewa at adre

hnokoâ me Tuhan at Juda? anyin a öhmun e wâ but jimeyö anyin okhû, ke öhmun e o but he ka khudrung kâu. 3 A löng ut Heroda a than, me e ame hlohlo tha e me Jerusalema hia. 4 Me e ame úkhacakouâ tavat bihut ae nua, me tavat sihnalimen hnyi hnyei, me e ame hnei ödra ge dok adre me he ka hnöku Keriso hnyin. 5 Haingödra kâu, ka habe, Betheleema hnyi hnyei Juda: anyin a walang hna sihnalimen hnen perofeta, ka habe,

6 Ke haba u Betheleema hnyei Juda,

U ca úhnyúkong ge je taben hnyi hnyei Juda :

Anyin ame he ka o gam at musî,

At ame he ka musö lakeik a at Isaraela.

7 Ke haba Heroda ame hawâ duöngâ ta je magoi, me hnö cicilâ gadrin a manen kehö okhû. 8 Ke e amé kun'ödrin Betheleema ai, me ha, ka habe, He th'öbun ka elâm wia bongon inma; ke öbun ka wâ ju, thumetu nya thö, m' inye he minya ka munyi khudrung kâu. 9 Ödrin e hia but löng hwan than, me ödrin e he but; ke wâ bi, haba okhû waleji ödrin e wâ e jimeyö, ame bân hnyi hnyimaködrin, ke ne o but ame laba cicö hon dok a e hnyin inma. 10 Ödrin e wâ okhû, me ödrin e ti senyin gan hmâ. 11 Ke ödrin e o thö ka hnyi hnyin uma me wâ inma me Maria a hinyen; ke ödrin e ta ju me khudrung kâu; ke ödrin e khöng ut tang omjehedrin me ham kâu je bwihlany, gol, me libanu, me muro. 12 A hia but Khong kou ködrin hnyi bwi m' ödrin e ca he ka hmetu kö Heroda, me ödrin e he but ka hnyi idrin hnyei hnyi ke gethen bi.

13 Ödrin e he but, me wâ bi, ame manen dut angela anyin Than kö Josefa hnyi bwi, ame ha, ka habe, Todrö, hom dö inma me hinyen, ke kec dö Aigupito ai, me laba eling, ke ne o but hnyi ün oge me he ka thumetu u hnyin: anyin ame he Heroda ka elâm inma he ka hlingâ e. 14 Me e ame todrö hnyi hnyinghet me hom inma me hinyen, me he Aigupito ai; 15 me laba eling ke ne o but hnyi ün ame mokcu hnyin Heroda: me me hwädâ hna ha ge Than a deny perofeta, ka habe, Oge hia but hawâ nöku üheny Aigupito. 16 A wâ but Heroda a je magoi ödrin e iyawâ e, me e ame hmönyin gan hmâ, me úkhünöng he ka hlingâ ta je wanakat hia thithö hnyi Betheleema, ke hnyi je hnyigöulen e, hwân ge tavat a lo hunaidra ke ne o but ka ta je mendreng, hoton ün e ame hia but hnö

wia hnyin ta je magoi. 17 Me ame hwädâ thö hna ha ga Jeremia perofeta, ka habe, 18 Adre me löng hnyi Rama hwan, Hwatenge me tenge thungau, Rakela ame tenge ge lakon; K' ame ca tubet bi, anyin ae hi' ödrin dut.

19 Ke a mokcu Heroda, me wâ bi, ame manen dut angela anyin Than kö Josefa hnyi bwi hnyi hnyei Aigupito, 20 ame ha, ka habe, Todrö hom dö inma me hinyen, me he thö ka hnyi hnyei Isaraela: anyin ödrin e mokcu hnyat ödrin e elâm inma he ka hlingâ. 21 Me e ame todrö, me hom inma me hinyen, me he ka hnyi hnyei Isaraela. 22 Ke e ame löng a g' ame than biju Arekelao hnyi Juda, hwaban kamen a Heroda, me e ame ot he ka he kâe; ke adre me kou kâu hnyi bwi, me e ame he ka hnyi ke keihen Galilaia, 23 me o thö ka hnyi taun a Nazareta ien me laba ju eling: me me hwädâ thö hna ha ge ta je perofeta, ka habe, Adre me he ka hâiâ e, me e at Nazareta.

HNYIMAKAN 3.

HNYI je bong eling ame o thö Ioane Bapataiso k' ame khetâ hofuc hnyi hnyebuba hnyi Juda, 2 haingen ka habe, Ietra ju öbun; anyin ae hakekeny jut dokhon drany 3 Anyin a e at a ha gan Isaia perofeta, haingen, ka habe,

Ifucin at ame hongot hnyi hnyebuba, ame ha, ka habe,

Penapena ju gethen deny Than,

Owisa thö deny ta je gethen.

4 Ke haba Ioane ame khavâ úkhaú a leünen kamela, k' ame ca hnyekon ge wen a unen meno; ke haba hing an jeú me hamon me haniiny hnyot. 5 Me ame he but kâu Jerusalema, me Juda hia thithö, me ke keihen hnyei hia hakekenyâ Joridano; 6 ke e ame bapataiso ödra hnyi wagewe Joridano, adre me omanenâ anyidra ta je monu. 7 Ke hnyi ün e ame wâ ta je Faresaio me ta je Sadukaio ae se hia adre me o but ka hnyi anyin bapataiso, me e ame ha ködra, ka habe, Je lakon on lö, ia kou köbun m' öbun e he ka kec ge hmönyin ame he ka o? 8 Wa but öbun wan ae úcú me ietra: 9 ke ca únykúme he ka ha eú hnyi je hnyekubun, ka habe, Aberahama kamöta: anyin oge me ha köbun e khana Khong he ka okúâ lakon kö Aberahama únyi hnyi je veto ang.

MATAIO 4.

10 Adre hia but walang ang ip giwa hnyi hwecin ta je úö : haba ta je úö hia ame ca wa so, me adre ma sö degecâ me khûâ ka hnyi meic. 11 Haba inya oge me bapataisoi öbun ge köiö ka hnyi ietra : ke haba at ame he jem hotuk ae beönua huk, ae ca úcú nya bi he ka hom taben li hnyeúcän : e ame he ka bapataisoi öbun ge Hanu Kap me meic : 12 e bi hnyi hnyamen anyin ut, ke e ame he ka ányâwia hwit hnyi hnen hna huje hwit ; ke e ame he ka úkhöünâ anyin hwit ka hnyi omhani, ke e ame he ka thong thatúnyin hwit hnyi meic ame ca mok balua.

13 Haba Jesu ame he but úheny Galilaia Joridano ai kö Ioane, e me he ka bapataisoi e. 14 Ke haba Ioane ame bethawâ e, me ha, ka habe, E so u me he bi ka bapataisoi nya, ke u me he but könya ? 15 Ke Jesu ame thu me ha kâu, ka habe, Më kap ju walang ang : anyin ae úcú köta he ka hnu hoton hia thithö hwakecin ae wisa. Me e ame löng kâu. 16 A hia but bapataisoi Jesu, me e ame ölö thö úheny hnyi köiö : ke wâ bi adre me khöng ut kâu drany, ke e ame wâ Hanon Khong ame gâ but kâu helâ me biny, me o hnyi hon ; 17 ke wâ bi ke hwan únyi hnyi drany, ame ha, ka habe, Walang Nökuk a oúnykúmik, at oge me ti senyin gan.

HNyimakan 4.

KE haba Hanu ame hum Jesu ka hnyi hnyebuba, e me he diabolö he ka cubec e. 2 K' ame ca han hnyi fâte je lany ke fâte je lit, ke hwaban dö e, me ame mekihnânem. 3 Me ame o but kâu at ame úcúbic, me ha, ka habe, U je ne Nokon Khong, ha thö, me me areto but je veto ang. 4 Me e ame thu me ha, ka habe, Adre hia but sihnalimen, ka habe, Ame ca he ka möt at ge areto thibi, ke hnen bi ta je hofuc hia ame o but únyi hnyi hnyimen Khong. 5 Haba diabolö ame hom e ka hnyi taun ae kap, me ip e hon ban uma kap, 6 ke ha kâu, ka habe, U je ne Nokon Khong, utut : anyin adre sihnalimen, ka habe,

E ame he ka hûna anyin ta je angela hnân hobi köu :

K' adre me he ka kaptilö u ge je hnyamödra,

Wâ e nye thö thö hnyeúcän hnyi veto.

7 Haba Jesu ame ha kâu, ka habe, Adre hia but sihnalimen minya, ka habe, U me

ca he ka cubec Than a Khongom. 8 Ke haba diabolö ame hom hmetu e ka hnyi bucen ae beû hmâ, me omanená kaú ta je dökhü hia eang hmeledrany, ke ta je hmanenanginy ; 9 me e ame ha kâu, ka habe, Oge me he ka ham köu ta je únyi e, u je ne he bi ka nom me khudrung ju könya. 10 Ke haba Jesu ame ha kâu, ka habe, Satana lö, kec dö : anyin adre hia but sihnalimen, ka habe, U ma he ka khudrung ka Than a Khongom, me bi athnyabainy thibi. 11 Me haba diabolö ame hna but e ; ke wâ bi, ame o thö ta je angela me bi athnyabainy.

12 Ke haba hnyi úen e ame löng a g' adre hia but cö Ioane, me e ame he but Galilaia ai ; 13 ke e ame hna but Nazareta, me he ka laba hnyi Kaperenauma, hnyi hobat köiö, hnyi hnyigöulen Zebulona me Nafatali : 14 me me hwädâ hna ha ga Isaia perofeta, ka habe,

15 Hnyei Zebulona me Nafatali,
Cicö köiö, hoton Joridano,
Galilaia iny ke je hnyei,

16 Haba tavat adre me laba hnyi menekholom

Adre me wâ melam ae gan,

Ke haba tavat adre me laba hnyi ke keihen hnyei a hmenon mok,

Ame o but melam ködra.

17 Hwân hnyi úen e, Jesu ame hwân he ka khetâ me ha, ka habe, Ietra ju öbun ; anyin ae hakekeny jut dokhon drany.

18 Ke e ame vhenö hobat köiö Galilaia, ke e ame wâ li liamekeiny, jia Simona ke ien Peteru, me Anederea a keiny, ödru me thong ert eú hnyi köiö ; anyin a ödru li at thut. 19 Ke e ame ha ködru, ka habe, He hotuk, me oge me he ka wi' öbu me hnân thelo at. 20 Me ödru me ie hna but je ert me he hoton. 21 Ke e ame he úheny e, me e ame wâ ke li liamekeiny, jia Iakobo nöku Zebedaio, me Ioane a keiny, ödru me tha laba me Zebedaio a kamödru hon hu, ödrin e ena útödrin je ert ; ke e ame ha' ödru. 22 Me ödru me ie hna but hu me kamödru, me he hoton.

23 Ke Jesu ame vhenö Galilaia hia thithö, ame úne hnyin umödrin je sunago, me khetâ úthumetu a soiny dökhü, me ohia ta je mok hia thithö, me ta je sényin hia hnyi hnyei. 24 Ke e ame lung igigilö Suria hia thithö : me adre me hom but kâu tavat ae mok hia thithö, wale ame taku ödra ge je ve mok me vec, tavat a delec demoni, me ing, me mat, me e ame omeli ödra. 25

MATAIO 5.

Haba tavat ae se hia adre me he hoton e, úhedra Galilaia me Dekapoli me Jerusalema me Juda me ke keihen hoton Joridano.

HNYIMAKAN 5.

E AME wâ tavat ae se hia, me e ame e ame labâ, me ame o kâu laten : 2 me e ame khetâ me n' ödra, haingen, ka habe,

3 Hnahic hnen tavat ae theduoc hanudrin, anyin a hobi ködra dökhu dokhon drany.

4 Hnahic hnen tavat adre me tenge, anyin a adre me he ka otubweli ödra.

5 Hnahic hnen tavat ae ilemuk : anyin adre me he ka hu hnyei.

6 Hnahic hnen tavat adre me bean ke beijem hwakecin ae wisa ; anyin adre me he ka osekuni ödra.

7 Hnahic hnen tavat adre me betenge : anyin adre me he bi ka betenge ködra.

8 Hnahic hnen tavat ae kalaöt hnyekudra, anyin adre me he ka wâ Khong.

9 Hnahic hnen tavat adre me öusoköuâ : anyin adre me he ka hai ödra me lakon Khong.

10 Hnahic hnen tavat adre hia but oveci ödra can hwakecin ae wisa : anyin a hobi ködra dökhu dokhon drany. 11 Hnöbun hnahic e ka he tavat ka ú öbun me oveci öbun, me haikongu öbun, me hai thoi öbun ge ta je únyi hia can inya. 12 Senyin d' öbun me hobâ : anyin ae gan hmâ hwaböbun ethö hnyi drany ; anyin a helâe adre me ovecâ ta je perofeta a bán.

13 Öbun ang sâltiny hmeledrany, ke a ne ba but hinyin sâlt, me adre ma kâmâu he ka öhinyâ hmetu e? e ca so hmetu bi, ke so bi he ka degec me uto ju ge at. 14 Öbun e melaminy hmeledrany. E ca khana he ka iyong taun adre ip hon bucen. 15 Ke adre me ca vâc lamepa he ka ip hmelen kumete, ke so bi ethö hon taben ; me ame omelamâ tavat hia eiö hnyin uma. 16 Helâ ju e öbun, omelamâ thö melamibun hnyi hnyimakan tavat, m' adre me wâ anyibun ta je huliwa ae so, m' adre me he ka ogânâ Kamöbun ethö hnyi drany.

17 Ca he öbun ka únykûme a oge me o but he ka ohia hnanyibu me ta je perofeta : oge me ca o but he ka ohia, ke so bi he ka ohwâdá. 18 Anyin ae hnathu inya oge me ha köbun, a g' ame ca he bi ka hia ke iota, ame ne ke ong únyi ae úhnyúkong hmönyin únyi hnyi hnanyibu, ke ne o but ame

he ka hia drany me hmeledrany, me me he ka hwâdá ta je únyi hia thibut. 19 Anyin a wale, haba at ame he ka hanyâúâ khaca hnyi ta je hnanyibu eang ae úhnyúkong hmönyin, k' ame ná tavat he ka helâe, me adre me he ka ha öühnyúkongo e hnyi dökhu dokhon drany : ke haba at ame he ka vheno me ná, me adre me he ka ogânâ e hnyi dökhu dokhon drany. 20 Anyin a inya oge me ha köbun, ka habe, A ne ca nua bi hwakecibun ae wisa hon hwakecin ae wisa ge tavat sihnalimen me je Faresaio. öbun e ca he bi ka didrö ka hnyi dokhon drany.

21 Öbun e hia but löng hnödra hna ha kâú adrem, ka habe, Ca he ka úhlingö ; anyin a haba at ame úhlingö me úcú he ka owisa e : 22 ke inya oge me ha köbun, ka habe, haba at ame hmönyin ka liamekeiny mē ke ba can, me úcú he ka owisa e ; ke haba at ame he ka ha ka liamekeiny mē, ka habe, Raka, e úcú he ka hno e hnen tavat úhnenamö ; ke haba at ame he ka ha. ka habe, Mori, me úcú kâu meicin gena. 23 Anyin a wale u je ne hom ânyâm bwihlany ka hnyi taben hut, ke u ka únykûme eling ae hu únyi ae vec gam^l ka liamekeiny möu, 24 mē ip ju ânyâm bwihlany ciö taben hut, ke mē he thö, ke bâm he ka úsoköu me liamekeiny möu, me u hap he but jem ka hudo ânyâm bwihlany. 25 Logotö úsoköu me iwahnaihmiöny möu, u ka tiga tha u me hnyi gethen, wâ e nye hni u but iwahnaihmiöny möu ka at owisa, ke at owisa ame hnö u but ka at tue, me e ame khüö u thö ka hnyi uma ce at. 26 E hnathu inya oge me ha köu, u me ca he ka didrut úheny e, ke ne o but u je mē ham hwaban hia ke ne o but je ong mone ae úhnyúkong.

27 Öbun e hia but löng hnödra hna ha ehac, ka habe, U ca he ka venâu áiân ke at : 28 ke inya bi oge me ha köbun, ka habe, haba at ame wâ hmâ áiân ke at me behnyekon e, me a hia but bi únyi monu mē eü hnyi hnyekon. 29 Ke a ne bi jönâm emâkâm a metâm, úâ degecâ thö e : anyin ae so köu he ka hia ke outh unyâm, ke kong bi he ka khûâ hia unyâm hnyi gena. 30 Ke a ne bi jönâm hnyamâm a metâm, subâ degecâ but e : anyin ae so köu he ka hia ke ong outh unyâm, ke kong bi he ka khûâ hia unyâm hnyi gena. 31 Adre me ha minya ehac, ka habe, Haba at ame degec áiân, e so e ame he ka ham tusiny thang hna faipoipo : 32 ke inya bi oge me

ha köbun, ka habe, haba at ame degec áiân, k' ame ca bi únyi monu, me e ame kunâ e he ka bi únyi monu; k' ame bi únyi monu minya at ame hom momo e adre degec.

33 Ke haba khaca, öbun e hia but löng a g' adre ha ködra kâú adrem, ka habe, U me ca he ka khemanyin thoi, ke hamâm he ka thamûa ka Than hnâm hna khemanyin: 34 ke inya bi oge me ha köbun, ka habe, Ca khemanyin bi he ka ha ge drany, anyin a theron e anyin Khong; 35 ke helâe minya ge hmeledrany, anyin a taben e li hnyeúcân; ke helâe minya ge Jerusalema, anyin a hanyaban e Than ae gan hmâ. 36 Ke ca he minya ka khemanyin me ha ge bâm, anyin ae ca khanö u he ka ohawâ me ohlitâ ke leünen bâm a khaca. 37 Ke so e helâng ifucibun, ka habe, E, e; e ba, e ba: anyin a únyi hnyi monu he ka bi hanen hon e.

38 Öbun e hia but löng hnödra hna ha, ka habe, Ecmak hwaban ecmak, ke nyu hwaban nyu: 39 ke inya oge me ha köbun, ka habe, Ca hagutâ at ae kong; ke haba at ame khaú wahicâm a metâm, mē wia minya thö ke keihen kâú. 40 Ke a ne ke at ame beivinö möu hnyi úhnei, k' ame hûgûnâ ányâm úkhaú, mē ham minya but kâú ányâm úkot. 41 Ke a ne ke at ame újöngi u he ka tha he mē hnyi ke mael, mē tha he thö mē ke ne o but hnyi lö. 42 Ham but ka at ame sumató u, ke ca hotom bi ka at ame mē sumató únyi gam.

43 Öbun e hia but löng a g' adre me ha, ka habe, Betenge ju ge at ae hakekenyi u, ke ikiki thö ka iwahnaihmiöny möu: 44 ke oge me ha bi nya köbun, ka habe, Betenge ju ge je iwahnaihmiöny möbun, ke hic ju hobi kâú tavat adre me oveci öbun; 45 m' öbun e he bi ka lakon Kamöbun ethö hnyi drany: anyin a e ame oâ anyin seúnö hon tavat ae kong me tavat ae so, k' ame kunâ we ka tavat ae wisa me tavat ae ca wisa bi. 46 Anyin öbun e ne betenge ge tavat adre me betenge gabun, me, ieú hwaban köbun? hawa, a ca ányâ helâe ta je telona? 47 Ke öbun e ne italofa me je liamekeiny möbun thibi, me ieú ke únyi ae beónua hnyi hnöbun hna ányâ? hawa a ca ányâ helâe ta je Aten ke je hnyei. 48 Anyin a wale hamöbun he ka wisa helâ me iwisainy Kamöbun ethö hnyi drany.

HNYIMAKAN 6.

WÂ eâu, ke ca he ka ányâ hwakecibun ae wisa hnyi hnyimakan tavat hnân bi wânödra: wâ e nye ba but hwaböbun únyi ge Kamöbun ethö hnyi drany.

2 Anyin a wale u ka he ka ham ta je betenge, ca túâ khoto hnyi hnyimákâm, helâ me man tavat thoi hnyok hnyi je sunago me ta je gethen, me me he ka haisoi ödra hnen tavat. E hnathu inya oge me ha köbun, adre hia but kap hwabödra. 3 Ke u ka he bi ka ham ányâm betenge, e so e ca he hanyamâm a mem ka wâ únyi ame mádrâ hanyamâm a metâm: 4 me me iyong hnâm hna ham betenge: me haba Kâmâm at ame wâ hnyi dok ae iyong ame he ka bi hwaban köu.

5 Ke öbun ka he ka hic, e so öbun e ca helâ me tavat thoi hnyok: anyin e senem ködra he ka tot me hic hnyi ta je sunago me vheden ta je gethen, me me haisoi ödra hnen tavat. E hnathu inya oge me ha köbun, adre hia but kap hwabödra. 6 Ke haba u, u ka he áu ka hic, didrut ka hnyi hnyeulem, eiö hnyin uma, ke u ka hia but hlöng hwanuma, hic ju ka Kâmâm hnyi dok ae iyong, ke ame he Kâmâm at ame wâ hnyi dok ae iyong ka bi hwaban köu. 7 Ke öbun ka he ka hic ca labö ha thiju ke hofuc a khaca, helâ me hna ányâ hnen Aten ke je hnyei: anyin adre me únykúme a g' adre me he ka ling ödra únyi ge hnödra hna osehia ha. 8 Anyin a wale, ca he öbun ka helâ mödra: anyin ae khana bi Kamöbun ta je únyi öbun e weny hnyi ñen a öbun tiga ca sumâtâ kâú. 9 Waleling, m' öbun e he ka hic helâng, ka habe, Kamöhmun lö, ethö hnyi drany, E so e kap iâm. 10 E so e o but dokhom dokhu. E so adre me ányâ wem eang hmeledrany e me úcú me ethö hnyi drany. 11 Ham but köhmun hnyi bong ang jeú ae úcú köhmun. 12 Thang ut ta je monu gahmun, helâ me hnöhmun hna thang ut ta je monu gadra adre me okongu öhmun. 13 Ca hum öhmun ka hnyi úcúbic, ke so bi hûgûn' öhmun dut únyi hnyi hulö. 14 Anyin a öbun e ne thang ut ge tavat hnödra je hna hanyâúâ me ame he Kamöbun ethö hnyi drany ka thang hnöbun hna hanyâúâ. 15 Ke öbun e ne ca thang ut ge tavat hnödra je hna hanyâúâ, me ame ca he bi Kamöbun ethö hnyi drany ka thang ut hnöbun je hna hanyâúâ.

MATAIO 7.

16 Ke haba khaca, öbun ka he ka ányâ ca han, ca helâ bi me man tavat thoi hnyok ae hmak hnyimaködra: anyin adre me okongoâ je hnyimaködra me me manen dut ka tavat a adre me ca han. E hnathu inya oge me ha köbun, ka habe, Adre hia but kap hwabödra. 17 Ke haba u, u ka he ka ányâ ca han, hneü but bâm, ke ányâwia hnyimákâm; 18 me me ca manen ka at a u me ca han, ke so bi ka Kâmâm hnyi dok ae iyong: me ame he Kâmâm, at ame wâ hnyi dok ae iyong, ka bi hwaban köu.

19 Ca ip hobi köbun tang omjeü eang hmeledrany, ae hu nokon walelaba me viiny he ka ohia, wale dok ae hu at venöu hnyin adre me he ka kia me venâu: 20 ke so bi ip ju hobi köbun tang omjeü ethö hnyi drany, dok ae ba nokon walelaba me viiny he ka an, ke ba minya at venöu ame he ka kia me venâu: 21 anyin a haba dok ame mokut hnyin tang omjehem, me ame he ka e bi minya hnyekom. 22 Haba ecmak, me lamepainty unyin: anyin a wale a ne bwele emákâm, me ame he bi ka tha melam, hia unyâm. 23 Ke e ka kong emákâm, me ame he ka tha menekholom hia but unyâm. Anyin a wale, e ka lit ut melam gam, shaiba ge kahmën menekholom eling! 24 E ba at ae khana he ka athnyabainy li tuhan a lo: anyin a e ame he ka húkotiâ khaca me weny khaca; k' ame ne he ka kece ka khaca me hociâ khaca. E ca khan' öbun he ka bi athnyabainy Khong me mamona. 25 Anyin a wale, inya oge me ha köbun, ka habe, Ca únykúme újengöâ hnân hobi kâu anyibun möt, wale ge hnöbun hna he ka han me ic; ke unyibun, wale ge hnöbun hna he ka khavâ. Hawa, e ca beönua möt hon jeü, me unyin hon úkhaü? 26 Únykúme ju omeno ame gâ ethö, adre me ca hnyi belök me menu, me ip jeü hnyi je omhani; k' ame ha ö'dra Kamöbun ethö hnyi drany. Hawa, öbun ca únyi hnathu hudrin? 27 Ke ie at gabun ame únykúme újengöâ ae khana he ka bi hanen kubit a khaca ka hnyi iheüen? 28 Ke ieü gabun öbun e únykúme újengöâ ka hnyi úkhaü? Únykúme ju úkúen ta je ibedila; wale a ca hnyi huliwa me amo: 29 ke so bi inya oge me ha köbun a haba Solomona hnyi anyin hmanenang hia ame ca theibâ bi helâe. 30 Ke a ne khavâ Khong hnyot helâe a e hnyi bong ang, ke nyi adre me he ka khúâ but ka hnyi wahnainyâ, hawa, e ca únyi hnathu kâu he ka khaü' öbun, öbun hnyat a labageju úhnyúkong? 31 Anyin a wale

ca únykúme bi me ha, ka habe, Ieü ate me he ka an? ke, Ieü ate me he ka ijem? ke, Ieü ate me he ka khavâ? 32 Anyin ame elâm hnen Aten ke je hnyei ta je únyi e; ke e khana Kamöbun ethö hnyi drany ae úcü köbun ta je únyi e. 33 Ke böbun he ka elâm dokhon dökhü, me hwakecin ae wisa; ke adre me he minya ka ham köbun ta je únyi e. 34 Anyin a wale ca únykúme újengöâ bi ge bong nyi: anyin a hamen bong nyi he ka únykúme gan bi. E úcü thibi bong me anyin monu.

HNyimakan 7.

CA únykúme hwalö, m' adre me ca únykúme hwali öbun bi. 2 Anyin a haba tulutiny hnöbun hna únykúme hwalö, adre me he ka únykúme hwali öbun bi: helâe minya adre me he ka tulut köbun hoton hnöbun hna tuluto. 3 Ke ieü gam u me wâhmakhmeto atmen hnyin emakan liamekeiny möu, ke u me ca únykúme udâ eü hnyin emákâm bi? 4 Ke u me he ka kâmâu ka ha ka liamekeiny möu, ka habe, Hnö nya thö he ka hom but atmen únyi hnyin emákâm; ke wâ bi, wale udâ hnyin emákâm bi? 5 U at thoi hnyok, bâm ka oc udâ únyi hnyi emákâm bi; me u me he ka wâ wia he ka hom atmen únyi hnyi hnyin emakan liamekeiny möu.

6 Ca ham únyi ae kap ka ta je kuli, ke ca khúâ anyibun ta je penina ka hnyi hnyimakan ta je buaka, wâ ödrin nye uto but ge je cadrin, ke hwiö me ki' öbun.

7 Sumâtâ thö, m' adre me he ka ham köbun; elâm dö, me öbun e he ka wâ thö; seseto thö, m' adre me he ka khöng ut köbun: 8 anyin ame he ka hu ka tavat hia adre me sumâtâ; k' ame wâ hnen at ame elâm; k' adre me khöng ka at ame seseto. 9 Ke ie at gabun ae hu nokon ame sumâtâ areto, me ame he ka ham kâu veto: 10 ke a ne sumâtâ wâ me ame he ka ham bi kâu on? 11 Anyin a wale, a ne mabun, öbun tavat ae monu, he ka wâhmakhmeto hna he ka ham ta je únyi ae so ka lakubun, awe, ame ca ti he bi Kamöbun ethö hnyi drany ka ham ta je únyi ae so ka tavat adre me sumâtâ e. 12 Anyin a wale, haba ta je únyi öbun e weny e me he tavat ka ányâ köbun, ányâ thö e ködra: anyin a wale hnanyibu me ta je perofeta.

13 Didrö ka hnyi homagöüle ae hnek: anyin ae gan homagöüle, me lau but gethen ka hnyi hnaúhangö, ke ödra se hia tavat

MATAIO 8.

adre me dit hnyin. 14 Ke hnek homagöule ke úhnyükong gethen ka hnyi möt, ke wakhalet thibi tavat adre me wâ e.

15 O 'bun âu ge ta je perofeta thoi, adre me o but köbun, k' adre me khavâ je úkhaúiny mamoe, ke eú hnyi hnyidrin je luko ae úhûlú hmönyin. 16 Öbun e he ka wâhmakhmetu ödrin ge anyidrin ta je wan. Hawa, adre me tau wan vine hnyi iwadekong, me je wan meta hnyi iwataföcö? 17 Ke helâe, haba ta je úö ae so, ame wa so; ke haba ta je úö ae kong ame wa kong. 18 E ca khana úö ae so he ka wa kong, ke ca khana úö ae kong he ka wa so. 19 Haba ta je úö hia ame wa kong, me adre me he ka sö degecâ, me khûâ but ka hnyi meic. 20 Wale, me öbun e he ka wâhmakhmetu ödra ge anyidra ta je wan. 21 Adre me ca he ka dit hia ka hnyi homagöuleny drany hnyat adre me ha kõnya, ka habe, Taböny Than lö, Tabon Than lö; ke so thibi at ame ânyâ weny Kamök ethö hnyi drany. 22 At se hia adre me he ka ha kõnya hnyi bong eling, ka habe, Taböny Than lö, Taböny Than lö, hawa, öhmun e ca hnyi perofeta hnyi iâm, me obâ ta je demoni hnyi iâm, ke se hia ta je huliwa ae man öhmun e ânyâ hnyi iâm? 23 Ke oge me he ka ha ködra, ka habe, E ca khanö nya öbun: úsâkaúö but mönya, öbun tavat öbun e ânyâ hulö. 24 Anyin a wale haba at ame löng hok ta je hofuc ang, me mâdrâ, oge me he ka öúco e me at ae metâ, wale at ame otilâ umen uma hon kic: 25 me ame ta but we, me ame o but di, me hwege but ang, me kot uma e; ke ame ca ü bi: anyin a taben kic. 26 Ke haba at ame löng hok ta je hofuc ang, ke ame ca mâdrâ bi, me adre me he ka öúco e me at ae monu, wale at ame otilâ umen uma hon öny: 27 ke ame ta but we, me o but di, ke hwege but ang, me kot uma e; me ame ü but: ke gan hmâ útainy uma e.

28 Ke ame um dö ta je hofuc e ho Iesu, me ame lâiâ gan hmâ tavat ae se hia hnen hna úne: 29 anyin a e ame n' ödra helâ me at ae man, ke ca helâ bi me tavat sibnalimen.

HNyIMAKAN 8.

KE e ame ölö but úheny hon bucen, me haba tavat ae se hia adre me he hoton. 2 Me wâ bi, ame o but kâu ke lepera me khudrung ju kâu, me ha, ka habe, Taböny Than lö, u je ne bewem, me

khatö u he ka osoi nya. 3 Me e ame inâ but hnyamen me kâlâ, me ha; ka habe, E bewek; u je so but. Me ame ie hia but hnân lepera. 4 Ke haba Iesu ame ha kâu, ka habe, Wâ eâu, ca ha ka ke at; ke he thö, omanenö u bi ka at bihut, me ham bwihlany a húna Mose, hnân haten ohnathoâ ködrin.

5 Ke ame o but Iesu ka hnyi Kapere-nauma, me ame o but kâu ke keneturio me khöü kâu, 6 me ha, ka habe, Taböny Than, haba athnyabaik ame mokulec mok a mat eiö hnyin uma, ke vec gan hmâ. 7 Ke e ame ha kâu, ka habe, Oge ma he, ka osoâ e. 8 Haba keneturio ame thu me ha kâu, ka habe, Taböny Than, iny ca úcû m' u me he ka dit ka hnyi umök uma: ke so bi u me he ka ha thibi ke hofuc, me me he ka möt ut athnyabaik. 9 Anyin a inya bi at ame löng musu, ke e hu gak ta je soja: ke inya oge me ha ka ke at, He thö, me, e ame he; me ka ke at, Aiö u, me, e ame he kõnya; me ka athnyabaik, Ânyâ thö e, me, e ame ânyâ. 10 A löng ut Iesu, me e ame lâiâ, me ha ka tavat adre me he hoton, ka habe, E hnathu, inya oge me ha köbun, inya oge me ca wâ hnyi Isaraela labageju ae gan a helâe. 11 Ke inya oge me ha köbun, ka habe, E se hia tavat adre me he ka he úhedra jimeyö me jimeú he ka tha laba me Aberahama, me Isaaka, me Jakob, hnyi dökhü hnyi drany: 12 ke haba lakon dökhü, me adre me he ka ob' ödra ka hnyi menekholom hnyöu ai: k' adre me he ka tenge sesebila eling me úgiö ga nyudra. 13 Ke haba Iesu ame ha ka keneturio, ka habe, He thö, ke adre me he ka ânyâ hobi köu e úcû me ânyâm labageju. Me ame so but athnyabainy hnyi úen cici eling.

14 Ke ame o thö Iesu ka hnyi uma umö Peteru, k' ame wâ hinyen áiân ame mokulec mok ae kahwa. 15 Me e ame kâlâ hnyamen momo, me ame hia but kahwa; me ame todrö momo, k' ame bi huliwa kâu. 16 Ke hnyi sahac ödrin e hom kâu tavat ae se hia a dilic ödra demoni: me e ame obâ je hanu ge hwan hofuc, me osoâ ta je mok hia: 17 me me hwâdâ hna ha hnö Isaia perofeta, ka habe, E ame ka hom hnöta ta je sényin, k' ame vaden ta je mekita.

18 Ke haba Iesu ame wâ tavat ae se hia igigilö e, me e ame úkhúnöng he ka he ka hnyi ke keihen. 19 Ke ame he ke at sibnalimen, me ha kâu, ka habe, At Úne lö, oge me he ka he hotom ka hnyi dok u

me he ka he ka hnyin. 20 Ke haba Iesu ame ha kâu, ka habe, Haba ta je alope, me hu hnödra hnyi kânâ, ke haba ta je meno ame ga ethö, me hu haüödra; ke haba bi Nokon at, me ba hnân omokulec ban hnyin. 21 Ke haba ke aten ame ha kâu, ka habe, Taböny Than, me hnö nya but m' inye bök ka kônim cica. 22 Ke haba Iesu ame ha kâu, ka habe, He hotuk, ke hamen ta je komok he ka kônâm ta je kokidrin.

23 Ke e ame ölö ka hnyi hon galu, me haba laten adre me he hoton. 24 Ke wâ bi ame o but bouidet ae gan eü hnyi köiö, k' ame khutu takoú but hu hnen köiö: ke e ame mokut. 25 Me ödrin e he me bwe-bwelâ e, me ha, ka habe, Taböny Than lö, omeli ötin dö; ötin e he but ang ka mok. 26 Me e ame ha ködrin, ka habe, Ieü gabun öbun e ot hnyat labageju úhnyú-kong? Me e ame todrö, me thawâ ang me köiö; me ame ta but hau ae gan hmâ. 27 Haba tavat ödrin e lâiâ me ha, ka habe, Ehö at ang, ame löng kâu köiö me ang?

28 Ke e ame khöp dö hnyi ke keihen, hnyi hnyei iny at Gadara, me ame úkhanö mē li at a dilic ödru demoni, ödru me he úhedru hnyi je erkemok, ödru ti hwege monu, wale, me me ha at ame vheno gethen eling. 29 Ke wâ bi ödru me kuku göra-nyai, me ha, ka habe, Ieü gam köhmu Iesu a Nokon Khong? u je o but ang he ka oveci öhmu, ke tiga ca úen bi? 30 Ke eling e sâkâú gadrin hna hat buaka ae se hia adre me han tot. 31 Haba je demoni adre me khöü kâu, me ha, ka habe, U je ne he ka ob' öhmun, ö u hn' öhmun dut he ka delec hna hat buaka. 32 Ke e ame ha ködrin, ka habe, He th' öbun. Ke ödrin e dit ut, me delec hna hat buaka: ke wâ bi, haba hna hat buaka hia thithö adre me wadring ut jime thö ban hwatapkölu ka hnyi köiö, me adre me mokcu. 33 Ke ame kec dö hnyat ödrin e tuö me he ka hnyi taun, me úthumetu ge ta je únyi hia, me hna ányâ ka li at a dilic ödru demoni. 34 Me wâ bi, ame he but aten taun hia thithö he ka iouny me Iesu: ke adre me wâ ju, me adre me khöü kâu he ka hna but je hnyigöulödra.

HNYIMAKAN 9.

KE e ame ölö ka hnyi galu me he nulâ but, ame o thö ka hnyi iny hnyei. 2 Ke wâ bi, adre me sam but kâu at ae mat ame mokut hon hnen: ke haba Iesu

ame wâ anyidrin labageju me e ame ha ka at ae mat, ka habe, Nöhuk, senyin dö; adre hia but hna degecâ ta je hulö gam. 3 Ke wâ bi, keihen hnyat sihnalimen, adre me ha eü hnyi je hnyekudra, ka habe E bi gan dut at ang ka Khong. 4 Ke haba Iesu ame wâhmakhmeto je únykúmenödrin me e ame ha, ka habe, Ieü gabun öbun e únykúme mono eü hnyi je hnyekubun? 5 Anyin a ieü ae háhâ, he ka ha, Adre hia but thang ta je hulö gam; a me ne he ka ha ka habe, Todrö me he thö? 6 Ke so bi möbun e he ka wâ ae tren man Nokon at eang hmeledrany he ka thang ta je hulö (me e ame ha ka at ae mat, ka habe) Todrö, hom minya thö hnâm me he thö ka hnyi umâm uma. 7 Me e ame todrö me he ka hnyi umen uma. 8 Ke ame wâ e hnen tavat ae se hia, me adre me lâiâ me ogânâ Khong, wale at ame ham man a helâe ka ta.

9 Ke haba Iesu ame he úheny e, me e ame wâ at ame laba hnyi dok adre bi fat hnyin, Mataio ien: me e ame ha kâu, ka habe, He hotuk. Me e ame todrö me he hoton.

10 Ke e ame laba eiö hnyin uma, ke wâ bi, ame he but ta je telona ae se me tavat ae kong he ka tha laba me Iesu me laten. 11 Ke haba ta je Faresaio ödrin e wâ, me ödrin e ha ka laten, ka habe, Ieü ge At úne köbun ame tha han me ta je telona me tavat ae kong? 12 Ke a löng ut Iesu, me e ame ha ködrin, ka habe, E ca únyi hnathu at ae tren bubuny ka tavat ae hwege, ke so bi ka tavat a ödra mok. 13 Ke he th' öbun ka nâ bongon ang, ka habe, Wek a ibetengiö, ke ca hut bi: anyin oge me ca o he ka hawâ tavat ae wisa ke so bi tavat ae kong.

14 Me ame o but kâu latö Ioane, ödrin e ha kâu, ka habe, Ieü ang a öhmun osehia but me ta je Faresaio labö ányâ ca han, k' ame ca hnyi ányâ ca han látâm. 15 Ke haba Iesu ame ha ködrin, ka habe, Hawa, e khana lahanen at a tep faipoipo he ka tenge, e ka tiga e unyidrin at a tep faipoipo? ke ame he ka o je bong me adre me he ka hom dö gadrin at a tep faipoipo, me wale úen ödrin e he ka ányâ hnyin ca han. 16 E ba at ame útibetkôuâ ecmano ae hât ka hnyi úkhaú ae bobot ut; anyin a haba ecmano hnân okhötâ ame okongoâ úkhaú me ame gan hmâ but mou. 17 Ke adre me ca he minya ka hingâlâ waina a teb únyi ka hnyi je kaia a unen menö a únyi

MATAIO 10.

but adrem: wâ e nye hmouca but ta je kaia, me hingölö but waina, me kong ut je kaia a unen meno: ke adre me hingälâ waina a teb únyi ka hnyi je unen meno ae hát, me ame tha so hia but.

18 E ame tiga ha ta je únyi eling ködrin, me wâ bi, ame o but ke at ae tren musi, me khudrung ju kâu, me ha, ka habe, a mokcu nöku hlu walang ang: ke mē aiö u he ka ip hnyamâm hon, me me mödrut. 19 Haba Iesu ame todrö me he hoton, me laten minya. 20 Me wâ bi, ke momo ame ka hingölö dra hnyi twelv ta je huna ame he hnyi hotu Jesu me kâlâ obiny úkhaüen: 21 anyin a e ame ha eú hnyi hnyekon, ka habe, Oge ne he thibi ka kâlâ úkhaüen, me oge me he ka möt. 22 Haba Iesu ame hwiö thö me wâ momo, me ha, ka habe, Nöku lö, senyin dö, u je mödrut hnen ânyâm labageju. Ke ame modrut momo hnyi üen eling. 23 Ke ame o but Iesu ka hnyi uma umen at musi, me wâ hnyat ödrin e túö köwi, me tavat ae se adre me mede, 24 me e ame ha ködrin, ka habe, Vese but öbun: a ca mok bi hlu, e ame mokut. Me adre me hlumä e. 25 Ke a hia but obâ tavat a ödra se hia, me e ame didrö me kât hnyamen; me ame todrö hlu. 26 Ke ame lung igigilö hnyi hnyeï hia eling únyi e.

27 Ke haba Iesu ame he úheny e, me ame he hoton li at ae wadröu, ödrü me hongot, ka habe, Nöku Davita lö, betenge gahmu. 28 Ke e ame didrö ka hnyi uma, me ame he but kâu li wadröu: ke haba Iesu ame ha ködrü, ka habe, Hawa, öbu me únykúme me e khañö nya he ka ânyâ e? Ke ödrü me ha kâu, ka habe, E, Than. 29 Me e ame kâlâ li emaködrü, me ha, ka habe, Ame he ka e bi köbu helâ me hnöbu hna labageju. 30 Me ame bwela but li emaködrü. Ke haba Iesu ame húna hwegiâ ködrü, ka habe, Wâ eâu, e nye khana thö ke at. 31 Ke ödrü me didrut me ha olungâ e hnyi hnyeï hia eling.

32 Ke ödrü me tiga didrut, wâ bi adre me hom kâu ke at ae hum a delec demoni. 33 Ke a hia but obâ demoni me ame fuc dö hum: haba tavat ae se hia adre me lâiâ me ha, ka habe, Adre me ca wâ balua ehac helâe hnyi Isaraela. 34 Ke haingen ta je Fâresaio, ka habe, E ame obâ ta je demoni únyi ge tuhan ta je demoni.

35 Ke haba Iesu ame vhenö ta je taun me ta je hnyaba hia, ame úne hnyi umödra ta je sunago, me khetâ úthumetuiny döku

ae so, me osoâ ta je mok hia, me ta je sēnyin hia. 36 Ke e ame wâ tavat ae se hia, me e ame betenge gadra, anyin a ödra sēnyin dut, adre me ve se but, helâ me ta je mamoe e ba at ame tuö. 37 Me e ame ha ka laten, ka habe, E gan hmâ widrany, ke wakhalet thibi tavat huliwan. 38 Anyin a wale he th' öbun ka khöü ka Thaniny widrany me me he ka kunâ tavat huliwa ka hnyi anyin widrany.

HNYIMAKAN 10.

KE e ame hawâ laten a twelv, me e ame ham ködrin musi hon ta je hanu ae kong, he ka ob' ödra, ke he ka osoâ ta je mok hia, me ta je sēnyin hia.

2 Ke walang ien ta je aposetolo a twelv, ka habe, A bö Simona, ke ien minya Peteru, ke Anederea liamekeiny mē, ke Iakobo nöku Zebedaio, ke Ioane liamekeiny mē; 3 ke Filipino, ke Batolomaio, ke Toma, ke Mataio a telona, ke Iakobo nöku Alefaio, ke Thadaio, 4 ke Simona at Kanana, ke Juda Isakariota, at ame alecuâ e. 5 Wale hnyat a twelv a kun' ödrin Iesu me húna ködrin, ka habe,

Ca he öbun hnyi gethen deny Aten ta je hnyeï, ke ca dit bi ka hnyi ke taun anyin at Samaria: 6 ke so bi, he th' öbun ka ta je mamoe a hia hanen lap anyi Isaraela. 7 Ke haba hnyi uhebun, khetâ thö me ha, ka habe, E hakekeny jut dokhon drany. 8 Omelö thö ta je mok, ke omelö hmetu thö tavat adre me mokcu, ke okhabalavâ but ta je lepera, ke obâ but ta je demoni: öbun e hia but kap baüâ but. 9 Ca hok gol, me sileva, me bras hnyi tangöbun je tangen mone; 10 me ong tang hobi kâu he ka he, me úsa lo úkot, me je tangen hnyeüca, me uci: anyin ae úcü at huliwa he ka kap jeü. 11 Haba ta je taun me ta je hnyaba öbun e he ka o ka hnyin, elelâm dö at ae úcü hwakecin; ke laba ju e ke ne o but öbun e he úheny e. 12 Ke öbun ka didrö ka hnyi ke uma, italofa ju mödra. 13 Ke a ne so uma eling, e so e ame ta but hon, hnöbun hna ha hnahicâ e: ke a ne ca so bi, e so he ka hmetu köbun hnöbun hna ha hnahicâ. 14 Ke kaba at ame ca köp öbun, k' ame ca löng hobun ta je hofuc, awe, öbun ka didrut únyi hnyin uma eling ame ne taun, jijingâ but kânâiny je hnyeücabun. 15 E hnathu, inya oge me ha köbun, ka habe, Ame he ka hâhâ ka hnyeï Sodoma me Gomora hnyi bong owisa hon taun eling.

MATAIO 11.

16 Wâ bi, inya oge me kun' öbun helâ me ta je mamoe hnyi wanben ta je luko: anyin a wale metâ but öbun helâ me ta je on, me menyik helâ me ta je biny. 17 Ke wâ eâu tavat: anyin adre me he ka hn' öbun dut ka tavat ûhnei, ke adre me he ka kuc öbun hnyi umödra ta je sunago; 18 eke, adre me he ka lili öbun ka hnyi hnyimakan tavat musi me ta je than can inya, hnân ohnathoâ ködrin me Aten ta je hnyeï. 19 Ke ödrin ka he ka hn' öbun dut, ca ûnykûme bi, ka habe, adre me he ka kâmâu hna ha, ke ieû: anyin adre me he ka ham köbun ûnyi hnân he ka ha hnyi ûen eling. 20 Anyin a ca öbun hnyat öbun e ka ha, ke so bi Hanon Kamöbun at ame fuc eû hnyi je hnyekubun. 21 Ame he keiny ka hna liamekeiny mē ka mok, ke helâe minya kamen ka nokon: k' ame he lakon ka tot ka kamödrin me hinyödrin, m' adre me he ka hling' ödru. 22 Ke ame he tavat hia thithö ka hûkötö köbun can iök: ke haba at ame he ka hokhnyok ke ne o but hnyi obiny, me ame he ka möt. 23 Ke ödra ka oveci öbun hnyi ke taun, kec dö ka hnyi ke taun: anyin ae hnathu inya oge me ha köbun, ka habe, Öbun e ca he ka vheno hia ta je taun hnyi Isaraela, ke ne o but ame o thö Nokon at.

24 E ca beönua at adre nâ hon at ûne, ke ca beönua athnyabainy hon tuhan. 25 E so ka at adre nâ ame ne tha ûcû me at ame nâ e, ke e ka tha ûcû hlu me tuhan. Adre ne hia but hawâ at ae tren hnyaba, ka habe, Belezebuba, hawa, adre me ca he minya ka hawâ ien aten hnyaban! 26 Anyin a wale, ca ot bi gadra: anyin ae ba ûnyi adre me ikhâlâ ame ca he ka manen; ke ba minya ûnyi ae iyong adre me ca he ka wâ. 27 Haba ûnyi oge me ha köbun hnyi menekholom, ha th' öbun hnyi melam: ke haba hnöbun hna löng ge je hnyikönyöbun, khetâ thö hon ban je uma. 28 Ke ca ot bi ge tavat adre me hlingâ unyin, ke ca khan' ödra bi he ka hlingâ hanu: ke so he ka outen at ae khana he ka öhnaûhangöâ unyin me hanu hnyi gena. 29 Hawa, adre ca ûco li wahelö hwaban asari? ke ba at gadru ame he ka kölu ka hnyi hon kânâ, e ka ca musi bi Kamöbun: 30 ke adre hia but aû hia je leünen böbun. 31 Anyin a wale, ca he öbun ka ot, anyin a öbun beönua hon ta je wahelö ae se hia. 32 Anyin a wale, haba at ame he ka haiö nya hnyi hnyimakan tavat, me oge me he bi nya ka háiâ e

hnyi hnyimakan Kamök ethö hnyi drany. 33 Ke haba at ame he ka ivinö nya hnyi hnyimakan tavat, me oge me he bi nya ka ivinöâ e hnyi hnyimakan Kamök ethö hnyi drany.

34 Ca ûnykûme bi öbun, ka habe, oge me o but he ka kunâ úsoköu ka hnyi hmeledrany: oge me ca o but he ka kunâ úsoköu, ke so bi hele vat. 35 Anyin oge me o but me me he ka imouköu nokon me kamen, ke hlu me hinyen, ke úngon me úngon: 36 ke haba ta je iwahnaihmiöny me at, me ame he ka e bi hnyi hnyaban. 37 Haba at ame betenge ka kamen me hinyen huk, me ca úcû könya; ke haba at ame betenge ka nokon бага me nokon hlu huk, me ca úcû könya. 38 Ke haba at ame ca hom bi anyin satauro me he hotuk, me ca úcû könya. 39 Haba at ame wâ anyin möt, me ame he ka ohia e; ke haba at ame ohia anyin möt can inya, me ame he ka wâ e.

40 Haba at ame köp öbun, me ame köp nya minya, ke haba at ame köp nya, me ame kap at a kunö nya. 41 Haba at ame kap perofeta hnyi ien perofeta, me ame he ka hu kâu hwaban perofeta; ke haba at ame kap at ae so hwakecin hnyi ien at ae so hwakecin, me ame he ka hu hwaban at ae so hwakecin. 42 Ke haba at ame he ka habelen at ae ûhnyúkong eang ge utköiö ae katebu thibi, hnyi ien at úling, e hnathu inya oge me ha köbun, ka habe, ame ca he ka hia hwaban hobi kâu.

HNYIMAKAN 11.

KE a um dö Iesu húna ka laten a twelv, e ame he úheny e he ka úne me khetâ hnyi anyidra je taun.

2 Ke a löng ut Ioane hnyin uma ce at ta je huliwa anyin Keriso me e ame kuni li laten, 3 he ka ha kâu, ka habe, U but e At ame he ka o, hawa, öhmun e he ka lubahingen khaca? 4 Ke haba Iesu ame thu me ha ködru, ka habe, He th' öbu ka thumetu Ioane ge hnöbu hna löng me wâ: 5 a bwele but ta je wadröu ame he thö ta je mat, a khabalaû but ta je lepera, ame löng dö ta je wejiji, a möt hmetu thö tavat adre mokcu, ke adre me khetâ úthumetu ae so ka ta je theduoc. 6 Ke hnahic hnen' at ame ca he ka thö thö gak. 7 Ke ödru me tiga he, me Iesu ame hwân ka ha ka tavat ae se hia ga Ioane ka habe, Öbun e he but ka hnyi hnyebuba he ka wâ ieû? hlowe, ame

jijing ge ang? 8 Ke öbun e he but he ka wâ hmâ ieu? at ame khavâ ûkhaû ae menyik? Wâ bi, ödrin dö hnyin ta je uma umen je than hnyat, ödrin e khavâ ûkhaû ae menyik. 9 Ke ieu öbun e he kâu? he ka wâ perofeta? Eke, inya oge me ha köbun, ka habe, e beönua e hon perofeta.

10 E at eji adre sihnalimen, ka habe, Wâ bi, inya oge me kunâ anyik ûthu-metu he ka bân hnyi hnyimâkâm, Wale at ame he ka ânyâwia dem gethen hnyi hnyimâkâm.

11 E hnathu, inya oge me ha köbun, ka habe, Adre tiga ca oâ unyin tavat a hnokoâ hnen omomo ke at ae beönua hu Ioane Bapataiso : ke so bi, haba at ae ûhnyûkong hnyi dokhon drany ame beönua hon e. 12 Ke hwân hnyi ta je bong bongu Ioane Bapataiso ke ne o but walang ang, adre me ûhûgûnô dokhon drany, ke ame hûgûnâ e hnyat ae hwege. 13 Anyin a haba ta je perofeta hia me ta je hnanyibu, adre perofeta ke ne o but kö Ioane. 14 Ke a ne webun he ka kap, wale Elia, at ame he ka o. 15 Haba at ae hu hnyikönyen ka löng, löng ju e. 16 Ke oge me he ka oûco me ieu dö ang? E ûcü e me ta je wanakat adre me ulalabainy hnyi hna ûcü, me ûhnenamö me je lahanödra, 17 me ha, ka habe, Öhmun e hia but tuö köwi köbun, ke öbun e ca bibiâ bi, öhmun e hia but tenge köbun, ke öbun e ca sang betenge thö. 18 Anyin a o but Ioane me ame ca han me ic, ke haingödra, ka habe, E hu demoni gan. 19 Ke ame o but Nokon at, me ame han me ic, ke haingödra, ka habe, Wâ bi, at ae hwenhmiâ me beic waina, hanen ta je telona me tavat ae kong! Ke haba ûnyi hnân haisoâ metâ, me huliwainy.

20 Me e ame hwân ka haikongoâ ta je taun e ame ânyâ hnyin ta je huliwa ae man ae se hia, anyin adre me ca ietra bi. 21 Ekölö gam Korazin! ekölö gam Bethesaida! anyin adre ne ânyâ hnyi Turo me Sidona ta je huliwa ae man adre ânyâ unyibun, adre me ne hia but ietra me ecmano ae gan nân me hnabadröu. 22 Ke so bi, inya oge me ha köbun, ame he bi ka hâhâ ka Turo me Sidona hubun hnyi bong owisa. 23 Ke haba u Kaperenauma, hawa, adre me he ka ogoranyi u ka hnyi drany? adre me he bi ka ohnyikönö u ka hnyi Hedis : anyin adre ne hia but ânyâ hnyi Sodoma ta je huliwa ae man adre me ânyâ unyâm, ame ne he ka tethmâ ke ne o but hnyi bong ang. 24 Ke inya oge me ha köbun, ka habe, Ame he ka

hâhâ ka hnyi Sodoma hom bi hnyi bong owisa.

25 Hnyi ûen e Iesu ame thu me ha, ka habe, Inya oge me ole köu Cica, Tuhan drany me hmeledrany, anyin a û je ikhâlâ ta je ûnyi eang ge tavat ae metâ me tavat ae khana wia, ke u je omanenâ bi ka ta je mendreng : 26 eke, Cica lö, anyin ae ûcü e hnyi hnyimâkâm. 27 A hia but Cica ham könya ta je ûnyi hia : ke ba ke at ame wâhmakhmetoâ Nokon, ke Kamen thibi ; ke ba at ame wâhmakhmetoâ Kamen, ke Nokon thibi, me at minya ame weny Nokon he ka omanenâ kâu. 28 Ai öbun könya tavat hia thithö öbun e huliwa, me öbun tavat hije ûnyi ae hmak, me oge me he bi nya ka omên' öbun. 29 Kap ju anyik ûnyi hnân ûhûkâlâkôuâ hubun, me nâ thö ûnyi gak ; anyin a iny menyik ke hnyikânâ hnyok, me öbun e he ka wâ hna menâ hobi kâu ta je hanubun. 30 Anyin ae ca pason anyik hna ûhûkâlâkôuâ, ke hâhâ thö honök hok.

HNYIMAKAN 12.

HNYI ûen e, Iesu ame he hnyi hna belökâ hwit hnyi bong sabbath ; ke mekihnânem but laten, ke ödrin e hwân ka thu wan hwit me han. 2 Haba ta je Faresio adre me wâ, me adre me ha, ka habe, Wâ bi haba lâtam ödrin e ânyâ ûnyi ae ca ûcü he ka ânyâ hnyi sabbath. 3 Ke haingen ködrin, ka habe, Hawa, öbun e ca hnyi aû hna ânyâ hnö Davita ehac, waleji e ame mekihnânem me anyin bunyen ; 4 a g' ame didrö ka hnyi uma umen Khong, me an je areto hnân omanenâ, waleji ae ca ûcü kâu he ka an me anyin bunyen, ke so thibi tavat bihut? 5 Ke öbun e ca munyi aû minya hnyi hnanyibu, ge hnen tavat bihut hna ca okabâ sabbath hnyi hnyin uma kap, ke ödrin e ca kong bi? 6 Ke inya oge me ha köbun, ka habe, Wale bi ang At ae gan hon uma kap. 7 Ke a ne khan' öbun bongon hna ha, ka habe, Wek a ibetengiö ke ca hut bi, m' öbun e ca he ka haikongoâ tavat ae ca monu bi. 8 Anyin a Nokon at a tuhan sabbath.

9 Ke e ame he ûheny e, me e ame didrö ka hnyi umödrin sunago : 10 ke wâ bi, eling ke at ae meleca hnyamen. Me ödrin e hnö e me ha, ka habe, Hawa, e kap he ka ûhömeli hnyi sabbath? m' ödrin e he ka bifuco e. 11 Me e ame ha ködrin, ka habe, Ia gabun ae tren mamoe, a ne kölu but ka

MATAIO 12.

hnyi thop hnyi bong sabath, me ame ca he ka kât, me lelö hmetu e? 12 Ke hawa, e ca beönua at hon mamoe? Waleling me me so he ka mâdrâ so hnyi sabath. 13 Me e ame ha' ka at eji, ka habe, Lau but hnyamâm. Me e ame lau but; me ame so but helâ me khaca. 14 Ke ame didrut ta je Faresaio he ka úbnenamö gan, m' adre me he ka kâmâu he ka hlingâ. 15 Ke a wâhmakhmeto but Iesu, me e ame hna but dok e: ke ame he hoton tavat ae se; me e ame omeli ödra hia, 16 me thaw' ödra m' adre me ca he ka omanenâ e: 17 me me hwâdâ hna ha hnö Isaia perofeta, ka habe,

18 Wâ bi, athnyabaik oge me úca;

A oúnykumik, wale ame senyin kâu banuk:

Oge me he ka ip Hanuk hon,

Ke e ame he ka omanenâ wisa ka Aten ta je hnyei.

19 E ame ca he ka ivinö, me fuc göranyai; Ke ba at ame he ka löng ifucin eú hnyi je gethen.

20 E ame ca he ka thu hlowe ame ihnyong, Ke ame ca he ka ume waamo ame hlâ úhnyúkong

Ke ne o but e ame kunâ hna owisa he ka ton.

21 Ke ame he Aten ta je Hnyei ka geju ka hnyi ien.

22 Adre me hom but kâu ke at a delec demoni, ae wadröu, ke hum: me e ame osoâ e, me ame fuc dö at ae hum me bwela.

23 Haba tavat hia ae se adre me lâiâ gan hmâ me ha, ka habe, Hawa, nöku Davita at ang? 24 Haba at Faresaio adre me löng me adre me ha, ka habe, At ang ame ca obâ ta je demoni ke so bi únyi ga Belezebuba a tuhan ta je demoni. 25 Ke e ame wâ je únykúmenödrin, me e ame ha ködrin, ka habe, Haba je dökhu hia adre imoukôu gadra, me ame he ka ba wan; ke ame ca he ka tethmâ taun ame ne hnyaba adre me imoukôu gadra: 26 ke a ne Satana ame obâ Satana me ame imoukôu but; ke ame he ka kâmâu ka tethmâ dokhon dökhu? 27 Ke a ne inya oge me obâ ta je demoni únyi ga Belezebuba, únyi ga ia ame ob' ödrin minya hnen lakubun? waleling e me úcú ködrin he ka owis' öbun. 28 Ke oge ne obâ ta je demoni únyi ge Hanon Khong, awe, a o but köbun dökhu dokhon Khong. 29 Ke ame he ka kâmâu at ka dit ka hnyi uma umen at ae hwege, he ka söh anyin ta je únyi, a ne ca bân bi he ka ca at ae hwege? me ame he bi ka

söh umen uma. 30 Haba at ame ca tha hien mönya, me wale iwahnaihmiöny mönya; ke haba at ame ca tha úkhöünâ mönya, me ame oveseâ but. 31 Anyin a wale, inya oge me ha köbun, ka habe, Adre me he ka thang degecâ ta je monu hia, ke ta je bi gan anyin at; ke haba at ame he ka bi gan ka Hanu, me adre me ca he ka thang degecâ. 32 Ke haba at ame he ka haikongoâ Nokon at, me adre me he ka hna degecâ e; ke haba at ame he ka haikongoâ Hanu Kap, me adre me ca he ka thang degecâ e hnyi möt ang, ke ba minya hnyi möt ame he ka o. 33 Osoâ thö úö me me so minya je wan; ke haba khaca, okongoâ úö me me kong minya je wan: anyin adre me wâhmakhmetoâ úö ge wan. 34 Je lakon on lö, öbun e he ka kâmâu he ka ha je hofuc ae so, k' öbun kong bi? anyin ame fuc hnyem únyi ge unöngötiny hnyok. 35 Haba at ae so ame hom but ta je únyi ae so únyi hnyi tang omjehen ae so; ke haba at ae kong ame hom but ta je únyi ae kong únyi hnyi tang omjehen ae kong. 36 Ke inya oge me ha köbun, a haba ta je hofuc baú hia ame ha hnen at, me adre me he ka ha hmetu hnyi bong owisa. 37 Anyin adre me he ka haiwisö u ge hwâm ta je hofuc, k' adre me he ka ohnaúhangöi u ge hwâm ta je hofuc.

38 Haba keihen tavat sihnalimen me ta je Faresaio adre me thu me ha, ka habe, At úne lö, e bewehmun he ka wâ ke haten gam. 39 Ke e ame thu ködrin, ka habe, Dö ae kong ke bi únyi monu, adre me elâm haten; ke adre me ca he ka ham ködra haten, ke so thibi haten ga Jona perofeta: 40 anyin a Jona ame laba hnyi hnyin wâ ae gan kun ta lany ke kun ta lit: helâe ame he Nokon at ka laba hnyi hnyin kânâ kun ta lany ke kun ta lit. 41 Ame he at Nineve ka tha tot me dö ang hnyi hna owisa, ke adre me he ka ha hnaúhangoâ e: anyin adre me ietra hnyi hna khetâ hnö Jona; ke wâ bi walang at ae beönua hu Jona. 42 Ame he momo than úheny hnyi hwaiöu ka tha tot me dö ang hnyi hna owisa he ka hahnaúhangoâ e: anyin a e ame o únyi hnyi can hmele-drany he ka löng métâ anyi Solomona; ke wâ bi, wale bi ang at ae beönua hu Solomona. 43 Ke haba hanu ae kong, hnyi úen e ame didrut únyi hnyi hnyin at, e ame he hnyi je dok ae hwahwacit, he ka heleú hna menâ k' ame ca wâ bi. 44 Me e ame ha, ka habe, Oge me he ka hmetu ka hnyi umök

uma ehac oge didrut úhek hnyin; ke e ame o but me wá ae ba önyen, ke adre hia but aba wia, me omecâ. 45 Me e ame he but me tha hom mē je hanu a seven ae beönuu anyidrin monu hon e, ke ödrin e didrö me laba eling : ke haba obiny ka at eling, ame he ka kong hon a bân. Ke ame he ka helâe minya ka dö ang ae kong.

46 E ame tiga fuc ka tavat ae se hia, wá bi, ame útiten eú hnyöu hinyen me je liamekeiny mē, e bewedrin he ka úhnenamö mē. 47 Ke haba ke at ame ha kâu, ka habe, Wá bi, ame útiten eú hinyâm me je liamekeiny möú, e bewedrin he ka úhnenamö möu. 48 Me e ame thu me ha ka at ame fuc kâu, ka habe, Ia hinyök? ke ie je liamekeiny mönya? 49 Me e ame inâ hnyamen ka je laten me ha, ka habe, Wá bi, hinyök, me je liamekeiny mönya! 50 Anyin a haba at ame ânyâ we Cica ethö hnyi drany, wale thibi e keik, me hanik, me hinyök.

HNYIMAKAN 13.

HNYI bong eling Iesu ame he úheny hnyi uma, me laba hnyi hobatköiö. 2 Me ame úhacaköu thö kâu tavat ae se hia, me e ame ölö thö ka hnyi hon hu me laba; ke ame utitilen tavat ae se hia hnyi baten köiö. 3 Me e ame ha ködra ta je hofuc ae se hia a deny je úhöücú, haingen, ka habe, Wá bi, ame he but at belök he ka jijingâ wan; 4 ke e ame jijingâ, me ame kölu but ke je wan hnyi baten gethen, me ame o but ta je meno ame gâ me an dö: 5 ke ame kölu but keihen ka hnyi hon dok ae hudei, ke ca haki hnyi kânâ: me ame ie kú thö anyin ae ca haki kânâ: 6 k' ame o but seúnö, me ame le but, me me mok, anyin ae ba iwân. 7 Ke ame kölu but keihen hnyi wanben ta je úö ae údedö; ke ame kú takoú but hnen ta je úö ae údedö: 8 ke ame kölu but keihen ka hnyi kânâ ae hoso, me wa but, keihen úsa wan haded, keihen úsa sikste, keihen úsa thöte. 9 Haba at ae hu hnyikonyen, löng ju e.

10 Me ame o thö laten, me ha kâu, ka habe, Ieú can u je ha ködra ge ta je úhöücú? 11 E ame thu ködrin me ha, ka habe, Adre me ham köbun he ka wáhmakhmetoâ ta je únyi ae iyong hnyi dokhon drany, k' adre me ca ham bi ködra. 12 Anyin adre me he ka ham ka at ae hu gan, me me he ka tren gan hmâ: ke adre me he ka hom ge at ae ca hu gan bi, únyi e ame hu. 13 Anyin

a wale, inya oge me ha ködra ta je úhöücú; anyin adre me bwela, k' adre me ca wá bi, ke löng, k' adre me ca löngmakhmeto bi, k' adre me ca wá únykúme bi. 14 Me hwâdâ but ködra hna perofeta hnö Isايا, ka habe,

Öbun e he ka löng ge hnyeköny, me ca wá únykúme bi;

K' öbun e he ka wá ge ecmak, me ca he bi ka khana:

15 Anyin ame khöt ut hnyekon, tavat ang, Ke hmak je hnyikönyödra he ka löng, K' adre mook ge je emaködra; Wá adre nye wá ge je emaködra Me löng ge je hnyikönyödra, Me wá únykúme ge hnyekudra, Me hmetuhmetu but, M' oge me he ka omeli ödra.

16 Ke hnahic hnen ta je emaköbun, anyin öbun e wá, me ta je hnyikönyöbun, anyin öbun e löng. 17 Anyin ae hnathu inya oge me ha köbun, ka habe, e se hia ta je perofeta me tavat ae wisa hwakecidra adre me weny he ka wá hnöbun hna wá, k' adre me ca wá bi; me be he ka löng hnöbun hna löng, k' adre me ca löng bi. 18 Anyin a wale löng ju öbun úhöücú ge at ame belök. 19 E ka löng ut ke at hofucin dökhü, ke ame ca wá únykúme bi, me ame o but at ae kong, me húgúnâ únyi adre tá eú hnyi hnyekon. Wale thibi e hna tá hnyi baten gethen. 20 Ke haba hna tá hnyi dok ae hudei, wale at ame löng hofuc, me ie kap senyinâ; 21 ke so bi e ba bi iwân eú hnyi hnyekon, k' ame ca kúeny tethmâ; ke ame ne o but hlöuhlöu, me úöveci, can hofuc, me e ame ie thö thö. 22 Ke haba at adre tá hnyi wanben ta je úö ae údedö, wale at ame löng hofuc, ke ame kú takoú hofuc hnen je vheliny hmele-drany, me je iyawö ge omjeú, me e ame ca wa but. 23 Ke haba hna tá hon kânâ ae hoso, wale at ame löng hofuc, me wá únykúme; at ame hing wa, me hu wan, keihen úsa wan haded, ke keihen úsa sikste, ke keihen úsa thöte.

24 E ame omanenâ hmetu ködra ke úhöücú, ka habe, Haba dokhon drany, me úcü me at ame tá je wan ae so hnyi iny hnye: 25 ke ame tiga mokut tavat, me ame he but iwahnaihmöny mē, me tá takoú hwit hnen zizania, me he thö. 26 Ke ame kú thö bátân me wa, me ame manen minya but zizania. 27 Me ame o but lathnya-bainy at tren uma, me ha kâu, ka habe, Than lö, hawa, u je ca tá ta je wan ae so

MATAIO 14.

hnyi em hnyei? ke únyi ua bi zizania? 28 Ke e ame thu me ha ködrin ka habe, Ame ányá e hnen iwahnaihmiöny. Ke haba lathnyaba ödrin e ha káu, ka habe, Hawa e wem öhmun e he ka oc úkhöünâ e? 29 Ke haingen, ka habe, Ohe; wâ öbun nye tha oc dö hwit me je zizania. 30 E so ödru me he ka tha kú ke ne o but hnyi úen menu: ke haba hnyi úen menu oge me he ka ha ka tavat menu, ka habe, Mē úkhöünâ thö je zizania, me tha ip me ca, hnân thong degecá: ke ip dö hwit hnyi anyik om hani.

31 E ame omanená hmetu ködra ke úhöücú, ka habe, Haba dokhon drany, me úcú me wan sinapi ame hom ke at me ta hnyi iny hnyei: 32 wale thibi e wan ae úhnyúkong hmelen ta je wan hia; ke hnyi úen e ame kú thö me ame gan hmâ hon ta je úö ae ometu, a úö cici, me úcú ka ta je meno ame gâ ethö he ka tabâ ta je vheiny.

33 Ke e ame ha hmetu ködra ke úhöücú, ka habe, Haba dokhon drany me úcú me leven ame hom ke momo me ikhâlâ hnyi hnyin falawa a kun ta tulut, ke ne o but ame tha khibi hia thö.

34 Haba ta je hofuc hia e, ame ha Iesu ka tavat hnyi je úhöücú; k' ame ca fuc ködra ke ba úhöücú: 35 me me hwádâ thö hna ha hnen perofeta, ka habe,

Oge me he ka khöng ut hnyimök hnyi ta je úhöücú;

Oge me he ka ha ta je únyi ae iyong hwân hnyi hna bi taben hmeledrany.

36 Ke haba Iesu ame hna but tavat ae se hia, me ame didrö ka hnyi uma: ke ame o but káu laten, haingödra, ka habe, Omanená thö köhmun bongon úhöücú me zizania hnyi utkânâ. 37 Me e ame thu ködrin, me ha, ka habe, Haba at ame tâ wan ae so, me wale Nokon at; 38 ke haba utkânâ, me wale hmeledrany; ke haba wan ae so, me wale lakon dokhu; ke haba zizania, me wale lakon at ae kong; 39 ke haba iwahnaihmiöny a at ame tâ, me wale diabolo: ke haba menu, me wale obiny hmeledrany; ke haba tavat menu, me wale ta je angela. 40 Ke haba zizania adre úkhöünâ he ka thong hnyi meic; me ame he ka helâe hnyi obiny hmeledrany. 41 Ame he Nokon at ka kunâ anyin ta je angela, m' ödrin e he ka úkhöünâ únyi hnyi dokhon dökhu ta je únyi hia adre me bi jöning, ke tavat adre me ányá hulö, 42 me khú' ödrin ka hnyi thopiny meic: k' adre me he ka tenge me úgiö ganyudra eling. 43 Ke

haba tavat ae wisa, me adre me he ka hadröngöc helâ me seünö hnyi dökhu dokhon Kamödra. Haba at ae hu li hnyikönyen, löng ju.

44 Haba dokhon drany, me úcú me tang omjeú adre me ikhâlâ hnyi hnyei; waleji ame wâ hnen ke at, me ikhâlâ but; me e ame senyin me he but me úcoâ anyin ta je únyi hia, me úco utkânâ eling.

45 Wale hmetu ang, haba dokhon drany me úcú me at úco omjeú at ame elâm ta je penina ae so: 46 ke e ame wâ ju ke penina ae gan hwaban, me e ame mē úco anyin ta je únyi hia hnân bi hwaban e.

47 Wale hmetu ang, haba dokhon drany, me úcú me ert adre me thong eú hnyi köiö, me ame hnok dö ta je wâ monu hia: 48 ke ame unöngöt dö, me ödrin e lelö e ka hnyi hme; ke adre me úlalabainy me úkhöünâ je wâ ae so ka hnyi je tang, me degec bi ta je wâ ae kong. 49 Ame he ka helâe hnyi obiny hmeledrany: ame he ka he but ta je angela me kia luâ tavat ae kong me tavat ae wisa, 50 me khú' ödra ka hnyi thopiny meic: adre me he ka tenge me úgiö ganyudra eling.

51 Hawa, öbun e wâ únykúme ta je únyi hia e? Haingödrin ka habe, Eke. 52 Me e ame ha ködrin, ka habe, Anyin a wale, haba tavat sihnalimen hia waleji adre nâ ka hnyi dokhon drany, me helâ me at ae tren uma ame sang ta je únyi ae teb únyi me ta je únyi ae kueny jut únyi hnyi tang omjehen.

53 A hia but Iesu umo ta je úhöücú e, me e ame he but úheny e. 54 Me e ame o but ka hnyi iny hnyei, me e ame n' ödra hnyin umödra sunago, me adre me lâiâ, me ha, ka habe, Únyi ua metâ eang me ta je huliwa ae man anyin at ang? 55 Hawa, ca nokon bi at tretrau? ke ca Maria bi ien hinyen? ke hawa, ca je liamekeiny mē jia Iakobo, me Josefa, me Simona, me Juda? 56 Ke ca eang bi unyita je lahaniny hia? Ke únyi ua bi ta je únyi hia eang gan? 57 Ke adre me thö thö gan. Ke haba Iesu ame ha ködra, ka habe, E ca ba lung anyin perofeta, ke ka e bi hnyi iny hnyei, me anyin bi lap. 58 Ke e ame ca ányá ta je huliwa ae man ae se hia eling, can anyidra ca labageju.

HNYIMAKAN 14.

HNYI úen eling a löng ut Heroad than lung a Iesu, 2 me e ame ha

MATAIO 15.

ka lathnyabainy, ka habe, Ioane Bapataiso e; a môt hmetu thö úheny hnyi hna mok; anyin a wale ame huliwa ta je únyi ang ae man unyin. 3 Anyin a hia but Heroda köt Ioane, me ca e, me ip hnyi uma ce at, can ga Herodia, öiö Filipino, liamekeiny mē. 4 Anyin a Ioane ame ha, ka habe, E ca úcú köu he ka hom e. 5 Me e ame weny ka hlingâ e, k' ame outen tavat ae se hia, anyin adre me kap e helâ me perofeta. 6 Ke haba hnyi bong adre me bijeuâ bong adre hnöku Heroda hnyin, ame biâ hlu nöku Herodia hnyi wanben, me osenyini Heroda. 7 Waleling me me khemanyin he ka ham kâu únyi e ame he ka sumâtâ. 8 Ke haba hlu, me ame ha hnyekon hinyen he ka ha, ka habe, Ham but kõnya bö Ioane hnyin mini. 9 Me ame hmak ut than; ke únyi bi ge hna khemanyin, ke can ge tavat adre me tha laba mē, me e ame hûna he ka ham but; 10 me e ame úkhúnöng he ka subâ bö Ioane hnyin uma ce at. 11 Me adre me hom but ban hnyi mini, me ham ka hlu, ke hlu ame hom me ham ka hinyen. 12 Me ame he but laten, me hom unyin, me konâm; ke ödrin e he but me thumetu Iesu.

13 Ke a löng ut Iesu, me e ame ho úheny e hon hu, ka hnyi ong hnyebuba a hake e: ke a löng ut tavat ae se hia, me adre me he hoton hon kânâ únyi hnyi ta je taun. 14 Ke e ame o thö me wâ tavat ae se hia, me e ame betenge gadra, me ohia hnödra ta je mok. 15 Ke hnyi sahac ame he but kâu laten, me haingödrin, ka habe, Hnyebuba ang, k' a um do lauy; kunâ thö tavat ang ae se hia, m' adre me he ka hnyi je taun he ka úcú ö 'dra bi. 16 Ke haba Iesu ame ha ködrin, ka habe, Ohe, adre me ca he ka he; ha ö 'dra bi öbun. 17 Ke haingödrin kâu, ka habe, E hu thabúng thibi ta areto ke lo li wâ unyihmun. 18 Me e ame ha, ka habe, Hö jem. 19 Ke ame hûna ka tavat ae se hia he ka laba hnyi hna önying; ke e ame hom je areto a thabúng ke li wâ, k' ame bwele hnyi drany ai me oleâ, me thuthu, me ham je areto ka laten, ke laten ka tavat ae se hia. 20 Ke ödra hia adre me han, me ame sekudra ju: ke adre me hom je kolon adre thuthu a unöngöt dö je tang a twelv. 21 Ke haba úseiny tavat adre me han me helâ me faiv thauzan obaga, k' adre ca aú bi omomo me je wanakat.

22 Me e ame ie kunâ laten he ka laba hon hu, me me bödrin ka kec ka hnyi ke

keihen, me e ame he ka hna but tavat ae se hia. 23 Ke a hia but kunâ tavat ae se hia, e ame hake ölö thö ka hnyi bucen he ka hic: ke hauhaotreng ut ke hake e thiju ling. 24 Ke haba hu, me e but hnyi wanben köiö, ame kap hnahna hnen ta je waköiö, anyin a esang. 25 Ke hnyi hna hmak a vakiny hnyi lit e ame he ködrin, ame he hon köiö. 26 Ke a wâ but e hnen laten ame he hon köiö, me ödrin e hmak me ha, ka habe, Hanu jo; ke ödrin e kuku anyin a ödrin ot. 27 Ke haba Iesu ame ie fuc ködrin, ka habe, Hwege thö; inya bi; ca ot. 28 Haba Peteru ame thu kâu, ka habe, Than lö, ame ne u bi ling, bethe ha kõnya he ka he but köu ka hnyi hon köiö. 29 Haingen ame ha, ka habe, Aiö u, Haba Peteru ame utut úheny hon hu, me he hon köiö, he ka he kö Iesu. 30 Ke e ame wâ ang, me e ame ot; ke e ame hwân he ka ú, me e ame kuku me ha, ka habe, Than lö, omeli nya. 31 Me Iesu ame ie hinöbeny me kât e, me ha kâu, ka habe, At ame labageju úhnyúkong lö, ieú gam u me hlohlo? 32 Ke ödru me ölö thö ka hnyi hon hu, me ame ta but hau. 33 Ke haba aten hu ödrin e khudrung kâu, me ha, ka habe, E hnathu u thibi Nokon Khong.

34 Ke ödrin e kec ka hnyi ke keihen, me ödrin e o thö hot, ka hnyi Genesareta. 35 Ke amē wâhmakhmeto e hnen tavat hnyi hnyei eling, me adre me úkhúnöng igigilö hnyei eling, me hom but kâu ta je komok hia; 36 me khöú kâu m' adre me he ka kâlâ thibi obiny anyin úkhaú: ke haba tavat hia adre me kâlâ, adre me mödrut.

HNYIMAKAN 15.

KE ame o but kö Iesu ke je Faresaio me tavat sihnalimen úhedra Jerusalema, me ha, ka habe, 2 Ieú ge latâm ödrin e hanyâúâ hna úne hnen wahingat? anyin ödrin e ca mē hinyem ödrin ka he ka han. 3 Me e ame thu me ha ködrin ka habe, Ieú gabun öbun e hanyâúâ minya hnanyibu anyin Khong ge hnöbun hna úne? 4 Anyin a Khong ame ha, ka habe, Ogânâ kâmâm me hinyâm: ke, Haba at ame haikongoâ kamen me hinyen, e hnathu e ame he ka mok. 5 Ke haingöbun, ka habe, Haba at ame he ka ha ka kamen me hinyen, ka habe, E kap bi anyik ta je únyi hnân hadru' öbu; 6 e ame ca he ka ogânâ kamen. Me öbun e ohavâ hofuc hwan Khong ge

MATAIO 16.

anyibun je hna úne. 7 Hnyat thoi hnyok lö, e so hna perofeta gabun hnö Isaiä, ka habe,

8 Haba tavat ang, adre me oganö nya ge je esongodidra;

Ke haba je hnyekudra, me úsákâüö mönya.

9 E únyi baú hnödra hna khudrung könya K' adre me nâ bi ta je hna úne a húna hnen at.

10 Me e ame hawa tavat ae se hia, me ha ködra, ka habe, Löng ju, me wâ únykúme ju: 11 Ca únyi bi ame dit ka hnyi hnyem ame okongoâ at; ke so bi únyi ame didrut únyi hnyi hnyem, wale bi e ame okongoâ at. 12 Me ame o but laten me ha kâu, ka habe, E khanö u a ta je Faresaio adre me hmönyidra ka löng hofuc e? 13 Ke e ame thu me ha, ka habe, Haba ta je úö a ca tã bi hnen Kamök ethö hnyi drany, me adre me he ka oc dö me iwân. 14 Hn' ödra but: ödra je hnyat kú gethen k' ödra wadröu. Ke a ne lelö wadröu ge ke wadröu, ödra me he ka tha ta eú hnyi hmonop. 15 Haba Peteru ame thu me ha, ka habe, Ha thö köhmun bongon úhöücú. 16 Ke e ame ha, ka habe, Hawa, öbun hnyat adre me tiga ca wâ únykúme bala? 17 Öbun e ca wáhmakhmeto bi a haba ta je únyi ame dit ka hnyi hnyem, me ame he ka hnyi hnyin, me adre me degec ut ka hnyi hnyot? 18 Ke haba ta je únyi ame didrut únyi hnyi hnyem, me ame he but úheny hnyi hnyok; me wale ame oikikiâ at. 19 Anyin ame didrut únyi hnyi hnyok ta je hna únykúme ae kong, me je úhlingö, me venöu áiân ke at, me bi únyi monu, me venöu, me ohnatho thoi, me haikongo: 20 wale ta je únyi ame oikikiâ at: ke haba he ka han k' adre ca hinyem, me ame ca he ka okongoâ at.

21 Haba Iesu ame hna but dok e, me he ka hnyi ke keihen Turo me Sidona. 22 Me wâ bi, ame o but ke momo Kanana únyi hnyi je hnyegöulen hnyei eling, k' ame hongot tenge, ka habe, Than a Nöku Davita lö, betenge ju gak; ame vec ut nökek hlu a delec demoni. 23 Ke ba hofuc e ame thu. Me ame o thö laten me sumâtâ e, ka habe, Obâ but momo; anyin a e ame hongot hotutin. 24 Ke e ame thu me ha, ka habe, E ba ke únyi adre kunö nya kâu, ke so bi ka ta je mamoe adre he monu hnyi lap anyin at Isaraela. 25 Me ame o thö momo me khudrung ju kâu me ha ka habe, Than lö, hadruö nya. 26 Ke e ame thu,

ka habe, E ca so bi he ka hom jeú an je lakon, me khúâ ka ta je kuli. 27 Ke haingen momo ame ha, ka habe, Eke Than: anyin a haba je kuli adre me labö an je kolon ame kölu únyi hnyi hon laulau anyin tuhödrin. 28 Me haba Iesu ame thu me ha ka momo ka habe, Momo lö, e gan hmâ ányâm labageju: e so he ka e köu helâ me hnâm hna wem. Me ame möt ut nokon hlu cicö úen eling.

29 Ke haba Iesu ame he úheny e, me o hnyi köiö hnyi Galilaia; ke e ame ölö ka hnyi bucen me laba eling. 30 Me ame o but kâu tavat ae se hia, tha ödra me ta je mat, me ta je wadröu, me ta je hum, me ta je bâbu, me keihen tavat ae se hia minya, me adre me khú' ödra ka hnyi hmelen li can; me e ame omeli ödra: 31 me me láiâ tavat ae se hia, hnyi úen adre me wâ ta je hum adre me fuc, me je bâbu adre me so but, me je mat adre me he: me adre me ogânâ Khongon Isaraela.

32 Haba Iesu ame hawâ laten me ha ka habe, Inya oge me betenge ge tavat ae se hia, anyin a ödra bong kun dut eang unyik ke ba ö 'dra: ke ca wek he ka kun' ödra k' ödra mekihnânem wâ adre nye he ka momonu eú hnyi gethen. 33 Ke haba laten ödrin e ha kâu, ka habe, E hu gatin únyi ua je areto ae se hia eang hnyi hnyebuba, me hnân he ka osekunâ tavat ae se hia helâng? 34 Ke haba Iesu ame ha ködrin ka habe, Ve ta areto anyibun? Haingödrin, Seven, me je ong wâ. 35 Me e ame húna ka tavat ae se hia he ka laba hon kânâ; 36 ke e ame hom je areto a seven me je ong wâ, me e ame oleâ me thuthu, me ham ka laten, ke laten ka tavat ae se hia. 37 Haba ödra hia adre me han me ame sekudra ju: ke ödrin e hom dö je kolon adre thuthu, me ame unöngöt dö je tang a seven. 38 Ke ödra foa thauzan obaga adre me han, adre ca aú bi omomo me ta je wanakat. 39 Me e ame hna but tavat ae se hia, me e ame ölö thö hon ong hu me o ka hnyi je hnyigöulen Magadala.

HNYIMAKAN 16.

ME ame o but ta je Faresaio me Sadukaio, me adre me cubec e me sumâtâ he ka omanená ke haten únyi hnyi drany. 2 Me e ame thu ködra, ka habe, Hnyi sahac öbun e ha, ka habe, Ame he ka so drany: anyin ae dra drany. 3 Ke hnyi hnyomakatu, Ame he ka kong drany

MATAIO 17.

hnyi bong ang : anyin ame dra drany ke khömet. Ekhan' öbun heka wâhmakhmetoâ bongon drany; ke ca khan' öbun bi he ka wâhmakhmetoâ ta je haten ta je ûen. 4 Ame elâm haten hnen dö ae kong k' ame bi ûnyi monu; k' adre me ca he bi ka ham kâu haten, ke so thibi haten anyi Jona perofeta. Ke e ame hn' ödra, me he but.

5 Ke ame khöp dö laten hnyi ke keihen, k' ödrin e hnying he ka hok areto. 6 Haba Iesu ame ha ködrin, ka habe, O 'bun âu ge leven anyin ta je Faresaio me ta je Sadukaio. 7 Me ödrin e ûhnenamökouâ, ka habe, anyin la ötin e ca hok areto. 8 Haba Iesu ame wâhmakhmeto, me e ame ha, ka habe, Öbun hnyat labageju ûhnyûkong lö, ieu gabun öbun e ûhnenamökouâ anyin ae ba areto? 9 Hawa, öbun e ca wâhmakhmeto bala bi, ke öbun e ca ûnykûme bi je areto a thabûng anyin tavat a faiv thauzan, me useiny je tang öbun e hom? 10 Ke helâe je areto a seven anyin foa thauzan tavat me useiny je tang öbun e hom? 11 Ieu gabun öbun e ca wâhmakhmeto a oge me ca ha köbun ge areto? Ke so bi he ka wâ âu ge leven anyin ta je Faresaio me je Sadukaio? 12 Me ödrin e wâ ûnykûme a e ame ca ha ködrin he ka wâ leveniny areto, ke so bi ûne anyin ta je Faresaio me je Sadukaio.

13 Ke ame o but Iesu hnyi ke keihen hneyi Kaisaria Filipi, me e ame hnö laten, ka habe, Haba ifucin tavat ge Nokon at, me ia? 14 Haingödrin, ka habe, Haingen keihen, Ioane Bapataiso; ke haingen keihen, Elia : ke haingen keihen Jeremia, ame ne ke at hnyi ta je perofeta. 15 Ke haingen ködrin, ka habe, Ke haba ifucibun gak, m' iny ia? 16 Haba Simona Peteru ame thu me ha, ka habe, U thibi Keriso a Nokon Khong ae möt. 17 Ke haba Iesu ame thu me ha kâu, ka habe, Hnâm hnâhic Simona Bar-Jona : anyin a ca omanenâ bi köu hnen at, ke hnen bi Kamök ethö hnyi drany. 18 Ke inya oge me ha köu, ka habe, U Peteru, ke hnyi hon veto ang, oge me he ka otilâ anyik ekalesia; ke ame ca he ka hwege ta je homagöuleny hedis hon e. 19 Ke oge me he ka ham köu je kiny dokhon drany: ke haba ûnyi u me he ka ohmâ eang hmeledrany, adre me he ka ohmâ ethö hnyi drany: ke haba ûnyi u me he ka thang eang hmeledrany adre me he ka thang ethö hnyi drany. 20 Me e ame ha ka laten m' ödrin e ca he ka ha ka ke at a e bi Keriso.

21 Hwân ûen e, Iesu ame hwân ka omanenâ ka laten a e ame he ka he Jerusalema ai, me vheno ta je vec ae se hia ûnyi ge wahingat, me ta je taben tavat bihut, me hnyat sihnalimen, k' adre me he ka hlingâ, k' ame he ka möt hmetu hnyi bong a kuniny. 22 Haba Peteru ame hom e, me hwân he ka thawâ, haingen, ka habe, Ekölö gam Than; adre me ca he bala ka ânyâ helâe köu. 23 Ke e ame hwiö thö me ha kö Peteru, ka habe, Satana lö, he thö ka hnyi hotuk: u at ame bijönik: anyin u je ca ûnykûme ge ta je ûnyi anyin Khong, ke ta je ûnyi thibi anyin at. 24 Me Iesu ame ha ka laten, ka habe, A ne ke at ame weny he ka he hotuk, e so e ame hokhnyok, me hom anyin satauro me he hotuk. 25 Anyin e haba at ame beomelö anyin möt, me ame he ka ohia e: ke haba at ame he ka hna anyin möt can inya, ame he ka hu e. 26 Anyin a ieu troban ka at, a ne he ka hu kâu hmeledrany hia, ke ame bi hwaban e ge anyin möt? ke ieu hmetu ke ûnyi hnân he ka bi hwaban anyin möt? 27 Anyin ame he ka o thö Nokon at hnyi hmanenanginy Kamen, tha e me anyin ta je angela, me e ame he ka ve ham ka tavat hia thithö e úcú me anyidra ta je huliwa. 28 E hnathu, inya oge me ha köbun, haba keihen gadra adre me tot eang, adre me ca he bi ka mok, ke ne o but adre me wâ Nokon at ame he ka o hnyi dokhon dökhü.

HNYIMAKAN 17.

KE hwaban ta bong a siks Iesu ame hum Peteru, me Iakobo, me Ioane a keiny, me su ödrin ka hnyi bucen a hake ödrin ke: 2 me e ame ke bongon dut hnyi hnyimaködrin: ke ame hadröngöc hnyimakan helâ me seûnö, ke hau anyin je úkhaû helâ me melâm. 3 Me wâ bi, haba Mose me Elia ödru me manen ködrin, m' ödru ûhnenamö më. 4 Ke haba Peteru ame ha kö Iesu, ka habe, Than lö, e so kötin he ka laba eang: a ne wem oge me he ka otilâ je uma menâ a kun; hnân hobi köu khaca, ke hobi kö Mose khaca, ke hobi kö Elia khaca. 5 Ke e ame tiga ha, me wâ bi ûlâ ae hadröngöc ame tubi ödrin: ke wâ bi, hwan hofuc ûnyi hnyin ûlâ ame ha, ka habe, Walang Nökuk a oûnykûmik oge me senyin kâu; löng ju öbun kâu. 6 Ke a löng ut laten, me ödrin e ta ju hnyikânâi, me ot gan hmâ. 7 Ke haba Iesu ame he me kal' ödrin, me ame ha, ka habe, Todró ke ca ot

bi. 8 Me ödrin e bwele göranyai ke ba at ödrin e wâ, ke hake Iesu thibi.

9 Ke ödrin e tiga utut úhedrin hon bucen, me Iesu ame hûna ködrin, ka habe, Ca ha bi ka ke at únyi a manen, ke ne o but a möt hmetu thö Nokon at úheny hnyi hna mok. 10 Me ame hnö e hnen laten, ka habe, Anyin a ieu ame ha tavat sihnalimen, ka habe, Ame he ka bö Elia ka o? 11 Ke e ame thu, me ha, ka habe, E hnathu ame bö Elia, k' ame he ka ohâtâ ta je únyi hia : 12 ke inya oge me ha köbun, ka habe, A o but Elia, ke adre me ca wâhmakhmeto, k' adre hia but ányâ kâu wedra. Ame he minya Nokon at ka hu vec helâe únyi gandra. 13 Haba laten ödrin e wâhmakhmeto a e ame haiö Ioane Bapataiso ködrin.

14 Ke ödrin e o but ka tavat ae se hia, ke ame o but kâu ke at ame cibouca kâu, me ha, ka habe, 15 Than lö, betenge ju ge nökek : anyin a e ame ing, me gan hmâ vec : anyin a e ame osehia but ta eú hnyi meic, ke osehia minya ka hnyi köiö. 16 Ke oge hia but hom e ka látâm, ke ca khan' ödrin he ka omelö e. 17 Ke haba Iesu ame thu me ha, ka habe, Dö ame ca labageju bi, ke hwali lö, oge me he ka tha e möbun ke ne o but kehö? oge me he ka hokhnyoki öbun ke ne o but kehö? hö jem kõnya. 18 Haba Iesu ame thawâ e, me ame didrut demoni únyi hnyin : me ame möt dö da hwân hnyi úen e. 19 Me ame he duöng laten kö Iesu me ha, ka habe, Ieu ae ca khan' öhmun gan he ka obâ e? 20 Me e ame ha ködrin, ka habe, Anyin ae úhnyúkong anyibun labageju : anyin e hnathu inya oge me ha köbun, ka habe, a ne hu gabun labageju helâ me wan sinapi, me öbun e he ka ha bucen ang, ka habe, Kec dö kâe ; me ame he ka kec ; ke ba ke únyi ame he ka pason köbun.

22 Ke ödrin e tiga laba hnyi Galilaia, haba Iesu ame ha ködrin, ka habe, Adre me he ka alecuâ Nokon at ka hnyi ta je hnyamen at ; 23 ke adre me he ka hlingâ e, ke e ame he ka möt hmetu hnyi bong a kuniny. Me ödrin a vec gan hmâ.

24 Ke ödrin e o but hnyi Kaperenauma, me ame o but kö Peteru tavat adre me hok haf-sekel, me ha, ka habe, Hawa ame ca hnyi bi haf-sekel at ame n' öbun? 25 Haingen, Eke. Ke hnyi úen e ame didrö hnyin uma ai, haba Iesu ame bán he ka fuc kâu, ka habe, Simona, ieu únykúmenâm? haba ta je than eang hmeledrany adre me hom únyi ga ia fat me hut? hawa, unyi

ge lakudra, ame ne únyi ge je atkanyua? 26 Haingen ame ha, ka habe, Únyi ge je atkanyua : me Iesu ame ha kâu, ka habe, Awe adre hna bâûâ lakon. 27 Ke so bi wâ ötin nye osau' ödra, he thö hnyiköiöai, me khûâ but wage, me lelö thö wâ a bán ka wadring ka hnyin ; ke u ka hia but khöng hnyimen, u me he ka wâ khaca sekel : hom dö e, me ham ködrin hnân hobi köu m' önya.

HNYIMAKAN 18.

HNYI úen eling ame o laten kö Iesu me ha, ka habe, Ia ae gan hnyi dokhon drany? 2 Me e ame hawâ wanakat ae úhnyúkong kâu, me otilâ hnyi wanbödrin, 3 me ha, ka habe, E hnathu inya oge me ha köbun, ka habe, Öbun e ne ca wi' öbun bi, me me helâ me wanakat, e ca khan' öbun he ka didrö ka hnyi dokhon drany. 4 Anyin a wale, haba at ame he ka oúhnyúkongoâ e bi helâ me wanakat ang, wale bi e at ae gan hmâ hnyi dokhon drany. 5 Ke haba at ame he ka kap wanakat helâng hnyi iök, me ame köp nya minya : 6 ke haba at ame he ka bijöniny ke at ae úhnyúkong eang ame labageju kõnya, me so ka at eling he ka vekiny hnyi nyin veto hnân oamâmâ, me he ka öüâ but e hnyi köiö ae dit. 7 Ekölö ge hmeledrany anyin ae hu ta je hna bi jöniny! anyin ae únyi hnathu he ka oâ ta je hna bijöniny : ke ekölö ge at ame he ka oâ ta je hna bijöniny! 8 A ne bi jönâm hnyamâm a metâm, subâ degecâ but gam : e so köu he ka didrö ka hnyi möt a u bâbu ke mat, hon he ka tha hu li hnyamâm ke li cam, ke adre me he ka khúö u ka hnyi meic ame ca mok balua. 9 Ke a ne bi jönâm emákâm, úâ degecâ thö gam : ke so köu he ka didrö ka hnyi möt a khaca biju emákâm, hon he ka tha hu li ecmak, me adre me he ka khúö u ka hnyi meiciny gena. 10 Wâ eâu öbun nye húkotiâ ke at ae úhnyúkong eang ; anyin a inya oge me ha köbun, haba anyidrin ta je angela ethö hnyi drany adre me wâ bala hnyimakan Kamök ethö hnyi drany. 12 Anyin a ieu únykúmenöbun? a ne ke at ae tren je mamoe a wan haded, ke ame he monu but khaca gadrin, hawa, e ame ca he ka hna bi nainte nain, me he ka hnyi je bucen he ka elâm at a he monu? 13 Ke a ne wâ ju e, e hnathu inya oge me ha köbun, ka habe, e ame senyinâ e hon hnen hna senyinâ

nainte nain ödrin e ca he monu. 14 Ke helâe e ca weny Kamöbun ethö hnyi drany, a g' ame he ka hia ke at eang ae ûhnyûkong.

15 Ke a ne monu köu kem, he thö ka omamenâ kâu anyin monu ke hake öbu ke : a ne ling u, öbu me he bi ka liamekeiny hmetu. 16 Ke ame ne ca ling u, bi hiâm ju minya ge at a khaca, ame ne lo, m' adre me he ka ohmâ ta je hofuc hia a tha hahathoâ hnen hnyimen li at a lo, ame ne kun. 17 Ke a ne hócö ling ödrin, ha thö ka ûkhacaköu : ke a ne hócö löng ûkhacaköu, hna but e me me he ka helâ köu me Aten ke je hnyei, ke ta je telona. 18 E hnathu inya oge me ha köbun, ka habe, Haba ûnyi öbun e he ka ohmâ eang hmeledrany adre me he ka ohmâ ethö hnyi drany : ke haba ûnyi öbun e he ka thang eang hmeledrany, me adre me he minya ka thang ethö hnyi drany. 19 Wale hmetu ang, inya oge me ha köbun, ka habe, ame ne he lo li at gabun ka tha ogâ ke ûnyi eang hmeledrany wale ödrü me he ka sumâtâ, me ame he ka ham ködrü hnen Kamök ethö hnyi drany. 20 Anyin a haba dok ame ûkhacaköu hnyin li at a lo, ame ne kun, hnyi iök, me inya ling hnyi wanbödrin.

21 Haba Peteru ame o but kâu me ha, ka habe, Than lö, ama ove monu kõnya keik m' iny hna but e? hawa, ame he ka o hnyi seven? 22 Haba Iesu ame ha kâu, ka habe, Oge me ca ha köu, ka habe, Ame he ka o hnyi seven ; ke so bi, Ke ne o but ka hnyi sevente je seven. 23 Anyin a wale, haba dokhon drany me úcú me ke than ame weny he ka hnö ge ta je ûnyi anyin lathnyabainy. 24 Ke e ame hwân he ka wâhmakhmeto, me adre me hom but kâu at ame hia but me hom gan ten thauzan je talan. 25 Ke can anyin ae ba gan hnân bi hwaban, haba tuhan ame ûkhûnöng he ka úco e, me âiân, me lakon, me ta je ûnyi ae hu gan, me hnân bi hwaban. 26 Anyin a wale, haba athnyaba ame ta ju me nom ju kâu, me ha, ka habe, Than lö, më hokhnyoki nya ju, me oge me he ka ham hia hwaban köu. 27 Haba tuhan athnyaba eling ame betenge gan, me thang ut e, me hna degecâ kâu hnen hna më hom. 28 Ke ame dit hnyöu ai athnyaba eling, me wâ ke athnyaba a hanen, waleji ame më hom gan je denari a wan haded : me e ame kâlâ e, me kât nyin me ha, ka habe, Hö jem hmetu hnâm hna më hom gak. 29 Me haba athnyaba a hanen

ame ta ju, me khöû kâu, me ha, ka habe, Më hokhnyoki nya ju, me oge me he ka ham hmetu köu. 30 Ke e ame hócö : me e ame he me khûâ e huyin uma ce at, ke ne o but e ame ham hmetu hna më hom. 31 Ke a wâ but hnen je athnyaba a hanen hnen hna ânyâ, me ame hmak je hnyekudrin, me ödrin e o thö me omanenâ ka tuhödrin ûnyi hia ame ânyâ. 32 Me haba tuhan ame hawâ e, me ha kâu, ka habe, U athnyaba ae kong lö, oge me thang hia hnâm hna më hom gak, anyin a u je khöû kõnya : 33 hawa, e ca úcú köu he ka betenge minya ge athnyaba a hanâm, helâji me hnök hna betenge gam? 34 Haba tuhan ame hmönyin, me hna but ka tavat úöveci, ke ne o but e ame he ka ham ta je ûnyi hia e ame më hom. 35 Ke ame he ka ânyâ helâe köbun hnen Kamök ethö hnyi drany, öbun ka ca he hia ka ve thöng keiny ûnyi hnyi je hnyekubun.

HNYIMAKAN 19.

A HIA but Iesu öumo ta je hofuc e, me e ame he úheny Galilaia, me o hnyi hnyigöulen Juda hoton Joridano ; 2 ke ame he hoton tavat ae se hia ; me e ame omeli ödra eling.

3 Ke ame o thö kâu ta je Faresaio he ka cubec e, haingödrin ka habe, Hawa, e úcú ka at he ka degec âiân can ta je ûnyi hia? 4 Me e ame thu me ha, ka habe, Hawa, öbun e ca hnyi aú, a haba at ame op tavat hnyi can a e ame up ödrü бага me momo, 5 me ha, ka habe, Anyin a wale, ame he бага ka hna kamen me hinyen me kece bi ka âiân ; ke ame he ka khaca thibi unyidru? 6 Waleling m' ödrü me ca lo hmetu bi, ke khaca thibi unyidra. Anyin a wale, haba hnen Khong hna úhúkâlâkôuâ, me ca he bi at ka thang. 7 Haingödrin kâu, ka habe, Anyin a ieú Mose ame hûna he ka ham tusiny thang faipoipo, me ip ju momo? 8 Me e ame ha ködrin, ka habe, Haba Mose ame hn' öbun he ka degec laöiöbun can únâkiny je hnyekubun : k' adre me ca hnyi helâe hnyi can. 9 Ke inya oge me ha köbun, ka habe, Haba at ame degec âiân, k' a bi ûnyi monu, me ihok me ke at bi, me wale bi at ame bi ûnyi monu : ke haba at ame hom momo adre degec, me e at ame bi ûnyi monu. 10 Ke haba laten, ödrin e ha kâu, ka habe, A ne helâe bongon at ge momo, e ca úcú bi he ka faipoipo. 11 Ke e ame ha ködrin, ka habe, E ca

MATAIO 20.

khana tavat hia he ka kap hofuc e, ke so thibi tavat adre me ham ködrin. 12 Anyin ae hu je eunuka ame helâe únyi hnyi erkin ge hinyen: k' ame eunuka but keihen, a oeunuka hnen at: ke e hu je eunuka, adre me ka oeunuk' ödra hobi kâu dokhon drany. Ke haba at ae khana he ka kap e, e so e ame kap.

13 Me adre me hom but kâu ta je wanakat, me me he ka ip li hnyamen hudrin, me hic: ke haba laten ödrin e thaw' ödra. 14 Ke haingö Iesu, ka habe, Hna but ta je wanakat, ke ca thaw' ödrin bi he ka he jem kõnya: anyin a helâ ödrin dokhon drany. 15 Me e ame ip li hnyamen hudrin, me he but úheny e.

16 Me wâ bi ame o but ke at me ha kâu, ka habe, At úne lö, ieú ke únyi ae so o ge me he ka ányâ me me hu thö kõnya möt ame ca ba balua? 17 Me e ame ha kâu, ka habe, Ieú gam u me hnö gak únyi ae so? Khaca thibi at ae so: ke a ne wem he ka didró ka hnyi möt vheno thö ta je hnanyibu. 18 Haingen ame ha kâu, ka habe, Ewa? Ke Iesu ame ha kâu, ka habe, U ca he ka hlingâ, U ca he ka bi. únyi monu, U ca he ka venöu, U me ca he ka ohnathoâ thoi, 19 Ogánâ kâmâm me hinyam: ke, U me he ka betenge ge at ame laba hakekenyi u helâ me u bi. 20 Haba hidróu ame ha kâu, ka habe, Oge hia but vheno ta je únyi e: ke ieú biju ae hia gak? 21 Haba Iesu ame ha kâu, ka habe, A ne wem he ka bekhöt, he thö, úco thö anyâm ta je únyi, me ham ka tavat ae theduoc, ke u me he ka hu tang omjeú hnyi drany: ke aiö u bi, he hotuk. 22 Ke a löng ut hidróu hofuc eling, me e ame he but me hmak ut hnyekon: anyin a e at ae tren omjeú ae gan hmâ.

23 Me haba Iesu ame ha ka laten, ka habe, E hnathu inya oge me ha köbun, ka habe, Huliwa but at ae tren omjeú he ka didró ka hnyi dokhon drany. 24 Ke inya oge me ha hmetu köbun, ka habe, E háhá ka kamela he ka didró hnyi hwanumen jebú, hon he ka didró ka hnyi dökhu dokhon Khong at ae tren omjeú. 25 A löng ut laten me ödrin e láiá gan hmâ me ha, ka habe, Ia la ae khana he ka möt? 26 Haba Iesu ame ö' drin me ha, ka habe, E ca khana bi e hnen at; ke ba ke únyi ae pason ka Khong. 27 Haba Peteru ame thu kâu, ka habe, Wâ bi, öhmun e hia but hna degecâ ta je únyi hia, me he hotom; ke öhmun e he ka hu ieú? 28 Haba Iesu ame ha ködrin, ka habe, E hnathu inya oge

me ha köbun, ka habe, haba hnyi hna he ka omelö hmetu, e ka he Nokon at ka laba hon theroniny anyin hmanenang. haba öbun tavat öbun e he hotuk, me öbun e he minya bi ka laba hon je theron a twelv, he ka owisa je tribu anyin at Isaraela a twelv. 29 Ke haba at ame he ka hna but uma, ke liamekeiny, ke haniny, ke kamen, ke hinyen, ke lakon, ke hnyei, can iök, me e ame kap wan haded úsehiainy, me ame he ka hu minya möt ae ca ba balua. 30 Ke se hia tavat ame bödra, me ame he ka bilidra but, ke haba tavat ame bilidra me ame he ka bödra but.

HNYIMAKAN 20.

A NYIN ae úcú dokhon drany me tuhan uma, at ame vesákong he ka hawâ tavat huliwa ka hnyi anyin hna belökâ vine. 2 Ke tha mou thö gan me tavat huliwa he ka kap úsa khaca denari hnyi bong, me e ame kun' ödra ka hnyi anyin hna belökâ vine. 3 Ke e ame dit hmetu but hnyi awa a kuniny, k' ame wâ keihen adre me útitilen bâu hnyi hna úcú; 4 ke e ame ha ködra, ka habe, He th' öbun ka hnyi hna belökâ vine, me oge me he ka bi hwaban köbun únyi ae úcú. Me ödrin e he but. 5 Ke e ame dit hmetu but, hnyi awa a siks, ke hnyi awa a nain, k' ame ányâ helâe. 6 Ke haba hnyi awa a eleven. e ame dit hmetu but, me wâ keihen adre me útitilen baú; me e ame ha ködra, ka habe, Ieú gabun öbun e útitilen baú ke obekhötâ bong? 7 Haingödra kâu, ka habe, Anyin ae ba at ame haw' öhmun. Ke e ame ha ködra, ka habe, He th' öbun minya ka hnyi hna belökâ vine. 8 Ke hnyi hauhaotreng, haba tuhan vine ame ha ka homakan huliwa, ka habe, Hawâ thö tavat huliwa me ham ködra hwaban, hwân ge tavat a bilidra ke ne o but ka tavat a bödra. 9 Me ame o but tavat adre hawâ hnyi awa a eleven, me ödrin e ve kap denari. 10 Ke ame o minya but tavat a bödra, k' ödrin e únykúme he ka kap gáná; ke ödrin e ve kap minya denari. 11 Ke adre hia but kap, me adre me ulidro tuhan uma, 12 me ha, ka habe, Haba tavat a bilidra adre hia but huliwa khaca thibi áwâ, ke u je mâdrâ ködrin e úcú möhmun, waleji tavat öhmun e hok hmakiny bong me kahwainy ae gan hmâ. 13 Ke e ame thu ka ke at gadrin, ka habe, Hanök lö, iny ca hwali köu: hawa, öte ca tha thamâ

MATAIO 21.

hnyi denari? 14 Hom dö ânyâm me he thö, haba wek bi he ka ham ka at a biliny e úcú môu. 15 Hawa, e ca úcú kõnya he ka ânyâ wek ge anyik ta je únyi? hawa e kong emakâm anyin a iny at betenge? 16 Ke helâe haba at a biliny ame he ka bân, ke haba at a bân, ame he ka biliny jut.

17 Haba Iesu ame he Jerusalema ai, me e ame saû thö me laten a twelv a hake ödrin ke, me ha ködrin eû hnyi gethen, ka habe, 18 Wâ bi, ötin e he Jerusalema ai; ke adre me he ka alecuâ Nokon at ka je taben tavat bihut me hnyat sihnalimen; ke adre me he ka hahnaúhangoâ e, he ka hlingâ, 19 ke adre me he ka hna e ka Aten je hnyei he ka hlumâ e, me kot ge osö, me osatauroâ: ke e ame he ka möt hmetu thö hnyi bong a kuniny.

20 Me ame e but kâu hinyen li laku Zebe-daio tha e me li lakon, ödrin e khudrung me sumâtâ e ge ke únyi. 21 Me e ame ha ka momo, ka habe, Ieú wem? Haba momo ame ha kâu, ka habe, Ö u ha thö me me he li lakuk ang ka laba ke at hnyi ke keihâm a metâm, ke ke at hnyi ke keihâm a mem hnyi dokhom dökhu. 22 Ke haba Iesu ame thu me ha, ka habe, E ca khan' öbu bongon hnöbu hna sumâtâ. Hawa, e khan' öbu he ka ic hnyi kaia oge me he ka ijem? Haingödrü ka habe, E khan' öhmu. 23 Ke e ame ha ködrü, ka habe, Öbu me he ka hnyi ic hnyi anyik kaia: ke haba he ka laba hnyi ke keihen metök me mek, me ca hamök bi he ka ham, ke wale hobi kâu thibi hnen Kamök hna penapena hobi kâu. 24 Ke a löng ut hnyat a ten me ame hmönyidrin ka li liamekeiny. 25 Ke haba Iesu ame haw' ödrin kâu me ha, ka habe, E khan' öbun a hwakecin tavat adre me musö Aten je hnyei he ka hwen than hudrin, ke ame musi ödrin hnen ta je tuh-ödrin. 26 Ame ca he ka helâe gabun: ke haba at ame began gabun ame he ka bi athnyaba köbun; 27 ke haba at ame weny he ka bân gabun, me ame he ka bi athnyaba köbun: 28 helâ me Nokon at a ca o me me he ka bi athnyaba kâu tavat, ke so bi he ka bi athnyaba me ham anyin möt hnân hwaban melen tavat ae se hia.

29 Ke ödrin e tiga dit úhedrin Jeriko me ame he tavat ae se hia hotudrin. 30 Ke wâ bi, li wadröu ödrü me laba hnyi baten gethen, k' ödrü me löng a g' ame he nul' ödrü Iesu, me ödrü me hongot, ka habe, Than a Nöku Davita lö, betenge ju

gahmu. 31 Me ame thaw' ödrü tavat ae se hia, m' ödrü me laba hnyibú: ke so bi ödrü me hongot hwege tot, me ha, ka habe, Than a Nöku Davita lö, betenge ju gahmu. 32 Me Iesu ame todru me haw' ödrü, me ha, ka habe, Ieú webu a oge me he ka ânyâ köbu? 33 Haingödrü, ka habe, Than lö, me me bwela but li emaköhmu. 34 Me haba Iesu ame hnyok ködrü, me kâlâ li emaködrü: me ödrü me ie bwela but me he hoton.

HNYIMAKAN 21.

KE ödrin e hakekeny Jerusalema ai, k' ödrin e o but Bethefage hnyi bucen Elaio, ke haba Iesu ame kunâ li laten, 2 haingen ködrü, ka habe, He th' öbu ka hnyi taun cici öbu, me öbu me he ka wâ asina adre me noc, me nokon unyin: thang ut, me lelö thö jem kõnya. 3 Ke ame ne he ke at ka fuc köbu, me ha th' öbu, ka habe, E hu hanymödrü ge Than; me e ame he ka ie kun' ödrü. 4 Ke adre me ânyâ e, me me hwâdâ hna ha ge perofeta, ka habe, 5 Ha thö ka hluiny Ziona, ka habe, Wâ bi, ame o but köu Tuhâm, At ae menyik, k' ame tabâ asina, Ke nak asina, a nokon asina.

6 Me ame he but li laten me ânyâ helâ me hna ha ködrü ga Iesu, 7 me lelö asina, me nokon, k' ödrü me ip je úkhaúidru hon li asina; me e ame laba hon. 8 Ke haba tavat ae se hia adre me ulolo anyidra je úkhaú eû hnyi gethen; ke haba keihen adre me sö je anginy úö, me ave gethen. 9 Ke haba tavat adre me bödra me tavat a bilidra, adre me kuku me ha, ka habe, Hosana ka Nöku Davita: Hnen hnahic at ame o but hnyi ien Than; Hosana ethö beönua. 10 Ke hnyi úen e ame o but hnyi Jerusalema me ame bwebwet bi taun hia, haingödra, ka habe, Ia e? 11 Me ame ha tavat ae se hia, ka habe, Walang perofeta a Iesu úheny Nazareta hnyi Galilaia.

12 Ke haba Iesu ame didrö hnyin uma kap umen Khong, me obâ hia tavat adre me úcú hnyin uma kap, me hagutâ hnyikânâi ta je laulau anyin tavat wia mone, me je utap taben tavat adre me úcú biny; 13 me e ame ha ködra, ka habe, Adre hia but sihnalimen, ka habe, Adre me he ka hwenyi ien umök uma, me uma hnân hic: ke öbun e wia e me me op umen tavat venöu. 14 Ke ame o but kâu ta je wadröu me ta je mat hnyi uma kap; me e ame

MATAIO 21.

omeli ödra. 15 Ke haba je taben tavat bihut me hnyat sihnalimen adre me wâ ta je ûnyi hnân lâiâ e ame ânyâ, ke je wanakat adre me hongot hnyin uma kap, me ha, ka habe, Hosana ka Nöku Davita, me adre me hmönyidra, 16 me ha kâu, ka habe, Hawa, u je löng hnödrin hna ha? Haingö Iesu ame ha ködra, ka habe, Eke: öbun e ca munyi aú, ka habe, Únyi hnyi hnyimen ta je wanakat me ta je mendreng u je obekhötâ bi hna haisoâ. 17 Me e ame hn' ödra but me he but úheny hnyi taun Bethania ai, me mokut eling.

18 Ke haba hnyi hnomakatu, e ame he hmetu ka hnyi taun ke ame mekihnânem. 19 Me e ame wâ imeta hnyi baten gethen, me e ame he kâu, ke ba wan e ame wâ, ke je lan thibi; haingen kâu ka habe, U me ca he hmetu ka wa nyiele balua. Me ame ie meleca thö imeta. 20 Ke a wâ but laten, me ödrin e lâiâ me ha, ka habe, E logot meleca thö imeta! 21 Haba Iesu ame thu me ha ködrin, ka habe, E hnathu inya oge me ha köbun, öbun e ne hu labageju, me ca lolo bi hnyok, öbun e ca he ka hake ânyâ thibi hna ânyâ ka imeta, ke öbun e ne he ka ha ka bucen ang, ka habe, Bethe ok ut me ta but eú hnyi köiö, me ame he ka hwâdâ. 22 Ke haba ta je ûnyi hia thithö öbun e he ka sumâtâ hnyi hic, öbun ka labageju, me öbun e he ka hu.

23 Ke e ame o ka hnyi hnyin uma kap, me haba je taben tavat bihut me wahingating hnyei ödrin e o kâu hnyi úen e ame tiga úne, me haingödrin, ka habe, Hnen musi anyi ia u me ânyâ ta je ûnyi e? 24 Haba Iesu ame thu me ha ködrin, ka habe, Oge me he bi nya ka hnei öbun ge ke hofuc, ke öbun ka thu thö kõnya, me oge me he ka ha köbun musi oge me ânyâ hnyin ta je ûnyi e. 25 Haba hna bapataiso hnö Ioane me ûnyi ua? ûnyi hnyi drany, ûnyi ge at? Me adre me úhnenamökouâ, ka habe, Ate ne ha me ûnyi hnyi drany, me e ame he ka ha köta ka habe, Ieú gabun öbun e ca geju kâu? 26 Ke ate ne ha, ka habe, Únyi ge at; me öta outen tavat ae se hia; anyin a ödra hia adre me köp Ioane helâ me perofeta. 27 Me adre me thu kö Iesu, ka habe, E ca khan' öhmun. Me e ame ha ködra, ka habe Oge me ca he minya inya ka ha köbun musi oge me ânyâ hnyin ta je ûnyi e. 28 Ke ieú únykúmenöbun? Wale ke at a lo lakon; me e ame o ka atö me ha, ka habe, Nökuk, he thö ka huliwa hnyi bong ang hnyi ik hnyei vine. 29 Ke

haingen, ka habe, Iny höcö: ke hwaban e, e ame ietra me he. 30 Me e ame o ka wakeiat me ha helâe minya. Ke e ame thu me ha, ka habe, Cica inya oge ma he: ke ame ca he bi. 31 Ie at gadru ame ânyâ weny kamödrü? Haingödra, ka habe, Atö. Haba Iesu ame ha ködra ka habe, E hnathu inya oge me ha köbun, haba ta je telona, me ta je momo hnyi gethen, adre me khalet' öbun ka hnyi dökhü dokhon Khong. 32 Anyin a Ioane ame o but köbun hnyi deny hwakecin ae wisa, ke öbun e ca geju kâu: ke ame labageju kâu hnen ta je telona me ta je momo hnyi gethen: ke öbun e wâ thibi, öbun e ca ietra hwaban, m' öbun e he ka labageju kâu.

33 Löng ju ke úhöücú; Wale at tuhan uma ame belökö vine, me bi haginy igigilö, me hin thop hnân hlic vine, me otilâ tap ae beú göranyai, me hna ka tavat belök, me e ame he but ka hnyi ke hnyei bi. 34 Ke hnyi úen ame hakekeny ka metu je wan, me e ame kunâ lathnyabainy ka tavat belök, he ka hom je wan. 35 Haba tavat belök adre me kât lathnyabainy, me osöâ khaca, me hlingâ khaca, me lûâ khaca. 36 Me e ame kunâ hmetu ke lathnyaba ae se hia hon hnyat a bödrin: me adre me ânyâ helâe minya ködrin. 37 Ke hwaban e, e ame kunâ ködra nokon, haingen, Ödrin e he la ka outen nöku. 38 Ke a wâ but nokon hnen tavat belök, me ödrin e úhakouâ, ka habe, Wale but ang mátrân; ate me he ka hlingâ, me me tang omjehetin biju anyin ta je ûnyi. 39 Me ödrin e kât e me obâ ûnyi hnyi hnyei vine, me hlingâ. 40 Anyin a wale, e ka o tuhan hnyei vine, ieú ame he ka mádrâ ka tavat belök? 41 Haingödrin kâu, ka habe, E ame he ka ohia tavat eling ae kong, me hna hnyei vine ka keihen tavat belök, tavat adre me he ka ham wan kâu hnyi je úen. 42 Haba Iesu ame ha ködrin, ka habe, Öbun e ca aú hna sihnalimen, ka habe,

Haba veto ame degec hnen tavat bi uma,

Me adre me ânyâ me hnân ban kopiny: Únyi ge Than eling,

Ke ate me wâ me lâiâ?

43 Anyin a wale, inya oge me ha köbun, ka habe, Adre me he ka hom gabun dökhü dokhon Khong, me adre me he ka ham ka hnyei adre me wa waniny. 44 Ke haba at ame he ka ta hon veto ang, me ame he ka thu amâmâ: ke e ka kölu ka hnyi hon

at, me ame he ka thu omomono e. 45 Ke a löng ut ta je taben tavat bihut ke ta je Faresaio anyin ta je úhöúcú, me ödrin e wâ únykúme a e ame ha gadrin. 46 Me ödrin e elâm he ka kât e, k' ödrin e outen tavat ae se hia, anyin adre me kap e a perofeta.

HNYIMAKAN 22.

HABA Iesu ame ha hmetu ködra je úhöúcú ame ha, ka habe, 2 Haba dokhon drany, me úcú me ke than at ame ânyâ bijeú hnyi faipoipo a nokon, 3 k' ame kunâ lathnyabainy he ka hom tavat adre hia but hawâ ka hnyi bijeúiny faipoipo: k' adre me höcö. 4 Me e ame kunâ hmetu ke je lathnyaba me ha, ka habe, Ha thö ka tavat adre hia but hawâ, ka habe, Wâ bi, oge hia but penapena anyik bijeú: k' adre hia but hlinga halek je bolok ke halek je meno ae pipikhenya, k' adre hia but penapena ta je únyi hia: ai öbun ka hnyi bijeúiny faipoipo. 5 Ke adre me oúnyibâúâ me ve se but, ke at ka hnyi iny ta hnyei, ke ke at ka hnyin anyin hna úcú: 6 ke haba je kolon adre me kât lathnyabainy, me okongoâ, me hlingâ. 7 Me ame hmönyin bi than, k' ame kunâ anyin je utbavat, me ohia tavat úhlingö eling, me thong degecâ anyidra taun. 8. Me e ame ha ka lathnyabainy, ka habe, Adre hia but penapena bijeúiny faipoipo ke ca úcú ödra bi, a tavat adre me bödra ka hawâ. 9 Anyin a wale, he th' öbun ka hnyi vheden ta je gethen, ke haba tavat hia öbun e he ka wâ, haw' ödra thö ka hnyi bijeúiny faipoipo. 10 Me ame he but lathnyaba eling ka hnyi ta je gethen, me úkhacahouâ hia tavat ödrin e wâ, tavat ae kong ke tavat ae so: me ame unöngöt hna faipoipo ge at. 11 Ke ame didrö than he ka wâ tavat adre hawâ, me e ame wâ ke at eling ae ba úkhaúen faipoipo: 12 me e ame ha kâu, ka habe, Hanök lö, ieú gam u je didrö kââng, ke ba gam úkhaúen faipoipo? Me e ame laba hnyibú but. 13 Ke haba than ame ha ka lathnyaba, ka habe, Ca ju li can ke li hnyamen, me khúâ but ka hnyi menekholom hnyöu, dok adre me tenge hnyin me úgiö ganyon. 14 Anyin adre me hawâ tavat ae se, ke wakhalet thibi adre me úca.

15 Me ame he but ta je Faresaio me úhnenamö m' adre ma kâmâu ka töuhneweny ge hnen hna ha. 16 Me adre me

kunâ kâu latödrin, ke je Herodiane minya, me ha, ka habe, At úne lö, e khan' öhmundut a u at ae hnathu, a at ame únö hnatho gethen deny Khong, ke u me ca outen at, anyin a u me ca únykúme bi hnyimakan at. 17 Anyin a wale, ha thö köhmun, Ieú únykúmenâm? e úcú he ka fat kö Kaisara, hawa, degec u? 18 Ke haba Iesu ame wâ hwakecidrin ae kong, me e ame ha, ka habe, Hnyat thoi, ieú gabun öbun e cubic nya? 19 Omanená thö kõnya mone hnân fat. Me adre me hom kâu denari. 20 Me e ame ha ködrin, ka habe, Hnyimakö ia ang me hna sihnalimen? 21 Haingödrin kâu, ka habe, Kaisara. Me e ame ha ködrin ka habe, Awe, ham but kö Kaisara ta je únyi anyi Kaisara, ke ka Khong ta je únyi anyin Khong. 22 Ke adre me löng, me adre me láiâ, me hna but e, me he but.

23 Hnyi bong eling ame he but kâu ta je Sadukaio, tavat adre me ha, ka habe, e ba möt hmetu thö: 24 ke adre me hnö e, ka habe, At úne lö, haba Mose ame ha, ka habe, A ne mokcu ke at ke ba nokon, hamen liamekeiny mē he ka hom áiân bi, me bi mátrân liamekeiny mē. 25 E unyihmun je liamekeiny a seven: ame faipoipo thö atö, me ame mokcu, ke ba mátrân, ke ame hna but áiân ka keiny; 26 ke helâe minya ge loiny, me kuniny, ke ne o but hnyi seven. 27 Ke hwabödrin hia thö, ame mok minya ju momo. 28 Waleling, me ame he ka öiö ia gadrin a ödrin seven hnyi möt hmetu thö? anyin a ödrin hia ödrin e hom e. 29 Haba Iesu ame thu me ha ködrin, ka habe, Öbun e únykúme hwalö but, ke ca khan' öbun hna sihnalimen, me man maniny Khong. 30 Anyin adre me ca he ka hok áiân me úhamtamomo hnyi möt hmetu, ke adre me he ka tha úcú me ta je angela hnyi drany. 31 Ke haba hnyi möt hmetu únyi hnyi hna mok, hawa, öbun e ca aú hnen Khong hna ha köbun ka habe, 32 Inya ang Khongu Aberahama, me Khongu Isaaka, me Khongu Jakob? Haba Khong, me ca Khongon bi tavat adre mokcu, ke so bi tavat ae möt. 33 Ke a löng ut tavat ae se hia, me adre me láiâ hnen hna úne.

34 Ke a löng ut ta je Faresaio a g' ame ohnyibö ta je Sadukaio, me adre me úkhacaköu thö. 35 Ke haba ke at gadrin a at únö hnanyibu ame hnö he ka cubec e, hai-ngen ka habe, 36 At úne lö, ewa hnanyibu ae gan hnyi ta je hnanyibu? 37 Me e

MATAIO 23.

ame ha kâu, ka habe, U me he ka hnyok ka Than a Khongom ge hnyekom ae bekhöt, me hanom ae bekhöt, me oünykûmâm ae bekhöt. 38 Wale hnanyibu ae gan a bân. 39 Ke haba loiny, helâ minya e, ka habe, U ma betenge ge at ame laba hakekenyi u helâ me u bi. 40 Hnyi li hnanyibu eling ame him je hnanyibu hia me ta je perofeta.

41 Ame tiga úkhacaköu ta je Faresaio, ke Iesu ame hnei ödra ge ke únyi, ka habe, 42 Ieü únykúmenöbun ge Keriso? nöku ia e? Haingödrin kâu, ka habe, Nöku Davita. 43 Me e ame ha ködra, ka habe, Ieü ga Davita ame hâiâ e únyi ge Hanu, ka habe, Than, haingen.

44 Ame ha Than ka Tuhök, ka habe, Laba ju hnyi ke keihen a metök

Ke ne o but oge me he ka ip ta je iwa-hnaihmiönö möu hmelen li cam? 45 Awe, ame ne hâiâ e hnö Davata, ka habe, Than, ama kâmâu ka nokon? 46 Ke ba at ae khana he ka thu kâu ge ke hofuc, ke ba at ae hwege hnyekon he ka hnö hmetu e, hwân hnyi bong eling.

HNyimakan 23.

HABA Jesu ame ha ka tavat ae se hia me lateu minya ka habe, 2 Haba hnyat sihnalimen me ta je Faresaio adre me laba hon je utap tabö Mose: 3 anyin a wale, haba ta je únyi hia thithö ödrin e he ka ha köbun he ka ányâ, ányâ thö, me tuö: ke ca he öbun ka úcúcúbongoâ hwa-kecidrin; anyin adre me ha thibi, k' adre me ca ányâ bi. 4 Eke, adre me húgo ta je hok ae hmak, ke pason he ka hijen, me ip hon li bajebenynin tavat, ke ödrin bi, ödrin e ca bwebwelâ ge ke banyödrin. 5 Ke ödrin e ányâ hia anyidrin ta je huliwa hnân bi wânen at: anyin ödrin e olâwâ anyidrin je filateri, me ogânâ je baten je khaúdrin, 6 me wedrin ta je hna laba ae beönua hnyi ta je bijeü, ke je utap ae nua hnyi ta je sunago, 7 me he ka nom ködrin hnyi ta je hna úcú, me he ka hai' ödrin, ka habe, Rabi. 8 Ke haba öbun, ca he ka haw' öbun, ka habe, Rabi: anyin a khaca thibi at úne köbun, ke öbun ka liamekeiny hia. 9 Ke ca he ka hawâ ke at eang hmeledrany, ka habe, Kamen: anyin a khaca thibi kamöbun ethö hnyi drany. 10 Ke ca he öbun ka haw' öbun, ka habe, Je homakan: anyin a khaca thibi homakan köbun, wale Keriso. 11 Ke haba at ae

gan unyibun, me ame he ka athnyabaibun. 12 Ke adre me he ka öühnyúkongo at ame ka ogânâ e; k' adre me he ka ogânâ at ame ka öühnyukongoâ e.

13 Ekölö gabun hnyat sihnalimen me ta je Faresaio, hnyat thoi hnyok! anyin öbun e hlöng dokhon drany ka at: anyin öbun e ca didrö ka hnyin, ke öbun e thawâ minya tavat adre me labö didrö.

15 Ekölö gabun hnyat sihnalimen me ta je Faresaio, hnyat thoi hnyok! anyin öbun e vheno köiö me hnyei he ka heleü hanöbun a khaca, ke e ka wia e, öbun e ányâ e me me nokon gena a ibi olo nuainy hubun.

16 Ekölö gabun tavat úsú k' öbun wadröu bi, wale a tavat adre me ha, ka habe, A ne ke at ame khemanyin únyi ge uma kap, me únyi baú bi e; ke haba at ame he ka khemanyin únyi ge goliny uma kap, me hmâ bala but e. 17 Hnyat ae monu öbun me wadröu: anyin a ieü ae nua, a ne gol, a ne uma, wale at ame okabâ gol? 18 Ke a ne ke at ame khemanyin únyi ge taben hut, me únyi baú e; ke a ne ke at ame he ka khemanyin únyi ge bwihlany hon e, me e hmâ bala but e. 19 Hnyat ae wadröu: anyin a ieü ae nua, hawa a ne bwihlany, a ne taben bi hut, wale at ame okabâ bwihlany? 20 Anyin a wale, haba at ame khemanyin únyi ge taben hut, e ame khemanyin únyi ge e bi, me ta je únyi hia thithö minya adre ip ethö hon. 21 Ke haba at ame khemanyin únyi ge uma kap, me ame khemanyin únyi ge e bi, me únyi ge at minya ame laba eiö hnyin. 22 Ke haba at ame khemanyin únyi ge drany, e ame khemanyin minya ge theron anyin Khong, me at minya ame tabâ e.

23 Ekölö gabun hnyat sihnalimen me ta je Faresaio hnyat thoi hnyok! anyin a öbun e ham ke hanen a libenyitainy minet, me aneto, me komina, ke öbun e hia but hna biju ta je únyi ae gan hnyi hnanyibu, wale hna owisa, me ibetengiö, me labageju: e úcú öbun e ányâ ta je únyi e, ke ca hna bi ta je únyi eang. 24 Hnyat úsú, k' öbun je wadröu bi, hnyat öbun e hneköien minâ, me utâ bi kamela.

25 Ekölö gabun hnyat sihnalimen me ta je Faresaio, hnyat thoi hnyok! anyin öbun e hneü hoton utkaia me mini, ke haba bi hnyin, me unöngöt ge hna húgúnâ hwali me hwakecin ae kong. 26 Faresaio ae wadröu lö, hneü bânâ but hnyin utkaia me mini, me me so minya but hoton.

MATAIO 24.

27 Ekölö gabun hnyat sihnalimen me ta je Faresaio, hnyat thoi hnyok! anyin a öbun úcú me ta je erkemokadre me ohawá, ke so hmönyin at ka wá hoton, ke haba eú hnyin, me unöngöt ge je jeien komok, me ikiki hia. 28 Ke helâe, öbun ame manen wisa ka tavat, ke unöngöt dö eú hnyibun ge thoi hnyok me hulö.

29 Ekölö gabun hnyat sihnalimen me ta je Faresaio, hnyat thoi hnyok! anyin a öbun e up veten je erkemok hon ta je perofeta, me omecá je erkemok hon tavat ae wisa, 30 me ha, ka habe, A ne öhmun hnyi ta je bong bongon lakamöhmun, öhmun e ca he ka hnyi hanen tavat adre me hlingá ta je perofeta. 31 Waleling me öbun ka ohnathu öbun bi a öbun lakon tavat adre me hlingá ta je perofeta. 32 Awe, öunöngötá thö tulut anyin lakamöbun. 33 Öbun je on lö, ke lakon je vaipa, öbun e he ka kámáu ka kec ge hnaúhangöiny gena? 34 Wá bi, inya oge me kuná köbun ta je perofeta me tavat ae metá, me hnyat sihnalimen : ke öbun e he ka hlingá me osatauroá keihen gadrin, ke öbun e he ka osöá keihen hnyi umöbun je sunago, me sed' ödrin únyi hnyi ke taun ka hnyi ke taun: 35 me ame he ka o but köbun dra ae wisa hia adre hingálá eang hmeledrany, hwân ge dra drö Abela at ae wisa, ke ne o but ka dra dro Zakaria nöku Barakia, waleji öbun e hlingá hnyi wanben uma kap me taben hut. 36 E hnathu inya oge me ha köbun, ka habe, Ame he ka o ta je únyi hia eling ka dö ang.

37 Jerusalema, Jerusalema lö, at ame hlingá ta je perofeta, me lûá tavat adre me kuná káu! iny ibi osehia wek he ka úkha-caköuá lakom helâ me hinyen denakhoto ame tube lakon ge li labenyin, m' öbun ka höcö öbún! 38 Wá bi adre hia but hna degecá umöbun uma ke ba önyen. 39 Anyin a inya oge me ha köbun, ka habe, Öbun e ca he hmetu ka ö nya, ke ne o but úen öbun e he ka ha hnyin, ka habe, Hnen hnahic at ame o but hnyi ien Than.

HNHYIMAKAN 24.

HABA Iesu ame didrut úheny hnyi uma kap; me ame o but laten he ka omanená káu je ke keihen hna op uma kap. 2 Haba Iesu ame ha ködrin, ka habe, Hawa, öbun e wá but ta je únyi hia eang? e hnathu inya oge me ha köbun, ka

habe, Ame ca he bi ke veto ka mokut hon ke veto, ke adre me he ka tho degecá hia.

3 E ame tiga laba hon bucen Elaio, me ame o duöng káu laten, me ha, ka habe, omanená thö köhmun ame he ka o kehö ta je únyi e? ke ieú haten ge hnâm hna he ka o hmetu, me únyi minya a obiny hmeledrany? 4 Ke haba Iesu ame thu ködrin, ka habe, Wá eáú, wá e nye omonu öbun dut ke at. 5 Anyin ödra se hia adre me he ka o hnyi iök me ha, ka habe, Inya ang Keriso; me omonoá tavat ae se hia. 6 Ke öbun e he ka löng ge ta je vat, me hoon ta je vat: wá eáú, öbun nye he ka ot, anyin ame he bi ka o ta je únyi e, ke tiga hia bi obiny. 7 Anyin ame he ka tot ke hnyei ka ke hnyei, me ke dökhu ha ke dökhu; ke ame he ka hu je hmiá, me hwiöi hnyi ke je dok. 8 Ke haba ta je únyi eling, me wale hwân ta je vec. 9 Me adre me he ka hn' öbun dut ka tavat úöveci, ke adre me he ka hling' öbun: ke adre me he ka huköti öbun ta je hnyei hia thithö can iök. 10 Me ame he ka thö thö tavat ae se hia, me úalecuödraköu ödra, me bi iwahnaihmiöny. 11 Ke ame he ka o ta je perofeta thoi ae se hia me omonoá tavat ae se hia. 12 Ke can hnödra hna osehia hulö, ame he ka katebu ibetengiö anyin tavat ae se hia. 13 Ke haba at ame he ka tethmâ ke ne o but obiny, me e ame he ka möt. 14 Ke adre me he ka khetâ úthumetuiny dökhu ang hnyi hmeledrany hia hnân ohnatho ka ta je hnyei; me ame he ka o but obiny.

15 Awe, öbun ka wá únyi ae ikiki at ame okongo, ame tot hnyi dok ae kap, waleji a ha Daniela perofeta, (wáhma-khmeto ju hnen at ame áú), 16 haba hnyi úen e, e so ame he tavat adre me laba hnyi Juda ka kec ka hnyi bucen: 17 ke haba at hnyi hon uma, e so e me ca utut he ka hok únyi únyi hnyi hnyin umen uma: 18 ke haba at a belök, e so e me ca hmetu bi he ka hom anyin úkhaú. 19 Ke ekölö ge tavat a ödra erkin, me tavat adre me úasin hnyi je bong eling. 20 Ke hic ju öbun, m' öbun e ca he ka kec hnyi úen megic, ke sabath: 21 anyin ame he ka o vec ae gan hmâ e ba helâe ehac hnyi hwân hmeledrany ke ne o but walang ang, k' ame ca he bi ka helâe hmetu. 22 Ke adre ne ca owakhaletá ta je bong, me ba at ame he ka möt: ke so bi adre me he ka owakhaletá ta je bong e ge tavat adre úca. 23 Ke a ne ha köbun ke at, ka habe, Wá

bi, Keriso but ang, ke, Wale bi e; ca kap öbun. 24 Anyin ame he ka o je Keriso thoi, me je perofeta thoi, me adre me he ka omanená ta je haten ae gan, me ta je únyi hnán láia, m' adre me he ka omono tavat adre me úca a ne ca pason. 25 Wâ bi, oge hia but ha báná köbun. 26 Anyin a wale, ödra ka he ka ha köbun, ka habe, Wâ bi, e but hnyi hnyebuba, ca he th' öbun: ke Wâ bi, e but hnyi je hnyeüle eiö, ca kap öbun. 27 Anyin a haba hucuce ame o thö úheny jimeyö, k' ame umumelam jio; k' ame he ka helâe, e ka o hmetu Nokon at. 28 Haba hnen ta je komok, me wale dok ame úkhacaköu ta je aeto hnyin.

29 Ke hwaban vec hnyi úen eling, ame he ka ie menekholom but seúnö, ke ame ca he hmetu ka melam tehi, ke ame he ka kölu but ta je okhú, ke adre me he ka jijing ta je man hnyi drany: 30 me ame he ka manen hnyi drany haten Nokon at: ke ame he ka útengiö ta je tribu hia eang hmeledrany, ke adre me he ka wâ Nokon at ame o hon ta je úláiny drany, tha e me man me hmanenang ae gan hmâ. 31 Ke e ame he ka kunâ anyin ta je angela me ifucin khoto ame mea, me adre me he ka úkhacaköuâ thö hnen ta je hna úca únyi hnyi je ang a vak, hwân hnyi ke can drany ke ne o but ka hnyi ke can.

32 Ke ná th' öbun úhöücü me imeta: e tiga but je anginy ke hlau je lan, me khan' öbun ae hakekeny jut honivakeny; 33 ke helâe minya öbun, öbun ka wâ thö ta je únyi hia thithö e, khan' öbun dö ae hakekeny jut, ke e but ang hnyi hwanuma. 34 E hnathu inya oge me ha köbun a g' ame ca he ka ie hia dö eang, me ame he ka hwádâ ta je únyi hia e. 35 Ame he ka hia drany me hmeledrany, k' ame ca he bi ka hia hok ta je hofuc. 36 Ke haba bong me awa eling, me ba at ae khana, ke ca khana minya bi ta je angela ethö hnyi drany, ke Nokon, ke hake Kamen thibi. 37 Ame he ka helâ me je bong bongu Noa ioiny Nokon at. 38 Anyin a hnyi úen ae tiga ca o thö uou, adre me labö han me ic, me faipoipo, me úham ta momo, ke ne o but hnyi bong Noa ame didrö ka hnyi hnyin hu, 39 ke ca khan' ödra bi ke ne o but ame o thö uou, me ame tha obi' ödra hia but; ke ame he ka helâe, e ka o hmetu Nokon at. 40 Hnyi úen eling ame belök li at a lo; adre me he ka hom khaca, me hnen biju khaca: 41 lo li momo ame he

ka tha hnyi khenyi hwit; adre me he ka hom khaca, k' ame he ka hnen biju khaca. 42 Anyin a wale, hmákâ thö: anyin ae ca khan' öbun úen ame he ka o hnyin Tuhöbun. 43 Ke wâhmakhmeto ju öbun únyi ang, a ga ne wâ at ae tren uma hna hmak hnyi lit ame he ka o hnyin at ae venöu, me ame ne hia but hmákâ, me ca hna bi ködra he ka kia umen uma. 44 Anyin a wale laba penapena th' öbun: anyin a hnyi úen öbun e ca únyküme bi ame he ka o but Nokon at. 45 Ewa athnyaba ae hnathu me metâ, wale hnen tuhan hna otilâ he ka musö hnyaban, he ka khenâ jeú ködrin hnyi je hing úen cici? 46 Hnen hnahic athnyaba eling, e ka o tuhan ka wâ a g' ame ányâ helâe. 47 E hnathu inya oge me ha köbun, e ame he ka otilâ e he ka musö anyin ta je únyi hia. 48 Ke a ne ha athnyaba ae kong eü hnyi hnyekon, ka habe, E tiga bec Tuhök; 49 me hwân he ka kot je athnyaba a lahanen, me he ka han me ic unyin tavat adre ic me monu; 50 me ame he ka o tuhan athnyaba eling hnyi bong e ame ca únyküme, me hnyi úen e ame ca wâhmakhmeto hnyin, 51 me ame he ka subâ luâ e, me ha jekhon unyin tavat thoi hnyok; ame he ka tenge eling me úgiö ganyon.

HNYIMAKAN 25.

ME adre me he ka ouco dokhon drany me je hing hlu a ten, ödrin e ve hom anyidrin je lamepa he ka úkhanö me at a tep faipoipo. 2 E monu ke faiv gadrin, ke metâ ke faiv. 3 Haba hnyat e ae monu ödrin e hom anyidrin je lamepa, ke ödrin e ca hok wakaco minya bi: 4 ke haba hnyat ae metâ ödrin e hok wakaco hnyi anyidra je kaia me hnyi anyidra je lamepa. 5 E tiga bec at a tep faipoipo, me ödrin hia ödrin e ta mokut me mokut. 6 Ke hnyi wanbenset adre me kuku thö me ha, ka habe, Wale but ang at a tep faipoipo! Ai öbun he ka úkhanö mē. 7 Me ame todrö je hlu hia eling, me ányâwia anyidrin je lamepa. 8 Ke haba hnyat ae monu ödrin e ha ka hnyat ae metâ, ka habe, Hanyihmun ge hanen anyibun wakaco, anyin ae mok ut anyihmun je lamepa. 9 Ke haba hnyat ae metâ ödrin e thu me ha, ka habe, Ame ne ca he ka úcü öhmun bi m' öbun: ke so bi he th' öbun ka tavat úcü, me úco hobi köbuu bi. 10 Ke ödrin e tiga he bi he ka úcü, me ame o but at a

MATAIO 25.

tep faipoipo ; me haba hnyat ödrin e pena-pena, me ödrin e tha didrö mē ka hnyi bijeüiny faipoipo, ke adre me hlöng ut hwanuma. 11 Hwaban e, ame o but ke je hlu, me ha, ka habe, Tabony than, tabony than lö, khöng ut köhmun. 12 Ke e ame thu, me ha, ka habe, E hnathu inya oge me ha, ka habe, E ca khanö nya öbun. 13 Anyin a wale, hmáká ju öbun, anyin ae ca khan' öbun bong me awa ame he ka o but hnyin Nokon at.

14 Anyin a haba únyi e, me heláke ame he ke at ka hnyi ke hnyei, me e ame hawá lathnyabainy me hna but ködrin anyin ta je únyi. 15 Ke e ame ham ka ke at je talan a faiv, ke ka ke at lo, ke ka ke at khaca ; ka ke at me ke at hoton hnödrin hna khana ; ke e ame he but ka hnyi dok ae sákáú. 16 Haba at a kap je talan a thabúng, me e ame ie he me úcú hanen, me ame hu minya hanen a thabúng hmetu ke je talan. 17 Ke heláe me at a kap lo, e ame úcú hanen ke lo hmetu. 18 Ke haba at a kap khaca, me e ame he but me hiny káná, me ikhálá mone anyin tuhan. 19 Ke hwaban ta je bong ae se hia ame o but tuhan lathnyaba eling, me tuluto anyidrin ta je únyi. 20 Me ame o but at a kap je talan a thabúng, ke e ame hom minya ke je talan a thabúng me ha, ka habe, Than lö, u je hna könya je talan a thabúng : wá bi, oge hia but úcú hanen thabúng ke ta talan minya. 21 Me haingen tuhan ame ha káu, ka habe, Ole, u athnyaba ae so me hnathu, u je hia but hnathu hnyi ta je únyi ae wakhalet, oge me he ka otilö u hon ta je únyi ae se hia, didrö ka hnyi senyin anyin tuhám. 22 Me ame o but minya at a kap lo li talan, me ha, ka habe, Than lö, u je hna könya lo li talan : wá bi oge hia but úcú hanen a lo ke li talan minya. 23 Haingen than ame ha, ka habe, Ole, u athnyaba ae so me hnathu, u je hia but hnathu hnyi ta je únyi ae wakhalet, oge me he ka otilö u hon ta je únyi ae se hia : didrö ka hnyi senyin anyin tuhám. 24 Me ame o but minya at a kap talan a khaca, me ha, ka habe, Than lö, inya oge me wáhmakhmetu u, a u at ae hwege monu hnyimákám, u me meno hnyi dok u je ca tā hnyin, me úkhöúná hnyi dok u je ca jijingá hnyin : 25 me oge me ot me he me konám ányám talan hnyi káná ; ke wale hmetu ang únyi a ányám. 26 Me haba tuhan ame thu me ha káu, ka habe, U athnyaba ae kong me

úsēnyin, e khatö u a oge me meno hnyi dok oge ca ta hnyin, me úkhöúná hnyi dok oge me ca jijingá hnyin ; 27 anyin a wale, hamám he ka ip anyik mone unyin tavat úcú hobi káu iny ka o thö, m' oge me he ka hu hmetu anyik me hna bi hanen. 28 Anyin a wale, hügúná thö gan talan me ham ka at a tren talan a ten. 29 Anyin adre me he ka ham ködra hia tavat ae hu gadra, me me se hia but gadra : ke haba at ae ba adre me he ka hügúná gan únyi e ame hu. 30 Ke khúá but athnyaba ae únyi baú ka hnyi menekholom hnyöu : ame he ka tenge eling me úgiö ganyon.

31 Ke e ka o but Nokon at hnyi anyin hmanenang tha e me anyin ta je angela hia thithö, me e ame he ka laba hon theroniny anyin hmanenang : 32 ke ame he ka úkhacaköu ta je hnyei hia thithö hnyi hnyimakan : ke e ame he ka khená lu' ödra but, helá me at tuö mamoe ame khená luá ta je mamoe me ta je got : 33 me e ame he ka ip ta je mamoe hnyi ke keihen a metân, me ta je got hnyi ke keihen a meny. 34 Haba Than ame he ka ha ködra hnyi ke keihen a metân, ka habe, Ai öbun, öbun hia tavat a ohnahicá hnen Kamök, hu hwajekhöúbun ju dökhü adre penapena hobi köbun hwân hnyi hna bi taben hmele-drany : 35 anyin a oge mekihnânem, m' öbun e ha ök : oge me beic, m' öbun e habelik : iny atkanyua, m' öbun e hawo nya : 36 oge me he thu, m' öbun e okhaúö nya : oge me mok, m' öbun e senö nya : ke inya hnyin uma ceat, m' öbun e o thö könya. 37 Me ame he ka thu káu huen tavat ae wisa, ka habe, Than lö, öhmun e ö u kehö u mekihnânem, m' öhmun e hám, k' u beic m' öhmun e habelám ? 38 Ke öhmun e ö u kehö a u atkanyua, m' öhmun e hawo u ? ke he thu, m' öhmun e okhaúö u ? 39 Ke öhmun e ö u kehö a u mok, ke hnyin uma ceat, me o thö köu ? 40 Me ame he Than ka thu ködrin, ka habe, E hnathu inya oge me ha köbun, habaji ge hnöbun hna ányá ka ke at gadra ae úhnyú-kong hmönyin a je liamekeiny mönya, me öbun e ányá ling könya. 41 Ke e ame he ka ha ködra hnyi ke keihen a meny, ka habe, Úsákáúö but mönya, öbun tavat ae hnaúhangö ka hnyi meic ame ca mok balua, waleji adre penapena hobi kö diabolö me anyin ta je angela : 42 anyin a oge me mekihnânem, k' öbun e ca ha ök : oge me beic, k' öbun e ca habelik : 43 iny atkanyua, k' öbun e ca hawo nya ; oge me he

thu, k' öbun e ca okhaüö nya; oge me mok, ke oge me laba hnyi uma ceat, k' öbun e ca senö nya. 44 Ke ödra minya adre me he ka thu, me ha, ka habe, Than lö, öhmun e ö u kehö a u mekihnanem, ke beic, ke atkanyua, ke he thu, ke mok, ke laba hnyin uma ceat, m' öhmun e ca hadruö u? 45 Me e ame he ka thu ködra, me ha, ka habe, E hnathu inya oge me ha köbun, ka habe, Habaji ge hnöbun hna ca anyá ka ke at gadra ae úhnyükong hmönyin, me öbun e ca anyá minya ling könya. 46 Ke haba tavat ang, me adre me he ka he ka hnyi hna bi hwaban ame ca ba balua; ke haba tavat ae wisa hwakecidra ka hnyi möt ame ca ba balua.

HNYIMAKAN 26.

KE a hia but Iesu umo ta je hofuc hia eling, me e ame ha ka laten, ka habe, 2 Öbun e wá ae lo biju li bong me ame he ka o but paseka, ke adre me he ka alecuá Nokon at me he ka osatauroá. 3 Ke hnyi úen e, ame úkhacaköu thö je taben tavat bihut, me hnyat sihnalimen, me wahingatin y hnyei ka hnyi uma umen taben bihut ae nua, Kaiafa ien; 4 ke adre me úhnenamoköuá he ka köt Iesu ge iyawö, m' adre me he ka hlingá e. 5 Ke haingödrin, ka habe, Ca anyá bi hnyi úen bijeu wá e nyi imonumonuny tavat.

6 E but Iesu hnyi Bethania hnyi uma umö Simona a lepera, 7 me ame o but káu ke momo ae hu kaia alabasa tangen muro ae gan hmá hwaban, me hingálá hon ban, hnyi úen e ame tiga laba ju ka han. 8 Ke a wá but laten me ame hmönyidrin me ha, ka habe, Hnân eü ame öunyibáúá heláe? 9 Anyin adre ne úco, me gan hmá hwaban he ka ham ka ta je theduoc. 10 Ke Iesu ame wáhmakhmeto, me e ame ha ködrin, ka habe, Ieü gabun öbun e ovhelá momo? e ame hia but anyá huliwa ae so könya. 11 Anyin a e bala bi unyibun ta je theduoc; ke oge me ca he bi nya ka laba bala eang unyibun. 12 Anyin a haba hnen momo hna hingálá muro eang ka hnyi unyik, e ame anyá he ka penapena hna könim nya. 13 E hnathu inya oge me ha köbun, ka habe, Haba hnyi je dok hia hnyi hmeledrany adre me he ka khetá hnyin je úthumetu ae so eang, adre me he minya ka ha ge hna anyá hnen momo eang hnân únykúme káu.

14 Haba ke at hnyi je twelv, Juda

Isakariota ien, ame he ka je taben tavat bihut, 15 me ha, ka habe, Ieü ke únyi öbun e he ka ham könya m' inye he ka alecuá e köbun? Me adre me tuluto me ham káu ta je mone a thöte. 16 Ke hwân hnyi úen eling, e ame heleü deny he ka alecuá e.

17 Haba hnyi bong a bániny bijeuiny areto adre ca levená bi, me ame he but kö Iesu laten, me ha, ka habe, Ewa dok u me wem öhmun e he ka penapena hobi köu, me u me he ka han paseka? 18 Me e ame ha, ka habe, He th' öbun ka hnyi taun ka ke at, me ha káu, ka habe, Haingen At úne, E hakekeny jut úök; ke oge me he ka tha han paseka me latök hnyin umâm uma. 19 Haba laten ödrin e mádrá helá me hna húna hnö Iesu ködrin; me ödrin e penapena paseka. 20 Ke a sahac ut, k' ame tha laba he ka han me laten a twelv; 21 ke ödrin e tiga han me e ame ha, ka habe, E hnathu inya oge me ha köbun a g' ame he ke at gabun ka alecuo nya. 22 Me ödrin e hmak gan hmá, me hwân he ka ve ha káu, ka habe, Than lö, ia, inya? 23 Me e ame thu me ha, ka habe, Haba at ame tha hnû jeü mönya hnyin mini, me wale at ame he ka alecuo nya. 24 Ame he but ka he Nokon at helá me hna sihnalimen gan: ke ekölö ge at a alecuá Nokon at a deny! adre ne ca hnokoá at eling, ame ne so bi káu. 25 Haba Juda at ame alecuá e, ame thu me ha, ka habe, Rabi, hawa inya? Haingen káu, ka habe, U me ha e. 26 Ke ödrin e tiga han, me Iesu ame hom areto, me oleá, me thuthu; ke e ame ham ka laten me ha ködrin, ka habe, Hom dö, an ju; walang unyik. 27 Ke e ame hom utkaia, me oleá, me ham ködrin, me ha, ka habe, Ijem d' öbun hia; 28 anyin a walang drök únyi hnyi úhinyköu, adre me hingálá e hobi káu tavat ae se hia, me hnân thang ta je hulö. 29 Ke inya oge me ha köbun, ka habe, oge me ca he hmetu ka hnyi ijem wan vine eang, ke ne o but hnyi bong oge me he ka tha ijem m' öbun hnyi dökhu dokhon Kamök.

30 Ke ödrin e hia but hai khumöng me ödrin e he but ka hnyi bucen Elaio.

31 Haba Iesu ame ha ködrin, ka habe, Öbun e he hia ka thö thö can inya hnyi lit ang: anyin adre hia but sihnalimen, ka habe, Oge me he ka kot at ame tuö mamoe, me ame he ka vese but ta je mamoe. 32 Ke iny ka möt hmetu thö, me oge me he ka bök Galilaia ai, ke bilibun biju. 33

Haba Peteru ame thu kâu me ha, ka habe, Ödrin e ne he ka thö hia thö gam, me oge me ca he bi nya ka munyi thö thö. 34 Haba Iesu ame ha kâu, ka habe, E hnathu inya oge me ha kôu, ka habe, Haba hnyi lit ang, ke tiga ca kokok bi khoto, me u me he ka ibi okun ivinö nya. 35 Haba Peteru ame ha kâu, ka habe, Eja ke ne oge ne he ka tha mok möu, oge me ca he bi nya ka ivinö u. Helâe minya hwan laten hia.

36 Haba Iesu ame tha o mödrin ka hnyi ke dok Gethesemane ien, me e ame ha ka laten, ka habe, Laba ju öbun ang, m' inye me he ju ka hic elâ. 37 Me e ame hum Peteru me li laku Zebedaio, me hwân he ka vec gan hmâ me hmak hnyekon. 38 Me e ame ha ködrin, ka habe, Ame vec gan hmâ hanuk helâ me ioiny mok: laba ju ang me tha hmâkâ mönya. 39 Me e ame he ka hnyi dok ae hakekeny, me ta ju hnyikânâi, me hic, me ha, ka habe, Cica lö, a ne ca pason, ö u ohia but utköiö eang gâk: ke so bi e ca hamök, ke ka hamâm bi. 40 Me e ame o thö ka laten me ö 'drin ödrin e mokut, me e ame ha kö Peteru, ka habe, Hawa, e ca khan' öbun he ka tha hmâkâ mönya hnyi awa a khaca? 41 Hmâkâ ju me hic, m' öbun e ca didrö ka hnyi ûcûbic: anyin ame weny hnyok, ke sényin bi unyin. 42 Ke e ame he hmetu ka hic me ha, ka habe, Cica lö, a ne ca khana he ka hia but utköiö eang, iny ka ca ijem, ânyâ thö wem. 43 Me e ame o hmetu me ö 'drin ödrin e mokut hmetu, anyin ae hmak je emaködrin. 44 Ke e ame hn' ödrin ju me he hmetu, me okun hic, ame ha thibi hofuc a khaca. 45 Me e ame o ka laten me ha ködrin, ka habe, Mokut ju öbun, me menâ: wâ bi, e hakekeny jut awa, ke adre hia but alecuâ Nokon at ka hnyi je hnyamen tavat ae kong. 46 Todrö, ötin e he thö: wâ bi, wale but ang at ame he ka alecuo nya.

47 E ame tiga fuc, me wâ bi, ame o but Juda, ke at hnyi twelv, ke tha e me tavat ae se hia, adre me vhat hele vat me utöhmü, ûnyi ge je taben tavat bihut me wahingatiny hnyei. 48 Ke haba at ame alecuâ e ame ha ködrin haten, ka habe, Haba at eâu oge me he ka úcimhnyimak më, wale, kât ju öbun. 49 Me e ame ie he kö Iesu me ha, ka kabe, E Rabi lö; k' ame úcimhnyimak më. 50 Haba Iesu ame ha kâu, ka habe, Hanök, ânyâ thö ûnyi u je o kâu. Me adre me o me hinöbeny hu Iesu,

me hom e. 51 Ke wâ bi, ke at ge latö Iesu ame inâ but hnyamen, me oc dö anyin hele vat, me kot athnyabainy taben bihut, me subâ but hnyikönyen. 52 Haba Iesu ame ka kâu, ka habe, Inâ hmeto but ânyâm hele vat ka hnyi tangen; anyin a haba tavat hia adre me hom hele vat, me adre me he ka mok ge hele vat. 53 Anyin a hawa, u je ûnykûme e ca khanö nya he ka khöü walang ang ka Kamök, me e ame he ka ham könya ta je angela ae se hia hon twelv ta je legeona? 54 Ke ame he ka kâmâu he ka hwâdâ hna sihnalimen a g' ame he ka helâe? 55 Hnyi awa eling Iesu ame ha ka tavat ae se hia, ka habe, Hawa, öbun e o but me je hele vat me je utöhmü helâke me ka at venöu he ka hum nya? Oge me laba hnyin uma kap hnyi ta ogö bong he ka ûne, ke öbun e ca köt nya. 56 Ke adre me ânyâ hia e me me hwâdâ hna sihnalimen ge ta je perofeta. Ke haba laten, me ödrin e hna but e me kec.

57 Ke haba tavat adre me köt Iesu, me adre me lelö thö e kö Kaiafa, at bihut ae nua, waleji dok ame úkhacaköu hnyin hnyat sihnalimen me wahingat. 58 Ke haba Peteru ame omise hoton ka hnyi uma umen at bihut ae nua, k' ame didrö me tha laba me lathnyaba he ka wâ obiny. 59 Ke haba je taben tavat bihut me tavat úhnenamö hia adre me elâm he ka bi fuco thoiö Iesu, m' adre me he ka hlingâ e; 60 me adre me ca wâ bi, ke so bi a o thö tavat ae se hia he ka bi fuco thoiâ. Ke hwaban e ame o thö li at a lo, 61 me ha, ka habe, Haingen at ang, ka habe, E khanö nya he ka kia uma umen Khong me otillâ hmetu hnyi kun ta bong. 62 Me ame todrö at bihut ae nua, me ha kâu, ka habe, E ba hnân thu gam? ieû hnödrin hna ohnathoâ gam. 63 Ke baba Iesu ame laba hnyibû, Me haba at bihut ae nua ame ha kâu, ka habe, Inya oge me hûna hwegiâ köu ge Khong ae möt, m' u me he ka ha köhmün, ka habe, U thibi Keriso a Nokon Khong, hawa? 64 Haingö Iesu ame ha kâu, ka habe, U me ha e: ke inya oge me ka köbun, ka habe, Nyiele öbun e he ka wâ Nokon at ame laba hnyi ke keihen maniny man a metân, k' ame he ka o hnyi úlâiny drany. 65 Me haba at bihut ae nua ame kia anyin je úkhaû, me ha, ka habe, E ame hia but fuc bigan ka Khong: ke hnân eû hmetu a g' ame he ke at ka ohnatho? wâ bi, öbun e hia but löng wa-

MATAIO 27.

lang ang hofuc bigan: 66 ke ieu únykúmenöbun? Me adre me thu, ka habe, E úcú e he ka mok. 67 Me adre me hangöjä hnyimakán me kháú e: ke haba keihen adre me kolop e, 68 me ha, ka habe, Perofetö u thö köhmun, Keriso: ia ame khöú u?

69 Ke haba Peteru ame laba eú, me ame he but káu ke hlu me ha ka habe, Uji ke at ame tha e me Iesu at Galilaia. 70 Ke e ame ivinö hnyi hnyimaködrin hia, ka habe, E ca khanö nya hnám hna ha. 71 Me e ame didrut ka hnyi poretiko, me ame wá e ke hlu, me e ame ha ka tavat eling, ka habe, Tha at minya ang me Iesu at Nazareta. 72 Me e ame ivinö hmetu, me khemanyin ka habe, E ca khanö nya at e. 73 E tiga ca kueny me ame o but tavat adre me útililen me ha kö Peteru, ka habe, E hnathu u ke hanödrin; anyin ame omanenö u ifucám. 74 Me e ame hwán he ka fuc hwege me khemanyin, ka habe, E ca khanö nya at e. Me ame ie kokok dö khoto. 75 Me haba Peteru ame únykúme hofuc eji ho Iesu ame ha, ka habe, U me he ka okun ivinö nya ke tiga ca kokok khoto. Me e ame didrut me tenge blöuhlöu.

HNyimakan 27.

HNYI hnyomakatu, haba je taben tavat bihut hia me wahingatiny hnyei, adre me si hnö Iesu, m' adre me he ka hlingá e: 2 ke adre me ca e, me lelö thö e me hna but e kö Pilato a gavena.

3 Ke a wáhmakhmeto but Juda at ame alecuá e, a ga mou thö gan, me e ame ietra, me hom hmetu je mone a thöte ka je taben tavat bihut me wahingat, 4 me ha, ka habe, Oge hia but ányá hulö he ka alecuá dra ae ba hnyikongon. Ke haingödra, ka habe, U me ha bi köhmun? ka u bi u. 5 Me e ame degec je mone hnyin uma kap, me he but; me e ame he but me hnok. 6 Haba je taben tavat bihut, adre me hom je mone, me ha, ka habe, E ca úcú he ka ip hnyi tangen bwihlany, anyin a hwaban dra. 7 Ke adre me úhnenamö, me úco hwaban e ke utkáná anyin at ame up mini, me hnán khön komok a je atkanyaua. 8 Waleling, m' adre me hwenyi ien utkáná eling, ka habe, Utkánáiny dra, ke ne o but hnyi bong ang. 9 Me ame hwádá thö hna ha ga Jeremia perofeta, ka habe, Adre me hom je mone a thöte a hwaban

at adre hia but ha me hwaban, wale a ha hwaban ge keihen lakon Isaraela; 10 me adre me ham me hwaban utkáná anyin at ame up mini helá me hnen Than hna hna könya.

11 Ke Iesu ame tot hnyi hnyimakau gavena: ke haba gavena ame hnö e, ka habe, U tuhan at Juda? Haingö Iesu ame ha káu, ka habe, U me ha e. 12 Ke ame bi fuco e hnen ta je taben tavat bihut me wahingat, me e ame ca thu bi. 13 Me haba Pilato ame ha káu, ka habe, U me ca löng a ödrin e osehia but bi fuci u? 14 Ke e ame ca thu bi káu ke hofuc a khaca: me me láia gan hmá but gavena. 15 Ke haba hwakecin gavena hnyi úen bijeu he ka labö thang ut ka tavat ke at adre ca, a at adre me weny. 16 Ke e hu gadra at ae lung adre ca, Barabasa ien. 17 Ke adre hia but úkhacaköu, me haba Pilato ame ha ködra, ka habe, Ia webun oge me he ka thang ut köbun? Hawa, Barabasa, ame ne Iesu adre me hwenyi ien me Keriso? 18 Anyin ae khana but a g' adre hna e can ihuhnyinköu. 19 Ke e ame tiga laba hon taben owisa, ke haba áian ame úkhünöng káu he ka ha, ka habe, Ca he bi u ka ányá ke únyi ka at e ae wisa: anyin a oge hia but íbiose vec gan hnyi bong ang hnyi bwi. 20 Ke haba je taben tavat bihut me wahingat adre me cubec tavat ae se hia he ka sumätö Barabasa, m' adre me hlingö Iesu. 21 Haba gavena ame thu, ka habe, Ia ae webun gadru, m' inye he ka thang ut köbun? Me adre me ha, ka habe, Barabasa. 22 Haba Pilato ame ha ködra, ka habe, Ke ieu oge me he ka ányá kö Iesu adre me hwenyi ien Keriso? Me haingödra hia, ka habe, Osatauroá thö. 23 Me e ame ha, ka habe, Anyin a ie monu e ame ányá? Me adre me ha hwegiá, ka habe, Osatauroá thö. 24 Ke a wá but Pilato a e ame ca he ka ton, k' ame kú bi thö imonumonuny, me e ame hom utköiö, me hinyem hnyi hnyimakan tavat, me ha, ka habe, Iny alai ge dren at ang ae wisa: hamöbun biju. 25 Haba tavat hia adre me thu, ka habe, E so e he dren ka takú öhmun me lakuhmun. 26 Me e ame thöng Barabasa but ködra: ke e ame osöi Iesu me hna but he ka osatauroá.

27 Haba je soja anyin gavena adre me hum Iesu ka hnyi uma umen than, me öúkhacaköuá káu je hanen deö vat hia. 28 Ke adre me uny jut anyin je úkhaú,

me okhâvâ bi ge ûkhaû ae dra. 29 Ke adre me hwâwâ je tö ae ûdedö hnân korona, me obicâ e, me ip hlowe hnyi hnyamen a metân; ke adre me ciboucâ hnyi hnyimakan, me hlumâ e, me ha, ka habe, E ge Tuhan at Juda! 30 Mc adre me hangöjâ e, me hom hlowe, me kot ban. 31 Ke adre hia but hlumâ e, me adre me uny hmetu but ûkhaû gan me okhâvâ ge je ûkhaûen bi, me lelö thö e he ka osatauroâ.

32 Ke adre me didrut me wâ ke at Kurene, Simona ien: me adre me musö e he ka tha he, me me he ka vaden anyin satauro. 33 Ke adre me o but ka ke dok, Gologotha ien, haba bongon, me, hnen ibokomok, 34 me adre me ham kâu waina adre ûhaniken me khöhlöng hnân ic: ke a hia but drem cubecâ, me e ame hócö he ka ijem. 35 Ke adre hia but osatauroâ e, me adre me khenâ anyin je ûkhaû ködra bi, adre me uglekôbâ: 36 ke adre me ûlalabainy me tuö e eling. 37 Ke adre me ip ethö hon ban hna bi fuco e adre sihnalimen, ka habe, WALANG IESU A TUHAN AT JUDA. 38 Me adre me tha osatauroâ më li at venöu, ke at hnyi ke keihen metâ, me ke at hnyi ke keihen me. 39 Haba tavat adre me he eling adre me hiâ e, me nyinyika je bödra, 40 me ha, ka habe, E, u at ama kia uma kap, me otilâ hmetu hnyi kun ta bong, omeli u thö: u je ne Nokon Khong utut ûhem hnyi satauro. 41 Ke helâe minya je taben tavat bihut, tha ödrin me hnyat sihnalimen, me wahingat adre me hiâ e, me ha, ka habe, 42 E ame omelö keihen; ke haba e bi e ca khana bi he ka omelö e. E, Tuhan at Isaraela; e so e ame utut walang ang ûheny hnyi satauro, m'ate me he ka labageju kâu. 43 E ame labageju ka Khong; e so e he ka omelö e walang ang, e ka weny e: anyin a e ame ha, ka habe, Inya ang Nokon Khong. 44 Ke haba li at venöu waleji adre me tha osatauroi ödru më, me ödru me hnyi haikongoâ helâe.

45 Ke ame menekholom but hnyei hia, hwân hnyi awa a siks ke ne o but ka hnyi awa a nain. 46 Ke helâke me hnyi awa a naininy Iesu ame hongot hwege, ka habe, Eli, Eli, lama sabakethani? walang bongon, ka habe, Khonguk, Khonguk lö, ieü gam u me hnö nya but? 47 Haba keihen adre me üttilen eling adre me löng, me adre me ha, ka habe, Haba at ang ame hao Elia. 48 Ke haba ke at gadra ame ie

wading, me hom ohmanenâ, me hülülüâ hnyi vinega, me ip hnyi obiny hlowe, me habelen e. 49 Ke haba kolon gadra, me adre me ha, ka habe, Më khanang: e so ate me wâ ame ne he Elia ka o he ka omelö e. 50 Ke a hia but Iesu hongot hmetu, me e ame hna but hanon. 51 Ke wâ bi, ame khekhe lo but mano singiny uma kap hwân ethö ke ne o but eü; ke ame jijing dö hmele-drany; me ame hmouca but ta je kic; 52 ke ame memang ut ta je erkemok; ke se hia ta je unyin tavat ae kap a tavat adre me mokut, me adre me möt hmetu thö, 53 me didrö ûnyi hnyi ta je erkemok hwabab hnen hna möt hmetu, k' adre me didrö ka hnyi taun ae kap, me manen dut ka tavat ae se hia. 54 Ke haba keneturio, me tavat minya unyin, wale hnyat adre me tuö Iesu, ödrin e wâ hwiöi, ke ta je ûnyi adre me ânyâ, me ödrin e ot gan hmâ, me ha, ka habe, E hnathu Nokon Khong at ang. 55 Ke wale minya omomo ae se hia adre me wâ sâkâûâ, waleji hnyat ödrin e he hotu Iesu ûheny Galilaia, me bi athnyabaiuy: 56 ke wale minya unyidrin Maria Magadalena, me Maria hinyö Iakobo me Jose, me hinyen li laku Zebedaiö.

57 Ke haba hnyi sahac ame o but ke at ae tren omjeü ûheny Arimathea, Josefa ien, wale ke atö Iesu minya: 58 haba at ang ame he but kö Pilato me sumâtâ unyi Iesu. Haba Pilato ame hûna bi he ka ham. 59 Ke Josefa ame hom unyin me lan e ge mano lino ae kalaut, 60 me ip e hnyi anyin bi erkemok ae teb ûnyi, waleji e ame tho hnyin kic: me hagutâ veto ae gan ka hnyi hnyimen erkemok, ke e ame he but. 61 Ke wale Maria Magadalena me ke Maria, ödru me laba cicö erkemok.

62 Ke haba nyi, wale bong a hwaban bong hnân Penapena, ame ûkhacaköu thö kö Pilato je taben tavat bihut, me ta je Faresaio, 63 me ha, ka habe, Tabony than lö, öhmun e ûnykûme a g' ame ha hnen at iyawö eling, kë tiga möt, ka habe, Hwabab kun ta bong oge me he ka möt hmetu. 64 Anyin a wale hûna ju, m' adre me he ka ohmâ erkemok ke ne o but hnyi bong a kuniny, wâ e nye o but laten me venâu e, me ha ka tavat, ka habe, A möt hmetu thö e ûheny hnyi hna mok: me ame he ka gan dut monu a biliny hon monu a bân. 65 Haba Pilato ame ha ködrin, ka habe, E hu bi gabun tavat tue: he th' öbun, hamöbun bi he ka ohmâ hoton hnöbun hna khana. 66 Me ödrin e he but, me ohmâ wia

MAREKO 1.

erkemok, me ödrin e okeceâ hmâ veto ge haten, ke e bi unyidrin tavat tue.

HNYIMAKAN 28.

HABA hnyi obiny bong sabath, ke tiga okubelitin' bong a bân hnyi wik, ame o but Maria Magdalena me ke Maria he ka wâ erkemok. 2 Ke wâ bi, wale hwiöi ae gan hmâ ; anyin ame utut angela anyin Than úheny hnyi drany, me o, me hagutâ veto únyi hnyi hnyimen erkemok, me laba ju hon. 3 Haba hnyimakan helâ me hucuce, ke hau anyin úkhaú : 4 me ame öbubuny hnyat tue me ot, ke helâke je komok ödrin. 5 Haba angela ame thu me ha ka watamomo, ka habe, Ca ot bi : anyin ae khanö nya a öbun e elöm Iesu waleji adre osatauroâ. 6 E hia but ang ; anyin a e a möt hmetu thö, helâji me hnen hna ha. Ai öbun ka wâ dok waleji a mokut hnyin Than. 7 Ke ie logot d' öbun me ha ka laten, ka habe, E a möt hmetu thö úheny hnyi hna mok ; ke wâ bi, e a bân dut Galilaia ai, ke bilibun biju ; öbun e he ka iouny mē eling : awe, oge hia but ha köbun. 8 Me ödrin e ie he logot úhedrin hnyi erkemok me ot me senyin ae gan hmâ, me wadring he ka thumeto laten. 9 Ke wâ bi Iesu ame úkhanö mödrin, me ha, ka habe, Talofa. Me ödrin e he me kât li can, me khudrung ju kâu. 10 Haba Iesu ame ha ködrin, ka habe, Ca ot bi : he

th' öbun ka thumeto je liamekeiny mönya madre me he ka he but Galilaia ai, me ödrin e he ka iouny eling mönya.

11 Ödrin e tiga he, me wâ bi, keihen hnyat tue ödrin e he ka hnyi taun, me thumeto je taben tavat bihut ge ta je únyi hia adre ányâ. 12 Me adre me úkhacaköu me wahingat, me úhnenamö, me adre me ham ka ta je soja mone ae gan, 13 me ha, ka habe, Ha th' öbun, ka habe, Haba laten ödrin e he hnyi hnyinghet me venâu e, ke öhmun tiga mokut bi. 14 Ke a ne o but hofuc e ka li hnyikönyen gavena, m' öhmun e he ka cubec e, me ohia anyibun hmak. 15 Me adre me hom je mone, me ánya helâ me hna n' ödrin : ke haba hofuc e adre me labö ha ehele unyin at Juda, ke helâe minya ke ne o but hnyi bong ang.

16 Ke haba laten a eleven ödrin e he Galilaia ai, ka hnyi bucen waleji a hia but Iesu kú ködrin. 17 Ke ödrin e wâ but e, me ödrin e khudrung ju kâu : ke haba keihen ödrin e loloâ. 18 Me haba Iesu ame o but ködrin me ha hofuc ködrin, haingen, ka habe, Adre hia but ham könya musi hia hnyi drany me eang hmeledrany. 19 Anyin a wale, he th' öbun ka bi latök hnyi ta je hnyei hia thithö, me bapataisoï ödra hnyi ien Kamen, me Nokon, me Hanu Kap : 20 ke n' ödra thö he ka vheno ta je únyi hia thithö waleji oge me hûna köbun : ke wâ bi, inya oge me tha e möbun hnyi ta je bong hia thithö ke ne o but ka hnyi obiny hmeledrany.

EVANGELIA A SIHNALIMEN

MAREKO.

HNYIMAKAN 1.

WALANG hwâniny úthumetu ae so anyi Iesu Keriso, a Nokon Khong. 2 Helâ me hna sihnalimen ga Isaia pefofeta, ka habe, Wâ bi, inya oge me kunâ anyik úthumetu hnyi hnyimákâm, At ame he ka ányâwia dem gethen ;

3 Ifucin at ame hongot hnyi hnyeububa, ka habe,

Penapena ju gethen deny Than, Owisa thö deny ta je gethen ;

4 Ame o but Ioane, at ame bapataisoï hnyi hnyeububa me khetâ hna bapataisoïny ietra m' adre me thang degecâ but ta je hulö. 5 Me ame he but kâu hnyei Juda hia, ke at Jerusalema hia ; me e ame bapa-

MAREKO 1.

taisoï ödra hnyi wagewe Joridano, k' adre me ve omanená anyidra ta je monu. 6 Ke leünen kamela khaüö Ioane, ke e ame ka weikâ hnyin ge wen unen meno, ke haba an jeü, me hamon me haneiny hnyot. 7 Ke e ame khetâ, me ha, ka habe, Ame he jem ke at a biliny ae man huk, e ca úcú bi nya ka nom me thang hna hukâlâ tangen li hnyeúcán. 8 Inya oge me bapataisoï öbun ge köiö; ke e ame he ka bapataisoï öbun ge Hanu Kap.

9 Ke haba hnyi je bong eling ame o but Iesu úheny Nazareta hnyi Galilaia, me ame bapataisoâ e Ioane hnyi Joridano. 10 Ke e ame tiga ölö thö úheny hnyi wagewe, me e ame wâ drany adre me khöng ut, me Hanu ame gâ hon e helâ me biny : 11 me ame o but hwan hofuc únyi hnyi drany, ka habe, U thibi Nökuk a oúnykúmik, inya oge me senyin köu.

12 Haba Hanu ame ie kunâ e ka hnyi hnyeubaba. 13 Ke e ame laba hnyi hnyeubaba fâte je bong, ame cubec e hnen Sataana; ke tha e më omeno ae hiny; ke haba ta je angela adre me bi athnyabainy.

14 Ke hwaban hna cö Ioane, Iesu ame o hnyi Galeilaia, ame khetâ úthumetu ae so anyin Khong, ka habe, 15 A hwâdá but úen, ke hakekeny jut dökhú dokhon Khong : ietra ju öbun, me kap úthumetu ae so.

16 Ke e ame he hnyi baten köiöiny Galilaia, me ö Simona, me Anederea liamekeiny me Simona, ödru me thong ert eü hnyi köiö : anyin a ödru li at thut. 17 Haingö Iesu ame ha ködru, ka habe, He hotuk me oge me he ka wi' öbu me hnân thelo at. 18 Me ödru me ie hna but útödru tang ert me he hoton. 19 Ke e ame tiga he me e ame ö Iakobo nöku Zebedaio me Ioane a liamekeiny më, ödru me laba hon hu me ena je ert. 20 Me e ame ie hau' ödru minya : ke ödru me hna but kamödru a Zebedaio me je lathnyaba hon hu, me he hoton.

21 Ke ödrin e he thö Kaperenauma ai; me e ame ie didrö ka hnyi sunago hnyi sabath me úne. 22 Me adre me láia hnen hna úne : anyin a e ame n' ödra helâ me at ae tren man, ke ca helâ me hnyat sihna-limen. 23 E eling hnyi umödra sunago ke at ae hu hanu ae kong; ke e ame hongot, ka habe, 24 Iesu at Nazereta lö, ieü gam köhmun? hawa, u je o he ka ohí' öhmun? inya oge me wâhmakhmetu u, a u At ae Kap anyin Khong. 25 Haba Iesu ame thawâ e me ha, ka habe, Ca mede bi, ke

didrut úhem hnyi hnyekon. 26 Ke haba hanu ae kong ame osesebilâ e, me kuku hwege me didrut úheny hnyi hnyekon. 27 Ke ödra hia adre me láia, me úhne-namököuâ, ka habe, Ieü ang? hna úne ae teb únyi! anyin a e ame musö ta je hanu ae kong hnen man, me ödrin e löng kâu. 28 Me ame ie lung igigilö ka hnyi je ke keihen hia hnyei Galilaia.

29 Ke adre me didrut úhedra hnyi sunago, me ödrin e ie didrö, tha ödrin me Ioane me Iakobo ka hnyi uma umö Simona me Anederea. 30 Ke haba hinyen öiö Simona ame mokulec mok a kahwa, me adre me ie omanená kâu mok anyin momo : 31 me e ame he me kât hnyamen momo, me otilâ; me ame ie hia but kahwa, me e ame huliwa ködrin.

32 Hnyi sahac, ke ame he but ka dit seünö, me adre me hom but kâu ta je komok hia, me tavat a dilic ödra demoni. 33 Me ame úkhacaköu thö taun hia hnyi hwanuma. 34 Ke e ame omelö ta je mok ae ve bongon, me obâ ta je demoni ae se hia; ke e ame ca hna bi ta je demoni he ka fuc, anyin adre me wâhmakhmeto but e.

35 Ke haba nyi, ke tiga bec ka o thö seünö, me e ame höihöi thö me didrut, me he ka hnyi dok ae ba aten, me hic eling. 36 Me ame he hoton Simona me tavat a tha ödrin më; 37 ke ödrin e wâ but e, me haingödrin kâu, ka habe, Ame elöm u tavat hia. 38 Ke haingen ködrin, ka habe, E so ötin e he ka hnyi ke je taun ehele, m' inya he ka khetâ minya eling; anyin a oge me o but hobi kâu e. 39 Me e ame dit ka hnyi umödra je sunago hnyi Galilaia hia, k' ame khetâ hofuc me obâ ta je demoni.

40 Me ame o but kâu ke lepera, ame khöu kâu me ciboucâ kâu, me ha kâu, ka habe, U je ne wem me khanö u he ka osoi nya. 41 Me e ame hnyok kâu, me hinö-beny me kâlâ e, me ha, ka habe, E bewek; u ma so but. 42 Me ame ie hia but leperagan, k' ame so but. 43 Ke e ame húna hwegiâ e, me ie kunâ e, me ha kâu, ka habe, 44 Wâ eâu u nye ha ka ke at : ke he thö, omanenö u thö ka at bihut, me ham hna húna hnö Mose hnân haten ködrin, ge hna okalaöti u. 45 Ke e ame didrut, me hwân he ka khetâ me ölungâ, me omanená únyi e, me ca khana hmetu Iesu he ka he manen ka hnyi taun, me e ame laba ju hnyije dok ae ba aten : ke adre me ve o kâu úhedra hnyi je ke keihen hia.

HNYIMAKAN 2.

KE e ame dit hmetu hnyi Kaperenauma ka habe, wale thö eiö hnyin uma. 2 Me ame ûkhacaköu thö tavat ae se hia, me me hnek dö ke ne o but hnyi hwanuma : me e ame ha hofuc ködra. 3 Ke adre me hom but kâu at ae mat, ame vadren hnen hnyat a vak. 4 Ke ca khan' ödrin bi he ka hakekenyâ e, anyin ae ûhneki tavat, me ödrin e khöng hon uma wale hnyi dok a e cicö : ke ödrin e hia but kia, me ödrin e hnahna but hna mokut wale ame mokut at ae mat hon. 5 A wâ but Iesu anyidrin labageju, me e ame ha ka at ae mat, ka habe, Nökuk lö, adre hia but hna degecâ ânyâm je hulö. 6 Ke ame laba eling keihen hnyat sihnalimen, me ödrin e ûnykûme eü hnyi je hnyekudrin, ka habe, 7 Ehö at ang ame fuc helâe ? e ame ha bigan ka Khong : ia ae khana he ka thang degecâ ta je hulö, a hake Khong thibi ? 8 Ke ame ie manen dut kö Iesu eü hnyi hnyekon ifucidrin helâe eü hnyi je hnyekudrin, me e ame ha ködrin, ka habe, Ieü gabun öbun e fuc eü hnyi je hnyekubun ge je ûnyi eling ? 9 Ieü ae hâhâ he ka ha ka at ae mat, ka habe, Adre hia but thang degecâ ânyâm je hulö, me he ka ha bi kâu ka habe, Tôdrö, hom dö hnâm me he thö ? 10 Ke so bi m' öbun e he ka wâ ae tren man Nokon at eang hmeledrany he ka thang degecâ ta je hulö, (e ame ha ka at ae mat, ka habe,) 11 Inya oge me ha köu, Todrö, hom minya thö hnâm, me he thö ka hnyi umâm uma. 12 Me e ame todrö me hom dö hnen, me didrut hnyi hnyimaködra hia ; me adre me lâiâ me ogânâ Khong, me ha, ka habe, Ate me ca wâ bala hwakecin helâng.

13 Ke e ame he hmetu hnyi hobat köiö ; me ame o but kâu tavat ae se hia, ke e ame ûne ködra. 14 Me e ame he, ke ame ö Levi nöku Alefaio ame laba hnyi uma khöp fat, me e ame ha kâu, ka habe, He hotuk. Me e ame todrö me he hoton. 15 Ke e ame laba hnyin umen uma, ame han, ke se hia minya ta je telona me tavat ae kong adre me tha laba me Iesu me laten : anyin a ödra se hia, hnyat adre me he hoton. 16 Ke a wâ but e hnen hnyat sihnalimen, hanen je Faresaio a g' ame tha han me je telona me tavat ae kong, me adre me ha ka laten, ka habe, E ame tha han me ic me ta je telona me tavat ae kong. 17 Ke a löng ut

Iesu, me e ame ha ködra, ka habe, E ca ûnyi hnathu at ae tren bubuny ka tavat ae hwege, ke so bi ka tavat ae mok : oge me ca o but he ka hawâ tavat ae wisa, ke tavat bi ae kong, m' adre me ietra.

18 Ke haba latö Ioane, ke laten ta je Faresaio, adre me ânyâ ca han : me adre me o but kâu, me ha, ka habe, Haba latö Ioane me laten ta je Faresaio adre me ânyâ ca han, ke haba lâtam, me ödrin e ca munyi ânyâ geü ca han ? 19 Ke Iesu ame ha ködra, ka habe, Hawa, e khana lahanen at a tep faipoipo he ka ânyâ ca han ke tiga e unyidrin at a tep faipoipo ? E ca khan' ödra he ka ânyâ ca han, e ka tiga laba unyidra at a tep faipoipo. 20 Ke ame he ka o ûen he ka hom gadra at a tep faipoipo, me wale but e ûen adre me he bi ka ânyâ hnyin ca han. 21 E ba ke at ame ütibetkôuâ ecmano a teb ûnyi ka hnyi ûkhaü ae bobot ut : wâ e nye ok ut ecmano ae bobot ge ecmano ae hât adre me ip hnân okhötâ, me ame he ka gan hmâ but mou. 22 Ke ba at ame hingälâ waina a teb ûnyi ka hnyi je tangen a je unen meno ae bobot : wâ e nye hmouca but ta je tangen hnen waina, me ame he ka hingölö waina, me kong ut ta je unen meno : ke so bi adre me hingälâ waina ae teb ûnyi ka hnyi je unen meno a teb ûnyi.

23 Ke haba hnyi ke bong sabath e ame he hnyi wanben je hna belökâ hwit ; ke haba laten ödrin e hwân he ka thu tilâ je wan hwit. 24 Ke haingen ta je Faresaio kâu, ka habe, Wâ bi, ieü gadrin ödrin e ânyâ hnyi bong sabath ûnyi adre hnyibo ? 25 Me e ame ha ködra, ka habe, Hawa öbun e ca munyi aü ehac hna mâdrâ hnö Davita hnyi ûen ae ba han, ke e ame mekihnânem me anyin bunyen ? 26 Wale ge hnen hna didrö ka hnyi a umen Khong hnyi ûen at bihut ae nua a Abiathara, me an je areto hnân omanená, waleji ae ca úcú ka tavat he ka an, ke hake tavat bihut thibi, ke e ame ham minya ka anyin bunyen ? 27 Me e ame ha ködra, ka habe, Adre mâdrâ sabath hobi kâu at, ke adre ca mâdrâ bi at hobi kâu sabath : 28 me me tuhan sabath minya bi Nokon at.

HNYIMAKAN 3.

KE e ame dit hmetu thö ka hnyi sunago ; ke eling at ae meleca hnyamen. 2 Me adre me tuö e, hawa, ame ne he ka osoâ e hnyi bong sabath ; m' adre me he ka bi

MAREKO 4.

fucu e. 3 Ke e ame ha ka at ae meleca hnyamen, ka habe, Todrö hnyi wanben. 4 Me e ame ha ködra, ka habe, Hawa, e úcú he ka mádrâ so hnyi bong sabath, hawa, he ka mádrâ monu? he ka omelö, hawa, he ka omoko? Ke adre me laba hnyibú but. 5 Ke e ame mē wâ igigili ödra hnyi hmönyin, ke ame vec can ae khöt ta je hnyekudra, me e ame ha ka at, ka habe, Lau but hnyamâm. Ke e ame lau but: me ame so hmetu but hnyamen. 6 Me ame didrut ta je Faresaio, me ie úhnenamö me hnyat Herodiane, m' adre me he ka hlingâ e.

7 Haba Iesu me laten ödrin e tha he ka hnyi hobat köiö: ke se hia hmönyin tavat adre me he hoton úhedra Galilaia: me úhedra Juda, 8 me Jerusalema, me Idumea, me ke keihen hnyei hoton Joridano, me tavat igigilö Turo me Sidona, ödra se hia hmönyin, adre löng ut ta je únyi ae gan e ame ányâ, me adre me he but kâu. 9 Me e ame ha ka laten, m' ödrin e he ka hok hu ae úhnyúkong he ka halubahingen, anyin ae se hia tavat, wâ adre nye he ka úhneki mē: 10 anyin a e ame hia but osoâ tavat ae se hia; waleling me me úhneki kâu tavat a ödra tren mok he ka kâlâ e. 11 Ke hnyi je úen a wâ but e hnen ta je hanu ae kong, me ödrin e nom ju kâu me hongot, ka habe, U thibi Nokon Khong. 12 Ke e ame thawâ hwegi ödra, wâ adre nye he ka omanenâ e.

13 Ke e ame ölö thö ka hnyi bucen, k' ame hawâ kâu hnyat ae weny: me ödrin e he but kâu. 14 Me e ame otílâ hnyat a twelv, he ka tha laba mē, me me he ka kun' ödrin he ka khetâ, 15 me he ka hu man he ka obâ ta je demoni: 16 me e ame hwenyi iö Simona, ka habe Peteru; 17 haba Iakobo nöku Zebedaio, ke Ioane liamekeiny me Iakobo; me e ame hwenyi iödrü, ka habe, Boanerege, walang bongon, Li lakon hendreng: 18 ke Anederea, ke Filipino, ke Batolomaio, ke Mataio, ke Toma, ke Iakobo nöku Alefaio, ke Thadaio, ke Simona at Kanana, 19 ke Juda Isakariota at a alecuâ e.

Ke e ame dit ka hnyi ke uma. 20 Ke ame ukhacaköu hmetu tavat ae se hia, me me ca khan' ödrin bi he ka han. 21 Ke e khana but lahanen, me ödrin e he but he ka kât e, anyin a haingödrin, ka habe, E a monu but. 22 Ke haingen tavat sihna-limen tavat adre me o úhedra Jerusalema, ka habe, E unyin Belezebuba, ke, E ame obâ ta je demoni únyi ge tuhan ta je

demoni. 23 Ke e ame haw' ödrin kâu, me ha ködra hnyi ta je úhöücú, ka habe, Ama kâmâu Satana ka obâ Satana? 24 Ke a ne imoukôu ke dökhü, e ca khana dökhü eling he ka tethmâ. 25 Ke a ne imoukôu ke lap a je liamekeiny, me ca khana lap eling he ka tethmâ. 26 Ke a nê Satana ame ka tot metâ kâu bi, me imoukôu, me ca khana bi he ka tethmâ, k' ame he ka obiny kâu. 27 Ke ca khana ke at he ka dit ka hnyi uma umen at ae hwege, me söh anyin ta je únyi, ame ne ca bân ka ca at ae hwege; waleling me ame he ka söh umen uma. 28 E hnathu inya oge me ha köbun, ka habe, Adre me he ka hna degecâ ta je monu hia a ányâ ge tavat, me je bigan a hnödra ta je hna bigan: 29 ke haba at ame he ka bigan ka Hanu Kap, me adre me ca he ka hna degecâ, k' ame he bala anyin hulö ka mokut hon nyiele balua: 30 anyin a haingödra, ka habe, E unyin hanu ae kong.

31 Me ame o but hinyen me je liamekeiny mē, me útítilen eú hnyöu, me úkhü-nöng he ka hawâ e. 32 Ke ame laba igigilö e tavat ae se hia, me adre me ha kâu, ka habe, Wâ bi, hinyâm me je liamekeiny möu ödrin e elöm u. 33 Ke e ame thu ködra, me ha, ka habe, Ia hinyök me je liamekeiny mönya? 34 Ke e ame hngehgele igigili ödra adre me laba igigilö e, me ha, ka habe, Wâ bi hinyök me je liamekeiny mönya! 35 Anyin a haba at ame he ka mádrâ weny Khong, wale thibi e liamekeiny mönya, me hanik, me hinyök.

HNYIMAKAN 4.

KE e ame hwân hmetu he ka úne hnyi hobat köiö. Ke ame úkhacaköu kâu tavat ae se hia hmönyin, me e ame ölö thö ka hnyi hon hu, me laba ju hnyi köiö: ke haba tavat ae se hia adre me laba hnyi hobat köiö. 2 Ke se hia ta je hofuc e ame n' ödra a deny ta je úhöücú, me ha ködra hnyi hnen hna úne, ka habe, 3 Löng ju: Wâ bi, ame he but at belök he ka jijingâ wan: 4 ke e ame jijingâ me ame kölu but keihen eú hnyi baten gethen, me ame o but ta je meno ame gâ, me an dö. 5 Ke ame kölu but keihen ka hnyi dok ae hudei, wale ae ca haki hnyin kânâ, me ame ie kú thö, anyin ae ca haki bi kânâ: 6 ke ame o but seúnö me ame le but; me mokcu, anyin ae ba iwân. 7 Ke ame kölu but keihen hnyi wanben ta je úö ae údedö,

MAREKO 5.

me ame kú thö ta je úö ae údedö me takou but, me ba ju wan. 8 Ke ame kölu but keihen ka hnyi hon kânâ ae hoso, me kú thö me hlau but, me wa ; me ame hu wan dut, úsa thöte, me sikste, me wan haded. 9 Ke e ame ha, ka habe, Haba at ae hu hnyikönyen ka löng, löng ju.

10 Ke a he but tavat ae se, me haba hnyat ödrin e tha laba mē, me hnyat minya a twelv, adre me hnö e ge bongon je úhöúcú. 11 Haingen ame ha ködrin, ka habe, Adre me ham köbun he ka wáhmakmeto ta je únyi ae iyong hnyi dökhü dokhon Khong : k' adre me ányá ta je únyi hia hnyi ta je úhöúcú hobi ködra eú : 12 m' adre me he ka wá, a wá thibi, k' adre me ca wá únykúme bi ; ke löng, a löng thibi, ke ca wáhmakmeto bi ; wá adre nye hwiö thö, m' adre me he ka thang degecá but anyidra ta je hulö. 13 Haingen ködra, ka habe, Hawa, e ca khan' öbun úhöúcú eang ? ke ama kámáu ka khan' öbun ta je úhöúcú hia ? 14 Haba at belök ame tá hofuc. 15 Haba je hna jijingá hnyi baten gethen, me wale adre me tá hofuc hnyin ; ke adre me löng ut me ame ie o but Satana me hom dö hofuc adre me tá unyidra. 16 Ke walang je hna jijingá hnyi dok ae hudei, a tavat adre me löng hofuc me ie kap senyiná ; 17 ke ba iwán eú hnyidra, waleling m' adre me ca tethmá bi ; ke e ka o hlöuhlöu me úöveci can hofuc, me adre me ie thö thö. 18 Ke haba keihen wale adre jijingá hnyi wanben ta je úö ae údedö ; wale tavat adre me löng hofuc, 19 me ame didrö ta je hna únykúme je únyi eang hmeledrany, ke iyawöiny omjeú, ke behnyekon ka ta je thatúnyi, me kú takou but hofuc, me ame ca wa bi. 20 Ke walang je hna jijingá hon kânâ ae hoso ; a tavat adre me löng hofuc, me kap, me hu wan dut, úsa thöte, me sikste, me wan haded.

21 Ke e ame ha ködra, ka habe, Hawa, adre me hom lamépa he ka ip hnyi hmelen kumete, ame ne hna mokut, k' adre me ca he bi ka ip hon taben ? 22 Anyin ae ba únyi adre me ikhálá, a g' adre me ca he bi ka omanená ; ke ba únyi adre me oiyongá a g' ame ca he ka he hnyi melam bi. 23 Haba at ae hu li hnyikönyen, löng ju. 24 Ke e ame ha ködra, ka habe, Wá wia eáu öbun ta je únyi öbun e löng : ke haba tulut öbun e tuluto, me adre me he bi ka tuluto köbun ; me adre me he ka bi hanen köbun. 25 Anyin adre me he ka ham ka

at ae hu gan : k' adre me he ka hom ge at ae ba ta únyi, únyi e ame hu.

26 Ke e ame ha, ka' habe, E úcú dökhü dokhon Khong me at ame khúâ je wan ka hnyi kânâ ; 27 k' ame mokut hnyi je hnyinghet, k' ame hmak dö hnyi ta je hnyomakatu, ke ame kú thö bátân me beú but, ke ca khana bi bongon. 28 Ke haba kânâ ame ka hamen bi okúâ jeú ; ame bán bátân, me ame vhöng ut, me biliny ka bekhöt wan hnyi hlanyin. 29 Ke e ka metu but wan e ame ie inâ but hele, anyin a úen dut menu.

30 Ke e ame ha, ka habe, Ate me he ka öuco dökhü dokhon Khong me ieú ? Ke ewa úhöúcú ate me he ka öuco mē ? 31 E úcú me wan sinapi, ödra ka tá hnyi kânâ, wale thibi e wan ae úhnyükong hmelen ta je wan hia eang hmeledrany, 32 ke ödra ka hia but tá, me ame kú thö me gan hmâ but hon ta je úö hia ae ometu, me ame vhei but je vheiny ae gan ; me me khana ta je meno ethö ka tabá hnyi hmenuiny.

33 Ke se hia ta je úhöúcú helâe e ame khetâ hofuc ködra hnyin, hoton hnödra hna khana he ka löng : 34 ke e ame ca fuc ködra, ke ba úhöúcú : ke e ame ha bongon ka laten a hake ödrin ke.

35 Ke hnyi bong eling hnyi sahae, e ame ha ködrin, ka habe, Ötin e he ka kec ka hnyi ke keihen. 36 Ke ödrin e hna but tavat ae se hia, me ödrin e kácá e hon hu ai. Ke tha e mē ke je hu. 37 Me ame o but boudet ae gan, ke ame khutu ta je waköio ka hnyi hu, me ame he but ka unöngöt dö hu. 38 Ke e ame mokut hon hunöng hnyi obiny hu : me ödrin e bwebwela e, me ha káu, ka habe, At úne lö, u me ca únykúme a ötin e he but ang ka mok ? 39 Me e ame hmak dö me thawá ang, me ha ka köio, ka habe, Ca mede, ca bwebwet hmetu. Me ame hia but ang me ta but hau ae gan hmâ. 40 Me e ame ha ködrin, ka habe, Ieú gabun öbun e ot ? Hawa, e tiga ca hu gabun labageju ? 41 Me ödrin e ot gan hmâ me úhnenamökouâ, ka habe, Ehö at ang, wale me me löng káu hnen ang me köio ?

HNYIMAKAN 5.

ME ödrin e khöp dö hnyi ke keihen köio, hnyi hnyei iny at Gadara. 2 Ke e a hia but utut úheny hon hu, me ame ie úkhanö mē at a delec hanu ae kong, ame he úheny hnyi je erkemok, 3 at ame

MAREKO 5.

labö laba hnyi ta je erkemok : ke ba at ae khana he ka ca e, e ca khan' ödra he ka ca ge tö fao ; 4 anyin a ödra osehia ca li can me li benyin ge tö fao, ke e ame thamua hna ca li benyin, me thu amamá hna ca li can : ke ba at ae hwege he ka ohnamá e. 5 E ame laba bala hnyi lit me lany hnyi je erkemok me je bucen, ame tenge, me ka hamen bi kave e ge veto. 6 Ke e ame bwele sákáú me ö Iesu, me e ame wadring me khudrung ju káu ; 7 me fuc ae gan hwan, ka habe, Ieú gam kõnya Iesu a Nokon Khong ae beónua ? Inya oge me khöú köu únyi hnyi ien Khong, u ma ca oveci nya. 8 Anyin a e ame ha káu, ka habe, Hanu ae kong, didrut úhem hnyi hnyin at. 9 Ke e ame hnö e, ka habe, Ia iám ? me e ame thu káu, ka habe, Legeona iök, anyin a öhmun se hia. 10 Ke e ame khöú hwege káu, me me ca he ka obá e únyi hnyi hnyei. 11 Ke eling hnahat buaka ae se hia ame han tot hmelen bucen. 12 Me ödrin e khöú káu, ka habe, Ö u he ka ob' öhmun ka hnyi je buaka, m' öhmun e he ka dilic ödra. 13 Me e ame hn' ödrin dut. Me ame didrut ta je hanu ae kong, me delec je buaka : me ame wadring ut hnahat buaka úheny dö hnyi dok ae hwa- tapkölu ka hnyi köiö, me ame ú but eú hnyi köiö, ödra helá me tu thauzan. 14 Me ame kec ut tavat adre me hán buaka, me thumetu e hnyi taun me hnyei. Ke adre me o thö he ka hnyi wá hna ányá. 15 Ke adre me o but kö Iesu, me adre me wá at eji a delec hnen je demoni, k' ame laba a khaú, ke metá but, waleji at a delec hnen legeona : me adre me ot bi. 16 Ke haba tavat adre hia but wá, me adre me ha ködra bongon hna mádrá ka at a delec demoni, me bongon je buaka. 17 Ke adre me hwán he ka khöú káu he ka hna but idra hnyei. 18 Ke e ame ölö thö ka hnyi hon hu, me haba at a delec demoni ame sumátá e, he ka tha laba mē. 19 Ke e ame ca ogá e, ke haingen bi káu, ka habe, He thö ka hnyi hnyabam, ka je lahanám, me omanená ködrin únyi ae gan a mádrá köu Than, me hnen hna betenge gam. 20 Ke e ame he me hwán he ka khetá hnyi Dekapoli ta je únyi ae gan a mádrá káu Iesu : me adre me láiá hia.

21 Ke haba Iesu ame kec hmetu hon hu ka hnyi ke keihen, me ame úkhacaköu hia thö káu tavat ae se hia hmönyin : ke e hakekeny jut ka hnyi köiö. 22 Ke ame o but ke taben sunago Jairo ien ; ke a wá

but e, me e ame ta ju hmelen li can, 23 me khöú hwege, ka habe, Ame he but ka mok nökek in ae úhnyúkong : ö u he thö jem he ka me ip li hnyamám hon, me me so but, me me he ka mödrut. 24 Ke e ame tha he mē ; ke se hia hmönyin tavat adre me he hoton mē, me adre me úhneki mē.

25 Ke wale momo ame moko dra ame hingölö hnyi twelv je huna, 26 ke e gan hmá anyin vec únyi ge tavat tren bubuny ae se hia, ke ba hia but tang omjehen anyin hna ham ködrin, ke ba troban, ke ame gan tot bi mok, 27 ke a löng ut bongu Iesu, me e ame he hnyi wanben tavat ae se hia hoton me kálá anyin úkhaú. 28 Anyin a haingen momo, ka habe, Oge ne he ka kálá thibi anyin úkhaú, oge me he ka möt. 29 Ke ame ie hme thö dra ge momo ; ke a löng ut momo unyin ae mödrut únyi hnyi mok eling. 30 Haba Iesu ame ka ie wá- hmakhmeto eú hnyin a ga didrut man gan, me e ame hwiö thö hnyi wanben tavat ae se hia me ha, ka habe, Ia kálá anyik úkhaú ? 31 Haba laten ödrin e ha káu, ka habe, U me wá tavat ae se hia adre me úhneki köu, me u je ha, ka habe, Ia ame kalö nya ? 32 Ke e ame hngehgele he ka wá momo a mádrá únyi eling. 33 Ke haba momo ame ot me öbubuny, anyin ae khana hna ányá káu, me ame o but me khudrung káu, me ha hia hnathu káu. 34 Me e ame ha ka momo, ka habe, Nökuk lö, u je möt ut hnen ányám labageju ; he thö me hnahic, me u je mödrut únyi hnyi ányám mok.

35 Ke e ame tiga fuc, me ame o but je úthumetu únyi hnyi hnyaban taben sunago, me ha, ka habe, A mokcu nokom in : hnán eú he ka újengö hmetu At úne ? 36 Ke haba Iesu ame ca óunyhatho hna ha, ke ame ha ka taben sunago, ka habe, Ca ot, ke labageju ju. 37 Ke e ame thaw' ödra me me ba ju at ame he ka he hoton, ke so thibi Peteru, me Iakobo, me Ioane liamekeiny me Iakobo. 38 Me ödrin e o but ka hnyi uma umen taben sunago ; ke e ame wá tavat adre me mede, me hnyamok, me tenge thungaú. 39 Ke e ame didrö me ha ködra, ka habe, Ieú gabun öbun e mede, me útengió ? a ca mokcu wanakat, k' ame mokut. 40 Ke adre me hlumá e. Ke a hia but ob' ödra hia, me e ame hawá kamen me hinyen wanakat, me je hnyat unyin, me didrö ka hnyi dok ame mokut hnyin wanakat. 41 E ame

MAREKO 6.

hom hnyamen wanakat me ha kâu, ka habe, Talitha kumi; bongon, Hlu lö, inya oge me ha köu, ka habe, Todrö. 42 Me ame ie todrö hlu me he, anyin a twelv hunainy. Me adre me ie läiâ gan hmâ. 43 Ke e ame hûna ködra me me ca manen ka ke at: k' ame hûna he ka hân in.

HNYIMAKAN 6.

ME e ame he but ûheny e; me e ame o ka hnyi iny hnyei; ke haba laten ödrin e he hoton. 2 Ke ame o thö bong sabath, me e ame hwân ka ûne hnyin sunago: ke ame löng e tavat ae se hia, me adre me läiâ, me ha, ka habe, Ûnyi ua ta je ûnyi ang ge at ang? ke, Ieû metâ adre ham ka at ang, ke ehö ge ta je huliwa ae man helâe a ânyâ ge li hnyamen? 3 Ca at tretrau at ang, wale nöku Maria, ke liamekeiny me Iakobo, me Jose, me Juda, me Simona? ke hawa, ca e bi ang unyita je lahaniny hia? Me adre me thö thö gan. 4 Haingö Iesu ködra, ka habe, E ca ba bi lung anyin perofeta, ke ka e bi hnyi iny hnyei, ke unyin je lahanen, ke hnyi hnyaban. 5 Ke ca khana bi he ka ânyâ eling ke huliwa ae man, ke e ame ip thibi hnyamen hon ke ta je komok me omeli ödra. 6 Ke e ame läiâ can anyidra ca labageju.

Ke e ame vheno igigilö je taun he ka ûne.

7 Ke e ame hawâ hnyat a twelv, me hwân he ka kun' ödrin, a ödrin ûcû lo; ke e ame ham ködrin musi hon ta je hanu ae kong; 8 me e ame hûna ködrin, ka habe, Ca hom ke ûnyi hobi kâu he, ke uci thibi; e ba kamec, ke ba tang, ke ba minya mone hnyi tangen; 9 ke bi taben je hnyeûcadrin, ke e ame ha minya, ka habe, Ca khâvâ bi lo li ûkot. 10 Haingen ame ha ködrin, ka habe, Haba uma öbun e he ka dit ka hnyin, laba ju e ke ne o but öbun e hmetu but ûheny e. 11 Ke haba dok ame ca he ka köp öbun, k' adre me ca ling öbun, öbun ka he but ûheny e jijingâ but kânâiny hnyeûcabun me hnân haten ködra. 12 Me ödrin e he but, me khetâ, ka habe, hamen tavat he ka ietra. 13 Ke se hia ta je demoni ödrin e obâ, ke se hia tavat a ödra tren mok, ödrin e hû ge wakaco, me omeli ödra.

14 Ke a löng ut gan Heroda than; anyin ame lung ien: me e ame ha, ka habe, A möt hmetu thö Ioane bapataiso ûheny hnyi hna mok, anyin a wale ame

huliwa ta je man eang ûnyi gan. 15 Ke haingen keihen, ka habe, Elia ling. Ke haingen keihen, ka habe, Perofeta ling, helâke at a hanen je perofeta. 16 Ke a löng ut Heroda gan, me e ame ha, ka habe, Ioane ling, waleji oge sö degecâ ban, e a möt hmetu thö. 17 Anyin a hia but Heroda ûkhûnöng he ka köt Ioane, me ip e hnyi uma ceat, ca Herodia öiö Filipo liamekeiny mē: anyin a e ame hom e me âiân. 18 Anyin a haingö Ioane kö Heroda, ka habe, E ca ûcû bi köu he ka hom âiân liamekeiny möu. 19 Ke ame hmönyi Herodia kâu, me behlingâ e; ke ca khana bi; 20 anyin a Heroda ame outö Ioane, ame wâhmakhmeto e, a e at ae wisa me kap, me e ame tuö e. Ke hnyi ûen e ame löng ifucin, me e ame hlohlo gan hmâ; ke e ame löng senyina hwan hofuc. 21 Ke ame o but bong ae ûcû Heroda ame ânyâ bijeû hnyi sahaciny bong adre bnokoâ e hnyin, ka anyin je homakan, me je taben vat ae nua, me ta je taben at Galilaia; 22 me ame didrö hlu nöku Herodia me biâ, me e ame osenyini Heroda me tavat adre me tha laba mē; me haba than ame ha ka hlu, ka habe, Ha thö kõnya wem, me oge me he bi nya ka ham köu. 23 Me e ame khemanyin kâu, ka habe, Oge me he ka ham köu hnâm hna he ka ha kõnya ke ne o but hnyi ke keihen a hafiny dökhu dökhu. 24 Ke e ame didrut me ha ka hinyen ka habe, Ieû oge me he ka ha? Haba momo ame ha, ka habe, Bö Ioane bapataiso. 25 Me e ame ie dit logot hmetu thö ka than me sumat me ha, ka habe, Inya oge me wek u me he ka ham kõnya walang ang bö Ioane Bapataiso hnyin mini. 26 Me ame hmak ut hnyekon than, ke ûnyi bi ge hna khemanyin, me ge tavat adre me tha laba mē, e ame ca behânâ kâu. 27 Haba than ame ie kunâ ke soja hanen tavat tue, me hûna he ka hom ban: me e ame he but me subâ nyi Ioane hnyin uma ceat, 28 me hom ban hnyin mini, me ham ka hlu; ke haba hlu ame ham bi ka hinyen. 29 Ke e khana but laten, me ödrin e he me hom unyin, me ip hnyi erkemok.

30 Haba je aposetolo ödrin e ûkhacaköu kö Iesu; me ödrin e omanenâ kâu ta je ûnyi hia ödrin e hia but ânyâ, me ta je ûnyi ödrin e hia but ûnö. 31 Ke haingen ködrin, ka habe, Ai öbun ka hnyi dok ae ba aten he ka mē menâ. Anyin ae se hai tavat adre me o me he hmetu, ke ba ûen

MAREKO 7.

ködrin he ka han. 32 Me ödrin e kec hon hu ka hnyi ke dok ae ba aten. 33 Ke a wâ but tavat ödrin e kec ut, ke se hia tavat adre me wâhmakhmetu ödrin, me adre me tha wadring hot únyi hnyi ta je taun, me bödra ke bilidrin bi. 34 Ke e ame o but me wâ tavat ae se hia hmönyin, me e ame betenge gadra, anyin a ödra úcú me ta je mamoe ae ba at ame tuö : me e ame hwân he ka n' ödra ge ta je únyi ae se hia. 35 Ke haba hnyi sahac ame he but kâu laten me ha kâu, ka habe, Hnyebuba ang, ka sahac ut : 36 kun' ödra thö, m' adre me he ka he ka hnyi je taun me je hnyaba igigilö he ka úcú ö 'dra bi. 37 Ke e ame thu ködrin, ka habe, Ha ö 'dra bi öbun. Hai-ngödrin kâu, ka habe, Hawa, öhmun e he ka he me úcú areto a tu haded je denari hwaban, me hnân ha ö 'dra? 38 Ke e ame ha ködrin, ka habe, Ve ta areto gabun? he thö ka wâ. Ke ödrin e wâ but, me ödrin e ha, ka habe, Thabûng, ke lo li wâ. 39 Ke e ame húna a g' adre me he ka laba hia hnyi je deö lap hon hnaönying ae but. 40 Ke adre me laba gaga a úsa wan haded, me úsa fite. 41 Ke e ame hom je areto a thabûng, me li wâ, me bwele hnyi drany ai, me oleâ, me thuthu je areto ; me e ame ham ka laten, m' ödrin e he ka ip hnyi hnyimaködra ; ke e ame khenâ li wâ ködra hia. 42 Ke ödra hia adre me han me ame sekudra ju. 43 Ke adre me hom dö je kolon hna han me öunöngotâ je tang a twelv, me hanen je wâ minya. 44 Ke haba tavat adre me han je areto, me faiv thauzan obaga.

45 Ke e ame ie kunâ laten he ka laba hon hu, ke bödrin ka kec ka hnyi ke keihen Bethesaida ai, me e ame he ka kuna tavat ae se hia. 46 Ke a hia but úhüne mödra, me e ame he ka hnyi bucen he ka hic. 47 Hnyi sahac, ke tiga e hu hnyi wanben köiö, ke hake e biju hot. 48 Me e ame ö 'drin, k' ödrin e mokhon dut galu, anyin a esang, ke haba hnyi hna hmak a vak hnyi lit, me e ame o but ködrin ame he hon köiö ; helâke ame he but ka khalet' ödrin : 49 ke ödrin e wâ but e, k' ame he hon köiö, me ödrin e únykúme, ka habe, Hanu jo, me ödrin e kuku : 50 anyin a ödrin hia ödrin e wâ e, me hlohloâ. Ke e ame ie ha hofuc ködrin, ka habe, Hwege thö : inya thibi ; ca ot bi. 51 Ke e ame ölö thö ködrin ka hnyi hon hu ; me ame ta but hau : me ödrin e láiâ gan hmâ hnyi je hnyekudrin ; 52 anyin a

ödrin e ca únykúme je areto, ke e khöt je hnyekudrin.

53 Ke ödrin e kec ka hnyi ke keihen me ödrin e khöp dö hnyi hnyeí Genesareta, me un dut. 54 Ke ödrin e utut úhedrin hon hu, me ame ie wahmakhmeto e hnen tavat, 55 me adre me wadring igigilö hnyeí eling hia, me hwân he ka vaden ta je komok hon ta je hna mokut ka hnyi dok waleji adre me löng a e bi hnyin. 56 Ke haba hnyi ta je dok hia e ame o ka hnyin, ame ne je hnyaba, ame ne je taun, ame ne ta hnyeí, me adre me ip ta je komok hnyi je dok adre me úcú omjeú hnyin, ke adre me khöú kâu m' adre me he ka kâlâ e, ame ne obiny thibi anyin úkhaú : ke haba tavat hia thithö adre me kâlâ e, me adre me möt ut.

HNYIMAKAN 7.

KE ame úkhacaköu thö kâu ta je Faresaio, me keihen hnyat sihnalimen, waleji adre me o úhedra Jerusalema, 2 ke adre me wâ keihen laten ödrin e han ö 'dra jeú ge je hnyamödrin ae kong, wale ödrin e ca hnyem. 3 Anyin ame ca han ta je Faresaio me at Juda hia, adre ne ca bödra ka hnyem wia, k' adre me kap hofuc vejec únyi ge wahingat : 4 ke úhedra hnyi hna úcú adre me ca han, ödra ka ca bödra ka soú : ke se hia ta je únyi adre me kap me hom, wale he ka hneú ta je utkaia, me je kaia hnân tuluto, me je kaia bras. 5 Haba ta je Faresaio me hnyat sihnalimen adre me hnö e, ka habe, Ieú ge látâm adre me ca hnu hoton hwakecin wahingat, wale a ödrin e han ge je hnyamödrin ae kong? 6 Me e ame ha ködrin, ka habe, E so hna perofeta hnö Isaia gabun hnyat thoi hnyok, ka habe,

Haba tavat ang adre me oganö nya ge je esongodidra,

Ke úsákâüö mönya je hnyekudra.

7 Ke únyi baú bi hnödra hna khudrung könya,

K' adre me ná ta je hna úne hnen tavat.

8 Öbun e hna degecâ hnanyibu anyin Khong, me kât hmâ je hna úne hnen at.

9 Haingen ame ha ködra, ka habe, Öbun hwege ka degec ut hnanyibu anyin Khong, m' öbun e he ka vheno hnöbun je hna úne.

10 Anyin a haingö Mose, ka habe, Ogânâ kâmâm me hinyâm ; ke, Haba at ame he ka haikongoâ kamen me hinyen, me adre me he ka hlingâ e : 11 ke haingöbun, ka

MAREKO 8.

habe, Haba at ame he ka ha ka kamen me hinyen, ka habe, Haba anyik ta je únyi hnân hom hadruo u, me, Korabana, walang bongon, Adre me ham ka Khong; 12 ke öbun e ca hna hmetu bi e he ka ányâ ke únyi hobi kâu kamen me hinyen; 13 wale öbun e ohia hofuc hwan Khong ge hnöbun je hna úne, waleji öbun e nâ: ke se hia ta je únyi helâe öbun e labö mádrâ. 14 Ke e ame hawâ hmetu tavat ae se hia, me ha ködra, ka habe, Ling nya ju öbun hia, me wâhmakhmeto: 15 e ba únyi úheny hnyi hoton at ame dit ka hnyi hnyekon, ae khana he ka okongoâ e: ke haba ta je únyi ame didrut gan ame he ka okongoâ at. 17 Ke e ame dit hmetu thö hnyin uma ai, úheny unyin tavat ae se hia, me haba laten adre me hnö e ge úhöúcú. 18 Ke e ame ha ködrin, ka habe, Hawa, e ba minya gabun hna wâhmakhmeto? öbun e ca wâ ae ba únyi úheny hnyi hoton ame dit ka hnyi hnyekon at, ae khana he ka okongoâ e? 19 anyin a e ame ca dit ka hnyi öúnykúm, ke so bi ka hnyi tang tiny, me didrut ka hnyi hnyot? E ame ha helâe, me haisoâ ta je jeú hia. 20 Ke haingen, ka habe, Haba únyi ame didrut úheny hnyi hnyekon at, wale ame okongoâ at. 21 Anyin a úheny hnyin, wale úheny hnyi hnyekon tavat, ame didrut je hna únykúme ae kong, me bi únyi monu, 22 me venöu, me úhlingö, me venâu áiân ke at, me benyekon, me hwakecin ae kong, me iyawö, me hwakecin ae ikiki, me ihuhnyinköu, me hwege hnyem, me hop, me hwen monu: 23 haba ta je únyi hia eling ae kong ame dit úheny hnyi hnyok, me ame okongoâ at. 24 Ke e ame todrö úheny e, me he ka hnyi hnyigöulen Turo me Sidona. Ke e ame dit ka hnyi ke uma, me weny adre me ca he tavat ka wâ e: ke ca khana bi he ka oiyongâ. 25 Ke ame löng ut ke momo ae hu nokon hlu a delec hanu ae kong, me e ame o but me ta ju hmelen li can. 26 At Heleni momo, a mátrân at Surofoinike. Me e ame sumâtâ e he ka ohâ demoni únyi ge nokon hlu. 27 Ke e ame ha ka momo, ka habe, E mē sekon dö lakon: anyin ae ca so he ka hom jeú an lakon, me khúâ ka ta je kuli. 28 Ke haba momo ame thu kâu, ka habe, Eke, Than lö: haba je kuli adre me labö an hmelen laulau je kolon jeú an lakon. 29 Me e ame ha ka momo, ka habe, Can hofuc e, he thö, a hia but demoni únyi hnyi hnyekon nokom hlu. 30 Haba momo ame he but ka hnyi umen

uma, me wâ wanakat ame mokut hon hna mokut, ke hia but demoni.

31 Me e ame he hmetu úheny hnyi je hnyegöulen Turo, me vheno Sidona ke ne o but hnyi köiö Galilaia, wanben je hnyigöulen Dekapoli. 32 Me adre me hom but kâu at ae wejiji ke teta minya hwan; me adre me khöü kâu he ka ip hnyamen hon. 33 Me e ame lelö thö e úheny unyin tavat ae se hia, me inâ li banyen ka hnyi li hnyikönyen, me e ame hangöjâ, me kâlâ bohmen; 34 ke e ame bwele thö hnyi drany ai, me mâng, me ha kâu, ka habe, Efatha, haba bongon, khöng ut. 35 Me ame lany jut li hnyikönyen, me ok ut töiny bohmen, me e ame fuc wisa. 36 Ke e ame húna ködra, m' adre me ca he bi ka omanená: ke haba hoton hnen hna húna hwegiä ködra, me helâe minya adre me hwege ka omanená e. 37 Me adre me láiâ gan hmâ, me ha, ka habe, E so hnen hna ányâ hia: e ame olöngâ ta je wejiji, me ofucâ ta je hum.

HNYIMAKAN 8.

HABA hnyi je bong eling, me e hu hmetu tavat ae se hia hmönyin, ke ba ö'dra, me e ame hawâ laten me ha ködrin, ka habe, 2 Inya oge me betenge ge tavat ae se hia, anyin a ödra bong kundut unyik, ke ba ö'dra: 3 ke oge ne he ka kun' ödra ka hnyi umödra je uma ke ödra mekihnânem, me adre me he ka momonu eú hnyi gethen; anyin a sâkâú ta je dok a mwi hnyin keihen. 4 Haba laten ödrin e thu kâu, ka habe, Únyi ua adre me he ka osekunâ tavat ang ge areto hnyi hnyebuba eang? 5 Ke e ame hnei ödrin, ka habe, Ve ta areto gabun? Haingödrin, Seven. 6 Me e ame húna ka tavat ae se hia he ka laba ju hon kânâ: ke e ame hom je areto a seven, ke hwaban hna oleâ e ame thuthu, me ham ka laten, he ka ip hnyi hnyimaködra; me ödrin e ip hnyi hnyimakan tavat ae se hia. 7 Ke e unyidrin minya ke je wâ ae úhnyükong: ke hwaban hna oleâ, e ame úkhünöng he ka ip minya e hnyi hnyimaködra. 8 Ke adre me han me ame sekudra thö: me adre me hom dö je kolon hna han seven ta je tang. 9 Ke helâ me foa thauzan tavat, me e ame kun' ödra. 10 Ke e ame ie ölö thö ka hnyi hon hu tha e me laten, me he ka hnyi ke keihen Dalemanutha.

11 Ke ame o but ta je Faresaio me

MAREKO 9.

hwân he ka hnö e, adre me elâm gan haten únyi hnyi drany he ka cubec e. 12 Ke e ame máng hwege eú hnyi hnyekon me ha, ka habe, Ieú ge dö ang adre me elâm haten? e hnathu inya oge me ha köbun ka habe, Adre me ca he ka ham haten ka dö ang. 13 Ke e ame hn' ödra but, me ölö hmetu hon hu ai, me kec ka hnyi ke keihen.

14 Ke ödrin e hnying hok kamec ; khaca thibi areto unyidrin hon hu. 15 Ke e ame hûna ködrin, ka habe, E, ö 'bun aú ge leven anyin ta je Faresaio me leven anyi Heroda. 16 Me adre me úhnenamökouá, ka habe, E ba jeú gatin. 17 Ke haba Iesu ame wâhmakhmeto, me e ame ha ködrin, ka habe, Ieú gabun öbun e úhnenamökouá, ka habe, anyin ae ba ö 'bun? hawa öbun tiga ca wâ, me wâhmakhmeto? e khöt bala bi je hnyekubun? 18 E hu li emaköbun, k' öbun e ca wâ bi? ke hu li hnyikönyöbun, k' öbun e ca löng bi? ke öbun e ca únykúme bi? 19 Haba ji ge hnök hna thuthu je areto a thabúng ka tavat a faiv thauzan, ve ta tang a unöngöt a kolon öbun e hom? Haingödrin kâu, ka habe, Twelv. 20 Me je areto a seven ka tavat a foa thauzan, ve ta tang a kolon a unöngöt öbun e hom? Haingödrin, ka habe, Seven. 21 Me e ame ha ködrin, ka habe, Öbun e ca wâhmakhmeto bala bi?

22 Ke ödrin e o but hnyi Bethesaida. Ke adre me hom but kâu at ae wadröu, me sumâtâ he ka kâlâ e. 23 Me e ame hom hnyamen at ae wadröu, me lelö thö e ka hnyi hoton taun ; ke a hia but hangöjâ li emakan, me ip li hnyamen hon, me e ame hnö e, ka habe, U me wâ ke únyi? 24 Ke e ame bwele thö me ha, ka habe, Inya oge me wâ tavat ; anyin oge me ö 'drin helâ me je úö, adre me he. 25 Ke e ame ip hmetu li hnyamen hon li emakan ; ke e ame wâ hmâ, me ame so but, me wâ wia ta je únyi hia. 26 Me e ame kunâ e ka hnyi hnyaban, me ha, ka habe, Ca më dit bi ka hnyi taun.

27 Haba Iesu ame tha he me laten, ka hnyi je ong taun hnyi Kaisaria Filipi : ke eú hnyi gethen e ame hnö laten, me ha ködrin, ka habe, Haba ifucin tavat gak, m' iny ia? 28 Me ödrin e thu kâu, ka habe, Ioane Bapataiso : me keihen, ka habe, Elia ; me keihen, ka habe, Hanen je perofeta. 29 Ke e ame hnei ödrin, ka habe, Haba ifucibun gak, m' iny ia? Hai- ngö Peteru ame thu kâu, ka habe, U thibi

Keriso. 30 Me e ame hûna ködrin, m' ödrin e ca ha bi ka ke at. 31 Ke e ame hwân he ka n' ödrin, a g' ame he Nokon at ka vheno ta je vec ae se hia, k' ame he ka oúnyibâúâ e ge wahingat, me je taben tavat bihut, me hnyat sihualimen, ke adre me he ka hlingâ e, k' ame he bi ka möt hmetu hwaban kun ta bong. 32 E ame ha manenâ hofuc eling. Ke haba Peteru ame lelö thö e me hwân he ka thawâ e. 33 Ke e ame hwiö thö me wâ laten, me e ame thawo Peteru, me ha, ka habe, Satana lö, he thö ka hnyi hotuk : anyin a u je ca wâ únykúme ta je únyi anyin Khong, ke so thibi ta je únyi anyin at. 34 Ke e ame havâ tavat ae se hia me laten minya, me há ködra, ka habe, A ne hu ke at ame weny he ka he hotuk, e so e he ka hamen hokhnyok, me hom anyin satauro me he hotuk. 35 Anyin a haba at ame beomelö anyin möt, me ame he ka ohia e ; ke haba at ame he ka hna anyin möt can inya me evangelia, me e ame he ka omelö e. 36 Anyin a ieú troban ka at ame ne hom hmeledrany hia me me anyin bi, k' ame he bi ka hna but anyin möt? 37 Ke ieú ke únyi ae úcú ka at he ka ham hnân úco anyin möt? 38 Haba at ame he ka hmehma gak me hok ta je hofuc hnyi dö ang, a dö bi únyi monu, k' ame ányâ ta je hulö, me ame he bi Nokon at ka hmehma gan hnyi úen e ame tha o me ta je angela ae kap hnyi hmanenanginy Kamen.

HNYIMAKAN 9.

KE e ame ha ködra, ka habe, E hnathu, inya oge me ha köbun, ka habe, Haba ke je hnyat adre me tot eang, me adre me ca he ka më mok ke ne o but adre me wâ dökhü dokhon Khong ame he ka o me man.

2 Ke hwaban ta bong a siks Iesu ame hum Peteru me Iakobo, me Ioane, me su ödrin ka hnyi bucen ae beú a hake ödrin ke : ke e ame ke bongon dut hnyi hnyimaködrin : 3 me ame hadröngöc ut anyin úkhaú, me hau hmönyin ; e ca khana ke at eang hmeledrany a at kot mano he ka ohawâ but helâe. 4 Ke haba Elia me Mose ödrü me manen ködrin, me tha úhnenamö me Iesu. 5 Ke haba Peteru ame ha kö Iesu, ka habe, Rabi, e so ötin e laba ang ; ke öhmun e he ka otillâ ke je uma menâ a kun, hnân hobi köu khaca, ke hobi kö Mose khaca, ke hobi kö Elia khaca.

MAREKO 9.

6 Anyin ae ca khana únyi he ka ha ; anyin ödrin e ot gan hmâ. 7 Ke ame o thö ke ùlá me tubi ödrin : me ame o but hofuc únyi hnyi hnyin ùlá, ame ha, ka habe, Walang Nökuk a oúnykúmik : löng ju öbun kâu, 8 Ke ödrin e ie bwele igigilö ke ba hmetu ke at ödrin e wâ, ke hake Iesu thiju unyidrin.

9 Ke ödrin e tiga utut úhedrin hon bucen, me e ame hûna ködrin m' ödrin e ca he ka omanenâ hnödrin hna wâ, e me mē möt hmetu thö Nokon at úheny hnyi hna mok. 10 Me ödrin e kât hmâ hofuc e, me úhnenamököuâ ka habe, Ieú bongon möt hmetu úheny hnyi hna mok. 11 Ke ödrin e hnö e, ka habe, Haingen hnyat sihnalimen, ka habe, Ame he ka bö Elia ka o. 12 Ke e ame ha ködrin, ka habe, E hnathu a bö Elia ka o, me ohâtâ ta je únyi hia : ke adre sihnalimen ahö ge Nokon at a e ame he ka vheno ta je vec ae se hia me adre me he ka öúnyibâúâ e? 13 Ke inya oge me ha köbun, ka habe, A hia but o Elia, ke adre hia but ányâ kâu wedra minya, helâ me hna sihnalimen gan.

14 Ke ödrin e o but ka laten, me ödrin e wâ tavat ae se hia igigili ödrin, me hnyat sihnalimen adre me úhnenamö mödrin. 15 Ke a wâ but e hnen tavat ae se hia, adre me ie láia, me wadring kâu he ka iouny so mē. 16 Ke e ame hnei ödra, ka habe, Ieú anyibun úhnenamö mödrin? 17 Me ame thu kâu hnen ke at ge tavat ae se hia, ka habe, At úne lö, inya oge me hom köu nökek, a delec hnen hanu ae hum ; 18 ke haba hnyi je dok e ame hom e ka hnyin e ame sa e hnyikânâi : ke e ame húlúhangöc dö, me úk ut ganyon, me áú tot : ke oge me ha ka látâm he ka obâ e ; ke ka khan' ödrin. 19 Me e ame thu ködrin, ka habe, Dö ame ca labageju lö, oge me he ka tha inya möbun ke ne o but kehö? oge me he ka hokhnyoki öbun ke ne o but kehö? hö jem könya. 20 Me adre me hom e kâu : ke a wâ but e, me haba hanu ame ie kia but e ; ke e ame ta hon kânâ me sesebila, k' ame húlúhangöc dö. 21 Me e ame hnö kamen, ka habe, A o kehö únyi ang kâu? Ke haingen, ka habe, Hwân ke tiga wanakat. 22 Ke e ame ibi ose khúâ e ka hnyi meic, me ka hnyi köiö minya, he ka hlingâ e : ke a ne khanö u, me ö u betenge gahmun, me hadru' öhmun. 23 Haba Iesu ame ha kâu, ka habe, A ne khanö u bi ! E khana ta je únyi hia hnen at ame labageju. 24 Me

ame ie fuc kamen wanakat, me ha, ka habe, Inya oge me labageju ; ö u hadruâ anyik calabageju. 25 A wâ but Iesu tavat ae se hia adre me wadring úkhacaköu, me e ame thawâ hanu ae kong, me ha kâu, ka habe, U hanu ae hum me wejiji lö, inya oge me hûna köu he ka didrut úhem hnyi hnyekon, ke ca delec hmetu bala bi. 26 Me e ame kuku me seset, me didrut : ke haba wanakat, me ame úcú me at a mokcu ; me ame ha tavat ae se, ka habe, A mokcu. 27 Ke haba Iesu ame lelö thö hnyamen, me otilö thö e ; me e ame tot. 28 Me e ame didrö hnyin uma ai, me ame hnö duöngâ e hnen laten, ka habe, E ca khan' öhmun he ka obâ e. 29 Me e ame ha ködrin, ka habe, Ame ca dit thibut únyi a helâe, ke so bi únyi ge hic.

30 Ödrin e he but úhedrin e, me he hnyi wanben Galiläia ; ka ca weny bi he ka manen ka ke at. 31 Anyin a e ame nâ laten, me ha ködrin, ka habe, Adre me he ka hna Nokon at ka hnyi je hnyamen tavat, k' adre me he ka hlingâ e ; ke hwabân hna hlingâ e, me e ame he ka möt hmetu hnyi bong a kuniny. 32 Ke ödrin e ca wâhmakhmeto bi hofuc eling, ke ödrin e ot minya he ka hnö e.

33 Ke ödrin e o but hnyi Kaperenauma : ke wale eiö hnyin uma, me e ame hnei ödrin, ka habe, Ieú öbun e iwatretra gan eú hnyi gethen? 34 Ke ödrin e laba hnyibú : anyin a ödrin e hia but iwatretra eú hnyi gethen ge at ae beönu. 35 Ke e ame laba ju me hawâ hnyat a twelv me ha ködrin, ka habe, A ne hu at ame bebân gabun, e ame he ka biliny me bi athnyaba ködrin hia. 36 Ke e ame hom ke wanakat me ip e hnyi wanbödrin : ke e ame kap e ge li benyen, me ha ködrin, ka habe, 37 Haba at ame he ka kap ke wanakat a helâng hnyi iök, me e ame köp nya : ke haba at ame köp nya, ame ca hake köp nya, ke at minya bi a kunö nya.

38 Ioane ame ha kâu, ka habe, At úne lö, öhmun e wâ but ke at ame obâ je demoni hnyi iâm, me öhmun e thawâ e : anyin a e ame ca he hotutin. 39 Ke haingö Iesu, ka habe, Ca thawâ bi e, anyin ae ba at ame ányâ ke huliwa ae man hnyi iök, me ame he ka ie haikongu nya. 40 Anyin a haba at ame ca iwahnaihmiöny mötin, me ame tha hien mötin. 41 Anyin a haba at ame he ka habelibun ge utköiö, anyin a je lahanö Keriso öbun, e hnathu, inya oge me ha köbun ame ca he ka hia hwaban e.

MAREKO 10.

42 Ke haba at ame he ka othöâ thö ke at ae úhnyúkong eang ame labageju kõnya, me so kâu adre ne öhvekinyá hnyi hwage-nyin veto hnân oamamá, me khúâ but kâu ka hnyi köiö. 43 Ke a ne bi jônâm hnyamâm, suba degecá but : anyin ae so köu he ka dit ka hnyi möt, ke hia hnyamâm, hon he ka dit me li hnyamâm hnyi gena, ka hnyi meic ame ca mok. 45 Ke a ne bi jônâm hnen cam, subâ degecá but : e me so but köu he ka dit ka hnyi möt ke hia cam, hon he ka khúö u me li cam hnyi gena. 47 Ke a ne bi jônâm emákâm, úâ degecá thö : e me so bi köu he ka dit ka hnyi dökhu dokhon Khong ke khaca biju emákâm, hon he ka khúö u me li ecmak hnyi gena ; 48 waleji ame ca mok bi hnyin anyidra biget, ke adre ca ume meic. 49 Anyin adre me he ka sáltâ tavat hia ge meic. 50 E so sált : ke a ne hia but hnân ohinyá sált, öbun e he ka kâmâu ka ohinyá hmetu e? E so e hu sált eü hnyi je hnyekubun, me laba úsoköu ju öbun.

HNYIMAKAN 10.

KE e ame todrö me he úheny ling me o hnyi je hnyigöulen Juda me hoton Joridano : me ame úkhacaköu hmetu kâu tavat ae se hia ; ke e ame n' ödra hmetu helâji me hwakecin. 2 Ke ame o but kâu ta je Faresaio, me hnö e, ka habe, Hawa e úcú ka at he ka degec áiân? adre me cubec e. 3 Ke e ame thu ködra, ka habe, Ieú hna húna köbun hnö Mose? 4 Haingödra, ka habe, Mose ame hna he ka sihnalimen tusiny thang hna faipoipo, m' adre me degec ut. 5 Iesu ame thu ködra, ka habe, Anyin ae nâk je hnyekubun e ame sihnalimen köbun hnanyibu eling. 6 Ke haba adrem hwân dö hnyi hna op ta únyi, e ame wi' ödrü бага me momo. 7 Anyin a wale, ame he бага ka hna but kamen me hinyen me kece ka áiân : 8 ke ame he ka khaca thibi unyidru : waleling m' ödrü me ca lo hmetu bi, ke khaca thibi unyidru. 9 Anyin a wale, e ca hamen at bi he ka thang únyi ame hújá hnen Khong. 10 Ke haba laten, me ödrin e hnö hmeto e eiö hnyin uma ge bongon únyi eling. 11 Ke e ame ha ködrin, ka habe, Haba бага ame degec áiân k' ame hom hmetu ke at, me e ame bi únyi monu kâu : 12 ke e ka hamen momo degec áiân, me hom ke at bi, me ame bi únyi monu momo eling.

13 Ke adre me hom but kâu ta je

mendreng me me he ka kal' ödrin : k' ame thaw' ödrin laten. 14 Iesu ame wâ, me ame vec hnyekon, ke haingen ködrin, ka habe, Hna but ta je mendreng m' adre me he kõnya ; ca thaw' ödra bi : anyin a helâ m' ödra dökhu dokhon Khong. 15 E hnathu inya oge me ha köbun, Haba at ame ca kap dökhu dokhon Khong helâ me wanakat, me e ame ca he ka dit ka hnyin. 16 Ke e ame köp ödrin me ha hnahici ödrin, me ip li hnyamen hudrin.

17 Ke e ame he eü hnyi gethen, me ame wadring ke at me cibouca kâu, me hnö e, ka habe, At úne lö, ieú hanymök oge me he ka ányâ me me hu thö kõnya möt ame ca ba balua? 18 Ke haingö Iesu kâu, ka habe, Ieú gam u me ha a iny so? e ba at ae so, ke hake Khong thibi. 19 E khanö u ta je hnanyibu, ka habe, Ca he ka úhlingö, Ca he ka bi únyi monu, Ca he ka venöu, Ca he ka ohnathoâ thoi, Ca iyawö, Ogânâ kâmâm me hinyâm. 20 Ke e ame thu kâu, ka habe, At úne lö, oge hia but vheno ta je únyi e k' iny tiga wanakat. 21 Ke haba Iesu ame wâ hmâ e, me betenge gan, me ha kâu, ka habe, Khaca thiju únyi ae hia gam : he thö ka úco ányâm ta je únyi, me ham ka ta je theduoc, me ame he ka hu köu tang omjeú hnyi drany : ke aiö u bi, he hotuk. 22 Ke e ame hmak ut ge hofuc eling, me he but me hlöuhlöu : anyin ae tren omjeú ae gan hmâ.

23 Haba Iesu ame hngehngеле, me e ame ha ka laten, ka habe, Huliwa but tavat tren omjeú he ka didrö ka hnyi dökhu dokhon Khong! 24 Me ame láiâ laten ge hwan hofuc. Ke haba Iesu ame thu hmetu, me ha ködrin, ka habe, Lakuk lö, huliwa ae gan hmâ he ka didrö ka hnyi dökhu dokhon Khong hnen tavat adre me labageju ka hnyi omjeú! 25 E háhâ ka kamela he ka dit hnyi hwanumen jebú, ke hnek bi at ae tren omjeú he ka didrö ka hnyi dökhu dokhon Khong. 26 Me ödrin e láiâ gan hmâ me ha, ka habe, Ia la ae khana he ka möb? 27 Iesu ame ö' drin me e ame ha, ka habe, E pason hnen at, ke e khana bi Khong : anyin ae khana Khong he ka ányâ ta je únyi hia thithö. 28 Haba Peteru ame hwân he ka ha kâu, ka habe, Wâ bi, öhmun e hia but hna degecá ta je únyi hia me he hotom. 29 Haingö Iesu, ka habe, E hnathu, inya oge me ha köbun, E ba at ame hia but hna but uma, me je liamekeiny, me lahaneny, me kamen, me hinyen, me lakon, me ta hnyei, can inya me evangelia,

MAREKO 11.

30 k' ame ca he ka kap walang ang hmetu wan handed, a je uma, me je liamekeiny, me lahaniny, me hinyen, me lakon, me ta hneyi, tha e me je vec; ke haba hnyi ün ame he ka o thö, wale möt ame ca ba balua. 31 Ke se hia tavat adre me bödra, ame he ka bilidra but; me tavat ame bilidra ame he ka bödra but.

32 Ke ödrin eü hnyi gethen ödrin e he Jerusalema ai; ke Iesu ame hnyimakan anyidrin bunyen: ke ödrin e läiä; ke haba tavat adre me he hotudrin adre me ot. Ke e ame hom hmetu hnyat a twelv, me hwân he ka omanenâ ködrin ta je ünyi ame he ka o kâu, ka habe, 33 Wâ bi ötin e he ang Jerusalema ai; ke adre me he ka hna Nokon at ka je taben tavat bihut, me hnyat sihnalimen; ke adre me he ka hangâ e he ka mok, me hna e ka Aten ke je hneyi: 34 ke adre me he ka hlumâ e, me hangöjâ, me osôâ, me hlingâ; ke hwaban kun ta bong e ame he ka möt hmetu.

35 Ke ame hakekenyâ e li laku Zebedaio jia Iakobo me Ioane, me ha kâu, ha habe, At üne lö, E wehmu m' u me he ka mâdrâ ünyi a wehmu. 36 Me e ame ha ködrü, ka habe, Ieü ae webu oge me he ka mâdrâ hobi köbu? 37 Haingödrü ödrü me ha kâu, ka habe, Hn' öhmu but m' öhmu me he ka laba, ke at hnyi ke keihâm a metâm, ke ke at hnyi ke keihâm a mem hnyi ânyâm hmanenang. 38 Ke haba Iesu ame ha ködrü, ka habe, E ca khan' öbu bongon hnöbu hna sumâtâ. Hawa, öbu hwege he ka ijem utköiö oge me he bi ka ijem? ke he ka bapataisoi öbu ge hna bapataiso adre ma bapataisoi nya hnyin? 39 Haingödrü ödrü me ha kâu, ka habe, Öhmu me he ka hwege. Haingö Iesu ködrü, ka habe, Öbu me he ka hnyi ic hnyi utköiö oge me ijem, k' adre me he ka bapataisoi öbu ge hna bapataiso adre ma bapataisoi nya hnyin: 40 ke so bi e ca hanymök he ka ham ka at he ka laba hnyi ke keihen a metök me mek: haba e, me hnân hobi kâu tavat adre me penapena e hobi kâu. 41 Ke a löng ut hnyat a ten, me ödrin e hwân he ka hmönyin kö Iakobo me Ioane. 42 Ke haba Iesu ame haw' ödrin, me ha ködrin, ka habe, Öbun e wâ but hwakecin tavat adre me musö Aten ke je hneyi, a ödrin e hwen than hudrin; k' ame musi ödrin bi hnen je tuhödrin. 43 Ke ame ca he ka helâe unyibun: ke haba at unyibun ame weny he ka gan, me e ame he ka athnyaba köbun: 44 ke haba at unyibun ame weny

he ka bân, me e ame he ka athnyabaidrin hia. 45 Anyin e hnathu ame ca o Nokon at m' adre me huliwa kâu, ke so bi he ka hamen bi athnyaba, me ham anyin möt hnân hwaban möt anyin tavat ae se hia.

46 Ke ödrin e o but hnyi Jeriko: ke e ame he hmetu me laten ühedrin Jeriko me tavat ae se hia, me ame laba nöku Timaiio, Baratimaio at sumat ae wadröu, eü hnyi baten gethen. 47 Ke a löng ut a Iesu but e, at Nazereta, me e ame hwân he ka hongot, ka habe, Iesu lö, a Nöku Davita, betenge ju gak. 48 Ke se hia tavat adre me thawâ e, me me he ka laba hnyibu ju: ke e ame hongot tot bala, ka habe, Nöku Davita lö, betenge ju gak. 49 Ke haba Iesu ame todru me ha, ka habe, Hawâ thö. Me adre me hawâ wadröu, me ha kâu ka habe, Hwege thö, todrö, e ame hao u. 50 Me e ame degec ut anyin ükhaü, me todrö me he kö Iesu. 51 Ke Iesu ame thu kâu me ha, ka habe, Ieü ae wem oge me he ka mâdrâ köu? Haingen wadröu ame ha kâu, ka habe, Raboni, m' oge me he bi ka bwela. 52 Ke haba Iesu ame ha kâu, ka habe, He thö, u je so but hnen ânyâm labageju. Me e ame ie bwele but, me he hoton eü hnyi gethen.

HNYIMAKAN 11.

KE ödrin e hakekeny jut Jerusalema ai, hnyi Bethefage me Bethania, hnyi bucen Elaio, me e ame kunâ li laten me ha ködrü, ka habe, 2 He th' öbu ka hnyi taun cici öbu: ke öbu ka o but eling, öbu me he ka ie wâ nokon asina adre noc, waleji a ödra tiga ca tabâ bi; thang ut e, me hom dö jem. 3 Ke e ka hu at ame he ka ha köbu, ka habe, Ieü can öbu me ânyâ ang? me öbu ha thö, ka habe, E hu hanymen e ge Than; ke e ame he ka ie kunâ e jem. 4 Me ödrü me he but me wâ nokon asina adre noc hakekenyâ hwanuma eü hnyi gethen; me ödrü me thang ut e. 5 Me ame ha ködrü hnen keihen adre me tot eling, ka habe, Öbu me thang me hnân eü asina? 6 Ke ödrü me ha ködrin helâ me hna ha ga Iesu: me ödrin e hn' ödrü but. 7 Ke ödrü me hom nokon asina kö Iesu me ip anyidrin je ükhaü hou; ke e ame tabâ e. 8 Ke se hia tavat adre me ulolo je khaüödra eü hnyi gethen; ke haba keihen adre me so angin ta je üü ünyi hnyi hnyot. 9 Ke haba tavat adre me bödra me tavat adre me he hoton, adre me hongot, ka habe,

MAREKO 12.

Hosana; Hnen hahic at ame o but hnyi ien Than: 10 Hnahic hnen dökhu ame o but, a dokhon kamöta a Davita: Hosana hnyi dok ae nua ethö.

11 Me e ame o but hnyi Jerusalema hnyi uma kap: ke e ame wâ igigilö ta je ûnyi hia, ke e ame he hnyi sahac Bethania ai tha e me hnyat a twelv.

12 Ke nyi, ödrin e o but ûhedrin Bethania, me e ame mekihnânem. 13 Ke e ame wâ imeta hnyi dok ae sâkâu ae hu lan, me e ame o but he ka wâ ame ne hu wan: e ame o but ka hnyin, me ame wâ a je lan thibi; anyin a ca ûen bi wa a meta. 14 Me e ame ha ka imeta, ka habe, E so ame ca he ke at ka an wan gam nyiele balua. Ke ame löng e hnen laten.

15 Ke ödrin e o but hnyi Jerusalema: me e ame dit ka hnyi uma kap, k' ame hwân he ka obâ tavat adre me ûcû hnyin uma kap, k' ame hagutâ hnyikânâi ta je laulau anyin tavat adre me ûcû mone, ke je taben lap anyin tavat adre me ûco je biny; 16 ke e ame ca hna ka ke at he ka he me kaia hnyin uma kap. 17 Ke e ame ûne, me ha ködra, ka habe, Hawa, adre me ca sihnalimen, ka habe, Adre me he ka hwenyi ien umök uma, me Uma umen hic hobi kâu ta ogo hnyeï hia thithö? ke öbun e hia but wia e me op a umen ta je venöu. 18 Ke a löng ut hnen je taben tavat bihut, me hnyat sihnalimen, me adre me heleü deny he ka hlingâ e: anyin a ödrin e outen e, anyin ame lâiâ tavat hia hnen hna ûne.

19 Ke e ame he ûheny hnyi taun hnyi je sahac.

20 Hnyi hnyomakatu ödrin e he hnyi baten imeta me ödrin e wâ a ga moku e hwân hnyi hwecin. 21 Haba Peteru ame ûnykûme hmetu, me e ame ha kâu, ka habe, Rabi, wâ bi a meleca thö imeta waleji u je hangâ. 22 Ke haba Iesu ame thu me ha ködrin, ka habe, Labageju ka Khong. 23 E hnathu inya oge me ha köbun, ka habe, haba at ame he ka ha ka bucen ang, ka habe, Kec dö, me u me he ka ta but eü hnyi köiö; k' ama ca hlohlo bi hnyi hnyekon, k' ama labageju a ame he ka hwâdâ hnen hna ha; awe, e ame he ka hu e. 24 Anyin a wale, inya oge me ha köbun, ka habe, Haba ta je ûnyi hia öbun e he ka sumâtâ hnyi hic, labagejon ju a öbun e he ka kap, m' öbun e he ka kap dö. 25 Ke öbun ka he ka tot me hic, öbun e ne hia but ip hnân ge ke at, hna degecâ but, me

me he Kamöbun ethö hnyi drany ka hna degecâ hnöbun hna hanyâûâ.

27 Ke ödrin e o hmetu hnyi Jerusalema: ke e ame he hnyin uma kap, me ame o but kâu je taben tavat bihut, me hnyat sihnalimen, me wahingat; 28 me adre me ha kâu, ka habe, Hnen musi anyi ia u me mâdrâ ta je ûnyi e? ke ia a ham köu musi he ka mâdrâ ta je ûnyi e? 29 Ke haba Iesu ame ha ködra, ka habe, Oge me he bi nya ka hnei öbun ge ke ûnyi, ke thu hmetu thö könya, me oge me he bi nya ka ha köbun musi oge me ânyâ hnyin ta je ûnyi e. 30 Haba bapataiso anyi Ioane, me, ûnyi hnyi drany, hawa ûnyi ge at? thu thö könya. 31 Me adre me ûhnenamö, ka habe, Ate ne he ka ha, ka habe, Ûnyi hnyi drany; me e ame he ka ha, ka habe, Ieü gabun öbun e ca kap e? 32 Ke ate ne ha, ka habe, Ûnyi ge at—ödra outen tavat: anyin a ödra hia adre me köp Ioane helâ me perofeta. 33 Me adre me thu kö Iesu, ka habe, E ca khan' öhmun. Me haba Iesu ame ha ködra, ka habe, Oge me ca he minya inya ka ha köbun musi oge me ânyâ hnyin ta je ûnyi e.

HNyimakan 12.

KE e ame hwân he ka fuc ködra a deny ta je ûhöûcû. Haba ke at ame ta hnyeï vine, me the haginy igigilö, me hiny thop hnân hlec vine, me otilâ tap tue, me hna but ka tavat belök, me he but ka hnyi ke hnyeï. 2 Ke haba hnyi ûen e ame kunâ ke athnyaba ka tavat belök, me me he ka kap wan hnyeï vine ûnyi ge tavat belök. 3 Me ödrin e kât e, me kot, me obâ ke ba ûnyi a hom. 4 Me e ame kunâ hmetu ke athnyaba ködra; me adre me aat dö e hnyi ban, me ti okongoâ. 5 Ke e ame kunâ ke at bi, ke adre me hlingâ e: me keihen miny ae se hia; adre osöâ keihen, me hlingâ keihen. 6 Ke tiga e bi unyin nokon a oûnykûminy, me e ame kunâ minya but ködra hnyi obiny, haingen, Adre me he ka ogânâ nökek. 7 Ke haba tavat belök eling, me adre me ûhaköuâ, ka habe, Wale but ang mâtrân; ai öbun, ate me he ka hlingâ me me tang omjehetin biju anyin ta je ûnyi. 8 Me adre me kât e me hlingâ, me khûâ but ka hnyi hoton hnyeï vine. 9 Anyin a wale, ieü ame he ka mâdrâ tuhan hnyeï vine? e ame he ka o me ohia tavat belök, me ham hnyeï vine ka keihen. 10

MAREKO 12.

Öbun e ca munyi aú hna sihnalimen, ka habe,

Haba veto ame degec ge tavat bi uma,
Me adre hia but ányá eling me hnân
kopiny bahebet :

11 A mádrá e hnen Than,

K' ate me wá me láíá ?

12 Me adre me heleú deny he ka kát e ;
ke adre me outen tavat ae se hia ; anyin
ae khan' ödra hnen hna úhöúú gadra : me
adre me hna but e me he but.

13 Ke adre me kuná káu keihen at Fare-
saio, me hnyat Herodiane he ka töuhneweny
e ge ta je ifucin. 14 Ke ödrin e o but, me
haingödrin káu, ka habe, At úne lö, e khan'
öhmun dut a u at ae hnathu, ke u me ca
outen at : anyin a u me ca únykúme hny-
makan at, ke u at ame ná hnatho gethen
deny Khong ; hawa, e úcú he ka fat kö
Kaisara, hawa, hna ju? 15 Öhmun e he
ka ham, öhmun e ca he ka ham, hawa?
Ke e ame wáhmakhmeto anyidrin iyawö,
me e ame ha ködrin, ka habe, Ieú gabun
öbun e cubic nya? Hö jem denari m' inye
wá thö. 16 Me ödrin e ham. Ke e ame
ha ködrin, ka habe, Hnyimakö ia ang, ke
hna sihnalimen hnyin? Haingödrin káu,
ka habe, Kaisara. 17 Haingö Iesu ködrin,
ka habe, Ham dö kö Kaisara ta je únyi
anyi Kaisara, ke ka Khong ta je únyi
anyin Khong. Me ödrin e láíá e gan hmá.

18 Me ame o but káu ta je Sadukaio,
wale tavat adre me ha, ka habe, e ba möt
hmetu únyi hnyi hna mok ; ke ödrin e hnö
e, ka habe, 19 At úne lö, haba Mose ame
sihnalimen köta, ka habe, A ne mokcu ke
liamekeiny me ke at, k' ame mok degec
áíán, ke ba bi nokon, me hamen liamekeiny
mē he ka hom áíán he ka bi mátrân liame-
keiny mē. 20 E hu je liamekeiny a seven :
me ame faipoipo thö atö, me ame mokcu,
ke ba mátrân ; 21 ame ka hom dö e at a
loiny, k' ame mok minya ju, ke ba mátrân ;
ke helâe minya ge at a kuniny : 22 ke ba
mátrânidrin hnyat a seven. Ke hwabödrin
hia thö ame mok minya ju momo. 23 Ame
he ka öiö ia gadrin hnyi möt hmetu? anyin
a hom hia hnen hnyat a seven me öiödrin.
24 Ke haba Iesu ame ha ködrin ka habe,
Hawa, öbun e ca monu can ang anyin a
öbun e ca wá hna sihnalimen me man ma-
niny Khong? 25 Anyin a ödra ka he ka
möt hmetu thö, me adre me ca he ka hu
öiödra, me úham ta momo ; ke adre me he
ka helâ me ta je angela hnyi drany. 26
Ke haba ge tavat adre mokcu, me hnödra

hna he ka möt hmetu, hawa, öbun e ca
munyi aú bi hnyi tusi anyi Mose, waleji
hnyi hna ha hnyi uö ae údedö, ame ha káu
hnen Khong, ka habe, Inya ang Khongu
Aberahama, me Khongu Isaaka, me Khongu
Jekob? 27 Haba e, me ca Khongon tavat
adre mokcu, ke so bi tavat ae möt : e gan
hmá anyibun monu.

28 Ke ame o but ke at sihnalimen, wale
at ame löng anyidrin úhnenamö, ke a wá-
hmakhmetoá hnen hna thu soá ködrin, me
e ame hnö e, ka habe, Ewa hnanyibu a bán
hnyi ta je hnanyibu? 29 Iesu ame thu,
ka habe, Walang at a bán, ka habe, Isaraela
lö, löng ju, Haba Than a Khonguta, e thibi
Than a khaca : 30 ke hamám he ka hnyok
ka Than a Khongom ge hnyekom ae bekhöt,
me hanom ae bekhöt, me óúnykúmám ae
bekhöt, me tang hwegiám ae bekhöt. 31
Walang loiny, ka habe, Hamám he ka be-
tenge ge at ame laba hakekenyi u helâ me
u bi. E ba hnanyibu ae gan hon li hna-
nyibu e. 32 Me ame ha káu hnen at
sihnalimen, ka habe, Awe, at úne lö, e so
hnám hna ha, a e khaca thibi ; ke ba ju ke
at, ke hake e : 33 ke haba he ka hnyok
káu ge hnyekon ae bekhöt, me óúnykú-
mánen ae bekhöt, me tang hwege ae bekhöt,
me he ka betenge ge at ame laba hake-
kenyá, helâ me e bi, awe, e únyi hnathu e
hon ta je hut adre hudo bekhötá, me ta je
hut hia. 34 Ke a wá Iesu ae wisa hnen
hna thu, me e ame ha káu, ka habe, U ca
úsákátúö me dökhu dokhon Khong. Ke ba
hmetu at ae hwege he ka hnö e.

35 Ke Iesu ame úne hnyin uma kap me
ha, ka habe, Ieú ge hnyat sihnalimen ödrin
e ha, ka habe, haba Keriso, me Nöku Da-
vita? 36 Ke ame ha Davita únyi ge Hanu
Kap, ka habe,

Haingen Than ka Tuhök, ka habe,

Laba ju hnyi ke keihök a metök,

Ke ne o but oge me wia je iwahnai-
hmiöny möu, me hnân taben li hnye-
úcám.

37 Haba Davita ame hawá e me Than ; ke
ame he ka kámáu ka nokon bi? Me haba
tavat ae se hia adre me löng káu me adre
me senyin.

38 Ke e ame ha ködra hnyi hnen hna
úne, ka habe, Ö 'bun áu ge hnyat siha-
limen, hnyat a wedra he ka he me je úkhaú
ae beú, k' adre me he ka nom ju ködra
hnyi ta je hna úcú, 39 ke wedra ta je tap
ae nua hnyi ta je sunago, ke ta je tap ae
beönua hnyi ta je bijeú : 40 a hnyat adre

MAREKO 13.

me utá je uma umen je safac, ke hic beú hmá hnân iyawá; ame he ka hu ka hnyat eling hnaúhangö ae ti gan.

41 Ke e ame laba cicö tangen mone, k' ame wá hna khúá mone ka hnyi tang hnen tavat ae se hia: ke se hia tavat tren omjeú adre me khúá gáná. 42 Ke ame o but ke safac ae theduoc, me e ame khúá li mone ae úhnyúkong, a kodane. 43 Me e ame hawá laten me ha ködrin, ka habe, E hna-thu inya oge me ha köbun, ae gan hmá hna khúá mone hnen safac ang ae theduoc hudrin hia tavat adre me khúá ka hnyi tangen mone: 44 anyin a ödra hia adre me khúá únyi hnyi unöngöt gadra; ke haba momo, me e ame khúá únyi hnyi anyin theduoc ta je únyi hia ae hu gan, wale únyi hnân tuö anyin möt.

HNYIMAKAN 13.

E AME didrut úheny hnyi uma kap me ame ha káu ke at hnyi je laten, ka habe, At úne lö, wá bi je veto ae gan hmá me hna up veto! 2 Ke haba Iesu ame ha káu, ka habe, U je wá hna up veto eang ae gan? ame ca he ke veto ka hnen hon ke veto, ke adre me he ka tho degecá hia.

3 Ke e ame laba hon bucen Elaio cicö uma kap, haba Peteru me Iakobo me Ioane me Anederea ödrin e hnö duöngá e, me ha, ka habe, 4 Ha thö köhmun ame he ka o kehö ta je únyi e? ke ieu haten ame he but ka hwádá ta je únyi hia e? 5 Ke haba Iesu ame hwân ka ha ködrin, ka habe, Wá eáú e nye omonu öbun dut ke at. 6 Anyin a at se hia adre me he ka o hnyi iök, me ha, ka habe, Inya ang; ke adre me he ka omonó tavat ae se hia. 7 Ke öbun ka löng hwan ta je vat me hon vat, ca ot bi: anyin ae úcú he ka o ta je únyi e; ke tiga hia bi obiny. 8 Anyin ame he ka tot ke hnyei ka ke hnyei, me ke dökhu ka ke dökhu: ame he ka hu je hwiöi hnyi ke je dok; ame he ka o ta je hmiá. Wale hwân ta je vec.

9 Ke wá eáú öbun, anyin adre me he ka hn' öbun ka tavat úhnei; ke adre me he ka osöi öbun hnyin ta je sunago; ke öbun e he ka todrö hnyi hnyimakan ta je gavena me than, can inya hnân ohnathoá ködra. 10 Ke úcú he ka mē khetá evangelia ka ta je hnyei hia thithö. 11 Ke ödra ka he ka lili öbun, me hn' öbun, ca he ka ie únykúme únyi hnân he ka ha: ke haba

hofuc adre me he ka ham köbun hnyi úen eling, ha thö: anyin a ca öbun ling tavat öbun e ha, ke Hanu Kap bi. 12 Ame he ke liamekeiny ka hna liamekeiny mē ka mok, ke helá kamen ka nokon; ke ame he lakon ka tot úcon kamödrin me hinyödrin, he ka hling' ödrü. 13 Ke ame he tavat hia ka húkoti' öbun can iök, ke haba at ame he ka tethmä ke ne o but obiny, ame he ka möt.

14 Ke öbun ka wá únyi ae ikiki, at ame okongoá, ame tot hnyi dok a ca hnen bi (e so he ka wáhmakhmeto ju hnen at ame aú) wale úen ae úcú he ka kec hnen tavat Juda ka hnyi je bucen: 15 ke haba at hnyi hon uma, me so e ame ca ut bi he ka dit me hom ke únyi únyi hnyi uma: 16 ke haba at hnyi ta hnyei, me so e ame ca hmetu bi he ka hom anyin úkhaú. 17 Ekölö ge tavat a ödra erkin, me tavat adre me úasin hnyi úen eling! 18 Ke hic ju öbun me me ca he ka o únyi e hnyi úen ae megic. 19 Anyin ame he ka hu vec hnyi je bong eling, ae ba heláe hnyi hwân hna op ta je únyi hia, waleji a op hnen Khong ke ne o but walang ang, ke ba minya ame he ka heláe. 20 K' ame ne ca owakhaletá ta je bong hnen Than, me ba at ama möt: ke so bi, can tavat adre hia but úca, waleji e ame úca, me e ame he ka owakhaletá ta je bong. 21 Ke a ne ke at ame he ka ha köbun, ka habe, Wá bi, Keriso but ang, ke wá bi, e but e; ca kap bi: 22 anyin ame he ka o ta je Keriso thoi, me ta je perofeta thoi, ke adre me he ka omanená ta je haten me ta je únyi hnân láia, m' adre me he ka omono tavat adre úca, a ne ca pason. 23 Ke wá eáú öbun: wá bi, oge me omanená báná köbun.

24 Ke haba hnyi je bong eling, hwaban hna úveci eling, me ame he ka mene-kholom but seúnö, k' ame ca he ka melam tehi, 25 k' ame he ka labö kölu ta je okhú únyi hnyi drany, ke adre me he ka jijingá ta je man ethö hnyi drany. 26 Me adre me he ka wá Nokon at ame he ka o hnyi ta je úlá tha e me man ae gan me hmanang. 27 Me e ame he ka kuná anyin ta je angela he ka úkhacaköuá hnen ta je hna úca únyi hnyi je ang a vak, hwân hnyi can hmeledrany ke ne o but hnyi can drany.

28 Ná th' öbun úhöúcé me imeta: e tiga but bi je anginy, ke hlau je lan, me khan' öbun dut ae hakekeny hnyeyun; 29 heláe minya öbun, öbun ka wá ta je únyi eling ame o, me khan' öbun dö ae hakekeny jut,

MAREKO 14.

ae but ang hnyi hwanuma. 30 E hnathu inya oge me ha köbun a g' ame ca he ka hia dö ang, ke ame he ka hwädä ta je únyi hia e. 31 Ame he bi ka hia drany me hmeledrany, k' ame ca he ka hia hok ta je hofuc. 32 Ke haba bong me awa eling me ba at ae khana, e ca khana ta je angela hnyi drany, me Nokon, ke hake Kamen thibi. 33 Wâ eäu öbun, hmákä thö me hic: anyin ae ca khan' öbun úen. 34 Ame helä me ke at ame he but, me më laba hnyi ke hneyi, me hna but umen uma, me ham musi ka lathnyabainy, ame ve khene anyidrin huliwa, me húna ka at ame tuö hwanuma he ka hmákä. 35 Anyin a wale, hmákä thö: anyin ae ca khan' öbun úen ame he ka o tuhan uma, ame ne sahac, ame ne wanbenset, ame ne hnyi úen ame kokok khoto, ame ne hnyomakatu: 36 wâ e nye ie o me ö bun öbun e mokut. 37 Ke haba hnök hna ha köbun, inya oge me ha minya ka tavat hia, ka habe, Hmákä thö.

HNYIMAKAN 14.

HWABAN lo li bong adre me he ka bi paseka, me areto adre ca levenä bi: haba je taben tavat bihut me hnyat sihnalimen, adre me heleú deny he ka kät e ge hofuc iyawö, m' adre me he ka hlingä e: 2 anyin a haingödra, ka habe, Ca hnen bi hnyi bijeú, wâ e nye imonumonuny tavat.

3 Ke e ame laba Bethania hnyi uma umen Simona a lepera, e ame laba ka han, me ame o but ke momo ae hu gan kaia alabasa tangen muro, hing narado ae gan hwaban; ke haba momo ame tho kaia, me hingälä hnyi hon ban. 4 Ke haba keihen ame hmönyidrin me ha, ka habe, Hnän eü he ka okongoä heläe muro? 5 Anyin a haba muro ang, adre ne úco, me úhnyükong theri haded je denari hwaban, m' adre me he ka ham ka ta je theduoc. Me adre me ulidro momo. 6 Ke haba Iesu ame ha, ka habe, Hna ju momo; ieú gabun öbun e ovecä e? e so hnen hna mádrä könya. 7 Anyin a e bala ang unyibun ta je theduoc, ke khan' öbun he ka mádrä so ködrin hnyi úen öbun e weny: ke oge me ca he bi nya ka laba bala unyibun. 8 A hia but momo ányä hnen hna khana: e ame bán ka ösüä unyik hobi kâu hnödra hna he ka könim nya. 9 Ke e hnathu inya oge me ha köbun, ka habe, haba ta je hneyi hia thithö hnyi hmeledrany, adre me he ka khetä hnyin

uthumetu ae so, me adre me he minya ka haimemenä hna ányä hnen momo ang, hnän he ka únykúme kâu.

10 Ke ame he Juda Isakariota, hanen hnyat a twelv, ka je taben tavat bihut, me me he ka alecuä e ködrin. 11 Ke adre me löng ut, me adre me senyin me ha bánä he ka ham kâu mone. Me e ame heleú deny ae úcú he ka alecuä e.

12 Hnyi bong a bán hnyi bijeúiny areto adre ca levenä bi, a úen he ka hlingä paseka, me ame ha kâu laten, ka habe, Ewa dok ae wem öhmun e he ka penapena m' u me he ka han paseka? 13 Me e ame kunä li laten me ha ködrü, ka habe, He th' öbu ka hnyi taun, k' ame he ka ukhanö möbu ke at ame vadren kaia ae lup: he th' öbu hoton; 14 ke haba uma e ame he ka dit ka hnyin, ha th' öbu ka at ae tren uma, ka habe, Haingen At úne, ka habe, Ewa hnyeuleny je atkanyua, wale oge me he ka tha han paseka hnyin me latök? 15 Me e ame he ka hamen kú köbu hnyeule ae gan ethö adre me bi onyen me penapena: awe, penapena ju ling hobi kötin. 16 Me ame he but li laten, me o ka hnyi taun, me wä helä me hnen hna ha ködrü: me ödrü me penapena paseka.

17 Ke hnyi sahac e ame o but tha e me hnyat a twelv. 18 Ke ödrin e tiga laba me han, haba Iesu ame ha, ka habe, E hnathu inya oge me ha köbun, ka habe. Ame he ke at gabun ka alecuo nya, wale at ame tha han mönya. 19 Me ödrin e hwän he ka hmak, me ve ha gaga kâu, ka habe, Ia, inya? 20 Me e ame ha ködrin, ka habe, Ke at hnyi twelv at ame tha hnü jeú mönya hnyi mini. 21 Anyin ame he ka he but Nokon at heläji me hna sihnalimen gan: ke ekölö ge at eling ame he ka alecuä Nokon at! E so ka at eling adre ne ca hnokoä e.

22 Ke ödrin e tiga han, ke e ame hom areto, me oleä, me thuthu me ham ködrin, me ha, ka habe, Hom d' öbun: walang unyik. 23 Ke e ame hom utköiö, me oleä me ham ködrin: ke ödrin hia ödrin e ic. 24 Ke e ame ha ködrin, ka habe, Walang drök únyi hnyi úhinyköu, wale adre hingälä hobi kâu tavat ae se hia. 25 E hnathu inya oge me ha köbun, ka habe. Oge me ca he hmetu, ka hnyi ijem wan vine, ke ne o but oge me he ka ijem a teb únyi hnyi dökhü dokhon Khong.

26 Ke ödrin e hia but hai khumöng, me ödrin e he but ka hnyi bucen Elaio.

MAREKO 14.

27 Ke haba Iesu ame ha ködrin, ka habe, Öbun e he bi hia ka thö thö: anyin adre bia but sihnalimen, ka habe, Oge me he ka kot at ame tuö je mamoe, me ame he ka vese but ta je mamoe. 28 Ke iny ka möt hmetu thö, oge me he ka bök Galilaia ai, ke bilibun biju. 29 Ke haba Peteru ame ha kâu, ka habe, Ödrin e ne he hia thithö ka thö thö gam, o ge me ca he ka hnyi thö thö. 30 Ke haba Iesu ame ha kâu, ka 'habe, E hnathu inya oge me ha köu, a haba u, hnyi bong ang, wale eâu hnyinghet, ke tiga ca olo bi kokok khoto, me u me he ka okun ivinö nya. 31 Ke e ame fuc hwege hmönyin, ka habe, A ne hamök he ka tha mok möu, me oge me ca he ka ivinö u. Helâe minya hna ha gadrin hia.

32 Ke ödrin e o but ka hnyi ke utkânâ Gethesemane ien: me e ame ha ka laten, ka habe, Mē laba ju eang, inya mē he ju ka hic. 33 Me e ame hum Peteru me Iakobo, me Ioane, me hwân he ka gan hmâ hlohlo me ti hmak hmönyin. 34 Ke e ame ha ködrin, ka habe, Ame vec gan hmâ hanuk, helâ me mok: laba ju eang me hmâkâ. 35 Me e ame he ûhnyûkong, me ta ju eû hnyi kânâ me hic me sumâtâ he ka hia awa eling gan, a ne ca pason. 36 Me e ame ha, ka habe, Aba, Cica, e khanö u he ka ânyâ ta je ûnyi hia; hom dö gak kaia eang: ke ca ânyâ hoton wek, ke so bi wem. 37 Me e ame o me ö 'drin, ödrin e mokut, me haingen kö Peteru, ka habe Simona lö, hawa, u me mokut? e ca khanö u he ka hmâkâ hnyi awa a khaca? 38 Hmâkâ th' öbun me hic, m' öbun e ca dit bi ka hnyi ûcûbic: e hnathu ame weny hanu, ke sēnyin bi unyin. 39 Ke e ame he hmetu ka hic, k' ame ha thibi hofuc a khaca. 40 Ke e ame o hmetu me ö 'drin ödrin e mokut, anyin ae hmak je emaködrin; ke ca khan' ödrin ûnyi hnân thu kâu. 41 Ke e ame okun o hmetu, ke haingen ködrin, ka habe, Mokut ju öbun walang ke menâ: soju ang; a o thö awa; wâ bi, adre hia but alecuâ Nokon at ka hnyi je hnyamen tavat ae kong. 42 Todrö, ötin e he thö: wâ bi, wale but ang at ame he ka alecuo nya.

43 E ame tiga ha hofuc me ame ie o but Juda hanen hnyat a twelv, ke tha e mē tavat ae se hia adre me vhat hele vat me utöhmu, ûnyi ge je taben bihut, me hnyat sihnalimen, me wahingat. 44 Haba at ame he ka alecuâ e ame hia but ha ködra haten, ka habe, Haba at eâu oge me he ka ûcimhnyimak mē, me wale bi e, kât ju, me

lelö, me tuö wia e. 45 Ke e ame o but, me e ame ie he kâu, me ha, ka habe, Rabi; k' ame ûcimhnyimak mē. 46 Me adre me hinöbeny kâu, me kât e. 47 Ke haba ke at gadrin ödrin e útitenen ame oc dö hele vat, me kot athnyabainy at bihut ae nua, me subâ but hnyikönyen. 48 Haba Iesu ame ha ködra, ka habe, Öbun e o me je hele vat me je utöhmu, helâke me ûcon at ae venöu he ka hum nya? 49 Tha inya möbun hnyi je bong hnyi uma kap oge me ûne, k' öbun e ca köt nya: k' adre me ânyâ ûnyi ang me me hwâdâ hna sihnalimen. 50 Ke ödrin hia ödrin e hna but e me kec ut.

51 Ke ame he hoton ke hidröu a wadrâ unyin bi ecmano lino, ke adre me kât e; 52 me e ame hna degecâ but ecmano lino, me kec gadra, ke ba ûkhaû.

53 Ke adre me lili Iesu thö ka at bihut ae nua: me ame tha ûkhacaköu mē ta je taben tavat bihut, me wahingat me hnyat sihnalimen. 54 Haba Peteru ame omise he hoton ka hnyi hnyin uma umen at bihut ae nua; ke e ame tha laba me je lathnyaba; k' ame hnyi hlök hnyi hnyimakan meic. 55 Haba je taben tavat bihut, me tavat ûhnei hia, me ödrin e elâm at ohnatho ûcû Iesu he ka hlingâ; ke ba at adre me wâ. 56 Anyin ae se hia tavat adre me ohnathoâ thoi gan, ke ca tha deny bi hnödrin je hna ha. 57 Me ame todrö keihen me bifuco thoiâ e, ka habe, 58 Öhmun e löng e ame ha, ka habe, Oge me he ka kia uma kap eang adre me mâdrâ ge je hnyam, ke hnyi kun ta bong oge me he ka otilâ khaca adre ca mâdrâ ge ta je hnyam. 59 Ke ca tha deny bala bi hnödra je hna ha. 60 Me ame todrö taben bihut ae nua hnyi wanben, me hnei Iesu, ka habe, E ba hnân thu gam? ieu hnödra hna ohnatho gam? 61 Ke e ame laba hnyibû, me ca thu bi. Me ame hnö hmetu e hnen taben tavat bihut ae nua me ha kâu, ka habe, U Keriso, Nokon At adre Ogânâ? 62 Haingö Iesu ame ha, ka habe, Inya ang: ke öbun e he ka wâ Nokon at ame laba hnyi ke keihen metân man ame tha he me ta je ûlâiny drany. 63 Haba taben tavat bihut ae nua ame kia anyin je ûkhaû me ha, ka habe, Hnân eû hmetu ka ke at he ka ohnatho? 64 Öbun e hia but löng hofuc bi gan: ieu ûnykûmenöbun? Me adre me thamûâ hia ae ûcû but kâu he ka mok. 65 Ke haba keihen adre me hwân he ka hangöjâ e, me lan hnyimakan, me khaû e, me ha kâu, ka

MAREKO 15.

habe, Perofeta thö: ke haba ta je athnyaba adre me hom e me khaú.

66 Ke haba Peteru ame laba eú hnyi hnyeúle, me ame he but káu ke hlu, athnyabainy taben tavat bihut ae nua; 67 ke e ame ö Peteru ame hlök, me e ame wâhmá e, me ha káu, ka habe, U minya ji unyin at Nazareta jia Iesu. 68 Ke e ame ivinö me ha, ka habe, E ca khanö nya, ke oge me ca wâhmakhmeto bi hnâm hna ha: ke e ame didrut ka hnyi poretika; me ame kokok dö khoto. 69 Me ame wâ hmetu e hnen athnyaba a hlu, me e ame hwân ka ha ka tavat adre me útítilen, ka habe, Wale ke hanödrin. 70 Ke e ame ivinö hmetu. Ke ca bec bi, haba tavat adre me útítilen adre me ha hmetu kö Peteru, ka habe, E hnathu, u hanödrin; anyin a u at Galilaia. 71 Me e ame hwân he ka ha hofuc úhangö me khemanyin, ka habe, E ca khanö nya at eling öbun e ha. 72 Ke ame ie kokok khoto, a loiny. Me Peteru ame únykúme hofuc a ha Iesu káu, ka habe, U me he ka okun ivinö nya ke tiga ca olo bi kokok khoto. Me e ame únykúme, me tenga.

HNYIMAKAN 15.

A HNYOMAKATU but, me ame ie uhnenamö je taben tavat bihut, me wahingat, me hnyat sihnalimen, me tavat úhnei hia, me adre me cö Iesu, me lelö thö e, me hna but e kö Pilato. 2 Haba Pilato ame hnö e, ka habe, U Tuhan at Juda? Me e ame thu, me ha, ka habe, U me ha e. 3 Ke se hia ta je hofuc ame bifuco gan je taben tavat bihut. 4 Haba Pilato ame hnö hmetu e, ka habe, E ba hnân thu gam? wâ bi e se hia ta je hofuc adre me bifuco köu. 5 Haba Iesu ame ca thu hmetu thö ke hofuc, me haba Pilato ame láia.

6 Ke haba hnyi bijeú e ame labö thang ködra ke at adre me ca, at a wedra. 7 Ke e hu ke at Barabasa ien adre me tha ca me tavat adre me thu musi, hnyat adre me úhlingö hnyi hna thu musi. 8 Ke ame he tavat ae se, me hwân he ka sumâtá ama ányá ködra helá me hnen hna labö ányá. 9 Ke haba Pilato ame thu ködra, ka habe, Hawa, e webun oge me he ka thang ut köbun Tuhan at Juda? 10 Anyin a e ame wâ but a g' adre hna e hnen je taben tavat bihut can ihuhnyinköu. 11 Ke haba je taben tavat bihut adre me cubec tavat ae se hia he ka ha, ka habe, E so he ka

thöng Barabasa bi ködra. 12 Ke haba Pilato ame ha hmetu me thu ködra, ka habe, Ie únyi oge me he ka ányá káu, waleji öbun e hwenyi ien, me Tuhan at Juda? 13 Me adre me hongot hwege hmetu, ka habe, Osatauroá thö. 14 Ke haba Pilato ame ha ködra, ka habe, Hnân eú, ie únyi ae kong e ame ányá? Ke adre me tí ha hwegiá, ka habe, Osatauroá thö e. 15 Ke haba Pilato ame weny he ka osenyinâ tavat ae se, me e ame thöng Barabasa but ködra, ke a hia but osoi Iesu, e ame hna but e m' adre me he ka osatauroá.

16 Haba ta je soja adre me lelö e ka hnyi hnyeule eú, wale a umen than; ke adre me úkhacaköuâ ta je soja hia. 17 Me adre me okhavá e ge úkhaú ae udrudrá hlit, me hwáwá je fío ae údedö hnân korona, me obicá káu; 18 me adre me hwân ka nom káu, me ha ka habe, E, Tuhan at Juda! 19 Ke adre me kot ban ge hlowe, me hangöjá e, me cibouca me nom káu. 20 Ke adre hia but hiá e, me adre me uny jut úkhaú ae udrudrá hlit, me okhavá e ge je úkhaúen bi. Ke adre me lelö but e káu he ka osatauroá.

21 Ke adre me musi Simona at Kurene at ame he unyidra úheny hnyi ta hnyei, kamö Alesanedo me Rufo, he ka vaden anyin satauro. 22 Ke adre me hom e ka hnyi dok Gologatha ien, bongon hna wia, hnen ibokomok. 23 Ke adre me ham káu waina adre úthueniken me muro: ke e ame ca kap. 24 Ke adre me osatauroá e me khenâ anyin je úkhaú, adre me ugleköbâ, ame ne he ka anyi ia eáú. 25 Ke hnyi awa a kuniny adre me osatauroá e. 26 Ke walang tusi adre sihnalimen a hnödra hna bifuco e, ka habe, TUHAN AT JUDA. 27 Ke lo li at venöu adre me tha osatauroá mē; ke at hnyi ke keihen a metá, ke ke at hnyi ke keihen a me. 29 Haba tavat adre me he eling adre me hiá e, me nyinyiká je bödra me ha, ka habe, E! u at ame he ka kia uma kap me otílá hmetu hnyi kun ta bong, 30 omeli u thö, me utut úhem hnyi satauro. 31 Heláe minya je taben tavat bihut me tavat sihnalimen adre me hiá e, me ha, ka habe, E ame omelö keihen; e ca khana bi he ka omelö e. 32 E so e utut walang ang Keriso, Tuhan at Isaraela úheny hnyi satauro, m' ate me he ka wâ me labageju. Ke habe li at adre tha osatauroá mē, ödru me hiá minya.

33 Ke haba hnyi awa a siksiny ame menekholom but hnyei hia ke ne o but

hnyi awa a naininy. 34 Ke haba hnyi awa a naininy, Iesu ame hongot hwege, ka habe, Eloï, Eloï, lama sabakethani? bongon adre wia, Khonguk, Khonguk lö, ieü gam u me hnö nya but? 35 Ke a löng ut keihen adre me ütiten, haingödra, ke habe, Wâ bi, e ame hao Elia. 36 Me ame wadring dö ke at me hülülûâ ohmanenâ hnyi vinega, me ip hon obiny hlowe, me habelen e, me ha, ka habe, Më khanang; e so ate me wâ ame ne he Elia ka o he ka hom e hnyikânâi. 37 Ke a hia but Iesu hongot hwege, me e ame mokcu. 38 Ke ame khekhe lo but mano singiny uma kap hwân ethö ke ne o but eü. 39 Ke a wâ but keneturio, at ame tot cicö e, a g' ame hna but helâe hanon, me haingen, ka habe, E hnathu Nokon Khong at ang. 40 Ke waleü omomo adre me wâ sâkâûâ; ke e unyidrin Maria Magdalena, ke Maria hinyö Iakobo ûhnyükong me Jose, ke Salome; 41 wale hnyat ödrin e he hoton me bi athnyabainy ke tiga e hnyi Galilaia; ke se hia minya omomo waleji adre me tha he më Jerusalem a.

42 A sahac ut, anyin a bong Penapena, wale bong hakekenyâ sabath, 43 me ame he but Josefa at Arimathea, a at ûhnamö adre ogânâ, at ame halubahingen dökhu dokhon Khong; me e ame hwege me didrö kö Pilato, me sumâtâ unyi Iesu. 44 Ke ame lâiâ Pilato anyin a logot mok: me e ame hawâ keneturio me hnö e, ka habe, E kueny jut ka mok. 45 Ke ka löng e ûnyi ge keneturio, me e ame ham unyin kö Josefa. 46 Ke e ame úco ecmano lino, k' ame hom but e hnyikânâi, me lan e ge mano lino, me ip e hnyin erkemok adre tho hnyi kic; ke e ame tetebulo veto ka hnyi hnyimen erkemok. 47 Ke haba Maria Magdalena, ke Maria hinyö Jose, me ödrü me wâ dok adre ip e hnyin.

HNYIMAKAN 16.

HWABAN dö sabath, haba Maria Magdalena, ke Maria hinyö Iakobo, ke Salome, me ödrin e úco ta je utö ae bo so, m' ödrin e o me botro kâu. 2 Me haba hnyi haolany hnyi bong a bâniny wik, me ödrin e o but ka hnyi erkemok hnyi ibioiny seünö. 3 Ke ödrin e tiga ûhakouâ, ka habe, Hamö ia he ka tetebulo veto hobi kötín ûnyi hnyi hnyimen erkemok? 4 ke ödrin e bwele thö me wâ a g' adre hia but tetebulo veto: anyin ae gan

hmâ. 5 Me ödrin e didrö ka hnyi erkemok, me wâ hidröu ame laba hnyi ke keihen metâ, a khaü hau; me ödrin e ot. 6 Ke haingen ame ha ködrin, ka habe, Ca ot bi: öbun e elöm Iesu at Nazareta waleji adre me osatauroâ: a möt hmetu thö e; e hia but ang: wâ bi dok ödrin e ip e hnyin! 7 Ke he th' öbun ka ha ka laten me Peteru minya, ka habe, A bân dut Galilaia ai ke bilibun biju: öbun e he ka iouny eling më, helâji me hnen hna ha köbun. 8 Me ödrin e didrut me kec ûhedrin hnyi erkemok; anyin ame o ködrin öbubuny me ot: ke ödrin e ca fuc bi ka ke at; anyin a ödrin ot.

9 Ke a hia but todrö hnyi haolany hnyi bong a bâniny wik, me e ame bân ka manen kö Maria Magdalena, waleji a obâ je demoni a seven ûnyi hnyin. 10 Haba momo ame he me ha ködrin hnyat a labö tha e më, waleji ödrin e tiga tenge hlöuhlöu. 11 Ke ödrin e löng ut a e a möt hmetu thö, ke a manen dut kâu, ke ödrin e ca kap hofuc.

12 Ke hwaban ta je ûnyi eling e amanen ae ke bongon bi ka li at gadrin, ödrü tiga he hnyi gethen ame he ka hnyi ta hnyi. 13 Me ödrü me he me omanenâ ka lahanödrü: ke ödrin e ca köp ödrü minya.

14 Ke hwaban dö e e ame manen ködrin a eleven ödrin e tiga laba ka han; me e ame ú ödrin can anyidrin ca labageju me khöt a je hnyekudrin, anyin a ödrin e ca kap bi hna ha hnen hnyat ödrin e wâ e a ga möt hmetu thö. 15 Ke haingen ködrin, ka habe, He th' öbun ka hnyi hmeledrany hia thithö ka khetâ evangelia ka tavat hia adre op. 16 Haba at ama labageju me adre bapataisoâ, me ame he ka möt; ke haba at ama ca labageju bi, e ame he ka hnaúhangö. 17 Ke walang je haten ame he ka tha he me tavat labageju: adre me he ka obâ ta je demoni ge iök; adre me he ka fuc hnyi ke je hwen; 18 adre me he ka kât je on, ke adre ne ijem ke ûnyi hnân mekiny, me ame ca he ka okongu ödrin; adre me he ka ip je hnyamödrin hon ta je komok, me ame he ka möt dö.

19 A hia but ha ködrin Than, me adre me kap dö e hnyi drany ai me ip e hnyi ke keihen metân Khong. 20 Me ödrin e he but me khetâ hnyi ta je hnyi hia, ke Than ame tha huliwa mödrin, me ohnathoâ ta je hofuc ge ta je haten ame tha he. Amen.

LUKA.

HNYIMAKAN 1.

A NYIN a haba tavat ae se adre me hwân he ka sihnalimen gaga me omanenâ ta je únyi ame hwâdá kôta, 2 helâ me hnödra hna ham kôta, waleji ate me wâ, k' ötin e bi atbnyabainy hofuc únyi hnyi can, 3 anyin a wale, oge me únykúme bi nya he ka sihnalimen gaga kôu taböny than Theofila, anyin oge hia but wâ gaga ke wisa ta je únyi únyi hnyi can; 4 m' u me he ka wâ thö hnathuiny ta je hofuc adre me nâ kôu.

5 Haba hnyi je bong bongu Heroda a than Juda, me wale ke at bihut Zakaria ien, únyi hnyi dö anyi Abia: haba ien áiân me Elisabeth, a mâtrâni Arona. 6 Ke ödru li at ae wisa hnyi hnyimakan Khong, k' ödru me vheno ta je hnanyibu ke ta je hna otilâ nhen Than, ke ba monu gadru. 7 Ke ba nö kudru anyin ae toúnyi Elisabeth, ke ödre li hingat ut.

8 Ke e ame tiga vheno hanymen at bihut hnyi hnyimakan Khong hnyi hna khene hanymen kâu, 9 me hamen he ka dit ka hnyi Uma kap umen Than he ka le utö ae bo so, hoton hwakecin at bihut. 10 Ke hnyi awa adre me le utö ae bo so, ame laba eú tavat hia ae se adre me hic. 11 Ke wale ame manen dut kâu angela anyin Than, ame tot hnyi ke keihen a metân taben le utö ae bo so hnyin. 12 Ke a wâ but Zakaria, me e ame hmak, ke ame o but kâu ot. 13 Ke haingen angela ame ha kâu, ka habe, Zakaria lö, ca ot: anyin adre me löng hijâm hic, me ame he áiâm Elisabeth ka hnokoâ nokom, ke u me he ka hwenyi ien Ioane. 14 Ke u me he ka senyin me hobâ; k' ame he tavat ae se hia ka senyin hnyi hna hnokoâ e. 15 Anyin a e ame he ka gan hnyi hnyimakan Than, e ame ca he ka ijem waina me grâg; ke e ame he ka unöngöt ge Hanu Kap únyi hnyi hnyekon hinyen. 16 Ke se hia lakon Isaraela e ame he ka ohmeto ka

Than a Khongudrin. 17 Ke e ame he ka bân hnyi hnyimakan hnyi hanu me mau mani Elia, he ka ohmeto hnyekon ta je kamen ka lakudra, me tavat adre hwen höcö ka hnyi metâ anyin tavat ae wisa: me me he ka ányâwia tavat adre penapena hobi kâu Than. 18 Ke haba Zakaria ame ha ka angela, ka habe, Ame he ka kâmâu ka khanö nya e? anyin oge hingat ut ang. ke someca but ang öiök. 19 Haba angela ame thu kâu, ka habe, Inya ang Gaberiela. at ame tot hnyi hnyimakan Khong; a khunö nya he ka ha kôu, me omanenâ kôu úthumetu eang ae so. 20 Ke wâ bi, u me he ka hum, ame ca he ka khanö u fuc ke ne o but hnyi bong adre me he ka ányâ hnyin ta je únyi e, anyin a u je ca kap hok hofuc, wale ame he ka hwâdá hnyi úen e. 21 Ke haba tavat adre me halubahing Zakaria k' adre láiâ anyin ae bec hnyin uma kap. 22 Ke e amedidrut me ca khana but fuc ködra: me adre me wâ ae hu únyi a manen kâu hnyin uma kap: ke e ame labö hmâhmâ ködra ke hum bala bi. 23 Ke ame um dö je bonginy anyin huliwa, me e ame he but ka hnyi hnyaban.

24 Hwaban ta je bong e, ame erkin dut Elisabeth a áiân; me e ame oiyongâ e bi hnyi faiv ta tehi me ha, ka habe, 25 A mâdrâ helâe könya Than hnyi ta je bong e ame ö nya hnyin, he ka degec anyik hmehma hnyi hnyimakan tavat.

26 Ke haba hnyi tehi a siksiny, haba Khong ame kunâ angela Gaberiela ka hnyi taun hnyi Galilaia Nazareta ien, 27 ka ke hing hlu hanen lap anyi Davita, a úkücü me ke at Josefa ien; haba ien hlu eling me Maria. 28 Haba angela ame didrö kâu me ha, ka habe, E, u at adre betenge gun lö, e but unyâm Than. 29 Ke haba hlu ame hmak ge hofuc eling, me únykúme ieú bongon iouny eling. 30 Ke haingen angela ame ha kâu, ka habe, Maria lö, ca ot: anyin a Khong ame betenge gam. 31 Ke wâ bi, u me he ka erkin, me hnokoâ da, me u me he ka hwenyi ien Iesu. 32

LUKA 1.

E ame he ka gan, ke adre me he ka hwenyi ien e Nokon At ae Beönua : ke ame he Than a Khong ka ham kâu theron anyi Davita a kamen : 33 ke e ame he ka musö lap anyi Jakob nyiele balua ; ke ame he ka ba obiny dokhon dökhü. 34 Haba Maria ame ha, ka habe, Ame he ka kâmâu únyi e, anyin a iny tiga ca wâ bi бага? 35 Ke haba angela ame thu me ha kâu, ka habe, Ame he ka o köu Hanu Kap, me ame he ka tungi u hnen man maniny Beönua : anyin a wale adre me he ka hwenyi ien at adre me he ka hnokoâ, me kap ; a Nokon Khong. 36 Ke wâ bi, haba liamekeiny möu a Elisabeth e erkin dut, ka someca but : ke siksiny ju ang je tehiny, waleji adre me ha me toúnyi. 37 Anyin ae ba hofuc únyi ge Khong ame he ka ba maniny. 38 Ke haba Maria ame ha, ka habe, Wâ bi, iny hlu a athnyabainy Than ; e so e hwâdâ bi könya hoton hnâm hna ha. Haba angela ame hna but e.

39 Hnyi je bong eling Marie ame tot me he mweimwei ka hnyi ke keihen hnyei ae hu bucen, ka hnyi ke taun hnyi Juda ; 40 me didrö ka hnyi uma umö Zakaria, me iouny me Elisabeth. 41 Ke a löng ut Elisabeth ibifuci Maria, me ame uthmâhmâ mendreng eü hnyi hnyekon ; ke unöngöt dö Elisabeth ge Hanu Kap ; 42 me e ame hwân ka fuc hwege, ka habe, Hnâm huahic hon omomo, ke e hnahic ut wan hnyekom. 43 Únyi ua könya ang, a g' ame o but könya hinyen Tuhök? 44 Anyin a wâ bi, ame tiga o but ka hnyi li hnyikönyök ibifucâm, me ame uthmâhmâ thö mendreng eü hnyi hnyekuk ge senyin. 45 Hnahic hnen momo ame labageju ; anyin ame he ka hwâdâ ta je únyi hia thithö adre ha kâu únyi ge Than. 46 Ke haingö Maria, ka habe, Haba hnyekuk ame ogânâ Than,

47 K' ame hobâ hanuk ka Khong At a omeli nya.

48 Anyin a e ame wâ athnyabainy a hlu, walönya at hnyikânâi :
Anyin a wâ bi, hwân walang ang ame he ta je dö hia ka hao nya me iny hnahic.

49 Anyin a haba at ae man ame hia but ányâ könya ta je únyi ae gan hmâ ; Ke e kap ien.

50 E ame omanená anyin ibetengiö ka ke dö me ke dö,
A hnyat adre me ouden e.

51 E ame omanená tang hwege ge hnyamen ;

K' ame oveseâ but tavat hnyi biganiny hnyekudra.

52 E ame hagutâ je than únyi hnyi hon anyidra ta je theron,
Me ogöranyâ tavat a ödra hnyikânâ.

53 E ame osekunâ tavat a ödra mekihnâ-nem ge ta je únyi ae so,
K' ame kunâ wia tavat tren omjeú ke ba únyi.

54 E ame hom hadruâ athnyabainy a Isaraela,
K' ame únykúme ibetengiö,

55 (Helâji me hnen hna ha ka lakamöta)
Kö Aberahama me je mâtrâniny nyiele balua.

56 Ke Maria ame tha laba më ame ne kun ta tehi, me e ame hmetu but ka hnyi hnyaban.

57 Ke a hwâdâ úen ame he Elisabeth ka hnokoâ ; ke e ame hnokoâ da. 58 Ke a löng ut tavat adre me laba hakekenyâ me lap a je liamekeiny më a g' ame betenge gan Than ; me adre me tha senyin më.

59 Ame o but bong a eitiny, me adre me he but ka peritomonâ wanakat ; ke ödrin e behwenyi ien e me Zakaria hoton ien kamen. 60 Ke haba hinyen ame thu, ka habe, Ca e, me so bi Ioane ien. 61 Me haingödra adre me ha ka momo, ka habe, E ba liamekeiny möu ae hu ien eling. 62 Me adre me bi hat ka kamen, ka habe, iö ia e ame weny he ka wenyö? 63 Ke e ame sumâtâ taben sihnalimen, k' ame sihnalimen, ka habe, Ien Ioane. Haba ödra hia adre me lâiâ. 64 Me ame ie ok ut hnyimen me bohmen, me e ame fuc me ogânâ Khong. 65 Me ame o but ot ködra hia tavat adre me laba igigilö : ke ame lung tot ta je únyi eling ka hnyi je dok hia ae hu bucen hnyi hnyei Juda. 66 Ke haba tavat hia thithö adre me löng, me adre me ip hmâ hnyi je hnyekudra, haingödra, ka habe, Ame he ka ieu ge da eang? Anyin a e but unyin hnyamen Than.

67 Ke a unöngöt dö Zakaria a kamen ge Hanu Kap, me e ame perofeta, ka habe,

68 E so adre me haisoâ Than Khongu Isaraela ;
Anyin a e ame senâ me bi hwaban möt hobi kâu lakeiny,

69 K' ame otillâ thö faoiny úhömeli hobi köta
Hnyi lap anyi Davita a athnyabainy :

70 (Helâji me hnen hna ha a deny anyin je perofeta ae kap hwân hnyi cau hmeledrany),

LUKA 2.

- 71 Ame he ka omeli öta únyi hnyi je iwahnaihmiöny möta, ke únyi hnyi hnyamödra hia adre me húkoti öta ;
- 72 He ka ányá betenge ka lakamöta, Me únykúme anyin úhinyköu ae kap ;
- 73 Waleji hofuc e ame khemanyin kö Abe-rahama a kamöta,
- 74 A g' adre me he ka omeli öta únyi hnyi hnyamen ta je iwahnaihmiöny möta, M' ate me he ka bi athnyabainy ke ba ot,
- 75 Hnyi hwakecin ae kap me wisa hnyi hnyimakan hnyi bonguta ta je bong hia thithö.
- 76 Eke, ke haba u, da, me adre me he ka haiö u me perofeta anyi Beönua : Anyin a u me he ka bán hnyi hnyimakan Than he ka ányâwia deny ta je gethen.
- 77 He ka owáhmakhmetoâ lakeiny ge úhömeli Wale he ka thang anyidra ta je hulö,
- 78 Únyi hnyi ibetengiö ae menyik anyin Khonguta. Anyin a wale ame he haolany ka sen' öta,
- 79 He ka omelamá tavat adre me laba hnyi lit me hmenon mok ; He ka su ta je cata ka hnyi gethen ae hnahic.
- 80 K' ame gan dut wanakat, me hwege tot hanon, me e ame laba hnyi je dok ae ba aten ke ne o but hnyi bong hnân omanená e ka at Isaraela.

HNYIMAKAN 2.

HABA hnyi je bong e, ame he but hnanyibu únyi ga Kaisara Augusto he ka sihnalimen aten hmeledrany hia. 2 Wale hna sihnalimen a bán hnyi úen Kurenio ame musi hnyi Suria. 3 Me adre me he hia but he ka sihnalimidra adre ve he ka idrin bi je taun. 4 Me ame he minya but Josefa úheny hnyi taun Nazareta hnyi Galilaia, ame he Juda ai, ka hnyi taun anyi Davita, Bethleema ien, anyin a e hanen lap me mátráni Davita ; 5 me me sihnalimen e me Maria, wale a úkócö mē, k' ame erkin dut. 6 Ke tiga ödru ling, me ame o but bong ame he ka hnokoâ hnyin. 7 Me e ame hnokoâ nokon da a atö ; ke e ame wádrá e ge mano, me omokulec ju hnyi taben jeú an meno, anyin ae ba hnödrin hna mokut hnyi uma umen je atkanyaua.

8 E hu tavat tuö mamoe hnyi hnyei eling, ödrin e hmáká hnyi hnyinghet hale-drin ta je mamoe. 9 Ke ame tot unyidrin angela anyin Than, me ame umumelam igigili ödrin melaminy Than, me ödrin e ot gan hmá. 10 Ke haba angela ame ha ködrin, ka habe, Ca ot bi ; anyin a wá bi, inya oge me ha köbun úthumetu ae so hnân senyin gan hmá hobi káu tavat hia thithö : 11 anyin adre hnokoâ hobi köbun hnyi bong ang hnyi taun anyi Davita, At úhömeli, wale Keriso a Than. 12 Ke walang haten köbun ; Öbun e he ka wá mendreng adre wádrá ge mano, ame mokut hnyi taben jeú an meno. 13 Me ame ie tha e me angela tavat ae se hia únyi hnyi drany, adre me ogâná Khong me ha, ka habe, 14 Ogâná thö Khong ae nua ethö görany ; Ke haba hnyi hmeledrany hnahic unyin tavat wale e ame betenge gadra.

15 Ke ame he but gadrin je angela hnyi dranyai, me ame úhakouá hnyat tuö mamoe, ka habe, ötin a he walang ang Bethleema ai, me wá únyi eang adre ányá, wale ame omanená köta hnen Than. 16 Me ödrin e he logot me ö Maria me Josefa, me inma minya ame mokut hnyi taben jeú an meno. 17 Ke ödrin e wá but, me ödrin e omanená hna thumetu ödrin ge wanakat e. 18 Ke haba tavat hia adre me löng me adre me láia ta je hofuc ame ha ködra hnen hnyat tuö mamoe. 19 Ke haba Maria ame ip hmá ta je hofuc eling hia, me únykúme eü hnyi hnyekon. 20 Me ame hmetu but hnyat tuö mamoe, ödrin e ole me ogâná Khong ge ta je únyi hia ödrin e löng me wá, heláji me hna ha ködrin.

21 Ke ame o but bong a eitiny hnân peritomoná wanakat, me ame hwenyi ien me, Iesu, wale a ha angela ke tiga ca erkin bi hinyen.

22 Ke ame um dö je bonginy obosoi ödru helá me hnanyibu anyi Mose, me adre me hom but e Jerusalema ai, he ka ip e hnyi hnyimakan Than, 23 (heláji me hna sihnalimen hnyi hnanyibu anyin Than, ka habe, Adre me he ka ha me kap ka Than ta je atö бага hia), 24 me ham ke hut helá me hna ha hnyi hnanyibu anyin Than, ka habe, Lo li biny, ame ne li lakon meköta. 25 Ke wá bi, wale ke at hnyi Jerusalema Simeona ien ; e at ae wisa hwakecin me outen Khong, ame halubahingen hna otubwelá at Isaraela : ke e Hanu Kap hnyi hon. 26 Ke adre hia but omanená káu a deny Hanu Kap, a g' ame ca he ka wá mok,

LUKA 3.

k' ame he ka mē wá thö Keriso anyin Than.
27 Ke e ame didró ka hnyi uma kap hnen.
Hanu: haba kamen me hinyen ödrü me
hom wanakat a Iesu he ka mádrá káu
hoton hnanyibu, 28 ke e ame kap e hnyi
li benyen, me ogáná Khong, me ha, ka
habe,

29 Than lö, u ma hna but walang ang
athnyabaem he ka he hnyi hnahic,
Heláji me hwám hofuc ;

30 Anyin oge me wá ge li emakök úhömeli
únyi gam,

31 Wale u je penapena hnyi hnyimakan
tavat hia thithö ;

32 Wale melam hnân omelamá Aten ta je
hnyei,
Ke hnân hmanenanginy lakem a Isa-
raela.

33 Ke haba kamen me hinyen, me ödrü me
láia ta je únyi adre me ha gan ; 34 ke haba
Simeona ame hahnahici ödrü, me ha kö
Maria a hinyen, ka habe, Wá bi, adre me
ip wanakat ang hnân okolo me otilá tavat
ae se hia hnyi Isaraela ; ke hnân haten
minya adre me he ka haikongoá ; 35 eke
adre me he ka dáoa minya hnyekom ge
bele vat ; me me manen dut je únykúmen
hnyok ae se hia. 36 Ke wale ko perofeta
momo jia Ana, nöku Fanuela, hanen tribu
Asera (ae se hia hmönyin je hunainy, k'
ame tha laba me áian ehac hnyi ta je huna
a seven hwân ke tiga hlu, 37 ke e safac
hnyi ta je huna a eite foa), e ame ca hnyi
hia hnyin uma kap, k' ame bi athnyaba
hnyi lit me lany, me ányá ca han, me labö
khöú. 38 Ke e ame o thö hnyi awa eling,
ame hnyi ole ka Khong, me e ame háia e
ködra hia hnyat adre me halubahingen
hwaban möt hnyi Jerusalema. 39 Ke
ödrü me umo ta je únyi hia hoton hnany-
ibu anyin Than, me ödrin e hmetu Galilaia
ai ka hnyi anyidrin taun wale Nazareta.

40 Ke ame gan dut wanakat, me ame
hwege me metá tot : ke e unyin ibetengió
anyin Khong.

41 Ame labö he kamen me hinyen Jeru-
salema ai hnyi je huna ka hnyi bijeú
paseka. 42 Ke twelv but ta je hunainy
ödrin e he Jerusalema ai helá me hwakecin
bijeú ; 43 ke a um dö je bongudrin, me
ödrü me he hmetu, ke ame laba biju wana-
kat a Iesu hnyi Jerusalema ; ke ca khana
kamen me hinyen ; 44 ke ödrü me úny-
kúme a e eú hnyi wanben bunyen, ke ödrü
me he khaca bong ; me ödrü me elám e
unyin je liamekeiny mödrü me labanödrü :

45 ke ödrü me ca wá bala, me ödrü me
hmetu but Jerusalema ai he ka elám. 46
Ke hwaban kun ta bong ödrü me wá e
hnyi uma kap, ame laba hnyi wanben tavat
úne, ame ling ödrin me hnei ödrin : 47 haba
tavat hia adre me löng, me adre me láia
gan hmá anyin metá me hnen hna thu.
48 Ke ödrü me wá e, me ödrü me láia : ke
haba hinyen ame ha káu, ka habe, Nökuk
lö, ieú gam u je heláe köhmu? wá bi, inya
me kámám öhmu me elóm u, k' öhmu tenge.
49 E ame ha ködrü, ka habe, Ieú gabu öbu
me elóm nya, e ca khan' öbu a hamök he
ka vheno ta je únyi anyi cica? 50 Ke
ödrü me ca wá únykúme hnen hna ha
ködrü. 51 Ke e ame tha he mödrü, me o
hnyi Nazareta ; ke e ame löng hotudru :
haba hinyen ame ip hmá hnyi hnyekon ta
je únyi hia thithö eling.

52 Haba Iesu ame kú tot hnyi metá me
je huna, ke ame betenge gan Khong me
at.

HNYIMAKAN 3.

HABA hnyi huna a fittininy musi a
Tiberio Kaisara, ke ame gavena
Ponetio Pilato hnyi Juda, ke ame musi
Heroda hnyi Galilaia, ke ame musi hnyi
hnyei Ituraja me Terekoniti Filipino a liame-
keiny mē, ke ame musi Lusanio hnyi Abi-
lene, 2 ke haba li at bihut ae nua me Ana
me Kaiafa, haba hnyi üen e, me ame o but
hofuc hwan Khong kö Ioane nöku Zakaria
hnyi hnyebuba. 3 Ke e ame vheno ta je
ke keihen hnyei hia thithö hnyi Joridano,
ame khetá bapataisoiny ietra m' adre me he
ka thang degecá but ta je hulö ; 4 heláji
me hna sihnalimen hnyi tusiny hofuc ho
Isaia perofeta, ka habe,

Ifucin at ame hongot hnyi hnyebuba,
ka habe,

Ányáwia th' öbun gethen deny Than,
Owisa thö deny ta je gethen.

5 Ame he ka öunöngötá ta je hnyigöulen
bucen hia,

K' ame he ka ohnyikáná ta je bucen me
ta je hut ;

K' ame he ka wisa bi dok ae hwali,
Ke okhabaláúá but ta je gethen ae
hokong ;

6 Ke ame he tavat hia thithö ka wá úhö-
meli anyin Khong.

7 Me e ame ha ka tavat ae se hia adre
me o but e me he ka bapataisoi ödra, ka
habe, Je lakon on lö, ia köú köbun he ka

LUKA 4.

kec ge hmönyin ame he ka o? 8 Anyin a wale wa but öbun wan ae úcú me ietra, ke ca hwân öbun he ka ha eú hnyi je hnyekubun, ka habe, Aberahama kamöta : anyin a inya oge me ha köbun, ka habe, e khana Khong he ka bi mât-râni Aberahama, únyi hnyi ta je veto ang. 9 Ke walang ang adre hia but ip giwa hnyi hwecin ta je úö ; ke haba ta je úö ame ca wa so bi, me adre me he ka sö degecâ me khúâ ka hnyi meic. 10 Haba tavat adre me hnö e, ka habe, Ieú hany möhmun öhmuu e he ka ányâ? 11 E ame thu me ha ködra, ka habe, Haba at a lo anyin li úkot e so e ame he ka ham ka at ae ba gan ; ke haba at ae hu jeú hamen he ka ányâ helâe minya. 12 Ke ame o but minya ta je telona, me me he ka bapataisoi ödra me ha kâu, ka habe, At úne lö, ieú hany möhmun? 13 Me e ame ha ködra, ka habe, Ca hom újengöâ hon únyi adre hûna köbun. 14 Haba tavat vat adre me hnö e minya, ka habe, Haba öhmun, ieú hany möhmun? E ame ha ködra, ka habe, Ca okongoâ bi ke at, ke ca bifuco thoiâ ; ke sekubun ju ge hna bi hwaböbun.

15 Ke tavat adre halubahingen, ke ödra hia adre me únykúme eú hnyi je hnyekudra, ka habe, ame ne Ioane la Keriso, ame ne ca e bi ; 16 me haba Ioane ame thu ködra hia thithö ka habe, Inya oge me bapataisoi öbun ge köiö ; ke ame he ka o at ae nua maniny huk, iny ca úcú bi he ka thang wen li tangen hnyeúcan : e ame he ka bapataisoi öbun ge Hanu Kap me meic : 17 e hnyi hnyamen ut, ke e ame he ka tha ulec wia anyin hna huje hwit hnyin, me me ip bi hwit hnyi omhani ; ke e ame he ka thong degecâ hlanyin hnyi meic ame ca mok bi.

18 Ke se hia ta je hofuc e ame khetâ hnyin evangelia ka tavat ; 19 ke e ame hia but thawo Heroda ca Herodia áian liamekeiny mē, me can ta je monu hia ame mádrâ Heroda, 20 ke e ame bi hanen únyi ang hon ta je únyi hia, a g' ame cö Ioane thö.

21 Ke a hia but bapataisoâ tavat hia thithö me e ame bapataisoi Iesu minya, ke e ame hic, me ame khöng ut drany, 22 me ame olö but kâu Hanu kap hnyi unyin, helâ me biny, ke ame o but hofuc únyi hnyi drany, ka habe, U thibi Nökuk a oúnykúmik ; oge me senyin köu.

23 Ke haba Iesu hnyi úen e ame hwân he ka huliwa, me helâke me thöte but hunainy, e nöku Josefa (hnödra hna ha

helâe), mât-râni Heli, 24 mât-râni Mathat, mât-râni Levi, mât-râni Meleki, mât-râni Jana, mât-râni Josefa, 25 mât-râni Matathia, mât-râni Amosa, mât-râni Naumo, mât-râni Eseli, mât-râni Nangai, 26 mât-râni Maatha, mât-râni Matathia, mât-râni Semei, mât-râni Josefa, mât-râni Juda, 27 mât-râni Joana, mât-râni Resia, mât-râni Zerubabela, mât-râni Salathiel, mât-râni Neri, 28 mât-râni Meleki, mât-râni Adi, mât-râni Kosamo, mât-râni Elemodamo, mât-râni Era, 29 mât-râni Jose, mât-râni Eliezera, mât-râni Joreimo, mât-râni Mathat, mât-râni Levi, 30 mât-râni Simeona, mât-râni Juda, mât-râni Josefa, mât-râni Jonam, mât-râni Eliakima, 31 mât-râni Melea, mât-râni Mena, mât-râni Matatha, mât-râni Nathana, mât-râni Davita, 32 mât-râni Jese, mât-râni Obed, mât-râni Boaza, mât-râni Salamona, mât-râni Naasona, 33 mât-râni Aminadaba, mât-râni Aram, mât-râni Eseroma, mât-râni Farez, mât-râni Juda, 34 mât-râni Jakob, mât-râni Isaaka, mât-râni Aberahama, mât-râni Tera, mât-râni Nahora, 35 mât-râni Serugo, mât-râni Reu, mât-râni Pelege, mât-râni Heberu, mât-râni Sala, 36 mât-râni Kanana, mât-râni Afasada, mât-râni Sema, mât-râni Noa, mât-râni Lameka, 37 mât-râni Methusela, mât-râni Enoka, mât-râni Jareda, mât-râni Mahaleleel, mât-râni Kanana, 38 mât-râni Enosa, mât-râni Setha, mât-râni Adamu, mât-râniy Khong.

HNYIMAKAN 4.

KE unöngöt dö Iesu ge Hanu Kap, ke e ame hmetu úheny hnyi Joridano, k' ame lelö thö e hnen Hanu ka hnyi hnyebuba 2 hnyi fâte ta je bong, k' ame cubec e hnen diabolö. Ke e ame ca han hnyi je bong eling : ke ame um dö je bong eling, me e ame mekihnânem but. 3 Haba diabolö ame ha kâu, ka habe, U je ne Nokon Khong, ha thö ka je veto ang e me areto but. 4 Haba Iesu ame thu kâu, ka habe, Adre hia but sihnalimen, ka habe, Ame ca he ka möt at ge areto thibi. 5 Ke e ame lelö thö e, me omanenâ kâu ta je dökhü hia thithö eang hmeledrany helâ me thuthubademak. 6 Ke haba diabolö ame ha kâu, ka habe, Oge me he ka ham köu ta je musi hia e, me ta je hmanenanginy : anyin adre hia but hna but e könya ; m' inye he ka ham ka at oge me wek kâu. 7 Anyin a wale u je ne he ka khudrung ju könya, me ányâm but ta je únyi hia eling. 8 Haba Iesu ame thu kâu, ka habe, Adre hia but

LUKA 4.

sihnalimen, ka habe, U me he ka khudrung ka Than a Khongom, me bi athuyabainy thibi. 9 Ke e ame hom e Jerusalema ai, me ip e hon baitoiny uma kap, me ha kâu, ka habe, U je ne Nokon Khong, utut jime thö: 10 anyin adre hia but sihnalimen, ka habe,

E ame he ka hûna ka anyin ta je angela hobi köu, he ka tuö u:

11 ke walang khaca, ka habe,

Adre me he ka kap tilö u ge je hnyamödra,

Wâ e nye thö thö cam hnyi veto.

12 Haba Iesu ame thu kâu, ka habe, Adre hia but ha, ka habe, U me ca he ka cubec Than a Khongom.

13 Ke ame um dö je úcubic hia anyin diabolö, me e ame hna but e ke ne o but hnyi ke úen.

14 Ke Iesu ame hmetu Galilaia ai hnyi maniny Hanu: me ame lung igigilö e hnyi je ke keihen hia. 15 Ke e ame úne hnyi umödra je sunago, ke tavat hia adre me ogânâ e.

16 Ke e ame o but hnyi Nazareta, waleji adre hat e hnyin: ke e ame didrö ka hnyi sunago hnyi bong sabath, helâ me hwa-kecin, k' ame tot he ka au tusi. 17 Ke adre me ham kâu tusi anyi Isaia perofeta. Me e ame khöng tusi, me elâm dok adre me sihnalimen hnyin, ka habe,

18 E but huk Hanon Than,

Anyin a e ame hia but hû nya he ka khetâ úthumetu ae so ka ta je theduoc:

E ame hia but kunö nya he ka haimemenâ hna hna ka ta je hwenbâ,

Ke hna bwele ka je wadröu,

Ke he ka thang hnyat adre aat dö

19 Ke he ka khetâ hunainy ae úcú ka Than.

20 Ke e ame vhec tusi, me ham ka athnyaba, me e ame laba ju: me ame wâ e hnen tavat hia thithö hnyi sunago. 21 Me e ame hwân he ka ha ködra, ka habe, E hwâdá but hna sihnalimen ang hnyi bong ang hnyi je hnyikönyöbun. 22 Me haba ödra hia adre me haisoâ e, k' adre me láia ta je ifucin ae so ame khulu but únyi hnyi hnyimen: haingödra, ka habe, Hawa, ca nöku Josefa at ang? 23 Haingö Iesu ame ha ködra, ka habe, Öbun e he la ka ha könya úhöücú eang, ka habe, At ae tren bubuny lö, osoi u thö: haba ta je únyi öhmun e löng a g' adre ányâ hnyi Kaperenauma, ányâ minya thö eang hnyi em

hnyei. 24 Haingen minya, ka habe, E hnathu inya oge me ha köbun, ka haba, E ba perofeta adre me kap hnyi iny hnyei. 25 Ke e hnathu inya oge me ha köbun, ka habe, E se hia ta je safac hnyi hnyei Isaraela hnyi je bong bongu Elia, waleji hnyi úen adre me hlöng drany hnyi kun ta huna ke siks ta tehi, ke ame o hmiâ hnyi hnyei hia; 26 ke adre ca kunö Elia bi ka ke at gadra, ke so bi ka ke momo a safac hnyi Sarepeta hnyi Sidona. 27 Ke se hia ta je lepera hnyi Isaraela hnyi je bong bongu Elisaia perofeta; ke ba ke at gadra adre osoâ ke jia thibi a Naamana at Suria. 28 Me ame hmönyidra hia hnyi sunago tavat adre me löng ta je únyi e; 29 me adre me todrö me obâ e ka hnyi hoton taun, me lelö e ka hnyi baten hut adre hötilö taun hnyin, m' adre me he ka khuâ e kâu. 30 Ke e ame he hnyi wanbödrâ me he but.

31 Ke e ame o but hnyi Kaperenauma, ke taun hnyi Galilaia. Ke e ame n' ödra hnyi bong sabath; 32 me adre me láia hnen hna úne; anyin ae man hwan hofuc. 33 Ke eiö hnyi sunago ke at ae hu hanuiny demoni ae kong; ke e ame hongot hwege thö, ka habe, 34 E, Iesu at Nazareta lö, u me hö e köhmun? u je o but he ka oh' öhmun? inya oge me wâhmakhmetu u a u At ae Kap anyin Khong. 35 Haba Iesu ame thawâ e, ka habe, Ca mede, ke didrut úhem hnyi hnyekon. Ke a hia but demoni hagutâ e hnyikânâi hnyi wanben, me e ame didrut úheny hnyi hnyekon, ke a ca okongoâ bi e. 36 Haba ödra hia adre me láia ke adre me úhaköuâ, ka habe, Ie hofuc ang, anyin a e ame musö hwegiâ ta je demoni ae kong ge man, me adre me kec me didrut. 37 Me ame lung igigilö e ka hnyi ta je ke keihen hia.

38 Me e ame todrö úheny hnyi sunago me didrö ka hnyi uma umö Simona. Ke haba hinyen öiö Simona ame moko kahwa ae gan hmâ; ke adre me khöü kâu hobi kâu momo. 39 Me e ame tot unyin momo, me thawâ kahwa; me ame hia but: me momo ame ie todrö me bi athnyabaidrin.

40 Ke ame he but ka dit seúnö, haba ödra hia ae hu je komok ae ve bongon, adre me hum ödra kâu; ke e ame ip li hnyamen hudrin hia, me osoi ödra. 41 Ke ame dit minya je demoni úhedra hnyin tavat ae se hia, adre me hongot me ha, ka habe, U thibi Nokon Khong. Ke e ame thaw' ödra, m' adre me ca he ka fuc, anyin

LUKA 5.

adre me wâhmakhmeto but a e thibi Keriso.

42 Ka selany jut, me e ame didrut me he ka hnyi hnyebuba : ke haba tavat ae se hia adre me elâm e, me o but kâu, me be-thawâ, me me ca he ka hn' ödra. 43 Me e ame ha ködra, ka habe, Hamök he ka khetâ úthumetu ae so hnyi dökhu dokhon Khong hnyi ke je taun bi : anyin adre me kunö nya hobi kâu e.

44 Ke e ame khetâ hnyi je sunago hnyi Galilaia.

HNYIMAKAN 5.

E AME tot hnyi baten köiö Genesareta, k' ame úhneki kâu tavat ae se he ka löng hofuc hwan Khong ; 2 ke e ame wâ li hu hnyi baten wagewe : ke haba tavat thut, me ödrin e he but he ka ânyâwia ütödrin je ert. 3 Me e ame ölö thö ka hnyi ke hu, a hu hu Simona, me sumâtâ e he ka okhaca hukâ hnyiköiö ai. Ke e ame laba ju hon hu, k' ame nâ tavat ae se hia. 4 Ke a hia but ha hofuc, me e ame ha kö Simona, ka habe, Kec ut ka hnyi dok ae dit, me hna but ütöbun tang ert hobi kâu öhan. 5 Haba Simona ame thu kâu, ka habe, Taböny Than lö, öhmun e huliwa hnyi lit hia, ke ba únyi öhmun e hom : ke únyi ge hwâm hofuc oge me he ka hna je ert. 6 Ke ödrin e ânyâ helâe, me ödrin e ginyâ but wâ ae se hia, me ame he bi ka hmouca but ütödrin tang ert ; 7 ke ödrin e aleû je lahanödrin hon ke hu, m' ödrin e he ka hadru' ödrin. Me ödrin e o but, me öunöngötâ thö li hu, me me hwân ka ú but li hu. 8 Ke a wâ but ga Simona Peteru, me e ame ta ju hnyi li bouca Iesu me ha, ka habe, Than lö, he thö gak, anyin a iny at ae kong. 9 Anyin a e ame lâiâ, me ödrin hia thithö unyin, ge öhan ödrin e sa ; 10 ke helâe minya Iakobo me Ioane, a li laku Zebedaio, li at ödru me tha thut me Simona. Haba Iesu ame ha kö Simona, ka habe, Ca ot ; hwân dö ang u me he ka kât tavat. 11 Ke ame khöp do li hu me ödrin e hna but ta je únyi hia, me he hoton.

12 E ame tiga laba hnyi ke taun ke wâ bi, at ae khöt ut unyin ge lepera : k' ame ö Iesu, me ta ju hnyikânâi, me sumâtâ e, ka habe, Than lö, a ne wem me khanö u he ka osoi nya. 13 Me e ame inâ hnyamen me kâlâ e, me ha, ka habe, Iny be wek ; u me so but. Me ame ie hia but

lepera gan. 14 Me e ame hûna kâu, he ka ca ha ka ke at : ke he thö, omanenö u bi thö ka at bihut, me bi hudiny hna osoi u, helâji me hna hûna hnö Mose, hnân ohnathoâ ködrin. 15 Ke e ame lung tot igigilö : ke ame úkhacaköu tavat ae se hia he ka löng, me he ka möt ut ge ta je mok gadra. 16 Me e ame he but ka hnyi hnyebuba he ka hic.

17 Ke haba hnyi ke bong eling e ame tiga úne ; ke ame úlalabainy ta je Faresaio me tavat únö hnanyibu, adre o but úhedra hnyi ta je taun hia hnyi Galilaia, me Juda, me Jerusalema : ke e bi unyin Than man he ka omelö. 18 Me wâ bi, tavat adre me vaden at ae mat hon hna mokut : me adre me heleû deny he ka hom e me ip hnyi hnyimakan. 19 Ke ödrin e ca wâ bi deny he ka hom e. anyin ae se hia tavat, me ödrin e ölö thö ka hnyi hon uma me hna hna but e me hna mokut minya hnyi wanben hna tubi bouma hnyi hnyimakö Iesu. 20 Ke e ame wâ anyidrin labageju, me e ame ha, ka habe. Ketha lö, adre hia but thang ta je monu gam. 21 Haba tavat sihnalimen me ta je Faresaio adre me hwân he ka úhnenamö ka habe, Ia e ame fuc bigan ? Ia ae khana he ka hna degecâ ta je hulö ke hake Khong thibi ? 22 Ke ame manen dut kö Iesu hnödrin hna úhnenamö, me e ame thu me ha ködrin, ka habe, Ieû gabun öbun e úhnenamö eû hnyi je hnyekubun ? 23 Ieû ae hâhâ he ka ha, ka habe, Adre hia but thang ta je monu gam, ke he ka ha bi. ka habe, Todrö me he thö ? 24 Ke so bi. me me manen köbun ae tren man Nokon at eang hmeledrany he ka hna degecâ ta je hulö (e ame ha ka at ae mat, ka habe). Inya oge me ha köu, Todrö me hom minya thö hnâm me he ka hnyi umâm uma. 25 Me e ame ie todrö hnyi hnyimaködra, me hom únyi e ame mokut hon, me he ka hnyi umen uma, k' ame ogânâ Khong. 26 Haba ödra hia adre me lâiâ me ogânâ Khong ; k' adre unöngöt dö ge ot, me haingödra, ka habe, Ate hia but wâ hnyi bong ang ta je únyi ae ke bongon bi.

27 Ke hwaban ta je únyi eling, e ame he me wâ ke telona, Levi ien, ame laba hnyi taben khöp fat, me e ame ha kâu, ka habe, He hotuk. 28 Me e ame hna but ta je únyi hia, k' ame tot me he hoton. 29 Haba Levi ame mádrâ bijeû ae gan hnyi umen uma hobi kâu e : ke se hia ta je telona me ke je hnyat adre me tha laba

LUKA 6.

mödrin he ka han. 30 Ke haba ta je Faresaio me tavat sihnalimen unyidrin, adre me ulidro laten, ka habe, Ieú gabun öbun e tha han me ic me ta je telona, me tavat ae kong. 31 Ke haba Iesu ame thu me ha ködrin, ka habe, E ca únyi hnathu bi at ae tren bubuny ka tavat ae hwege; ke so bi ka tavat ae mok. 32 Oge me ca o he ka hawâ tavat ae wisa, ke tavat bi ae kong, m' adre me ietra thö. 33 Me adre me ha kâu, ka habe, Haba je latö Ioane, me ödrin e osehia ânyâ ca han, me khöü; ke helâe minya laten ta je Faresaio; ke haba lâtam, me ödrin e han me ic. 34 Ke haba Iesu ame ha ködra, ka habe, Hawa, e khan' öbun he ka ocahanâ je lahanen at a tep faipoipo, ke tiga e bi unyidrin at a tep faipoipo? 35 Ke ame he ka o je bong, me adre me he ka hom dö at a tep faipoipo, wale but e úen ödrin e he ka ânyâ hnyin ca han. 36 Ke e ame ha ködra úböücú, ka habe, E ba at ame he ka kia ecmano únyi hnyi úkhaú ae teb únyi, me utibet-köüâ úkhaú ae bobot ut; wâ e nye kheke but úkhaú ae teb únyi, k' ame ca he bi ka tha úcú ecmano ae teb únyi me at ae bobot. 37 Ke ba at ame hingâlâ waina a teb únyi ka hnyi je tangen ae bobot ut, wâ e nye hmouca but ta je tangen ge waina ae teb únyi, me ame hingölö but, me kong ut ta je tangen. 38 Ke so he ka hingâlâ waina a teb únyi ka hnyi ta je tangen a teb únyi. 39 Ke ba at ame ijem waina ae kueny jut me ame he bi ka weny tebúnyi, ke haingen dö, ka habe, E so únyi ae kueny.

HNYIMAKAN 6.

HNYI ke sabbath e ame he hnyi hna belök; ke haba laten ödrin e thu je wan whit, me tau ge je hnyamödrin, me han. 2 Ke haba keihen ta je Faresaio adre me ha ködrin, ka habe, Ieú gabun öbun e ânyâ únyi ae ca wisa he ka mádrâ hnyi sabbath? 3 Me Iesu ame thu ködra, ka habe, Öbun e ca munyi aú hna mádrâ hnö Davita, waleji e ame mekihnânem me anyin bunyen; 4 a g' ame didrö ka hnyi uma umen Khong me hom, me an je areto hnân omanená, ke ame ham minya ka anyin bunyen; wale ae ca úcú he ka an, ke so thibi tavat bihut? 5 Ke e ame ha ködra, ka habe, Nokon at a Tuhan sabbath minya.

6 Hnyi ke sabbath e ame didrö ka hnyi sunago me úne: ke wale bi eling ke at, ke

meleca but hnyamen a metân. 7 Haba tavat sihnalimen me ta je Faresaio adre me ecmâkâ e, ame ne he ka osoâ hnyi sabbath; m' adre me he ka wâ thö deny he ka bi fuco e. 8 Ke e ame wâhmakhmeto únykúmenödra, me e ame ha ka at ae meleca hnyamen, ka habe, Höhöi thö, todrö hnyi wanben. Me e ame höhöi thö me tot. 9 Haba Iesu ame ha ködra, ka habe Oge me he ka hnei öbun, Hawa, e úcú he ka mádrâ so hnyi sabbath, ame ne he ka mádrâ hulö? he ka omelö at, ame ne he ka hlingâ? 10 Ke e ame hngehgele me ö'dra hia thithö, me e ame ha ka at, ka habe, Lau but hnyamâm. Me e ame ânyâ, me ame so but hnyamen. 11 Ke adre me hmönyidra gan hmâ; me úhnenamököüâ únyi adre me he ka ânyâ kö Iesu.

12 Hnyi úen eling, e ame he ka hnyi bucen he ka hic; ke e ame hic ka Khong hnyi lit hia. 13 Ke a lany jut, me e ame hawâ laten: ke e ame úca hnyat a twelv gadrin, me e ame hwenyi iödrin je aposetolo; 14 jia Simona, wale e ame hwenyi ien minya bi Peteru, ke Anederea a liamekeiny mē, ke Iakobo, ke Ioane, ke Filipino, ke Batolomaio, 15 ke Mataio, ke Toma, ke Iakobo noku Alefaio, ke Simona adre me hwenyi ien, Zelote, 16 ke Juda liamekeiny me Iakobo, ke Juda Isakariota wale at úalecuo; 17 ke e ame tha utut mödrin me tot hnyi dok ae tha hon, me tavat ae se hia a je laten, me tavat ae se hia úhedra Juda hia, me Jerusalema, ke únyi hnyi hobat köiö hnyi Turo me Sidona, tavat adre me he but kâu he ka löng hwan, me me he ka osoâ hnödra je mok; 18 me tavat minya adre ovecâ hnen ta je hanu ae kong, me adre me so but. 19 Ke ame elâm he ka kâlâ e hnen tavat ae se hia: anyin ame he but man únyi gan me osoi ödra hia.

20 Haba e ame wâ hmâ laten k' ame ha, ka habe, Hnöbun hnahic tavat ae theduoc, anyin a hobi köbun dökhü dokhon Khong. 21 Hnöbun hnahic öbun e mekihnânem walang ang, anyin adre me he ka osekuni öbun. Hnöbun hnahic öbun e tenge walang ang, anyin öbun e he ka hluma. 22 Hnöbun hnahic e ka he tavat ka hûköti öbun, me ob' öbun, me haikongu öbun, me degec je iöbun helâ me únyi ae kong can Nokon at. 23 Senyin d' öbun hnyi bong eling, me utsenyin: anyin a wâ bi, e gan hmâ hwa-böbun ethö hnyi drany: anyin adre me mádrâ helâe ka ta je profeta hnen laka-

LUKA 7.

mödra. 24 Ekölö gabun tavat tren omjeu! anyin a öbun e hia but kap anyibun so. 25 Ekölö gabun tavat ae sekubun walang ang! anyin a öbun e he bi ka mekihnänem. Ekölö gabun tavat öbun e hluma walang ang! anyin a öbun e he ka tenge me hlöuhlöu. 26 Ekölö gâbun e ka he tavat hia ka haisoi öbun! anyin a helâe hnen lakamödra ka ta je perofeta thoi.

27 Ke inya oge me ha köbun tavat öbun e löng, ka habe, Betenge ju ge ta je iwahnaihmiony möhun, mâdrâ thö so ka tavat adre me hûkoti öbun, 28 hasoi ödra thö adre me hang' öbun, hic ju hobi ködra adre me okongu öbun. 29 Ke haba at ame he ka khaú wahicâm, me wia minya thö kâu ke keihen; ke haba at ame he ka hûgúnâ ânyâm úkot, me ca behânâ bi úkhaú. 30 Ham dö ka tavat adre me sumató u; ke ca hnö hmetu bi ânyâm ta je únyi adre hûgúnâ. 31 Ke haba hnöbun hna weny tavat he ka ânyâ köbun, me ânyâ helâ ju e ködra. 32 Ke öbun e ne betenge ge tavat adre me betenge gabun, ie at ame he ka ole köbun? anyin a tavat ae kong adre me betenge ge tavat adre me betenge ködra. 33 Ke öbun e ne mâdrâ so ka tavat adre me mâdrâ köbun so, ie at ame he ka ole köbun? anyin a tavat ae kong adre me mâdrâ helâe. 34 Ke öbun e ne mē ham ka tavat, me únykúme he ka hu hmetu gadra, ie at ame he ka ole köbun? haba tavat ae kong adre me mē ham ka tavat ae kong, me me hu hmetu únyi ae tha úcú. 35 Ke betenge ju ge je iwahnaihmiony möbun, me mâdrâ thö so, me mē ham, ke ca únykúme bi; ke ame he ka gan hmâ hwaban köbun, ke öbun e he ka je lakon Beönua: anyin a e menyik ködra hia adre me ca ole bi, me tavat minya ae kong. 36 Ibetengiökou ju öbun, helâ me Kamöbun at ae betenge. 37 Ca únykúme hwalö bi, m' adre me ca he ka únykúme hwali öbun: ca haimono, m' adre me ca he ka haimonu öbun: thang bâúâ m' adre me he ka thang bâú' öbun bi: 38 ham dö, ke adre me he bi ka ham köbun; wale tulut ae gan, adre hlec, me újjingákouâ, me kökölö but, adre me he ka ham ka hnyi je úlaibun. Ke haba hnöbun hna tuluto, me adre me he bi ka tuluto köbun.

39 Ke e ame ha úhöúcú ködra, ka habe, Hawa, e khana wadröu he ka lelö ke wadröu? ödrü me ca he ka tha ta ka hnyi hmonop? 40 E ca beönua at adre nâ hon at ame úne: ke ame he ka tha úcú at adre

ometâ me at ame úne kâu. 41 Ke ieú gam u me wâ hmâ atmen hnyi emakan liamekeiny möu, ke u me ca wâ únykúme bi udâ hnyi hnyin emákâm bi? 42 Ke u me he ka kâmâu ka ha ka liamekeiny möu, ka habe, Liamekeiny lö, iny bethe he ka hom atmen hnyi hnyin emákâm, ke haba u bi u me ca wâ hmâ udâ eú hnyin emákâm bi? U at thoi hnyok, bâm ka degec udâ únyi hnyi emákâm bi, m' u me he ka wâ wia he ka degec ut atmen únyi hnyi emakan liamekeiny möu. 43 Anyin ae ba úö ae so ame wa wan bi ae kong; ke haba khaca, e ba úö ae kong ame wa wan ae so. 44 Anyin ame ve manen je úö ge wan bi. Anyin adre me ca tau je wan meta únyi hnyi úö ae udedö, ke adre me ca tau wan vine hnyi iwatetaföcö. 45 Haba at ae so ame hom but ta je únyi ae so únyi hnyi tang omjehen hnyekon ae so; ke haba at ae kong ame hom but ta je únyi ae kong únyi hnyi tang omjeú ae kong: anyin ame fuc dö hnyem únyi ge hnyok ae unöngöt dö.

46 Ke ieú e gabun a öbun e hao nya, ka habe, Taböny than, Taböny than lö, k' öbun e ca mâdrâ bi ta je únyi oge me ha? 47 Haba tavat hia adre me o könya me löng hok ta je hofuc me mâdrâ, me oge me he ka omanená köbun at ae úcú mē: 48 E úcú me at ame hötilö uma, k' ame hiny dilâ, ke a bi taben ge veto, ke ame o but di, k' ame khutukhavâ uma eling, me ame ca bwebwet bi: anyin adre me otilâ wia e. 49 Ke haba at ame löng, k' ame ca mâdrâ bi, me úcú me at ame hötilö uma hon kânâ ke ba taben; ke ame patrutrua bi di kâu, me logot ü but e; ke gan hmâ hnaúhangö uma e.

HNYIMAKAN 7.

KE e ame umo hwan ta je hofuc hnyi hnyekönyen tavat, me e ame didrö ka hnyi Kaperenauma.

2 Ke a mok athnyaba a oúnykúminy keneturio, k' ame he but ka mokcu. 3 Ke e ame löng hwakeci Iesu, me e ame kunâ wahingatiny at Juda kâu he ka sumátâ e, me me he but he ka omelö athnyabainy. 4 Ke ödrin e o but kö Iesu, me sumátâ újengö e, ka habe, E úcú at eling m' u me he ka ânyâ únyi eang kâu: 5 anyin a e ame betenge ge ita hnyei, ke a hia but otilâ umöhmun sunago. 6 Haba Iesu ame tha he mödrin. Ke e hakekeny jut ka

LUKA 7.

hnyi uma, me haba keneturio ame kunâ kâu je lahanen he ka ha kâu, ka habe, Than lö, më todru : anyin a iny ca ûcû bi, m' u me he ka didrö ka hnyi umök uma : 7 wale m' oge me ûnykûme a iny ca ûcû bi he ka he but köu : ke so u me he ka ha thibi hofuc, me ame he ka mödrut athnya-baik. 8 Anyin a inya ang at ame löng musi, ke hu gak je soja : ke oge me ha ka ke at, He thö, me e ame he ; ke ka ke at, Aiö u, me e ame o könya ; me ka athnya-baik, Anyâ thö e, me e ame mâdrâ. 9 A löng ut Iesu ta je ûnyi e, me e ame lâiâ, me hwiö me ha ka tavat ae se hia adre me he hoton, ka habe, Oge me ca wâ bi hnyi Isaraela labageju ae gan helâe. 10 Ke haba hnyat adre kunâ me ödrin e hmetu ka hnyi uma, me wâ athnyaba a ga möt dö.

11 Ke hwaban dö e, e ame o ka hnyi taun Naina ien ; ke ame tha he më laten me tavat ae se hia hmönyin. 12 Ke e ame hakekenyâ homagöuleny taun, me wâ bi, adre me vaden dut at a mokcu, nokon hinyen a khaca thibi, ka safac ut momo : ke tha e me tavat ae se hia ûnyi hnyi taun. 13 Ke haba Than ame wâ momo, me e ame betenge gan, me ha kâu, ka habe, Ca tenge. 14 Ke e ame he hakekeny me kâlâ tap ; me ame todru tavat adre me sam. Ke e ame ha, ka habe, Hidröu lö, inya oge me ha köu, ka habe, Todrö. 15 Me ame laba thö at a mokcu me hwân he ka fuc. Me e ame ham e ka hinyen. 16 Me ame o ködra hia ot ae gan hmâ : ke adre me ogânâ Khong, me ha, ka habe, A o but ang unyita perofeta ae gan hmâ : ke, Khong ame senâ lakeiny. 17 Me ame lung hnyi Juda me je ke keiben hia igigilö ûnyi eling gan.

18 Ke haba je latö Ioane ödrin e omanenâ kâu ta je ûnyi eling. 19 Me haba Ioane ame hawâ ke li at hnyi laten me kun' ödrü ka Than, he ka ha, ka habe, U at ame he ka o, ke hawa, öhmun e he ka lubahingen khaca? 20 Ame o but li at kâu, me ödrü me ha, ka habe, A kun' öhmu köu Ioane Bapataiso he ka hnei u, ka habe, U but e at ame he ka o, ke hawa öhmun e he ka lubahingen khaca? 21 Haba hnyi awa eling e ame omelö tavat ae se hia ame taku ödra hnen mok, me mok ae cap, me ta je hanu ae kong ; ke e ame obwela ta je wadröu ae se hia. 22 Ke e ame thu ködrü, ka habe, He th' öbu ka thumetu Ioane hnöbu hna wâ me löng ; a ga bwela but ta je wadröu, k' ame he thö ta je mat, ke

khabelaü but ta je lepera, k' ame löng dö ta je wejiji, ke a möt hmetu thö tavat adre mokcu, k' adre me khetâ but ûthumetu ae so ka ta je theduoc. 23 Hnahic hnen at ame ca he ka thö thö gak.

24 Ame he but li ûthumetu anyi Ioane, me e ame hwân he ka ha ka tavat ae se hia hwakeci Ioane, ka habe, Öbun e he but ka hnyi hnyebuba he ka wâ ieü? hawa, hlowe ame bwebwelâ ang? 25 Ke öbun e he but he ka wâ ieü? at ame khavâ ûkhaü ae menyik? Wâ bi, ödrin dö hnyi uma umen je than tavat adre me khavâ ûkhaü ae so, k' adre kap sot. 26 Öbun e he but he ka wâ ieü? perofeta? Eke, oge me ha köbun, e at ae beönua hon perofeta. 27 E at eji adre sihnalimen, ka habe,

Wâ bi, inya oge me kunâ anyik ûthumetu hnyi hnyimâkâm,

At ame he ka penapena dem gethen hnyi hnyimâkâm.

28 Inya oge me ha köbun, ka habe, E ba at a hnokoâ ge omomo ae beönua hu Ioane : ke so bi haba at ae ûhnyükong gadra hnyi dökhü dokhon Khong, me beönua hon e. 29 Ke haba tavat hia, me ta je telona, adre me löng, me haisoâ Khong, k' adre hia but bapataiso ödrâ hnen hna bapataiso anyi Ioane. 30 Ke haba ta je Faresaio me tavat ûnö hnanyibu, me adre me ka iet degecâ je ûnykûmenen Khong, k' adre me ca bapataiso ödra ge anyin bapataiso. 31 Oge me he bi nya ka öucoâ me ieü tavat hnyi dö ang, k' ödra tha ûcû me ieü? 32 Ödra ûcû me ta je wanakat adre me laba hnyi hna ûcû omjeü, k' adre me úhuenamö, ka habe, Öhmun e túö kowi köbun, k' öbun e ca bibiâ thö ; öhmun e tenge, k' öbun e ca sang betenge thö. 33 Anyin a o but Ioane Bapataiso k' ame ca han areto, k' ame ca ic waina, me haingöbun, ka habe, E hu demoni gan. 34 K' ame o but Nokon at ame han me ic, ke haingöbun, ka habe, Wâ bi at ae hutö me hwen hmiâ waina, hanen ta je telona me tavat ae kong! 35 Anyin adre me haiwisa metâ hnen je lakon bi.

36 Ke haba ke Faresaio ame hawâ e he ka tha han më. Me e ame didrö ka hnyi uma umen Faresaio, me laba ju ka han. 37 Ke wâ bi ke momo aten taun, momo ae kong ; ke e khana but a Iesu ame laba ka han hnyi uma umen Faresaio, me e ame hom kaia alabasa tangen muro, 38 k' ame tot hoton hnyi li can me tenge, me hwân he ka okhubetâ li can ge deköien li emakan,

LUKA 8.

me kot ge leúnen ban, me cem li can, me hú ge muro. 39 Ke a wá but Faresaio at a hawá e, me e ame ha eú hnyi hnyekon, ka habe, Haba at ang, a ne perofeta, me e khana but bongon momo ang me hwakecin at ame kálâ e, anyin a e momo ae kong. 40 Ke haba Iesu ame thu me ha káu, ka habe, Simona lö, e hu ke hofuc gak he ka ha köu. Ke haingen ame ha, ka habe, At úne lö, ha thö. 41 E hu li at ödru me hok gufa únyi ge at ame mē ham mone: haba khaca gadru ame hok gufa wale faiv haded ta je denari, ke haba khaca ame hok fifte. 42 Ke ba hnân bi hwaban me e ame hna bâú ödru. Ia ke at gadru ame he ka hnyok gâná káu? 43 Haba Simona ame thu, ka habe, Inya oge me únykúme, ame ne at la adre hna gâná káu. Me e ame ha káu, ka habe, E wisa hnâm hna únykúme. 44 Ke e ame hwiö thö ka momo me ha kö Simona, ka habe, U je wá but momo ang? oge dit ka hnyi umâm uma, ke u je ca bi utköü hobi káu li cak: ke a hia but momo okhubetâ li cak ge deköien, me kot ge leúnen ban. 45 Haba u, u je ca úcimhnyimak mönya: ke haba momo, hwânji hnyi úen o ge didrö kââng, e ame ca menâ he ka cem li cak. 46 U je ca hú böc ge wakaco: ke a hia but momo hú li cak ge muro. 47 Waleling me inye ha köu, ka habe, Adre hia but hna degecâ anyin ta je hulö ae se hia; anyin ae gan hmâ ibetengiö anyin momo: ke e ka úhnyúkong hna ohia ge ke at, me ka úhnyúkong anyin ibetengiö. 48 Ke e ame ha ka momo, ka habe, Adre hia but ohia ânyâm ta je hulö. 49 Ke haba tavat adre me tha laba mē, me adre me hwân ka ha eú hnyi je hnyekudra, ka habe, Ehö at ang ame ohia ta je hulö? 50 Ke e ame ha ka momo, ka habe, U je mödrut ge ânyâm labageju; he thö me hnahic.

HNYIMAKAN 8.

HWABAN e, e ame vheno ta je taun me hnyaba, k' ame khetâ, me omanenâ úthumetu ae so anyin dökhu dokhon Khong, ke tha e mē hnyat a twelv, 2 me ke je momo waleji a omeli ödrin, k' ödrin e tren hanu ae kong me je mok, wale Maria adre me wenyö Magadalena, waleji hnen je demoni a seven hna didrut únyi hnyin, 3 me Joana öiö Khuza, at ame tuö hnyaban Heroda, me Susana, me keihen minya ae se hia, hnyat adre me haomjehen únyi hnyi anyidra ta je únyi.

4 Ke ame úkhacaköu tavat ae se hia káu, k' ame o but káu aten ta je taun hia, me e ame ha úhöücú, ka habe, 5 Ame he but at belök he ka jijingâ wan: me e ame jijingâ, ke ame kölu but keihen eú hnyi baten gethen; me adre me uto ju, k' ame an dö ge ta je meno adre me gâ ethö. 6 Ke ame kölu but keihen hon dok ae hudei, me ame kú thö me ie meleca but, anyin ae ba únyi hnân omenyikâ. 7 Ke ame kölu but keihen hnyi wanben ta je úö ae údedö; me ame tha kú thö mē je úö ae údedö, me takou but e. 8 Ke ame kölu but keihen ka hnyi hon kânâ ae hoso, me ame kú thö, me wa, úsa wan haded je wan. E ame ha je hofuc eling ködra, k' ame hongot, ka habe, Haba at ae hu li hnyikönyen me me löng, löng ju e.

9 Ke ame hnö e hnen laten, ka habe, Ieú bongon úhöücú e? 10 Me e ame ha, ka habe, Adre me ham köbun he ka wáhamkmeto ta je únyi ae iyong hnyi dökhu dokhon Khong: ke adre me bi hnân úhöücú ka keihen; m' adre me he ka bwele, me ca wá bi, me he ka löng me ca wá únykúme bi. 11 Walang úhöücú, ka habe, Haba wan, wale hofuc hwan Khong. 12 Haba keihen hnyi baten gethen, wale tavat adre me löng; me ame o but diabolo me hom dö hofuc únyi hnyi je hnyekudra, wá adre nye labageju m' ödra mödrut. 13 Haba keihen hon dok ae hudei, me wale tavat adre me löng me kap hofuc me senyin; ke ba wân gadra, ke ca beú bi anyidra labageju ke adre me ta ju hnyi úen úcúbic. 14 Haba keihen ame kölu hnyi wanben ta je úö ae údedö, wale tavat adre me löng, me he but, me ame kú takú ödra hnen ta je vhet, me omjeú, me ta je senyin ge möt ang, k' adre me ca wa wan ae metu. 15 Haba keihen hnyi kânâ ae hoso, wale tavat adre me löng hofuc me hnyok ae so me hnathu, me kât hmâ, me wa wan a deny hok hnyok.

16 E ba at ame vâc lamepa, me he ka tube e ge utkaia, me ip eú hnyi hmelen hnamokut; k' adre ma ip ethö hon taben, me me wá melaminy hnen tavat adre me didrö. 17 Anyin ae ba únyi adre me ikhâlâ ame ca he ka manen; ke ba únyi ae iyong ame ca he bi ka manen. 18 Anyin a wale, wá wia öbun úhebun ka löng: anyin a haba at ae hu gan, me adre me he ka ham ta je únyi káu; ke haba at ae ba gan, me adre me he ka hom gan únyi e ame únykúme ae hu.

LUKA 8.

19 Me ame o but kâu hinyen me je liamekeiny mē, ke ca khan' ödrin he ka hakekeny kâu, anyin ae se hia tavat. 20 Me adre me thumeto e, ka habe, Waleú hinyâm me je liamekeiny möu ödrin e tot, ödrin e beionny möu. 21 Ke e ame thu ködra, ka habe, Haba at ame löng hofuc hwan Khong me mâdrâ, wale je liamekeiny mönya me hinyök.

22 Ke haba hnyi ke bong e ame tha ölö thö me laten ka hnyi hon hu; ke e ame ha ködrin, ka habe, ötin e he ka kec ka hnyi ke keihen köiö: me ödrin e kec ut. 23 Ödrin e kec ke e ame mokut: me ame o but höu hnyi köiö; me ame he ka unöngöt dö hudrin hu, he ödrin e he but ka ú. 24 Me ödrin e he but kâu me öhmákâ e me ha, ka habe, Taböny than, taböny than, ötin e he but ang ka mok. Me e ame hmak dö, me thawâ ang me je waköiö: me ame hia but, me ta but hau. 25 Ke e ame ha ködrin, ka habe, Ewa anyibun labageju? Ke ödrin e ot, me láiâ, me úhnenamököuâ, ka habe, Ehö at ang, anyin a e ame húna ka ang me köiö, me ödru me löng kâu?

26 Ke ödrin e khöp dö hnyi ke keihen Gadara, wale cicö Galilaia. 27 Ke e ame ölö thö hot ai, me ame úkhanö mē at úheny hnyi taun, a delec je demoni; ke ame ca khaú bi, hwân ehac, ke ame ca laba bi hnyi uma, ke ame laba bi hnyi je erkemok. 28 Ke e ame ö Iesu, me e ame hongot me ta ju hnyi hnyimakan me ha hwegiâ, ka habe, Ieú u me he ka ányâ könya Iesu a Nokon Khong ae Beönuâ? Inya oge me khöú köu, ca oveci nya. 29 Anyin a e ame húna ka hanu ae kong he ka didrut únyi hnyi hnyin at. Anyin a e ame osehia kât e: ke adre me labö tuö e, me ca ge tö fao, me ca li can; ke e ame thamua hna ca e, me ame hom e hnyebuba ai hnen demoni. 30 Ke haba Iesu ame hnö e, ka habe, Ia iâm? Me e ame ha, ka habe, Legiona; anyin a delec e hnen je demoni ae se hia. 31 Ke ödrin e khöú kâu, me me ca he ka kun' ödrin ka hnyi dok ae dit. 32 Ke wale but e hnahat buaka ae manen ame han tot hon bucen: ke ödrin e khöú kâu, me me he ka hn' ödrin he ka dilic ödra. Me e ame hn' ödrin dut. 33 Me ame didrut je demoni úhedrin hnyi hnyin at, me delec je buaka: haba hnahat buaka adre me wadring ut jimethö hnyi hwa-tapkölu kâu ka hnyi köiö, me adre me ú but. 34 Ke a wâ but hnen tavat hân buaka hna mâdrâ, me ödrin e kec, me úthu-

metu hnyi taun me ta hnyei. 35 Ke adre me he but he ka hnyi wâ hna mâdrâ, me o kö Iesu, me wâ at a didrut je demoni úhedrin hnyi hnyekon, ke e ame laba hnyi hmelen li ca Iesu, a khaú, ke metu but: me adre me ot. 36 Haba tavat adre wâ adre me thumeto tavat ge hna amelö at a delec demoni. 37 Ke haba tavat aten hnyei Gadara hia igigilö, adre me khöú kâu he ka hn' ödra but, anyin adre me ot gan hmâ: me e ame ölö thö ka hnyi hu me kec hmetu. 38 Ke haba at a obâ je demoni únyi hnyi hnyekon, me e ame sumâtâ, me me he ka tha laba mē: ke Iesu ame kunâ e me ha, ka habe, 39 He thö ka hnyi umâm uma, ke omanenâ thö ta je únyi ae gan a ányâ köu Khong. Me e ame he me omanenâ hnyi taun hia ta je únyi ae gan a mâdrâ kâu Iesu.

40 Ke ame o hmetu but Iesu, me ame kap soâ e hnen tavat; anyin a ödra hia adre me halubahingen e. 41 Ke wâ bi, ame o but ke at Jairo ien, at ame musö sunago: ke e ame ta ju hnyi li ca Iesu, me khöú kâu me me he ka hnyi umen uma; 42 anyin a khaca thibi nokon hlu, ame ne twelv but hunainy, ke e ame he but ka mok. Me ame he Iesu, k' ame úhneki kâu tavat ae se hia.

43 Ke waleú ke momo k' ame hingölö dra hnyi twelv ta hunâ, ke ba hia but tang omjehen ge hnen hna bi hwaban tavat treu bubuny, ke ba at ae khana he ka osoâ e, 44 haba momo e ame hnyi he hoton, k' ame mâdrâ obiny úkhaúen: me ame ie hme thö dra gan. 45 Me haingö Iesu, ka habe, Ia kalö nya? Ke haba ödra hia adre me ivinö, me haingö Peteru me keihen unyin, ka habe, Than lö, haba tavat ae se hia adre me uhneki me setu u. 46 Ke haba Iesu ame ha, ka habe, E hu at a kalö nya: anyin oge me wâhmakhmeto a ga didrut man gak. 47 Ke a wâ but momo ae ca iyong hmetu, me e ame o öbubuny me nom ju lnyi hnyimakan me omanenâ kâu hnyi hnyimakan tavat ae se hia can a e ame kâlâ, k' ame ie imelen dö. 48 Me e ame ha ka momo, ka habe, Nökuk lö, u je mödrut ge ányâm labageju; he thö me hnahic.

49 Ke e ame tiga fuc, me ame o but ke at úheny hnyi hnyaban at ame musö sunago, me ha, ka habe, A moku nokom hlu; ca újengö bi At úne. 50 Ke a löng Iesu, me e ame thu kâu, ka habe, Ca ot bi: ke labageju ju, me e ame he ka möt. 51 Ke

LUKA 9.

e ame didrö ka hnyi uma, k' ame thaw' ödra m' adre me ca hnyi dit, ke so thibi Peteru, me Ioane, me Iakobo, me kamen me hinyen hlu. 52 Haba ödra hia adre utengiö ke tenge thungaú gan : me haingen, ka habe, Ca útengiö ; anyin a ca mokcu, k' ame mokut. 53 Me adre me hlumä e, anyin ae khan' ödra a ga mokcu. 54 Ke e ame hom hnyamen me hongot, ka habe, Hlu lö, todrö. 55 Me ame o hmetu but hanon, me ame ie todrö hlu : ke Iesu ame húna he ka hân. 56 Haba kamen me hinyen ödrü me láia : ke e ame húna ködrü, ka habe, Ca omanenâ bi ka ke at hna mádrâ.

HNYIMAKAN 9.

E AME hawâ úkhacakouâ hnyat a twelv, k' ame ham ködrin man, ke he ka musö ta je demoni, ke he ka ohia ta je mok. 2 Me e ame kun' ödrin he ka khetâ dökhu dokhon Khong, me he ka omelö tavat ae hu mok gadra. 3 Ke e ame ha ködrin, ka habe, Ca hom bi ke únyi hobi kâu bunyen, ke ca me hom je uci, me tang, me kamec, me mone ; ke ca úsa lo bi úkot. 4 Ke haba uma öbun e he ka dit ka hnyin, laba ju e ke ne o but öbun e he but. 5 Haba at ame ca he ka köp öbun, k' öbun ka he but únyi hnyi taun eling, me jijingâ but kânâiny je hnyeúcabun hnân ohnatho ködrin. 6 Me ödrin e he but, me he hnyi wanben je taun, me ödrin e khetâ úthumetu ae so, me omelö tavat ae hu mok gadra.

7 Ke a löng ut Heroda than ta je únyi adre me ányá : me ame bhloho, anyin ame ha keihen a ga möt hmetu thö Ioane únyi hnyi hna mok ; 8 ke haingen keihen a ga manen dut Elia ; ke haingen keihen a ga o hmetu thö ke perofeta kâú adrem. 9 Ke haingö Heroda, ka habe, Oge hia but subâ nyi Ioane : ke ie at ang a oge me löng gan ta je únyi eling? Me e ame elâm he ka iouny mē.

10 Ame o hmetu but ta je aposetolo, me ödrin e thumeto e ge ta je únyi hia ödrin e mádrâ. Me e ame haw' ödrin, me hum ödrin ka hnyi taun Bethesaida ien. 11 Ke e khana but tavat me adre me he hoton : me e ame kap soi ödra, me ha ködra dökhu dokhon Khong, me omelö tavat a ödra mok. 12 A sahac ut ; me ame o but kâu laten a twelv, haingödrin, ka habe, Kunâ thö tavat ae se hia, m' adre me le ka he

hnyi je taun, ke ta hnyei igigilö, me mokut, me heleú jeú : anyin a öta ang hnyi hnye-buba. 13 Ke e ame ha ködrin, ka habe, Ha ö 'dra bi öbun. Me ödrin e ha, ka habe, E ba jeú gahmun, ke thabúng thibi ta areto, ke lo li wâ ; öhmun a mē he ka úcú jeú hobi kâu tavat ang ae se hia. 14 Anyin a helâ me faiv thauzan obaga. Ke e ame ha ka laten, ka habe, Olab' ödra ju helâ me úsa fífite. 15 Me ödrin e ányá helâe, me olab' ödra hia ju. 16 Ke e ame hom je areto a thabúng me li wâ, me bwela hnyi dranyai, me oleâ, me thuthu, me ham ka laten he ka ip hnyi hnyimakan tavat. 17 Me adre me han, me ame sekudra hia thö : ke ödrin e hom dö je kolon hna han unyidra, twelv je tang a unöngöt.

18 Ke hake e biju ame hic, ke tha e mē laten : me e ame hnei ödrin, ka habe, Haba hna ha hnen tavat gak, me iny ia? 19 Ödrin e thu, ka habe, Ioane Bapataiso ; ke haba keihen adre me ha, Elia ; ke haingen keihen a tot hmetu thö ke perofeta kâú adrem. 20 E ame ha ködrin, ka habe, Haba ifucibun gak m' iny ia? Peteru ame thu, ka habe, Keriso a Nokon Khong. 21 Ke e ame húna ködrin me ha, ka habe, Ca ha bi ka ke at únyi e ; 22 e ame ha, ka habe, Hanymen Nokon at he ka hokhnyokâ ta je únyi hia, ke ame he ka húkotiâ hnen wahingat, me je taben tavat bihut, me hnyat sihnalimen, ke adre me he ka hlingâ, ke ame he ka möt hmetu thö hnyi bong a kuniny. 23 Ke e ame ha ködra hia, ka habe, A ne ke at ame weny he ka he hotuk, e so e ame ka hing hokhnyok, me hom anyin satauro hnyi je bong, me he hotuk. 24 Anyin a haba at ame beomelö anyin möt, me ame he ka hia e ; ke haba at ame hna but anyin möt can inya, me adre me he ka omelö e. 25 Anyin a ieu troban ka at, ame ne hu kâu hmeledrany hia, ke ame ka degec me ohia e bi? 26 Ke haba at ame he ka hmehma gak me hok ta je hofuc, me ame he bi Nokon at ka hmehma gan, e ka tha o me anyin hing hmanenang, me hmanenanginy Kamen, me ta je angela ae kap. 27 Ke e hnathu inya oge me ha köbun, haba keihen adre me tot ang, adre me ca he ka mē mok ke ne o but adre me wâ thö dökhu dokhon Khong.

28 Hwaban ta je hofuc eling, ame ne eit ut ta bong, e ame hum Peteru, me Ioane, me Iakobo, k' ame ölö hnyi bucen he ka hic. 29 Ke e ame tiga hic, me ame

LUKA 9.

ke bongon dut hnyimakan, k' ame hau me hadröngöc úkhaüen. 30 Ke wâ bi, li at ödrü me úhnenamö mē, wale Mose me Elia; 31 ödrü me o hnyi hmanenang, me úhnenamö anyin mok adre me he ka ohwâdâ hnyi Jerusalema. 32 Ke ame ti bemokut Peteru, mödrü minya unyin : ke ödrin e hmak hmetu thö, me ödrin e wâ anyin hmanenang, me li at minya ödrü me tha tot mē. 33 Ke ödrü me tiga he but úhedru unyin, me haingö Peteru ame ha kö Iesu, ka habe, Than lö, e so ötin e laba ju ang : ke öhmun e he ka otílâ ke je uma menâ a kun; haba khaca, me hnân hobi köu, ke hobi kö Mose khaca, ke hobi kö Elia khaca : ke ca khanö Peteru bongon hnen hna ha. 34 E ame tiga ha hofuc eling, me ame o but úlâ me tubi ödrin : ke ödrin e ot hnyi úen ödrin e dit ka hnyi úlâ. 35 Me ame o but hwan hofuc únyi hnyin úlâ ame ha, ka habe, Wale Nökuk a úcanök : löng ju öbun kâu. 36 Ame o thö hwan hofuc, me ödrin e hake ö Iesu thiju. Ke ödrin e hnyi bi ju me ca ha bi ka ke at hnyi je bong eling únyi ödrin e wâ.

37 Ke haba nyi, ödrin e hia but utut úhedrin hon bucen, me ame úkhane mē tavat ae se hia hmönyin. 38 Ke wâ bi, ame hongot ke at unyin tavat ae se me ha, ka habe, At Úne lö, inya oge me khöú köu he ka mē wâ nökkuk da, anyin ae khaca thibi nökkuk : 39 ke wâ bi ame kât e hnen hanu me e ame ie hongot hwege; k' ame osesebila e, me e ame húlúhangöc dö, k' ame ka bec ut, k' ame ca ie didrut gan, me ame ti okongoâ e. 40 Ke oge me khöúâ ka látâm, m' ödrin e he ka obâ e : ke ca khan' ödrin bi. 41 Haba Iesu ame thu, ka habe, E, dö ame ca labageju bi ke hwali, oge me he ka tha laba möbun, ke hokhnyoki öbun ke ne o but kehö? Hom but jem nokom. 42 Ke e ame tiga he, me haba diabolo ame osesebila e me sa hmönyinâ. Me Iesu ame thawâ hanu ae kong, me osoâ da, me ham hmetu e ka kamen. 43 Ke haba ödra hia adre me láîâ man ae gan hmâ maniny Khong.

Ke ödre hia adre me tiga láîâ ta je únyi hia e ame ânyâ me e ame ha ka laten, ka habe, 44 E so e didrut je hofuc ang ka hnyi je hnyikönyöbun : anyin adre me he ka hna Nokon at ka hnyi je hnyamen tavat. 45 Ke ödrin e ca wâúnykúme bi hofuc eling, ke adre oiyongâ ködrin, wale me me ca khan' ödrin : ke ödrin ot he ka hnö e ge hofuc eling.

46 Me ame kú thö ivinö gadrin, ia la gadrin ame ho ka beönua. 47 Ke haba Iesu ame wâhmakhmeto únykúmenen je hnyekudrin, e ame hom dö wanakat me otílâ unyin, 48 me ha ködrin, ka habe, Haba at ame he ka kap wanakat ang hnyi iök, me e ame köp nya : ke haba at ame he ka köp nya, ame kap at a kunö nya : anyin a haba at ae úhnyúkong gabun hia thithö, wale at ae gan.

49 Ke haba Ioane ame ha, ka habe, Than lö, öhmun e wâ but ke at ame obâ je demoni hnyi iâm; ke öhmun e thawâ e, anyin a e ame ca he hotutin. 50 Ke haba Iesu ame ha kâu, ka habe, Ca thawâ bi e : anyin a haba at ame ca iwahnaihmiöny möbun, ame tha hien möbun.

51 Ke ame hwân ka o but úen adre me he ka kap e göranyai, me e ame hwege thö he ka he Jerusalema ai, 52 me kunâ je úthumetu he ka he hnyi hnyimakan : me ödrin e he me o hnyi ke taun anyin at Samaria he ka penapena halubahingen. 53 Ke adre me ca kap e, anyin a e ame be he hwege but Jerusalema ai. 54 Ke a wâ but e hnen li laten, jia Iakobo me Ioane, me ödrü me ha, ka habe, Than lö, e wem öhmu me he ka hawâ meic he ka utut únyi hnyi drany he ka thong degeci ödra? 55 Ke e ame hwiö thö me thaw' ödrü. 56 Me ödrin e he but ka hnyi ke taun.

57 Ke ödrin e tiga he eú hnyi gethen, haba ke at ame ha kâu, ka habe, Oge me he ka he hotom ka hnyi je dok hia u me he ka he ka hnyin. 58 Ke haba Iesu ame ha kâu, ka habe, Haba ta je alope, e hu umödra op hnyi kânâ, he haba ta je meno ethö e hu háüödra; ke haba bi Nokon at, me ca hu bi hnân hunen ban. 59 Ke e ame ha ka ke at, ka habe, He hotuk. Ke haingen ka habe, Than lö, mē hnö nya thö inye mē he ka kónim cica. 60 Ke e ame ha kâu, ka habe, Hna but ta je komok he ka konâm je kokidrin; ke he bi thö u ka khetâ dökhü dokhon Khong. 61 Haingen ke at, ka habe, Than lö, oge me he ka he hotom; ke mē hnö nya but inye mē he ka úhüne me anyik lap. 62 Haba Iesu ame ha kâu, ka habe, E ba at ame he ka úcú ka hnyi dökhü dokhon Khong, ame inâ hnyamen ka hnyi hon únyi hnân wia kânâ, ke hwiö hmetu bi.

HNAYIMAKAN 10.

HWABAN ta je únyi eling, haba Than ame úca keihen tavat a sevente, me kun' ödrin, a ödrin úcú lo he ka bödra ka hnyi ta je taun, me ta je dok e ame he ka he hnyin. 2 E ame ha ködrin, ka habe, E gan hmá widrany ke wakhalet thibi tavat adre me huliwan : anyin a wale hic ju öbun ka Thaniny widrany, me me he ka kuná tavat he ka huliwan anyin widrany. 3 He th' öbun : wá bi, inya oge me kun' öbun helá me lakon mamoe hnyi wanben ta je luko. 4 Ca hom bi tang mone, me tang, me taben hnyeúca, ke ca italofa bi me ke at eú hnyi gethen. 5 Ke haba uma öbun e he ka dit ka hnyin, mē ha thö, ka habe, E so e hnahic ut uma ang. 6 Ke a ne e bi ling at ame he ka hnahic, me ame he ka o káu hnahic únyi gabun : ke a ne ba, me ame he ka hmetu köbun. 7 Laba ju hnyi uma eling, ke han me ijem ta je únyi ödrin e ham : anyin a haba at huliwa me úcú me hwaban. Ca dit únyi hnyi ke uma me dit ka hnyi ke uma. 8 Ke haba taun öbun e he ka o ka hnyin, ke at ka köp öbun, me an ju ta je únyi adre me ip hnyi hnyimaköbun : 9 ke omelö tavat eling ae hu mok gadra, ke ha ködra, ka habe, E hakekeny jut köbun dökhu dokhon Khong. 10 Ke haba taun öbun e he ka o ka hnyin, ke adre me ca köp öbun, me he th' öbun ka hnyi getheniny me ha, ka habe, 11 Haba kánáiny anyibun taun wale ame kece ka hnyi je hnyeúcahmun, me öhmun e kot ut köbun : ke so bi, khan' öbun dö únyi ang, ae hakekeny jut dökhu dokhon Khong. 12 Inya oge me ha köbun, a g' ame he ka háhâ ka Sodoma hnyi bong eling hon taun e. 13 Ekölö gam Korazin ! ekölö gam Bethesaida ! anyin adre ne ányá hnyi Turo me Sidona ta je huliwa ae man adre ányá eang unyibun, adre me ne hia but ietra me laba me ecmano ae gan nân me hnabadröu. 14 Ke so bi ame he ka háhâ ka Turo me Sidona hnyi hna owisa, hubun. 15 Ke haba u Kaperenauma, hawa, adre me he ka ogöranyí u ka hnyi drany ? adre me he ka ohnyikánái u ka hnyi Hedis. 16 Haba at ama ling öbun e ame ling nya ; ke haba at ama húkoti öbun, e ame húkotiö nya ; ke haba at ama húkotiö nya, e ame húkotiá at a kunö nya.

17 Ke ame o hmetu but tavat a sevente me senyin, me ha, ka habe, Than lö, ame ling öhmun ta je demoni hnen iám. 18 E

ame ha ködrin, ka habe, Oge me ö Satana ame utut úheny hnyi drany helá me hucuce. 19 Wá bi, oge hia but ham köbun man he ka uto ta je on me ta je sekopio, me maniny hia thithö iwahnaihmiöny : ke ba ke únyi ame he ka okongu öbun. 20 Ke ca senyin bi ge hna ling öbun hnen ta je hanu ; ke senyin dö ge hna sihnalimen je iöbun ethö hnyi drany.

21 Haba hnyi úen eling e ame senyin hnyi Hanu Kap me ha, ka habe, Inya oge me ole köu Cica, Tuhan drany me hmele-drany, anyin a u je ikhálá ta je únyi eang ge tavat ae metá ke tavat wá bongon, me adre omanená ka ta je mendreng : eke, Cica, anyin a wale wem. 22 A ham könya ta je únyi hia thithö hnö Cica : ke ba at ame wáhmakhmetoá Nokon, ke Kamen thibi : ke ba at ame wáhmakhmetoá Kamen, ke Nokon thibi, me at minya hnen Nokon hna weny he ka omanená káu. 23 Ke e ame hwiö ka laten me ha duóngá, ka habe. Hnahic hnen ta je ecmak adre me wá únyi öbun e wá : 24 anyin a inya oge me ha köbun e se hia ta je perofeta me ta je than adre me bewá ta je únyi öbun e wá, k' adre me ca wá bi ; me belöng ta je únyi öbun e löng, k' adre me ca löng bi.

25 Ke wá bi ame todrö ke at únö hnanyibu, me cubec e, ka habe, At Úne lö, ieu hanymök oge me he ka ányá e me hu the könya möt ame ca ba balua ? 26 Ke ö ame ha káu, ka habe, Ieú hna sihnalimen hnyi hnanyibu ? hawa ge hnám hna áú ! 27 Ke e ame thu, ka habe, U me he ka hnyok ka Than a Khongom ge hnyekom ae bekhöt, me hanom ae bekhöt, me tang hwegiám ae bekhöt, me oúnykúmám ae bekhöt ; ke u me he ka betenge ge at ae hakekeny köu helá me u bi. 28 Ke e ame ha káu, ka habe, E wisa hnám hna thu. mádrâ thö e, ke u me he ka möt. 29 Ke e ame weny he ka hai wisa e bi, me e ame ha kö Iesu, ka habe, Ie at ae hakekeny könya ? 30 Haba Iesu ame thu, ka habe, Ame he ke at Jeriko ai úheny Jerusalema ; me ame úkhane me tavat venöu, ke adre me uny jut anyin je úkhaú, me kot e, me hna ju e, a g' ame he but ka mok. 31 Me ame he hnyi gethen eling ke at bihut : ke e ame wá e, me e ame saú thö ka he hnyi ke baten gethen. 32 Ke heláe minya ke at Levi, e ame o but ká e me wá, me e ame he minya hnyi baten gethen. 33 Me ame he but minya ke at Samaria, me o káu : ke e ame wá e, me e ame betenge gan, 34 me

LUKA 11.

hakekeny kâu, me lan hnân je aat, me hû ge wakaco me waina; ke e ame ip e hon haleny meno, me hom e ka hnyi omtabaga, me ûâ e. 35 Ke haba bong nyi, e ame hom li denari, me ham ka at ae tren uma me ha ka habe, U ma tuô e; ke haba hnâm hna he ka úcû hanen hon e, oge me he ka bi hwaban kôu, iny ka o hmetu thö. 36 Únykûme ju, ia gadrin hnyat a kun ame hakekeny ka at eji a úkhane me tavat venöu? 37 Ke e ame ha, ka habe, Wale at ame betenge gan. Haba Iesu ame ha kâu, ka habe, He thö ka mádrá helâe.

38 Ke ödrin e he but, me e ame dit ka hnyi ke taun: ke wale ke momo Maretha ien, ame kap e ka hnyi umen uma. 39 E hu keiny jia Maria, ke e ame laba hnyi hmele li ca Iesu me löng hwan hofuc. 40 Ke haba Maretha ame hmak hnyekon ge ta je huliwainy uma; me e ame he kâu me ha, ka habe, Than lö, u me ca únykûme bi a ga hia but keik hnö nya he ka hake huliwa? ha thö kâu me me he ka hadruö nya. 41 Ke haba Than ame thu kâu, ka habe, Maretha, Maretha lö, u me kong hnyekom me hmak ge ta je únyi ae se hia: 42 khaca thibi únyi ae únyi hnathu: ke haba Maria ame hia but úca ke keihen ae so, wale a g' adre me ca he ka hom hmetu gan.

HNYIMAKAN 11.

KE e ame hic hnyi ke dok, k' ame um dö, me ame ha kâu ke laten, ka habe, Than lö, ö u n' öhmun dö he ka hic, helâji me hnö Ioane hna nâ laten. 2 Me e ame ha ködrin, ka habe, Öbun ka he ka hic, me ha thö, ka habe, Cica lö, E so e ka kap iâm. E so e o but dokhom dökhü. 3 Ham köhmun hnyi je bong jeû ae úcû ka hnyi bong bi. 4 Thang ut ta je monu gahmun; anyin a öhmun e thang minya tavat adre me okongu öhmun. Ca hum öhmun ka hnyi úcûbic.

5 Ke e ame ha ködrin, ka habe, Ia gabun ae hu hanen, ke ame he ka he kâu hnyi wanbenset me ha kâu, ka habe, Hanök lö, mē ham dö könya kun ta areto; 6 anyin ame o but könya ke hanök hnyi anyin bunyen, ke ba jeû gak he ka hân; 7 ke e ame thu hmetu eiö hnyin uma, ka habe, Ca thaluö nya: adre hia but hlöng hwanuma, ke lakuk dö ang unyik hnyi hna mokut; e ca khanö nya he ka tot me ham kôu? 8 Haba inya, oge me ha köbun, ka habe, E ka ca he bi ka tot me ham kâu anyin a e

hanen, me e ame he bi ka tot me ham kâu ta je únyi hia e ame weny, can a g' ame sumâtâ újengöâ. 9 Ke haba inya oge me ha köbun, ka habe, Sumâtâ thö, me adre me he ka ham köbun; elâm dö, me öbun e he ka wâ; seseto thö, m' adre me he ka khöng ut köbun. 10 Anyin ame he ka hu ka tavat adre me sumâtâ; ke haba tavat adre me elâm, me adre me he ka wâ; ke adre me he ka khöng ka tavat adre me seseto. 11 Ie ke kamen gabun, k' ame sumâtâ areto ge nokon, me ame he ka ham bi kâu veto? k' ame ne sumâtâ wâ, me ame he ka ham bi kâu on? 12 Ke ame ne sumâtâ wakuniny khoto, me ame he ka ham bi kâu sekopio? 13 Anyin a wale, a ne mabun tavat ae monu he ka wâhmak-hmetoâ hna he ka ham ta je únyi ae so ka lakubun, awe, ame ca he bi Kamöbun ethö hnyi drany ka ham Hanu Kap ka tavat adre me sumâtâ e?

14 Ke e ame obâ demoni ae hum. Ke ame didrut demoni, me ame fuc dö hum; me ame láîâ tavat ae se hia. 15 Ke haba keihen gadra, adre me ha, ka habe, E ame obâ ta je demoni únyi ga Belezebuba, tuhan ta je demoni. 16 Ke haba keihen adre me cubec e, me elâm gan ke haten únyi hnyi drany. 17 Ke e ame wâ únykûmen-ödrin, me e ame ha ködra, ka habe, Haba je dökhü ame imoukôu, ame he ka ba wan; ke ame he ka kong ut lap ame imoukôu. 18 A ne imoukôu Satana ame he ka kâmâu ka tethmâ dokhon dökhü? anyin a öbun e ha, ka habe, Inya oge me obâ ta je demoni únyi ga Belezebuba. 19 Ke oge ne obâ ta je demoni únyi ga Belezebuba, me únyi ga ia ame ob' ödrin minya hnen lakubun? waleling, m' adre me he ka owis' öbun. 20 Ke oge ne obâ ta je demoni ge banyen Khong, awe, a o but köbun dökhü dokhon Khong. 21 A ne tot metâ at ae hwege he ka tuö umen uma, ame he ka mokut wia anyin ta je únyi: 22 ke e ka o at ae hwege hon e, me ngâ e, me e ame he ka hûgúnâ gan anyin únyi hnân vat, waleji e ame labageju kâu, me khenâ anyin ta je únyi. 23 Haba at ame ca tha hien mönya, me, iwahnaihmiöny mönya; ke haba at ame ca tha úkhöünâ mönya, me ame vese but. 24 E ka didrut hanu ae kong úheny hnyi hnyin at, e ame he hnyi wanben je dok ae mada, ame heleû hna menâ; ke a ne ca wâ bi, haingen ame ha, ka habe, Oge me he ka hmetu ka hnyi umök uma, waleji oge didrut úhek hnyin. 25 Ke e ame o

but, me ame wâ adre hia but aba wia me ave. 26 Me e ame he but me bi hanen ge ta je hanu ae kong hon e a seven; ke ödrin e didrö me laba eling: ke haba obiny ka at eling ame he ka kong hon a bân.

27 Ke e ame tiga ha ta je hofuc ang, me ame fuc hwege ke momo unyin tavat ae se hia me ha kâu, ka habe, Hnahic hnen hnyok adre hnöku u hnyin, me li bai u je ijem. 28 Ke e ame ha, ka habe, E beönua bi hnahic hnen tavat adre me löng hofuc hwan Khong me vheno e.

29 Ke ame hwân ka úkacaköu thö tavat ae se hia, me e ame hwân he ka ha, ka habe, Haba dö ang, me dö ae kong: k' adre me elâm haten; ke ba haten adre me he ka ham ködra, ke so thibi haten anyi Jona perofeta. 30 Anyin a haba Jona, me haten ka at Nineve, k' ame he Nokon at ka helâe ka dö ang. 31 Ame he momo than hnyi hwaiöu ka tha tot me dö ang hnyi bong owisa, me ha hnaúhang' ödra: anyin a e ame he but úheny hnyi can hmeledrany he ka löng metâ anyi Solomona; ke wâ bi, wale bi ang at ae beönua hu Solomona. 32 Ame he at Nineve ka tha tot me dö ang hnyi bong owisa, me ha hnaúhang' ödra: anyin adre me ietra hnyi hna khetâ hnö Jona; ke wâ bi, wale bi ang at ae beönua hu Jona.

33 E ba at ame vâc lamepa, me he bi ka ip e hnyi dok ae iyong, ke hmelen kumete, ke so ame ip hon taben me me wâ thö melaminy tavat adre me didrö. 34 Haba emâkâm, me lamepainy unyâm: e ka so emâkâm, me ame he ka tha melam hia unyâm; ke e ka kong, me ame he ka tha menekholom unyâm. 35 Anyin a wale wâ wia ju wâ e nye lidrut melam eü hnyi hnyekom. 36 Anyin a wale, a ne tha melam unyâm, ke a ne ba ke dok ae lit, awe, ame he ka tha melam hia thithö, helâ me lamepa ae umumelam hmönyin ame omelami u.

37 Ke e ame tiga fuc me ame hawâ e hnen ke Faresaio he ka tha han mē: me e ame didrö, me laba ju. 38 Ke haba Faresaio ame wâ, me e ame lâiâ, anyin a ca bân ka sou hnyi úen ame he ka han. 39 Haba Than ame ha kâu, ka habe, Öbun je Faresaio, öbun e ânyâwia hoton utkaia me mini; ke haba je hnyekubun, me unöngöt dö ge venöu me ta je monu. 40 Öbun je monu, haba at ame mâdrâ hoton, hawa ame ca mâdrâ minya hnyin? 41 Ke so bi

öbun e ne ham onyen hnyi betenge; awe, ame he ka so ta je únyi hia unyibun.

42 Ekölö gabun ta je Faresaio! anyin a öbun e ham je ke keihen a libenyitainy minet, me ru, me ta je úö ae ometu, ke öbun e hna biju hna owisa, ke hnyok ka Khong: e úcú öbun e ânyâ ta je únyi eling, ke ca hna but ta je únyi ang. 43 Ekölö gabun ta je Faresaio! anyin a we-bun je taben lap ae nua hnyi ta je sunago, ke he ka nom köbun hnyi ta je hna úcú. 44 Ekölö gabun! anyin a öbun úcú me ta je erkemok ae iyong, k' ame he tavat hon, ke ca khan' ödra bi.

45 Me ame thu kâu hnen ke at únö hnanyibu, ka habe, At Úne lö, u me ha helâe, me u me haikongu öhmun minya.

46 Ke e ame ha, ka habe, Ekölö gabun minya hnyat únö hnanyibu! anyin a öbun e ip hon tavat je hok ae hmak he ka hijen, ke haba öbun, me öbun e ca mâdrâ bi ge ke banyöbun a khaca. 47 Ekölö gabun! anyin a öbun e up veten je erkemok hon ta je perofeta, ke a hling' ödrin hnen lakamöbun. 48 Awe, öbun e ohnathoâ, me ogâ hwakecin lakamöbun: anyin adre me hling' ödrin, ke öbun e otillâ ta je hudrin. 49 Anyin a wale, ame ha hnen metâ anyin Khong, ka habe, Oge me he ka kunâ ködra ta je perofeta me ta je aposetolo; ke adre me he bi ka hlingâ me okongoâ keihen; 50 m' adre me he ka hnö dren ta je perofeta hia thithö unyin dö ang, waleji adre me hingâlâ hwân hnyi hna bi taben hmeledrany; 51 hwân ge drö Abela ke ne o but ka drö Zakaria, at adre me hlingâ hnyi wanben taben hut me dok ae kap: eke, inya oge me ha köbun, adre me he ka hnö e unyin dö ang. 52 Ekölö gabun hnyat únö hnanyibu! anyin a öbun e hia but hom kiiny metâ: k' öbun e ca dit bi ka hnyin, ke öbun e thawâ minya tavat adre me ke ka didrö.

53 E ame didrut úheny e, ke haba tavat sihnalimen ke ta je Faresaio adre me hwân he ka újengö e, me hnö hmönyinâ e ge ta je únyi ae se hia; 54 adre me tuö e, m' adre me he ka kât ge ke hofuc únyi hnyi hnyimen.

HNYIMAKAN 12.

HNYI úen eling ame úkacaköu tavat ae se hia je thauzan, ke adre me iutiödraköuödra, me e ame hwân ka ha bânâ ka laten, ka habe, Ö 'bun áu ge

leven anyin ta je Faresaio wale thoi. 2 Anyin ae ba únyi adre me ikhálá ame ca he bi ka manen: ke ba únyi ae iyong adre me ca he ka wá. 3 Anyin a wale, adre me he ka löng hnyi lany, únyi öbun e hia but ha hnyi lit; ke adre me he ka khetâ hon je uma hnöbun hna ha ka hnyi hnyekönyen hnyin hnyeule. 4 Ke inya oge me ha köbun lahanök, ka habe, Ca ot bi gadra adre me hlingâ unyin, ke ba minya hnödra hna khana he ka ányâ. 5 Ke oge me he ka kú köbun at öbun e he ka outen: Outen ju e at ae tren man he ka khûâ hnyi gena, at ka hia but hlingâ; eke, inya oge me ha köbun, outen ju e. 6 Hawa, adre ca úco bi je wahelö a thabúng hwaban li asari? ke Khong ame ca hnying ke at gadra. 7 Ke adre hia but áú je leúnen böbun. Ca ot, anyin a öhun beönua hon ta je wahelö ae se hia. 8 Ke inya oge me ha köbun, ka habe, Haba at ame he ka haiö nya hnyi hnyimakan tavat, me ame he Nokon at ka háilâ e hnyi hnyimakan ta je angela anyin Khong: 9 ke haba at ame he ka ivinö nya hnyi hnyimakan tavat, me adre me he ka ivinöâ e hnyi hnyimakan ta je angela anyin Khong. 10 Haba at ame he ka bifuco Nokon at, me adre me he ka hna e: ke haba at ame he ka haikongoâ Hanu Kap, me adre me ca he ka hna degecâ e. 11 At ka hum öbun ka hnyi ta je sunago, me ka tavat owisa, me ta je musi, ca únykúme bi, ka habe, ieú hnân thu, me ieú hnân he ka ha: 12 anyin ame he Hanu Kap ka n' öbun ge únyi hnân he ka ha hnyi úen eling.

13 Ke ame ha kâu hnen ke at hnyi tavat ae se hia, ka habe, At Úne lö, ha thö ka liamekeiny mönya he ka tha khenâ mönya jekhöühu. 14 Me e ame ha kâu, ka habe, Ketha lö, ia otilö nya hnân he ka owisa me khenâ köbun? 15 Me haingen ködra, ka habe, Wá eaú, tu' öbun ju, wá öbun nye behnyekon: anyin ame ca möt at ge úganiny ta je únyi ame hu kâu. 16 E ame ha ködra úhöúcú, ka habe, ame gan troban kânân ke at ae tren omjeú: 17 me e ame únykúme eú hnyi hnyekon, ka habe, Ieú oge me he ka ányâ, anyin ae ba hnen anyik ta je únyi? 18 Ke haingen, ka habe, Walang únyi oge me he ka ányâ, oge me he bi nya ka kia ta je omhanik, me otílâ gánâ; ke oge me he ka ukhöúnâ eling troban ik hnyei, me anyik ta je únyi. 19 M' oge me he ka ha ka hanuk, ka habe, Hanuk lö, e se hia ta je únyi adre úkhöünâ

hobi köu hnân ta je huna ae se; ö u menâ, han me ic me senyin. 20 Ke haba Khong ame ha kâu, ka habe, U at ae monu, adre me he ka hom hanom hnyi lit ang; ke hobi kö ia bi ju ta je únyi u je penapena? 21 E úcú at ang me at ame ka ip tang omjeú hobi kâu e bi, ke ba bi tang omjehen unyin Khong.

22 Ke haingen ka laten, ka habe, Waleling me oge me ha köbun, ka habe, Ca mä únykúme bi ge anyibun möt, wale ge hnöbun hna he ka han; ke unyibun, wale ge hnöbun hna he ka khavâ. 23 Anyin ae beönua möt hon jeú, ke unyin hon úkhaú. 24 Únykúme ju öbun ta je meköta, wale adre me ca hnyi belök me menu; ke ba umödra uma hnân hip únyi, me omhanidra; ke Khong ame ha ö'dra: ke hawa gabun, e ca beönua öbun hon ta je meno ame gâ? 25 Ke ie ke at gabun ae khana he ka bi hanen hna thu beny ka hnyi ibeúen, anyin ame ka weny bi? 26 Anyin a wale, a ne ca khan' öbun he ka ányâ únyi ae úhnyú-kong, ieú can gabun a öbun e únykúme újengöâ ka hnyi ke ta je únyi? 27 Únykúme ju öbun úkúiny ta je ibedila, adre me ca huliwa bi me amo; ke inya oge me ha köbun, a haba Solomona hnyi anyin hmanenang hia, me ame ca khaú bi helâe. 28 Ke a ne khavâ Khong hnyot helâe, wale a e bi hnyi hnyei hnyi bong ang, ke nyi adre me he ka khûâ ka hnyi wahnainyâ; hawâ, e ca únyi hnathu kâu he ka okhaú' öbun hnyat ame labageju úhnyú-kong? 29 Ke ca elâm öbun hnöbun hna he ka an me ic, ke ca loloâ bi. 30 Anyin a haba ta je únyi e, me ame elâm minya aten ta je hnyei: ke e khana Kamöbun ae úcú köbun ta je únyi e. 31 Ke so bi elâm bi th' öbun dokhon dökhü, ke adre me he ka ham minya köbun ta je únyi e. 32 Hnahat mamoe ae wakhalet lö, ca ot bi, anyin ae weny Kamöbun he ka ham köbun dökhü. 33 Úco thö anyibun ta je únyi me ham hnân ibetengiö; ányâ ju je tang mone ae nâk hobi köbun, wale tang omjeú hnyi drany ame ca ba balua bi, ame ca hakekenyâ at ae venöu, k' ame ca okongoâ minya bi hnen nokon walelaba. 34 Anyin a haba hna ip tang omjehebun hnyin wale bi e minya je hnyekubun. 35 Húkâlâ ju wen je hnyekubun, ke so e umumelam anyibun je lamepa; 36 ke so öbun e tha úcú me tavat adre me halubahingen tuhödra úheny hnyi hna faipoipo; me adre me he ka ie khöng kâu, e ka o ka

LUKA 13.

seseto. 37 Hnahic hnen je athnyaba, wale e ka o than ka ò 'drin, ödrin e hmáká : e hnathu inya oge me ha köbun, e ame he ka húkálá wen hnyekon, me olab' ödra ju, me he but he ka bi athnyaba ködra. 38 Ke a ne o hnyi awa a loiny, ame ne awa a kuniny, me ò 'drin, ödrin e helâe, hnödrin hnahic. 39 Ke wáúnykúme ju öbun ang, a ne khana tuhan uma úen ame he ka o hnyin at venöu, ame ne hia but hmáká, me e ame ca hna bi umen uma m' adre me he ka kia e. 40 E so öbun e laba metá minya : anyin ame he ka o but Nokon at, hnyi ke úen öbun e ca únykúme bi.

41 Haba Peteru ame ha káu, ka habe, Than lö, u me ha úhöúcú ang köhmun, hawa u me ha ka tavat hia minya? 42 Haba Than ame ha, ka habe, Ewa athnyaba ae hnathu me metá, wale hnen tuhan hna otílá he ka musö hnyaban, he ka khenâ jeú a jekhöúdrin hnyi úen? 43 Hnahic hnen athnyaba eling, e ka o tuhan me wá a g' ame ányâ helâe. 44 E hnathu oge me ha köbun, ka habe, e ame he ka otílá e he ka musö anyin ta je únyi hia. 45 Ke a ne ha athnyaba eling eú hnyi hnyekon, ka habe, E tiga bec tuhök ; k' ame ne hwân he ka kot je athnyaba obaga me omomo, me he ka han me ic, me ic monu ; 46 awe, ame he ka o tuhan athnyaba eling hnyi bong e ame ca únykúme, ke hnyi awa e ame ca wâhmakhmeto, me ame he ka subâ luâ e, me ham káu jekhon unyin tavat adre me ca úling. 47 Ke haba athnyaba wale ame wâhmakhmetoâ weny tuhan, k' ame ca penapena bi, k' ame ca ányâ únyi ae úcú me weny, me adre me he ka osehia kot ; 48 ke haba at ae ca khana, k' ame ányâ únyi ae úcú he ka kot hnyin, me ame he ka wakhalet hna kot e. Ke haba at adre me ham gánâ káu, me adre me he bi ka elâm gánâ unyin : ke haba at adre me ip gánâ unyin, me adre me he bi ka hawâ gánâ káu.

49 Oge me o but he ka khúá meic ka hnyi hmeledrany ; ke ieú wek, at ka hia but wác walang ang? 50 Eka hu bapataiso hobi könya a g' adre me he ka bapataiso nya káu ; e pason anyik vec ke ne o but ame hwádâ thö e. 51 Öbun e únykúme la, a oge me o but he ka ham hnahic ka hnyi hmeledrany? Inya oge me ha köbun, e ba, ke so bi hna oveseâ : 52 anyin adre me he ka hwân walang ang he ka kia hnyat a thabúng, ödrin e tha laba hnyi uma a khaca, haba kun, me ama iwahnaihmiöny

me lo, ke haba lo, me ödru me iwahnaihmiöny me kun. 53 Adre me he ka ve kia kamen me nokon, ke nokon me kamen ; ama iwahnaihmiöny hinyen me nokon hlu, ke nokon hlu me hinyen ; ame he ka iwahnaihmiöny úngon me úngon hlu, ke úngon hlu me úngon.

54 Ke e ame ha minya ka tavat ae se hia, ka habe, Öbun ka wá úlá ame o úheny jimeú, me öbun e ie ha, ka habe, We but ang ; ke ka e bi. 55 Ke e ka si thö ang a hwaiöu, me haingöbun, ka habe, Ame he ka gan seúnö ; ke ka e bi. 56 Öbun hnyat thoi, e khan' öbun he ka wâhmakhmetoâ hmeledrany me drany ; ke hawa bi ang öbun e ca wâhmakhmetoâ úen ang? 57 Ke ieú gabun öbun e ca wâhmakhmetoâ bi wisa? 58 Ke u ka tha he me iwahnaihmiöny möu ka at owisa, wá wia eú hnyi gethen me me hnö u but ; wá e nye lili u thö ka at owisa, ke at owisa ame hnö u but ka at tue, ke at tue ame khúö u thö ka hnyi uma ceat. 59 Inya oge me ha köu, u me ca he ka dit úhem e, ke ne o but u me ham je ong mone hia.

HNYIMAKAN 13.

HABA keihen gadra hnyi úen eling ödrin e thumeto e ge at Galilaia, waleji a úhaniken hnö Pilato drödra me dren anyidra ta je hut. 2 Ke e ame thu me ha ködrin, ka habe, Öbun e únykúme la, ae beönua monu anyin at Galilaia e hon at Galelaia hia, anyin ame o ködra ta je únyi e? 3 Inya oge me ha köbun, e ba : ke so bi, öbun e ne ca ietra bi ame he ka hi' öbun minya helâe. 4 Ke hnyat minya a eitín ame kölu takú ödrin tap adre op hnyi Siloam, m' adre me mokcu, öbun e únykúme la, ae beönua anyidrin monu hon tavat hia adre me laba hnyi Jerusalema? 5 Inya oge me ha köbun, e ba ; ke öbun e ne ca ietra bi, ame he ka hi' öbun hia minya but helâe.

6 E ame ha úhöúcú ang, ka habe, E hu ge ke at imeta a tá hnyi iny hnyei vine ; ke e ame he but ka heleú wan hnyin, ke ba wan ame wá. 7 Me haingen ka at ame ányáwia iny hnyei vine, ka habe, Wá bi, kun dut ta huna oge o hnyin ka heleú wan hnyi imeta eang, ke ba wan oge me wá : sö but, hnân eú ame okongoâ kánâ? 8 Ke e ame thu káu, ka habe, Than lö, më hnen ju hnyi huna bi ang, inye më seú igigilö thö, me hân kánân : 9 ke a ne wa e, e so ; ke a ne ba, hwaban dö e, u me he ka sö degecá.

LUKA 14.

10 Ke e ame úne hnyin ke sunago hnyi sabath. 11 Ke wâ bi wale ke momo, eitin dut hunainy hanu at ame osényinâ; ke ame nom but momo, ke ca khana bi he ka tot wisa. 12 Ame wâ e Iesu, me e ame ha kâu, ka hâbe, Momo lö, adre hia but thang ânyâm sényin. 13 Ke e ame ip li hnyamen hon momo : me e ame ie wisa but, me ogânâ Khong. 14 Ke ame hmönyin at ame musö sunago, anyin a Iesu ame osoâ hnyi bong sabath, me haingen ka tavat ae se hia, ka habe, E hu siks ta bong hnân huliwa hnyin : me so öbun e he but jem hnyi je bong eling m' adre me omeli öbun, ke ca hnyi bong sabath bi. 15 Haba Than ame thu kâu, ka habe, Hnyat thoi, hawa, öbun e ca ve thang hnyi sabath bolok me asina, me su hnyi köiö ai he ka habelen? 16 Ke haba momo ang, nöku Aberahama, waleji a ca Satana, wâ bi eitin dut je huna, hawa, e ca úcú he ka thang hnyi sabath hna ca e? 17 K' ame tiga ha je hofuc eling, me ame hmehma hia but je iwahnaihmiony mē: ke ame senyin bi tavat ge ta je únyi hia ae hmanenang e ame mâdrâ.

18 Anyin a wale e ame ha, ka habe, E úcú dökhu dokhon Khong me ieu? ke oge me he ka öuco e me ieu? 19 E úcú me wan sinapi ame hom ke at me tã hnyi iny hnyei; me ame kú thö me hlau, me úö ae gan hmâ but; me ame laba hnyi je anginy ta je meno ame gâ ethö. 20 E ame ha hmetu, ka habe, Oge me he ka öuco dökhu dokhon Khong me ieu? 21 E úcú me leven ame hom momo me ikhâlâ hnyi falawa a kun ta tulutiny, ke ne o but ame tha khibi hia thö.

22 Ke e ame he but me he hnyi wanben je taun me je hnyaba, k' ame úne tot, ame he Jerusalema ai. 23 Haba ke at ame ha kâu, ka habe, Than lö, hawa, e wakhalet thibi tavat adre me he ka möt? Me haingen ködra, ka habe, 24 Hwege th' öbun he ka dit hnyi homagöule ae hnek: anyin a inya oge me ha köbun, ka habe, e se hia tavat adre me elâm he ka didrö hnyin, k' ame ca he ka khan' ödra. 25 E ka hia but tot tuhan uma, me hlöng hwanuma, ke öbun e hwân he ka tot eú me seseto hwanuma, me ha, ka habe, Than lö, khöng ut köhmun: ke e ame he ka thu me ha köbun, ka habe, E ca khanö nya öbun, öbun hoúat ua; 26 me öbun e he ka hwân he ka ha, ka habe, Öhmun e hia but han me ic hnyi hnyimákâm, ke u je úne hnyi

dehmun je gethen; 27 ke e ame he ka ha, ka habe, Inya oge me ha köbun, e ca khanö nya öbun, öbun hoúat ua; úsákâúö but mönya öbun hia thithö tavat öbun e mâdrâ hulö. 28 Adre me he ka tenge eling, me úgiö ganyudra, wale öbun ka he ka ö Aberahama, me Isaaka, me Jakob, me ta je perofeta hia thithö hnyi dökhu dokhon Khong, ke adre me he bi ka ob' öbun. 29 Ke adre me he ka o úhedra jimeyö me jimeú, ke úhedra hnyi hwadrö me hwaiöu, he ka laba hnyi dökhu dokhon Khong. 30 Ke wâ bi, e hu tavat a bilidra, ame he ka bödra, ke hu tavat a bödra, ame he ka bilidra but.

31 Ke ame he but keihen ta je Faresaio hnyi awa eling, me ha kâu, ka habe, He thö, ke hna but dok ang, anyin a Heroda ame behe ka hlingö u. 32 Ke e ame ha ködrin, ka habe, He th' öbun ka ha ka alope e, ka habe, Wâ bi, inya oge me obâ ta je demoni, me omelö ta je mok hnyi bong ang me nyi, ke hnyi bong we oge me he ka oumo. 33 Ke so bi, hamök he ka he hnyi bong ang, me nyi, me hnyi bong we: anyin ae ca khana bi ke perofeta ka mok hnyi hoton Jerusalema. 34 Jerusalema, Jerusalema lö, at ame hlingâ ta je perofeta, me lú ödrin adre kun' ödrin kâu! e se hia wek he ka úkhacaköuâ lakom, helâ me hinyen denakhoto ame tube lakon ge li labenyin, m' öbun höcö bi öbun! 35 Wâ bi, adre hia but hna degecâ umöbun uma: ke inya oge me ha köbun, Öbun e ca he hmetu ka ö nya, ke ne o but öbun e he ka ha, ka habe, Hnen hnahic at ame o but hnyi ien Than.

HNYIMAKAN 14.

KE e ame didrö ka hnyi uma umen ke taben ta je Faresaio hnyi sabath he ka han, ke adre me tuö e. 2 Ke wâ bi, wale ke at hnyi hnyimakan ame mekinny thâköiö. 3 Ke haba Iesu ame thu me ha ka tavat únö hnanyibu, me ta je Faresaio, ka habe, Hawa, e úcú he ka osoâ at hnyi sabath, e ca úcú? 4 Ke adre me laba hnyibü. Me e ame hom e me osoâ, k' ame hna but e. 5 Haingen ködra, ka habe, Ia gabun ae hu haleny asina, a ne bolok, ame kölu ka hnyi thop, me ame ca he ka ie lelö hmetu thö e hnyi sabath? 6 Ke ca khan' ödra hmetu bi he ka thu je hofuc eling.

7 Ke e ame wâ a g' adre me úca je hna lap ae beönuu, me e ame ha úhöcú ka

tavat adre me hawâ; haingen ame ha ködrin, ka habe, 8 E ka hawo u ke at ka hnyi faipoipo, ca he ka laba hnyi hna laba ae beönua, wâ e nye hu at ae beönua hom adre me hawâ, 9 me ame o but at a tha haw' öbu, me ha köu, ka habe, Hna thö hobi kâu at ang; me u me he ka hwân hmehma me laba hnyi hna laba ae hnyikânâ. 10 Ke e ka hawo u, he thö ka laba hnyi laba ae hnyikânâ hmönyin; ke ka o at a hawo u, me e ame he ka ha köu, ka habe, Hanök lö, he thö ka laba hnyi hna laba ae beönua: me u me he ka mec hnyi hnyimakan tavat adre me tha laba möu. 11 Anyin adre me he ka öuhnyükongoâ at ame ogânâ e bi; k' adre me he ka ogânâ at ame ka öuhnyükongoâ e bi.

12 Haingen minya ka at a hawa e, ka habe, U ka thu han jebigö ame ne han saha, ca hawâ lahânâm, me je liamekeiny möu, me ânyâm lap, me tavat tren omjeü ae hakekeny köu; wâ adre nye he ka hawo u hmetu, me bi hwaban köu. 13 Ke u ka he ka ânyâ bijeü, hawâ thö je theduoc, me ta je bâbu, me ta je mat, me ta je wadröu: 14 ke adre me he ka ohnahici u; anyin ae ca hu gadra únyi he ka bi hwaban hmetu köu: anyin adre me he ka bi hwaban köu hnyi úen möt hmetu a tavat ae wisa hwa-kecidra.

15 Ame löng ta je hofuc e hnen ke at ame tha laba mē, me e ame ha kâu, ka habe, Hnahic hnen at ame he ka hnyi han hnyi dökhu dokhon Khong. 16 Me e ame ha kâu, ka habe, Ame ânyâ ke at bijeü ae gan hmâ; ke se hia tavat a hawâ: 17 ke e ame kunâ athnyabainy hnyi úen han he ka ha ka tavat adre me bödra ka hawâ, ka habe, Ai öbun; anyin adre hia but penapena ta je únyi. 18 Ke ödrin hia thithö adre me hwân he ka ve ha vhelidra. Hai- ngen ke at kâu, ka habe, Oge hia but úco ke utkânâ, ke hamök he ka he ka wâ e: ö u hnö nya ju ang. 19 Ke haingen ke at, ka habe, Oge hia but úco je bolok a faiv je úcon, ke oge me he but ka cubic ödrin: ö u hnö nya ju ang. 20 Ke haingen ke at, Oge hia but faipoipo, anyin a wale e ca khanö nya but he ka he. 21 Me ame o but athnyaba, me omanenâ ta je únyi eling ka tuhan. Me ame hmönyin tuhan uma, me ha ka athnyabainy, ka habe, Ie he bi thö ka hnyi je gethen me je hna ngeny hnyi taun, ke hawâ thö jem ta je theduoc, me ta je bâbu, me ta je wadröu, me ta je mat. 22 Ke haba athnyaba me

ha, ka habe, Than lö, adre hia but ânyâ helâ me hnâm hna hûna, ke tiga hu hna lap. 23 Ke hsingen than ka athnyaba, ka habe, He thö ka hnyi je hna cit gethen, me hmelen je hak, me újengi ödra thö jem, me me unöngöt dö umök uma. 24 Anyin a inya oge me ha köbun, ka habe, Ame ca he tavat adre bödra ka hawâ, ka hnyi drem anyik bijeü.

25 Ke ame tha he me tavat ae se hia: ke e ame hwiö thö me ha ködra, ka habe, 26 A ne hu at ame he ka o könya, ke ame ca höciâ bi kamen, me hinyen, me âiân, me lakon, me je liamekeiny, me lahaniny, me anyin minya bi möt, e ca khana he ka bi hanen ta je latök. 27 Haba at ame ca vadren anyin satauro me he hotuk, e ca khana bi he ka bi hanen latök. 28 Anyin a ie at gabun ame beup tap, k' amé ca mē laba ju he ka aú hwaban, hawa, e hu gan hnân he ka öumo? 29 Wâ e nye hia but bi taben, ke ca khana bi he ka öumo, me ame he ka hlumâ e hnen tavat hia adre me wâ, 30 adre me ha, ka habe, At ang ame hwân he ka op ke ca khana he ka umo. 31 Ke ie ke than ame he ka vat me ke than, ke ame ca mē laba me bán ka úny- kûme, hawa, e khana e me tavat a ten thauzan he ka vat me at ae hu gan twente thauzan e ka he ka o kâu? 32 Ke a ne ca khana bi, e ame kunâ úthumetu ke tiga sâkâu bi at eji, he ka sumâtâ úsoköu. 33 Ke helâe, haba at gabun ame ca hna bi ta je únyi hia thithö ae hu gan, me ca khana he ka bi hanen latök. 34 Eke, e so sâlt, ke a ne ba but hinyin sâlt, ieü hnân ohinyâ e? 35 E ca úcú e hobi kâu kânâ me hna belök: k' ame degec ut e hnen at. Haba at ae hu li hnyikönyen ka löng, löng ju e.

HNYIMAKAN 15.

AME hakekeny dö kâu ta je telona me tavat hia ae monu, he ka löng kâu. 2 Ke haba ta je Faresaio me tavat sihnali- men adre me ulidro, ka habe, Ame kap tavat ae kong hnen at ang, k' ame tha han mödra.

3 Me e ame ha úhöücú ang ködra, ka habe, 4 Ia gabun ae tren mamoe a wan haded, k' ame hia khaca gadra, hawa, ame ca he ka hna but nainte nain hnyi hnye- buba, me elâm at a hia ke ne o but e ame wâ ju e? 5 Ke ame wâ ju, me e ame ip hon abenyin, k' ame senyin bi. 6 Ke e ka o ka hnyi umen uma, me e ame hawâ

LUKA 16.

úkacakouá je lahanen, me tavat adre me laba hakekenyá, me ha ködrin, ka habe, Tha senyin dö mönya, anyin oge me wá ju halek mamoe a hia. 7 Inya oge me ha köbun, Adre me he ka senyin heláe hnyi drany ge ietra hnen at a khaca ae kong, hon hnödra hna senyiná tavat ae wisa a nainte nain, waleji a ca hu gadra hnân ietra.

8 Ke ewa momo ae hu gan je mone a ten, ke a ne hia but khaca, ame ca he ka vác lamepa, me aba uma, me elâm wia ke ne o but ame wá ju e? 9 Ke e ka wá, me e ame hawâ úkhacakouá lahanen, me tavat adre me laba hakekenyá, me ha, ka habe, Tha senyin dö mönya anyin oge me wá ju anyik mone a hia. 10 Inya oge me ha köbun, a g' ame he ka hu senyin heláe hnyi hnyimakan ta je angela anyin Khong can ietra hnen at ae kong a khaca.

11 Ke e ame ha, ka habe, Wale at ae hu lakon li baga: 12 ke haingen wakeiat ka kamen, ka habe, Cicö lö, ham dö kõnya jekhóuk. Me e ame khená ködrü anyin ta je únyi. 13 Ke tiga ca se hia bong hwabane, haba wakeiat ame úkhacakouá anyin ta je únyi hia, me he ka hnyi ke hnyeí ae sákáú; me e ame dedegec eling tang omjehen ge hwakecin ae kháládren. 14 Ke a hia but kháládrená anyin ta je únyi hia, me ame o but hmiá ae gan hmá ka hnyi hnyeí eling, me ame hwân he ka theduoc. 15 Me e ame he me laba unyin ke at aten hnyeí eling, ke e ame kuná e ka hnyi iny ta hnyeí he ka hân je buaka. 16 Ke ame kú thö weny he ka an ta je unen a an buaka: ke ba at ame hân e. 17 Ke ame metu hmetu thö hnyekon, me haingen, ka habe, Ve ta hlu anyi cica ae ti hu jeú me kolon bi gadrin, ke haba inya oge me he but ang ka mok ge mekihnânem! 18 Oge ma tot me he kö cica, me ha kâu, ka habe, Cica lö, oge hia but monu ka hnyi drany me hnyimákâm: 19 ke ca úcú hmetu he ka hawo nya me nokom: ha thö inye he ka helá me ányâm ke hlu. 20 Me e ame tot, me he ka kamen. Ke kamen ame wá, ke tiga sákáú, me e ame betenge gan, me wadring, me ta ju hon nyin, me úcimhnyimak më. 21 Haba nokon ame ha kâu, ka habe, Cica lö, oge hia but monu ka hnyi drany me hnyimákâm, ke ca úcú hmetu ka hawo nya me nokom. 22 Ke haba kamen ame ha ka lathnyabainy, ka habe, Ie hom but jem úkhaú ae ti so, ke okhavá ju kâu; ke iná thö wen hnyam

kâu, ke húkáláju tangen li hnyeúca: 23 ke hom but jem nokon kau ae pipikhenya, me hlingá but mate me han me senyin: 24 anyin a walang nökek úheny hnyi hna mok, ka möt hmetu thö; ke a hia, ke wale hmetu thö ang. Me ödrin e hwân he ka senyin. 25 Ke e hnyi hnyaba nokon a atö: ke e ame o me hakekeny ka hnyi uma, me ame löng khumöng me biá. 26 Me e ame hawâ ke athnyaba me hnö, ka habe, Ieú thö? 27 Me e ame thu kâu, ka habe, A o thö kem; ke a hia but kâmâm hlingá nokon kau ae pipikhenya, anyin a e ame kap ke tiga möt. 28 Me e ame ka hmönyin me höcö he ka dit: ke ame didrut kamen me újengö e. 29 Ke e ame thu me ha ka kamen, ka habe, Wá bi, e se hia ta ge huna oge bi athnyabaem hnyin, ke ba ányâm ke hnanyibu a khaca oge hany-áúá: ke so bi u je ca ham balua nokon got kõnya, m' inye he ka tha senyin me lahanök: 30 ke ame hap o ju nokom eang, at ame ohia ányâm ta je únyi ka omomo hnyi gethen, me u je hia but hlingá hobi kâu nokon kau ae pipikhenya. 31 Me e ame ha kâu, ka habe, Nökuk lö, u bala unyik, ke ányâm bi anyik ta je únyi hia. 32 E ka úcú kötin he ka senyin me hobá: anyin a walang kem úheny hnyi hna mok, ke a möt hmetu thö; ke hia, ke wale hmetu thö ang.

HNYIMAKAN 16.

KE haingen minya ka laten, ka habe, Wale ke at ae tren omjeú, ae hu athnyabainy a at tue; ke adre me bi fuco e ka tuhan a g' ame kháládrená anyin ta je únyi. 2 Ke e ame hawâ me ha kâu, ka habe, Ieú e oge me löng gam? ha thö bongon hnâm hna tuö; anyin a u me ca he hmetu bi ka tuö. 3 Ke haingen at tue eú hnyi hnyekon, ka habe, Oge ma kâmâu anyin ame he but tuhök ka hügúná hany-mök? E ba tang hwegiök he ka hiny kâná, k' iny hmehma bi he ka sumat. 4 E mou but únyi oge me he ka ányâ, m' adre me köp nya ka hnyi umödra je uma, at ka hia but obö nya únyi hnyi hany-mök. 5 Me e ame ve hawâ tavat waleji adre me hom gufa unyin tuhan, k' ame ha ka ke at, ka habe, Ve ta únyi anyin tuhök gam? 6 Haingen, ka habe, Wan haded je bathiny wakaco. Me e ame ha kâu, ka habe, Hom dö hna sihnalimâm, ke ie laba ju, me sihnalimen ju fite. 7 Ke e ame ha ka ke at,

ka habe, Ve ta gufa gam? Haingen, ka habe, Wan haded ta je koriny whit. Me e ame ha kâu, ka habe, Hom dö hna sihna-limâm me sihnalimen ju eite. 8 Ke haba than ame haisoâ athnyabainy ae ca wisa, anyin a e ame ânyâ metâ : anyin ae metâ but aten hmeledrany unyin anyidra dö hon tavat a aten melam. 9 Ke inya oge me ha köbun, ka habe, Bi hanöbun unyin mamona ae ca wisa ; me me ka o obiny, me adre me he ka köp öbun ka hnyi umödra ta je uma a nyiele balua. 10 Haba at ame hnathu hnyi únyi ae úhnyákong hmönyin, me e ame hnathu minya bi hnyi únyi ae gan : ke haba at ae ca wisa hnyi únyi ae úhnyákong, me ca wisa minya bi hnyi únyi ae gan. 11 Anyin a wale, öbun e ne ca hnathu hnyi mamona anyin hwa-kecin ae ca wisa, me ie at ame he ka ip köbun hing tang omjeú? 12 Ke öbun e ne ca hnathu hnyi únyi anyin ke at bi, ie at ame he ka ham köbun anyibun ta je únyi bi? 13 E ba athnyaba ae khana he ka bi athnyabainy li at : anyin a e ame he ka hociâ khaca, me hnyok ka khaca ; ke ame ne he ka keci ka khaca me hukötiâ khaca. E ca khan' öbun he ka bi athnyabainy Khong me mamona.

14 A löng ut ta je únyi e ta je Faresaio, vat ae behnyekudra omjeú ; me adre me hiâ e. 15 Ke e ame ha ködra, ka habe, Öbun tavat öbun e owis' öbun bi hnyi hnyimakan tavat ; ke khana bi Khong je hnyekubun : anyin a haba únyi ame oúnyihna-thoâ at, me, ikiki bi ling hnyi hnyimakan Khong. 16 Ke ne o but kö Ioane hnanyibu me ta je perofeta : hwaban ün eling adre me khetâ dökhu dokhon Khong, ke ame hwege didrö ka hnyin tavat hia. 17 E hâhâ he ka hia drany me hmeledrany, ke hmak he ka hia ke mataitusi ae úhnyákong hmönyin hnyi hnanyibu. 18 Haba бага at ame degec âiân me hom hmetu ke at, ame bi únyi monu e : ke haba бага at ame hom momo a degec âiân, ame bi únyi monu.

19 E hu ke at ae tren omjeú, ke e ame khavâ úkhaú ae dra me mano lino, k' ame manenang hnyi ta je bong hia : 20 ke wale ke at sumat, Lazaro ien, waleji adre me labö ip hnyi homagöuleny, e unöngöt dö unyin ge anyú, 21 ke e ame weny he ka an je kolon ame kölu únyi hnyi hon laulau anyin at ae tren omjeú ; eke, ame labö o ta je kuli he ka drem hnân ta je anyú. 22 Me ame mokcu at sumat, me ame hom dö

e ta je angela ka hnyi úlai Aberahama : ke ame mok minya ju at ae tren onjeú, me adre me konâm but. 23 Ke e ame vec hnyi Hedis, me bwele göranyai, me ame ö Aberahama hnyi dok ae sâkâú, me Lazaro minya hnyi úlainy. 24 Ke e ame hongot me ha, ka habe, Cica Aberahama lö, betenge ju gak, ö u me kunö Lazaro, me me he ka húlúlúâ ban banyen hnyi köiö, he ka oka-tebo bohömök ; anyin a oge me vec gan hmâ hnyi meic ang. 25 Ke haingö Aberahama, ka habe, Nökuk, únykúme ju a g' ame hu köu ânyâm ta je únyi ae so hnyi ânyâm möt, ke Lazaro thibiji ae kong anyin ta je únyi : ke walang ang e ame senyin, me u me vec biju. 26 Ke ca hake wale thibi e, ke adre me ip hmâ uthankong hnyigöulöhmun m' öbun, wale me ca khana tavat adre me behe köbun úhedra ang he ka hanyâúâ, ke ca khana tavat gadra adre me behe köhmun he ka hanyâúâ. 27 Me e ame ha, ka habe, Cica lö, inya oge me khöü köu, m' u me kunâ e ka hnyi hnyaba cica ; 28 anyin ae hu je liamekeiny mönya a faiv ; me me he ka ohnathoâ ködrin, wâ ödrin nye hnyi he jem ka hnyi dok ang ae vec. 29 Ke haingö Aberahama kâu, ka habe, E hu Mose me je perofeta unyidrin ; hamödrin he ka ling ödrin. 30 Ke haingen, ka habe, Ohe, cica Aberahama ; ame ne he ke at úheny hnyi hna mok, ödrin e he ka ietra. 31 Me haingen kâu, ka habe, Ödrin e ne ca ling Mose me je perofeta, me ödrin e ca he ka hmehmela e ka möt hmetu thö ke at únyi hnyi hna mok.

HNYIMAKAN 17.

E AME ha ka laten, ka habe, E ca khana he ka ca o ta je újejöng : ke ekölö ge at ame bi deny únyi eling! 2 E hâhâ kâu he ka vekiny hnyi hwagenyin veto hnân oamamá, me he ka öúâ but e eú hnyi köiö, ke e hmak kâu ame ne he ka bi joniny ke at ae úhnyákong eang. 3 Wâ eâu öbun : A ne monu but kem, nâ thö ; ke a ne ietra but, hna degecâ anyin monu. 4 Ke ame ne he ka oseven monu köu hnyi bong a khaca, k' ame oseven hwiö köu me ha, ka habe, Oge me ietra ; me u me he ka hna degecâ anyin monu.

5 Haba je aposetolo ödrin e ha ka Than, ka habe, Bi hanen ju anyihmun labageju. 6 Haba Than ame ha, ka habe, A ne hu gabun labageju helâ me wan sinapi, öbun e he ka ha ka úö sukamine eang, ka habe,

LUKA 18.

Ok dö me iwân, me könim u but eü hnyi köiö ; me ame he ka ling öbun. 7 Ke ia gabun ae hu athnyabainy ame trohnen, ame ne tuö mamoe, ke e ame o but úheny hnyi utkânâ, me ame he ka ha kâu, ka habe, le aiö u, m' u me han ; 8 ke ame ca bân he ka ha kâu, ka habe, Penapena thö hnök hna he ka han, ke hûkâlâ ju wen hnyekom, me huliwa kõnya ke ne o but oge hia but han me ic ; ke hwaban e, u me he ka han me ic? 9 Hawa, e ame ole ka athnyaba, anyin a e ame ányâ ta je únyi adre húna? 10 Helâe minya öbun, öbun ka hia but mádrâ ta je únyi adre húna köbun, ha th' öbun, ka habe, Öhmun ang je athnyaba ae ba troban ; öhmun e hia but mádrâ thibi hanymöhmun he ka mádrâ.

11 Ke e ame he hnyi wanben Samaria, me Galilaia, ame he Jerusalema ai. 12 Ke e ame tiga dit ka hnyi ke taun, me ame úkhanö me je lepera a ten, ödrin a tot sákâú : 13 ke ödrin e fuc hwege, ka habe, Iesu a Than lö, betenge ju gahmun. 14 Ke e ame wâ, me e ame ha ködrin, ka habe, He th' öbun ka omanen' öbun ka tavat bi hut. Ke ödrin e tiga he, me ödrin e so but. 15 Ke a wâ but hnen ke at gadrin a ga so but, e ame hmetu ju me haisoá Khong ge ifucin ae gan ; 16 me ta ju hnyikânâi hnyi hmelen li can, me ole kâu : haba at Samaria e. 17 Ke haba Iesu ame thu, ka habe, Hawa, ödrin ca ten adre osoá? ewa biju nain? 18 E ba ju ke at adre wâ ame hmetu he ka haisoá Khong, ke hake wale thibi ang atkanyua? 19 Me e ame ha kâu, ka habe, Todró, he thö, u je mödrut hnen ányâm labageju.

20 Ke a hia but ta je Faresaio hnö e ge úten ame he ka o hnyin dökhu dokhon Khong, me e ame thu ködrin, ka habe, A ca e bi dökhu dokhon Khong me hnân wâ : 21 ke haba khaca, adre me ca he ka ha, ka habe, Wâ bi ang! ke wâ bi e! anyin a wâ bi, e hnyi wanböbun dökhu dokhon Khong.

22 Ke e ame ha ka laten, ka habe, Ame he ka o úten, öbun e he ka weny he ka wâ ke bonginy Nokon at, ke öbun e ca he ka wâ. 23 Ke adre me he ka ha köbun, ka habe, Wâ bi e! Wâ bi ang! ca he ka hnyin me hnu hoton : 24 anyin a haba hucuce, ame hlâ hnyi ke keihen drany, me umumelam ka hnyi ke keihen drany ; ame he ka helâe Nokon at hnyi anyin bong. 25 Ke hamen he ka mē vec ge ta je

únyi ae se hia, me hota degecâ hnen dö ang. 26 Ame he ka úcú úten Nokon at me je bong eji bongu Noa. 27 Adre me han, adre me ic, adre me faipoipo, ke úham ta momo, ke ne o but hnyi bong ame dit Noa ka hnyi hu, me ame o but uoú me ohí' ödra hia. 28 Helâc minya hnyi je bong bongu Lota ; adre me han, adre me ic, adre me úcú, adre me belök, adre me bi uma ; 29 ke haba hnyi bong ame kec Lota úheny Sodoma, me ame ta meic me teio únyi hnyi drany, me ohí' ödra hia : 30 ke ame he ka helâe minya hnyi bong ame he ka manen hnyin Nokon at. 31 Haba at hnyi hon uma hnyi bong eling, ke eiö anyin ta je únyi hnyin uma, me so e ame ca ut bi he ka hom : haba at hnyi hna belök, me so e ame ca hmetu bi. 32 Únykúme ju öiö Lota. 33 Haba at ame he ka elâm he ka tuö anyin möt, me ame he ka ohia e : ke haba at ame he ka hna anyin möt, me ame he ka tuö e. 34 Oge me ha köbun, a g' ame he ka mokut lo li at hnyi lit eling hon hnamokut a khaca ; adre me he ka hom khaca, k' ame hnen biju khaca. 35 Ame he li momo ka tha oamamá, adre me he ka hom khaca, k' ame hnen biju khaca. 37 Ke ödrin e thu me ha kâu, ka habe, Than lö, ewa? Haingen ködrin, ka habe, Haba hnen komok, me wale hnen je aeto hna úkhacaköu kâu.

HNYIMAKAN 18.

E AME ha úhöúcú ködrin, me me he tavat ka labö hic bala, ke adre me ca he ka sēnyin ; 2 haingen, ka habe, Wale at owisa hnyi ke taun, at ame ca outen Khong, k' ame ca ogânâ at : 3 ke wale ke safac hnyi taun eling ; ke e ame ibi ose o but kâu me ha, ka habe, Owisa thü kõnya me iwahnaihmiöny mönya. 4 Ke e ame höcö hnyi úten eling : ke hwaban dö e, e ame ha eü hnyi hnyekon, ka habe, Eja ke ne oge ne ca outen Khong, ke oge me ca ogânâ at ; 5 ke oge me he bi nya ka owisa ka safac ang, can a g' ame labö lili nya, wâ oge nye mokhon dut gan ame labö he jem kõnya. 6 Haba Than ame ha, ka habe, Löng ju öbun hna ha hnen at owisa ae hwali hwakecin. 7 Ke hawa, ame ca he Khong ka owisa ka tavat e ame úca, a tavat adre me hongot kâu hnyi lany me lit, ke e ame hok hnyoki ödra beú hmâ ju? 8 Inya oge me ha köbun, e ame he ka ie owisa ködra. Ke e ka o Nokon

LUKA 18.

at, hawa e ame he ka wâ labageju eang hmeledrany?

9 Ke e ame ha ûhöücû eang ka keihen andre me ka labageju ködra bi, a ödra wisa, ke andre me önyibaûâ keihen: 10 Haba lo li at ödrü me he ka hnyi uma kap he ka hic, Faresaio ke at, ke telona ke at. 11 Haba Faresaio ame tot me hijö e bi helâng, ka habe, Khong lö, inya oge me ole köu, anyin a iny ca ûcü bi me keihen, a tavat venöu, me hwali hwakecida, me tavat bi ûnyi monu, k' iny ca ûcü minya bi me telona ang. 12 Inya oge me olo ânyâ ca han hnyi je wik, ke oge me ham ke keihen a libenyitainy anyik ta je ûnyi hia thithö. 13 Ke haba telona ame tot sâkâû, e ame ca më bwele bi hnyi drany ai, ke e ame khaû ûlainy me ha, ka habe, Khong lö, betenge ju gak at ae monu, 14 Inya oge me ha köbun ame he but at ang ka hnyi umen uma, ke andre haiwisa e hon at eji: anyin andre me he ka öûhnyûkongo at ame ogânâ e; ke andre me he ka ogânâ at ame öûhnyûkongoâ e.

15 Ke andre me hom but minya kâu, ta je mendreng me me he ka kâl' ödra: ke ame wâ e laten, me ödrin e thaw' ödra bi. 16 Ke haba Iesu ame haw' ödra kâu, me ha, ka habe, Hna but ta je wanakat ka he jem könya, ke ca thaw' ödra bi: anyin a ödra ûcü me dökhu dokhon Khong. 17 E hnathu, inya oge me ha köbun: haba at ame ca he ka kap dökhu dokhon Khong helâ me wanakat, me e ame ca he balua ka didrö ka hnyin.

18 Me ame hnö e hnen ke taben, ka habe, At ûne ae so lö ieû hanymök oge me he ka mâdrâ e me hu thö könya möt ame ca ba balua? 19 Ke haba Iesu ame ha kâu, ka habe, Ieû e gam u me ha m' iny so? e ba ke at ae so, ke khaca thibi a Khong. 20 E khanö u ta je hnanyibu, ka habe, U ca he ka bi ûnyi monu, U ca he ka ûhlingö, U ca he ka venöu, U ca he ka bi fuco thoiâ, Ogânâ ju kâmâm me hinyâm. 21 Ke e ame ha, ka habe, Oge hia but vhenö ta je ûnyi e k' iny tiga wanakat. 22 Ke a löng ut Iesu ûnyi e, me e ame ha kâu, ka habe, Khaca biju ûnyi ae hia gam: ûco thö ânyâm ta je ûnyi hia, me khenâ ka ta je theduoc, ke u me he ka hu tang omjeû hnyi drany: ke aiö u bi, me he hotuk. 23 E ame löng je hofuc e, me ame hmak ut hnyekon, anyin a e tren omjeû ae gan hmâ. 24 Ke ame wâ e Iesu, me haingen, ka habe,

Huliwa but at ae tren omjeû he ka didrö ka hnyi dökhu dokhon Khong! 25 Anyin ae hâhâ ka kamela he ka didrö ka hnyi hwanumen jebû, ke hnek bi he ka didrö ka hnyi dökhu dokhon Khong ka at ae tren omjeû. 26 Haingen tavat andre me löng e, ka habe, Ia la ae khana he ka möt? 27 Ke e ame ha, ka habe, Haba ta je ûnyi hia thithö ae ca khana at, me khana bi Khong. 28 Haba Peteru ame ha, ka habe, Wâ bi, öhmun e hia but hna degecâ ta je hnyabahmun, me he hotom. 29 Haingen ame ha ködrin, ka habe, E hnathu inya oge me ha köbun; a haba at ame hna but uma, me âiân, me je liamekeiny më, me kamen, me hinyen, me lakon hobi kâu dökhu dokhon Khong, 30 me e ame he ka kap ta je ûnyi ae se hia hnyi ûen ang, ke hnyi ûen ame he ka o möt ae ca ba balua.

31 E ame hom kâu hnyat a twelv me ha ködrin, ka habe, Wâ bi, ötin e he ka he Jerusalema ai, ke ame he ka hwâdâ ka Nokon at ta je ûnyi hia a sihnalimen ta je perofeta. 32 Anyin andre me he ka hna e ka aten ta je hnyei, ke andre me he ka hlumâ e, me okongoâ, me hangöjâ: 33 ke andre me he ka osöâ, me hlingâ e: ke e ame he ka möt hmetu thö hnyi bong a kuniny. 34 Ke ödrin e ca wâ ûnykûme bi ta je ûnyi eling; e iyong ködrin hofuc e, k' ödrin e ca wâhmakhmeto bi ta je ûnyi e ame ha.

35 E ame hakekenyâ Jeriko, ke haba ke wadröu ame laba eû hnyi baten gethen, k' ame sumâtâ ta ûnyi: 36 ke e ame löng hwan bunyen ae gan, me e ame hnei, ka habe, Ieû ang? 37 Ke andre me thumeto e a g' ame he thö Iesu at Nazareta. 38 Me e ame hongot, ka habe, Iesu lö, nöku Davita, betenge ju gak. 39 Ke haba tavat a bödrin ödrin e thawâ e, me me laba hnyibu ju: ke e ame hongot hwege tot, ka habe, Nöku Davita lö, ö u betenge gak. 40 Haba Iesu ame todru, me ûkhünöng he ka hawâ e kâu: me e ame o but, ke e ame hnö e, ka habe, 41 Ieû ae wem oge me he ka ânyâ köu? Ke e ame ha, ka habe, Than lö, m' inye bwela but. 42 Ke haba Iesu ame ha kâu, ka habe, U je bwela but: u je mödrut hnen ânyâm labageju. 43 Me e ame ie bwela but, me he hoton, me haisöâ Khong: ke a wâ but e hnen tavat hia, me andre me olungâ Khong.

HNYIMAKAN 19.

KE e ame didrö me he hnyi wanben Jeriko. 2 Ke wâ bi ke at Zakaio ien; ke taben je telona, ke tren minya omjeú. 3 E ame heleú deny he ka ô Iesu, ame ne ia; ke ca khana bi anyin ae se hia tavat, ke e ae okhulit. 4 Me e ame bân ka wadring, me ölö hnyi úö sukamore me me he ka wâ e: anyin a e ame he ka he hmelen e. 5 Ke ame o but Iesu kâ e, me e ame bwele thö, me wâ e, me ha kâu, ka habe, Zakaio lö, utut, mweimwei thö; anyin a hamök he ka laba hnyin umâm uma hnyi bong ang. 6 Me e ame ie utut, me kap senyina e. 7 Ke ödra hia adre me wâ e, me adre me ulidra, ka habe, A he but ka tha laba me at ae kong. 8 Ke haba Zakaio ame tot me ha ka Than, ka habe, Than lö, wâ ju, inya oge me ham ke keihen a hafiny anyik ta je únyi ka tavat ae theduoc; ke oge ne hia but hügúnâ monoâ omjehen ke at, me oge me ibi ovak hmetu bi hwaban. 9 Ke haba Iesu ame ha kâu, ka habe, A o but möt ka hnyi hnyaba eang hnyi bong ang, anyin a walang ke at nöku Aberahama. 10 Anyin a o but Nokon at he ka elâm, me omelö wahia.

11 Ke adre me tiga löng ta je únyi eling, e ame bihanen ta je hofuc me ha ke úhöúéú, anyin a e ame hakekenyâ Jerusalema, ke can minya adre me únykúme ame he ka ie manen dut dökhu dokhon Khong. 12 Anyin a wale, e ame ha, ka habe, Ame he but ke than ka hnyi dok ae sâkâú, he ka kap dökhu hobi kâu, ke ame he ka hmetu. 13 Me e ame hawâ ke je athnyabainy a ten, me ham ködrin je mina a ten, me ha ködrin, ka habe, Huliwan dö ke ne o but hnyi úen oge me o hnyin. 14 Ke ame höciâ e hnen aten iny hneyi, ke adre me kunâ úthumetu he ka wadring hoton he ka ha, ka habe, E ca wehmun me me musi öhmun at ang. 15 Me e ame o hmetu but, ke a hia but kap dökhu, me e ame úkhúnöng he ka hawâ je athnyaba waleji a ham mone ködrin, me me wâ thö hnödrin hna ve huliwan. 16 Me ame o but khaca, me ha, ka habe, Than lö, adre hia but huliwan ányâm mina a khaca me ame oâ ta je mina a ten. 17 Me e ame ha kâu, ka habe, Ole, u athnyaba ae so: hamâm he ka musö ta je taun a ten, anyin a u je hnathu hnyi únyi ae úhnyú-kong. 18 Me ame o minya but ke at me ha, ka habe, Than lö, a hia but ányâm mina a khaca bi hanen thabûng minya ta je

mina. 19 Ke e ame ha minya kâu, ka habe, Musö minya ju je taun a thabûng. 20 Ke ame o minya but ke at me ha, ka habe, Than lö, wâ bi ányâm mina, waleji oge me tuö me lan hnyi ecmano: 21 anyin a oge outö u, anyin a u at ame ú: u at ame hom únyi u je ca ip, me meno hnâm hna ca tâ. 22 Ke e ame ha kâu, ka habe, U athnyaba ae monu lö, únyi hnyi hnyimâm oge me he ka hangö u. E khanö u a iny at ú, me hom but únyi oge ca ip, me meno hnök hna ca tâ; 23 anyin a wale, ieú can u me ca ham anyik mone ka hnyi uma tuö mone, hobi kâu iny ka o thö, ame he ka hu kõnya anyik me hna bi hanen? 24 Me e ame ha ka tavat adre me tot hakekeny, ka habe, Hügúnâ thö gan mina, me ham ka at ae hu je mina a ten. 25 Ke ödrin e ha kâu, ka habe Than lö, e hu minya gan je mina a ten. 26 Haba inya oge me ha köbun; Adre me he ka ham ka at ae hu gan; ke adre me he ka hügúnâ ge at ae ba gan, únyi e ame hu. 27 Ke haba tavat eji je iwahnaihmöny mönya, waleji ae ca wedra oge me he ka musi ödra, hum ödra but jem he ka hling' ödra hnyi hnyimakök.

28 Ke a hia but ha e, me e ame bân dut he ka he Jerusalema ai.

29 Ke e ame hakekeny jut Bethefage ai, me Bethania hnyi bucen Elaio ien, me e ame kunâ ke li laten, 30 me ha, ka habe, He th' öbu ka hnyi taun cici öbu; ke öbu ka tiga dit hnyin öbu me he ka wâ nokon asina adre noc, ae tiga ca tabâ e hnen at: thang ut e me lelö thö jem. 31 E ka hu at ame hnei öbu ka habe, Öbu me thang hnân eú? m' öbu ha thö heláng, ka habe, E hu hanymen e ge Than. 32 Me ame he but li at a kunâ, me wâ helâ me hnen hna ha. 33 Ke ödru me tiga thang nokon asina, me ame ha ködru hnyat a haleny, ka habe, Öbu me thang hnân eú nokon asina? 34 Me haingödra, ka habe, E hu hanymen e ge Than. 35 Ke ödru me lelö thö e kö Iesu: ke ödrin e ip je khaúdrin hon nokon asina, me ip Iesu hon. 36 Ke e ame he, k' adre me ulolo je khaúdra eú hnyi gethen. 37 E ame hakekenyâ dok adre me ölö ka hnyi hon bucen Elaio, me ame hwân bunyen laten hia ka senyin me ole ka Khong ge ifucidra ae gan, can ta je huliwa ae man adre me wâ; 38 haingödra, ka habe, Hnahic hnen At musi ame o but hnyi ien Than: hnahic ethö hnyi drany, ke hmanenang ethö hnyi dok ae görany hmönyin. 39 Me

ame ha kâu keihen ta je Faresaio, hanen tavat ae se hia, ka habe, At ûne lö, thawâ ju lâtam. 40 Me e ame thu, ka habe, Inya oge me ha köbun, a ne laba hnyibû ju tavat ang, ame he bi ta je veto ka fuc.

41 E hakekeny jut, k' ame wâ taun, me e ame tenge gan, 42 me ha, ka habe, A ne khanö u hnyi bongom bong eang ta je ûnyi a hanen hnahic! ke walang ang adre me ikhâlâ hnyi li emâkâm. 43 Anyin ame he ka o köu je bong, k' ame he je iwahnai-hmiöny möu ka okhibi kânâ igigili u, me tot igigili u, me hling u, 44 me othahoni u me kânâ, u me je lakom unyâm; ke ame ca he ka hnen ke veto hon ke veto hnyi wanbâm; anyin ae ca khanö u ûen adre me sen' u hnyin.

45 E ame didrö ka hnyi uma kap, k' ame hwân he ka ob' ödra but adre me ûcû hnyin, 46 ame ha ködra, ka habe, Adre hia but sihnalimen, ka habe, Haba umök uma, me uma hnân hic; ke öbun e wia thö e me me op a umen tavat venöu.

47 E ame ûne hnyi je bong hnyi uma kap. Me adre me elâm he ka hlingâ e hnen je taben tavat bihut, me tavat sihnalimen, me je athnathuiny hnyei: 48 ke adre me ca wâ ke ûnyi he ka ânyâ; anyin ame belöng kâu tavat hia thithö.

HNYIMAKAN 20.

HABA hnyi ke bong, e ame tiga nâ tavat hnyi uma kap, k' ame khetâ úthumetu ae so, me ame o but kâu je taben tavat bihut me tavat sihnalimen, me wahingat; 2 me haingödra kâu, ka habe, Ha thö köhmun: Únyi ga ia musi u me ânyâ kâu ta je ûnyi e? Ke ia ham köu musi e? 3 Me e ame thu ködra, ka habe, Oge me he bi nya ka hnei öbun ke ûnyi, ke thu thö könya: 4 Haba bapataiso anyi Ioane, hawa ûnyi hnyi drany, hawa ûnyi ge at? 5 Me adre me ûhnenamö, ka habe, Ate ne ha, ûnyi hnyi drany, me e ame he ka ha, ka habe, Ieü e gabun öbun e ca kap e? 6 Ke ate ne ha, ka habe, Únyi ge at; me ame he tavat hia thithö ka lû' öta ge veto: anyin ae manen ködra a perofeta Ioane. 7 Me ödrin e thu, ka habe, E ca khan' öhmun dok a ûnyi hnyin. 8 Haba Iesu ame ha ködrin, ka habe, Oge me ca he minya inya ka ha köbun musi oge me ânyâ kâu ta je ûnyi e.

9 E ame hwân he ka ha ka tavat úhöúcü ang, ka habe, Ame tâ hnyei vine hnen ke

at, k' ame hna ka tavat ödrin e belökâ hnyei, me he but ka hnyi hnyei ae sâkâú he ka laba beü hmâ eling. 10 Ke haba hnyi huna e ame kunâ athnyabainy ka tavat belök, m' ödrin e he ka ham kâu je wan vine: ke haba tavat belok, me ödrin e kot e me obâ ke ba ûnyi a hom. 11 Me ame kunâ ke athnyaba bi: ke odrin e kot minya e, me okongoâ, me obâ ke ba ûnyi a hom. 12 Ke e ame kunâ hmetu a kuniny: ke ödrin e kot minya e, me obâ kâú. 13 Me ame ha tuhan hnyei vine, ka habe, Ieü oge me he ka ânyâ? Oge me he ka kunâ nökek a oúnykúmik, ödrin e he la ka ogânâ e. 14 Ke a wâ but e hnen tavat belök, me ödrin e úsabö, ka habe, Wale but ang mâtrân: ötin e he ka hlingâ e me me tang omjehetin biju anyin ta je ûnyi. 15 Me ödrin e obâ but e kâú ka hnyi hoton hnyei vine me hlingâ. Anyin a wale, ieü ame he ka ânyâ tuhan hnyei vine ködrin? 16 E ame he ka o me ohia tavat belok, me ham hnyei vine ka keihen. Ke adre me löng ut, me haingödra, ka habe, Ekölö, e so e me ca helâe. 17 Me e ame ö' drin me ha, ka habe, Ieü hna sihnalimen, ka habe,

Haba veto ame degec hnen tavat hötilö uma,

Adre hia but ânyâ hnân ban hon bahebet?

18 Haba at ame he ka kölu takoú veto ang ame he ka amam, ke e ka kölu ka hnyi hoton at, me ame he ka thu omomono e.

19 Ke haba tavat sihnalimen, me ta je taben tavat bihut adre me elâm hnyi awa eling he ka kât e; ke ödra outen tavat: anyin ae khan' ödrin dut a e ame ha úhöúcü eling gadra. 20 Ke adre me tuö e, me kunâ keihen he ka ecmâkâ, me iyawâ hwakecin ae wisa, k' ödrin thoi bi, m' adre me he ka kât e ge ta je ifucin, m' adre me he ka hna but e ka tavat owisa, me musi anyin gavena. 21 Ke adre me hnö e, ka habe, At ûne lö, e khan' öhmun dut a u me ha me únö wisa, ke u je ca wâhmakhmeto at, ke u me nâ hnatho gethen deny Khong: 22 E úcü köhmun he ka fat kö Kaisara, hawa, degec ut? 23 Ke e ame wâ but je hnyekudrin, me e ame ha ködrin, ka habe, 24 omanená thö könya denari. Hnyimakö ia ang, me hna sihnalimen? Ke ödrin e thu, ka habe, Kaisara. 25 Me e ame ha ködrin, ka habe, Awe, ham but kö Kaisara ta je ûnyi anyi Kaisara, ke ka Khong ta je ûnyi anyin Khong. 26 Ke ca khan' ödrin he ka kat e ge ifucin hnyi hnyimakan

LUKA 21.

tavat: ke adre me láia hnen hna .thu, me laba hnyibu.

27 Me ame o but káu keihen ta je Sadukaio, tavat adre me ha, ka habe, e ba möt hmetu thö; ke adre me hnö e, 28 me ha, ka habe, At úne lö, haba Mose ame sihnalimen köhmun, ka habe, E ka mokcu at ae hu áian a liamekeiny me ke at, ke e ka mokcu e ke ba nokon, me hamen liamekeiny më he ka hom momo e, me bi mátrân liamekeiny më. 29 Ke wale je liamekeiny a seven: ame faipoipo thö atö, me ame mokcu ke ba mátrân; 30 ke ame hom dö e at a loiny; me at a kuniny; 31 ke helâe gadrin hia hnyat a seven, ödrin e mokcu ke ba mátrânidrin. 32 Ke hwabödrin dö ame mok minya ju momo. 33 Ame he ka öio ia e gadrin hnyi möt hmetu? anyin a ödrin seven ödrin e hom e. 34 Ke haba Iesu ame thu ködrin, ka habe, Haba tavat eang hmelen, me adre me faipoipo, me úham ta momo: 35 ke haba tavat a ödra úcú he ka he ka hnyi möt eling, ke he ka möt hmetu úhedra hnyi hna mok, me adre me ca he bi ka faipoipo me úham ta momo: 36 ke ca khan' ödra bi he ka mok hmetu: anyin a ödra úcú me ta je angela; ödra lakon Khong, a lakon möt hmetu únyi hnyi hna mok. 37 Ke so bi, a hia but omanená ga Mose, hnyi dok eji a uhnyot, a g' ame he ka möt hmetu tavat úhedra hnyi hna mok, waleji hnyi hnen hna hawá Than a Khongu Aberahama, me Khongu Isaaka, me Khongu Jakob. 38 Haba Khong, me ca Khongon tavat adre me mok, ke so bi tavat ae möt: anyin adre me möt hia káu. 39 Me ame thu hnen keihen tavat sihnalimen, ka habe, At úne lö, e so hnám hna ha. 40 Ke hwaban e me ba hmetu at ae hwege hnyekon he ka hnö gan ke únyi.

41 E ame ha ködra, ka habe, Adre me kâmáu hna ha, ka habe, Haba Keriso me nöku Davita? 42 Anyin a haingö Davita hnyi tusi Salamo, ka habe,

Ame ha Than ka Tuhök, ka habe,

Laba ju hnyi ke keihök a metök,

43 Ke ne o but oge me he ka wia je iwahnaihmiöny möu me hnân taben li cam.

44 Anyin a wale, a ne ha Davita, ka habe, Than, me ame he ka kâmáu ka nokon bi?

45 Ke e ame ha ka laten hnyi hnyimakan tavat ae se hia, ka habe, 46 O 'bun áu ge tavat sihnalimen, hnyat a wedra he ka he me ta je úkhaú ae beú, me he ka

nom ködra tavat hnyi ta je hna úcú, me je hing taben lap hnyi je sunago, me je hna laba ae beöna hnyi je bijeú; 47 ödra adre me waláká je uma umen je safac, me hic beú hmá hnân tube hwakecidra: adre me he ka hu hnaúhangö ae gan hmá.

HNYIMAKAN 21.

KE e ame wá tavat ae tren omjeú adre me ve khúá anyidra ta je bwihlany ka hnyi tangen mone. 2 Ke e ame wá ke safac ae theduoc, ame khúá li mone ae úhnyúkong. 3 Ke e ame ha, ka habe, E hnathu inya oge me ha köbun, ka habe, E gan hmá hnen safac eang ae theduoc hna khúá, hudrin hia: 4 anyin a ödra hia adre me ve khúá ka hnyi tangen bwihlany únyi hnyi unöngöt gadra: ke haba momo únyi hnyi anyin theduoc ame khúá hia hwaban anyin möt.

5 Ke haba keihen adre me úhnenamö uma kap, wale adre omecá ge ta je veto ae so me je bwihlany, me e ame ha, ka habe, 6 Haba ta je únyi e öbun e wá, ame he ka o úen, me ame ca he bi ka hnen ke veto hon ke veto, ke adre me he ka tho hia. 7 Ke ödrin e hnö e, ka habe, At úne lö, ame he ka hwádá kehö ta je únyi e? ke ieú haten ge úen ame he ka hwádá hnyin ta je únyi e? 8 Haingen, ame ha, ka habe, Wá eáú, adre nye omonu öbun dut: anyin a at se hia adre me he ka o hnyi iök, me ve ha, ka habe, Inya ang; ke, e hakekeny jut úen: ca he öbun ka hnu hotudrin. 9 Ke öbun ka löng hön vat, me bwebwet, ca ot bi: anyin ame he ka më o ta je únyi e; ke ca logot bi obiny.

10 Me e ame ha ködra, ka habe, Ame he ka tot metá ke hnyei ka ke hnyei, me ke dökhü ka ke dökhü: 11 ke ame he ka hu ta je hwiöi ae gan, me hmiá, me mok hnyi ke je dok; ke ame he ka manen únyi hnyi drany ta je únyi hnân outen, me ta je haten ae gan. 12 Ke adre me he ka köt öbun, ke tiga ca o ta je únyi eling, me okongu öbun, me hn' öbun ka hnyi je sunago, me je uma ceat, me lili öbun ka je than me gavena can iök. 13 Ke ame he ka o e köbun hnân ohnatho. 14 Anyin a wale ip ju eú hnyi je hnyekubun, a ca he öbun ka më únykúme únyi hnân he ka thu: 15 anyin oge me he ka ham köbun hnyem me metá, me me ca khana iwahnaihmiöny möbun he ka úkhin fuc möbun me ton. 16 Ke ame he ka alecu' öbun hnen je kamen,

me hinyen, me je liamekeiny, me lahan-öbun, me je lawaebun; ke adre me he ka hlingá keihen gabun. 17 Ke ame he tavat hia thithö ka húkoti öbun can iök. 18 Ke ame ca he ka hia ke leünen böbun. 19 Öbun ka hok hnyok, me öbun e he ka möt.

20 Ke öbun ka wá Jerusalema adre me igigilö hnen vat, me wáhmakhmeto ju öbun ae hakekeny jut he ka ohia e. 21 Hnyi üen eling, e so e he at Juda ka kec ka hnyi je bucen; ke so e didrut tavat adre me laba hnyin taun eling; ke ca dit hmetu bi úhedra hnyiöu. 22 Anyin a üen bi hwabban eling, me me hwádá ta je únyi hia adre me sihnalimen. 23 Ekölö ge tavat a ödra erkin, ke tavat úasin hnyi bong e! anyin ame he ka o hlöuhlöu ae gan hnyi hnyei, me hmönyin ka tavat ang. 24 Ke adre me ke ka ta ge homakan hele vat, me he ka hom hwenb' ödra ka aten ta je hnyei: k' ame he ka uto Jerusalema hnen aten ta je hnyei, ke ne o but ame bekhot ut üen aten ta je hnyei. 25 Ke ame he ka hu ta je haten hnyi seünö me tehi me ta je okhú; ke hlöuhlöu hnyi hmeledrany minya, ke hlohlo hnyi ta je hnyei can imeainy köiö me ta je waköiöiny ame ü: 26 ame he ka mok tavat ge ot, k' adre me penapena halubahingen ta je únyi eling ame he ka o ka hnyi hmeledrany: anyin adre me he ka jijingá ta je man ethö hnyi drany. 27 Ke hnyi üen e adre me he ka wá Nokon at ame utut k' ame tabá úlá tha e me man, me hmanenang ae gan. 28 E ka hwân he ka hwádá ta je únyi eling, bwele th' öbun me wá; anyin ae hakekeny jut he ka omeli öbun.

29 Ke e ame ha ködra úhöücú, ka habe, Wá bi imeta me je üö hia: 30 e ka kú thö, me öbun e wá me wáhmakhmeto ae hakekeny jut honivakeny. 31 Ke helâe, öbun ka wá ta je únyi eang ame o, wáhmakhmeto ju öbun ae hakekeny jut dökhu dokhon Khong. 32 E hnathu inya oge me ha köbun, a g' ame ca he ka hia dö eang, ke ne o but ame hwádá ta je únyi hia. 33 Ame he ka hia drany me hmeledrany: ke ame ca he bi ka hia hok ta je hofuc.

34 O' bun áu, wá e nye hmak je hnyekubun ge hna han gáná, me hna ijem gáná, me hna únykúme möt ang, me ame he ka o bong eling me öuthmoki öbun helá me hnewe: 35 anyin ame he ka o helâe ka tavat hia adre me labá hmeledrany. 36 Ke hmáká ju öbun hnyi je üen hia, me

labö hic, me me khan' öbun he ka kec ge ta je únyi hia eang ame he ka o, me he ka útitilen hnyi hnyimakan Nokon at.

37 Ke e ame úne hnyi uma kap hnyi je lany; ke hnyinghet ut e ame didrut me laba hnyi bucen, Elaio ien. 38 Ke hnyi je hnyomakatu ame he but káu tavat hia ka hnyi uma kap he ka löng káu.

HNYIMAKAN 22.

KE e hakekeny jut bijeüiny areto adre ca levená bi, Paseka ien. 2 Haba je taben tavat bihut, me tavat sihnalimen adre me heleü deny he ka hlingá e; anyin adre me outen tavat.

3 Me ame didrö Satana hnyi hnyeku Juda, ke ien minya Isakariota, e ke at hnyi twelv. 4 Me e ame he me úhnenamö me je taben tavat bihut me je taben vat, ge hwakecin he ka alecuá e ködra. 5 Me adre me senyin me úhinhnyköu mē, he ka ham káu mone. 6 Ke e ame hmehmelá, me elâm üen he ka alecuá e ködra ke tiga hia bi tavat ae se hia.

7 Ke ame o but bonginy areto adre ca levená, wale üen hlingá paseka. 8 Me e ame kunö Peteru me Ioane, ame ha, ka habe, He th' öbu, me penapena thö paseka hobi kötin he ka han. 9 Ke ödru me ha káu, ka habe, Ewa dok ae wem öhmu me he ka penapena hnyin? 10 Ke e ame ha ködru, ka habe, Wá bi, öbu ka o ka hnyi taun, öbu me he ka úkhane me ke at ame vadren kaia ae lup; he thö hoton ka hnyi uma e ame he ka dit ka hnyin. 11 Ke öbu me he ka ha ka tuhan uma ka habe, Haingen At úne, öhmu me ha ju köu, ka habe, Ewa uma umen ta je atkanyua, me inye he me latök ka han paseka hnyin? 12 Me e ame he ka kú köbu hnyeule ae gan ethö adre ave, penapena thö ling. 13 Ke ödru me he but me wá helâji me hnen hna ha ködru: me ödru me penapena paseka.

14 Ke ame o but awa, me e ame laba ju, tha e me je aposetolo. 15 Haingen ködrin, ka habe, E gan hmâ wek he ka tha han möbun paseka eang, ke tiga hia imekik: 16 anyin a inya oge me ha köbun, ka habe, oge me ca he hmetu ka hnyi an e, ke ne o but ame hwádá thö e hnyi dökhu dokhon Khong. 17 Ke e ame kap utkaia, k' ame oleâ, ke haingen, ka habe, Hom dö ang me ve khená thö unyibun: 18 anyin a inya oge me ha köbun, ka habe, Oge me ca he

hmetu ka hnyi ijem wan vine ke ne o but ame o but dökhu dokhon Khong. 19 Ke e ame hom areto, k' ame oleá, me thuthu, me ham ködrin, haingen, ka habe, Walang unyik adre me ham hobi köbun : ányá thö ang hnân únykúme kõnya. 20 Ke heláe minya kaia hwaban hna han, ame ha, ka habe, Walang kaia a úhinhinköu ae teb únyi hnyi drök, ame hingálá hnân hobi köbun. 21 Ke wá bi, haba hnyamen at ame he ka alecuo nya, me walang unyik a hnyi hon laulau. 22 Anyin e hnathu ame he ka he but Nokon at heláji me hna ha muá : ke ekölö ge at adre me alecuá a deny ! 23 Me ödrin e hwân he ka úhnökouá, a ia gadrin ame he ka ányá únyi e.

24 Ke ame kú minya hna ivinö unyidrin, a ia ame he ka beónua gadrin. 25 Me haingen ködrin, ka habe, Haba je tuhan aten ta je hnye, me ödrin e hwen than ködra ; ke adre me hwenyi iödrin, a hnyat musi ödra, ka habe, Hnyat betenge. 26 Ke öbun e ca he ka heláe : ke haba at ame he ka beónua gabun, me so e ame he ka helá me wakeiat ; ke haba taben, me ame he ka helá me athnyaba. 27 Anyin a ie at ae beónua, a at ame laba ka han, hawa athnyabainy? hawa ca at ame han? ke inya ang unyibun helá me athnyaba. 28 Ke haba öbun, me öbun hnyat a hia but tethmä unyik hnyi je hna cubic nya ; 29 me oge me ham bi köbun dökhu, helá me Kanök ame ham kõnya, 30 m' öbun e he ka han me ic hnyi anyik laulau hnyi dökhu dökhu ; ke öbun e he ka ve laba hon je theron he ka owisa ta je tribu anyin at Isaraela a twelv. 31 Simona, Simona lö, wá bi, a hia but Satana sumátá he ka hum öbun, me me he ka jijingi öbun helá me hwit : 32 ke oge me hic hobi köu, me me ca he bi ka hia ányám labageju : ke u ka hmetu thö, sihwegjá je liamekeiny möu. 33 Ke e ame ha káu, ka habe, Than lö, oge hia but penapena he ka tha he möu ka hnyi uma ceat me mok minya. 34 Ke e ame ha, ka habe, Peteru, inya oge me ha köu, ka habe, e tiga ca kokok bi khoto hnyi bong ang, u me he ka mē okun ivinö hnám hna khana inya.

35 Ke e ame ha ködrin, ka habe, Habaji ge hnök hna kun' öbun, ke ba tangen mone, me tang, me tangen hnyeúcabun, hawa, e hu ke únyi ae hia gabun? Haingödrin, ka habe, E ha. 36 Me e ame ha ködrin, ka habe, Ke walang ang, haba at ae hu tangen mone, e so e ame he ka hom,

me tang minya : ke haba at ae ba hele vat, e so e ame hom anyin úkhaú he ka bi hwaban hele vat. 37 Anyin a inya oge me ha köbun, e úcú he ka hwádá kõnya hna sihnalimen ang, ka habe, Adre me tha aú e me tavat ae kong : anyin adre ohwádá únyi a únyi gak. 38 Ke ödrin e ha, ka habe, Than lö, Walang li hele vat. Ke e ame ha ködrin, ka habe, E so.

39 Ke e ame didrut me he ka hnyi bucen Elaio, heláji me hwakecin ; me ame he hoton laten. 40 Ke e ame o but ká e, me e ame ha ködrin, ka habe, Hic ju öbun, m' öbun e ca didrö ka hnyi úcúbic. 41 Ke e ame úsákáúö mödrin, heláke me hobenyin at ; ke e ame cibouca, me hic, 42 ame ha, ka habe, Cica lö, a ne wem he ka hom but utköiö eang gak ; ke so bi, ca he ka ányá wek, ke so bi wem. 43 Me ame manen dut káu angela únyi hnyi drany ame owhegiá e. 44 Ke e ame vec gan hmá, me e ame hic hwege, ke haba khun gan ame hingölö ka hnyi káná, helá me khukhulainy dra ae gan. 45 Ke e ame todrö úheny hnyi hna hic, me e ame he but ka laten, me ö' drin a ödrin e mokut anyin a ödrin hlöuhlöu, 46 haingen ame ha ködrin, ka habe, Ieú gabun öbun e mokut? todr' öbun me hic, wá öbun nye didrö ka hnyi úcúbic.

47 E ame tiga ha, wá bi tavat ae se hia, me at adre hwenyi ien Juda, ke at hnyi twelv, hnyimakan anyidrin bungen ; ke e ame hakekeny kö Iesu he ka úcimhnyimak mē. 48 Ke haba Iesu ame ha káu, ka habe, Juda lö, u me he ka alecuá Nokon at ge úcimhnyimak? 49 Ke a wá but hnen tavat adre me tot igigilo e únyi ame he ka o, me haingödrin ödrin e ha káu, ka habe, Than lö, öhmun e he ka kot ge hele vat? 50 Haba ke at gadrin ame kot athnyabainy taben tavat bihut, me subá but hnyikönyen a metán. 51 Ke haba Iesu ame ha, ka habe, Soju. Ke e ame mádrá hnyikönyen me ometo. 52 Ke haba Iesu ame ha ka ta je taben tavat bihut, me je taben uma kap me wahingat, wale tavat adre me o káu, ka habe, Hawa, öbun e o me je hele vat me utöhmu, heláke me ka at venöu? 53 Oge tha e möbun hnyi je bong hnyi uma kap, ke öbun e ca hinöbeny kõnya : ke úöbun eang, me man maniny lit minya.

54 Me adre me kát e, me lelo thö e ka hnyi uma umen taben tavat bihut. Ke haba Peteru ame omise hoton. 55 Ke adre hia but hú meic hnyi wanben hna laba, me ulalabainy, me Peteru ame hnyi

laba unyidra. 56 Ke a wâ but e hnen ke hlu ame laba hakekenyâ meic, me e ame wâ hmâ e, me ha, ka habe, At ang eji a tha e mē. 57 Ke e ame ivinôâ, ka habe, Ke momo lö, e ca khanö nya at e. 58 E ca beû bi, me ame wâ hmetu hnen ke at, me ha, ka habe, U minya ke hanödrin. Ke haingö Peteru, ame ha, ka habe, Ketha lö, ca inya bi. 59 Ke helâke me khaca but awa hwaban e, haba ke at ame ha hwegiâ, ka habe, E hnathu wale at a tha e mē: anyin a e at Galilaia. 60 Ke haingö Peteru ame ha, ka habe, Ketha, e ca khanö nya hnâm hna ha. E ame tiga fuc me ame ie kokot dö khoto. 61 Ke haba Than ame hwiö thö, me ö Peteru. Me haba Peteru ame únykúme hofuc hwan Than, waleji a ha kâu, ka habe, U me he ka okun ivinö nya ke tiga ca kokok bi khoto hnyi bong ang. 62 Me e ame didrut me tenge hlöu-hlöu.

63 Haba tavat adre kât e, adre me hlumâ e, me osöâ. 64 Ke adre me tube li emakan, me hnö e, ka habe, Perofeta thö, ia khöü u? 65 Kese hia ta je hofuc minya adre me ha, me hiâ e.

66 Ke e lany jut, me ame úkhacaköu thö wahingatinny hnyei, wale je taben tavat bihut me tavat sihnalimen; ke adre me lelö thö e ka hnyi anyidra úhnenamö, me ha, ka habe, 67 A ne u Keriso, ha thö köhmun. Haingen ködra, ka habe, Oge ne he ka ha köbun, öbun e ca he ka kap: 68 ke oge ne he bi nya ka hnei öbun, öbun e ca he ka thu. 69 ke hwân dö ang ke ne o but nyiele, ame he Nokon at ka laba hnyi ke keihen a metân man maniny Khong. 70 Haingödra hia, ka habe, A u e Nokon Khong? Me e ame ha ködra, ka habe, Öbun e ha e, a inya ang. 71 Me haingödra, ka habe, Hnân eü hmetu köta ke at hnân ohnatho? anyin a öta ate hia but löng únyi hnyi hnyimen.

HNYIMAKAN 23.

ME ame todrö tavat hia ae se, me lelö thö kö Pilato. 2 Ke adre me hwân he ka bi fuco e, ka habe, Öhmun e wâ but at ang ame omono ita hnyei, k' ame thawâ he ka fat kö Kaisara, k' ame ha, a e thibi Keriso a ke than bi. 3 Haba Pilato ame hnö e, ka habe, Hawa, u Tuhan at Juda? E ame thu, ka habe, U me ha e. 4 Haba Pilato ame ha ka taben tavat bihut me tavat ae se, ka habe, E ba monu anyin

at ang oge me wâ. 5 Ke adre me ha hwegiâ, ka habe, E ame obwebwelâ tavat, k' ame úne hnyi Juda hia thithö hwân hnyi Galilaia ke ne o but ka hnyi dok ang. 6 Ke a löng ut Pilato, me e ame hnei, ka habe, Hawa, at Galilaia at ang? 7 E ame wâhmakhmeto a e ke kei Heroda, me e ame kunâ e kö Heroda, anyin a e hnyi Jerusalema hnyi je bong eling.

8 Haba Heroda ame ö Iesu, me e ame senyin gan hmâ: anyin ae kueny jut weny he ka bewâ e, anyin a e ame löng ta je únyi gan; ke e ame únykúme he ka wâ ke úöman e ame he ka ányâ. 9 Ke e ame hnö e hnyi ta je hofuc ae se hia; ke e ame ca thu kâu. 10 Ke ame útitilen je taben tavat bihut, ke tavat sihnalimen, me bi fuco hwegiâ e. 11 Ke haba Heroda me anyin je soja adre me hmiödra e, me hlumâ e, me okhavâ e ge úkhaü ae hmanenang, me kunâ hmetu e kö Pilato. 12 Me ame úsoköu hmetu Heroda me Pilato hnyi bong eling: anyin a ödru imouköu ehac.

13 Haba Pilato ame úkhacaköuâ je taben tavat bihut, me hnyat musi, me tavat bi, 14 me ha ködrin, ka habe, Öbun e hom könya at ang helâke ame omonoâ tavat: ke wâ bi, oge hia but hnö wia e hnyi hnyimaköbun, me ba monu oge me wâ ge at ang hnyi ta je únyi öbun e bi fuco gan: 15 ke haba khaca, e ba minya hna wâ hnö Heroda: anyin a hia but kunâ hmetu e köta; ke wâ bi, e ba únyi a ányâ me me úcü he ka mok. 16 Anyin a wale, oge me he ka osöâ e, me thaug ut. 18 Ke ödra hia adre me tha hongot, ka habe, Hom dö at ang, ke hnö Barabasa but köhmun: 19 wale at adre me khûâ ka hnyi uma ceat, can úhúgúnö dökhü hnyi taun, me can úhlingâ at. 20 Ke haba Pilato ame fuc hmetu ködra, anyin ae beweny he ka hnö Iesu but; 21 ke adre me fuc hwege, ka habe, Osatauroâ thö, osatauroâ thö e. 22 Me e ame okun ha ködra, ka habe, Anyin a ieu monu e ame ányâ? e ba can oge me wâ gan, me me he ka mok: anyin a wale oge me he ka osöâ e me hna but. 23 Ke adre me tha ha hwegiâ ge ifucidra ae gan hmâ, adre me sumâtâ me me he ka osatauroâ e. Me ame ton dut ifucidra ae gan. 24 Ke haba Pilato ame ha muâ a g' adre me he ka ányâ hoton wedra. 25 Me e ame thang ut at adre ca can úhúgúnö dökhü, ke úhlingâ at, a at a wedra; ke e ame ham Iesu ka hnyi wedra.

26 Adre me lelö e, ke adre me köt

LUKA 24.

Simona, at Kureñe, ame he úheny hnyi hna belök, me adre me ip hon e satauro, me me vaden hotu Iesu.

27 Haba tavat ae se hia adre me he hoton, me omomo adre me tenge thungau me tenge gan. 28 Ke haba Iesu ame hwiö thö, me ha ködra, ka habe, Omomo Jerusalema lö, ca tengiö nya bi, ke tengi' öbun bi me lakubun. 29 Anyin a wâ bi ame he ka o but ang ta je bong adre me he ka ha hnyin, ka habe, Hnahic hnen toúnyi, me tangen hnöku ame ca hnokoá, me li bai adre me ca ijem. 30 Me adre me he ka hwân he ka ha ka je bucen, ka habe, Kölu takú öhmun ju; me ka ta je hut, Tubi öhmun ju. 31 Anyin adre ne ányâ ta je únyi ang hnyi úö ae hát, ieú adre me he ka ányâ hnyi úö ae meleca?

32 Ke e hu minya eling ke li at ae kong adre me tha lelö me he ka hlingâ.

33 Ke adre me o but ka hnyi ke ong dok, Ibokomok ien, adre me osatauroá thö e eling, me li at ae kong, ke at hnyi ke keihen metâ, me ke at hnyi ke keihen me. 34 Haba Iesu ame ha, ka habe, Cica lö, hn' ödra but; anyin ae ca khan' ödra hnödra hna mádrâ. Ke adre me khenâ anyin je úkhaú me uglekóbâ. 35 Ke ame utitilen dö tavat me wâ. Ke haba tavat musi adre me hiâ e, me ha, ka habe, A hia but omelö keihen; ke a ne e Keriso a oúnykúminy Khong, e so e ame he ka omelö e bi. 36 Me ame hlumâ e minya hnen tavat vat, adre me he but kâu, me habelen e ge vinega, 37 me ha, ka habe, A ne u Tuhan at Juda, omeli u thö, 38 Ke e hu tusi adre sihnalimen hon ka habe, WALANG TUHAN AT JUDA.

39 Ke haba ke at hnyin li at ae kong adre uhno ame haikongoá e, ka habe, Hawa u ca Keriso? omeli u thö, möhmun. 40 Me ame thu hnen ke at me thawâ, ka habe, U ca ot bi ge Khong, ke u je tha hnaúhangö thö me? 41 Ke e wisa hnaúhangö a ötu, anyin adre bi hwaban kötu e me úcü me hnötu hna mádrâ: ke haba at ang, me ba bi monu gan. 42 Me e ame ha kö Iesu, ka habe, Ö u na únykúmi nya, u ka o hnyi dokhom dökhu. 43 Ke e ame ha kâu, ka habe, E hnathu inya oge me ha kâu, a hnyi bong ang u me he ka tha e mönya hnyi Paradaiso.

44 Me ame lit hia but hnyi hwân hnyi jebigö ke ne o but hnyi jebigö sahac, 45 ke ba but melaminy seúnö: ke ame khekhe lo but imano singiny dok ae kap. 46 Ke

haba Iesu ame hongot hwege me ha, ka habe, Cica lö, inya oge me hna but hanuk ka hnyi li hnyamâm: ke a hia but ba hofuc e, e ame mokcu. 47 Ke a wâ but kene-turio hna mádrâ, me e ame haisoá Khong, me ha, ka habe, E hnathu wale at ae wisa. 48 Ke haba tavat hia adre me úkhacaköu he ka wâ únyi e, k' adre me wâ ta je únyi adre me ányâ, me adre me khaú je úlaidra me he hmetu but. 49 Ke haba lahanen, me adre me tot sâkâú, me watamomo a hnyat ödrin e he hoton úheny Galilaia, ke adre me wâ ta je únyi eling.

50 Ke wâ bi, wale ke at Josefa ien, at úhnenamö, ke at ae so me wisa, 51 (k' ame ca munyi ogâ anyidra si úhnenamö me hnödra hna ányâ), a at Arimathia, taun anyin at Juda, ke e at ame halubahingen dökhu dokhon Khong: 52 haba at eling ame he kö Pilato me sumâtâ unyi Iesu. 53 Ke e ame hom but huyikânâi, me lan ge mano lino, me ip hnyi kic adre tho hnân erkemok, ke tiga ba komok adre ip hnyin. 54 Ke haba bong e, me Penapena, anyin ae hakekeny jut sabath. 55 Ke haba wata-momo hnyat he hoton úheny Galilaia, me ödrin e wâ erkemok, me hwakecin hna ip hnyin. 56 Ke ödrin e hmetuhmetu me penapena ta je únyi ae bo so me je muro.

Ke ödrin e menâ ju hnyi sabath helâ me hnanyibu.

HNYIMAKAN 24.

KE hnyi bong a bâniny seven, hnyi haolany, me ödrin e he but ka hnyi erkemok, k' ödrin e hom ta je únyi ae bo so, wale ödrin e penapena. 2 Ke ödrin e wâ veto a g' adre hia but hagutâ únyi hnyi hnyimen erkemok. 3 Me ödrin e didrö, ke ödrin e ca wâ bi unyin Than Iesu. 4 Ke ödrin e tiga loloá, wâ bi, li at ödru me tot unyidrin, k' ödre khavâ je úkhaú ae ha-dröngoc: 5 me ödrin e ot, me hnyimaködrin hnyikânâi, ke ödru me ha ködrin, ka habe, Ieú gabun öbun e elâm at ae möt unyin tavat adre mokcu? 6 Ca e hmetu ang, ke a möt hmetu thö: únykúme th' öbun hofuc waleji a ha köbun ke tiga e hnyi Galilaia, 7 ame ha a g' adre me he ka hna Nokon at ka hnyi je hnyamen tavat ae kong, me osatauroá, k' ame he ka möt hmetu hnyi bong a kuniny. 8 Me ödrin e únykúme hwan hofuc, 9 me he hmetu únyi hnyi erkemok, me thumeto hnyat a twelv ge ta je únyi eling, me je lahanödrin hia. 10

LUKA 24.

Haba iödrin me Maria Magadalena, me Joana, me Maria hinyö Iakobo : ke haba keihen omomo unyidrin, me ödrin e thumeto ta je aposetolo ge ta je únyi e. 11 Ke haba hofuc hwan omomo, me helá me hofuc baú ködrin ; m' ödrin e ca kap bi. 12 Ke haba Peteru ame todrö me wadring ka hnyi erkemok ; me e ame nom me selá-drá, me wá a je mano lino thiju ame mokut ; me e ame he hmetu hnyaban ai me láia hna mádrá.

13 Ke wá bi hnyi bong eling lo li at gadrin ödrü me he ka hnyi ke taun Emao ien, e úsákáúö me Jerusalema heláke me siksti je setadia. 14 Ke ödrü me úhnenamö tilá ta je únyi hia a o. 15 Ke ödrü me tiga úhnenamö me ihut, haba Iesu ame hakekeny me tha he mödrü. 16 Ke adre kát li emaködrü me ödrü me ca he ka wáhmakhmeto e. 17 Ke e ame ha ködrü, ka habe, Ie je únyi e öbu me úhnenamö tilá ? Ke ödrü me todru me hmak. 18 Habake at gadru Kaleopa ien, ame thu kán, ka habe, U me ne hake atkanyua biju la e hnyi Jerusalema, ae ka khanö u ta je únyi a o hnyi je bong eang ? 19 Ke e ame ha ködrü ka habe, Ie ta je únyi ? Haingödrü ödrü me ha káu, ka habe, Ga Iesu at Nazareta wale perofeta ae man hnyi huliwa me hofuc, hnyi hnyimakan Khong me tavat hia thithö : 20 wale hnen je taben tavat bihut, me tavat adre me musi öhmun adre me hna e me me mok, ke adre me osatauroá e. 21 Ke öhmun e gejon a e bi at ame he ka omelö at Isaraela. Ke haba khaca minya, walang bong a kuniny hwaban hna ányá ta je únyi eling. 22 Ke wale minya, haba watamomo a je lahanöhmun ödrin e öuthmoki öhmun ge imwidrin hnyi erkemok hnyi haolany ; 23 ke ödrin e ca wá bi unyin, ke ödrin e o but me ha, a g' ame manen dut ködrin li angela, li at ödrü me ha, ka habe, A möt hmetu thö e. 24 Ke a mwi ke je lahanöhmun hnyi erkemok, me wá heláji me hnen watamomo hna ha : ke ödrin e ca wá bi e. 25 Me e ame ha ködrü, ka habe, Öbu li monu, me bec li hnyekubu he ka kap hia je hna ha hnen ta je perofeta ! 26 Hawa, ca hamen Keriso he ka kap ta je vec eling, me he ka dit ka hnyi anyin hmanenang ? 27 Ke e ame hwán ga Mose me ta je perofeta hia, he ka omanená ködrü ta je hna sihnalimen hia gan. 28 Ke ödrin e hakekeny ka hnyi taun, ödrü me he ka hnyin : ke haba e, me heláke ame he ka he balua. 29 Me ödrü me thawá e, ka habe,

Laba ju unyihmu : anyin a sahac ut, ke ame he but ka hia bong. Me e ame didrö he ka tha laba mödrü. 30 Ke e ame tha laba mödrü he ka han, me e ame hom areto, me oleá, me thuthu me ham ködrü. 31 Me adre me khöng ut li emaködrü, ke ödrü me wáhmakhmeto e ; me e ame ie hia but gadru. 32 Ke ödrü me úhaköu, ka habe, A ca kahwa bi li önykúmitu, waleji hnyi hnen hna úhnenamö mötu eú hnyi gethen, me hnen hna omanená kötu je hna sihnalimen ? 33 Ke ödrü me todrö hnyi awa eling me hmetu Jerusalema ai, me wá hnyat a eleven ödrin e úkhacaköu, me tavat unyidrin, 34 ke haingödrin, ka habe, E hnathu a möt hmetu thö Than, ke a manen dut kö Simona. 35 Ke ödrü minya ödrü me omanená ta je únyi eú hnyi gethen, me hnen hna manen ködrü hnyi hnen hna thuthu areto.

36 Ke ödrin e tiga úhnenamö ta je únyi e, me e ame tot hnyi wanbödrin, me ha ködrin, ka habe, Hnahie köbun. 37 Ke ödrin e öbubuny, me ot, ke ödrin e únykúme a hanu ödrin e wá. 38 Me e ame ha ködrin, ka habe, Ieú gabun öbun e hlohlo ? ke ieu ame kú gan lolo eú hnyi je hnyekubun ? 39 Wá bi li hnyamök me li cak, a inya ang : mádrö nya ju, me wá ; anyin ae ba hanu ae hu utioiny me je jö helá me hnöbun hna ö nya. 40 Ke a hia but ha e, e ame omanená ködrin li hnyamen, me li can. 41 Ke ödrin e tiga ca kap bi, anyin a ödrin e senyin me láia, me e ame ha ködrin, ka habe, E hu ö 'bun jeú eang ? 42 Me ödrin e ham káu ong hanen wá adre le. 43 Ke e ame hom me han hnyi hnyimaködrin.

44 Me e ame ha ködrin, ka habe, Walang je hofuc oge me ha köbun, waleji e me tiga inya ang unyibun, ae úcú he ka owhádá ta je únyi hia adre sihnalimen hnyi hnanyibu anyi Mose, me ta je perofeta, me ta je salamo gak. 45 Me e ame khöng ut je hnyekudrin, me ödrin e he ka wáhmakhmeto hna sihnalimen ; 46 ke e ame ha ködrin, ka habe, Adre hia but sihnalimen heláng, a g' ame he Keriso ka vec, me möt hmetu úheny hnyi hna mok hnyi bong a kuniny ; 47 me he ka khetá, hnyi ta je hnyei hia hwán hnyi Jerusalema, ietra, mo he ka thang degecá ta je hulö únyi ge ien. 48 Ke öbun bi hnyat ohnathoá ta je únyi e. 49 Ke wá bi, inya oge me he ka kuná köbun hna ha báná ga Cica : ke so öbun e he ka mē laba hnyi taun ke ne o but öbun e he ka hu man únyi ethö.

IOANA 1.

50 Ke e ame hum ödrin cicö Bethania : ke e ame hai li hnyamen me hahnahici ödrin. 51 Ke e ame tiga hahnahici ödrin, me e ame ie úsákâüö but mödrin, me adre me kap dö e hnyi drany ai. 52 Ke ödrin e khudrung ju kâu, me he hmetu Jerusalema ai me senyin ae gan hmâ : 53 ke ödrin bala bi hnyin uma kap, k' ödrin e haisoâ Khong.

EVANGELIA A SIHNALIMEN IOANE.

HNYIMAKAN 1.

HABA hnyi can, me waleji Logo, e unyin Khong Logo, haba Logo, me Khong. 2 E unyin Khong hnyi can. 3 Adre me op ta je únyi hia thithö a deny e ; ke ba únyi adre hia but op, a g' adre ca op gän. 4 E hu möt unyin ; ke haba möt, me melaminy at. 5 Ke ame umumelam melam hnyi lit ; k' ame ca kap bi e hnen lit. 6 Ame o ke at, a kunâ hnen Khong, Ioane ien. 7 E ame o but hnân ohnathoâ, m' adre me he ka ohnathoâ melam, me me labageju tavat hia thithö únyi gan bi. 8 Haba at e, me ca melam bi eling, ke so bi hnân ohnathoâ melam. 9 Haba melam hnathu, me wale at ame omelamá tavat hia adre me o ka hnyi hmeledrany. 10 A mwi but e eang hmeledrany, ke e at a op hmeledrany, ke a ca wâ e hnen hmeledrany, 11 E ame o but ka hnyi hing hwajekhon, k' ame ca kap e hnen lakeiny. 12 Ke haba tavat adre me kap e, wale hnyat adre me labageju ka hnyi ien, me e ame ham ködra man, me adre me lakon dut Khong : 13 ke adre me ca hnöku ödra únyi hnyi dra, ke ca únyi minya bi ge weny unyin, ke ca únyi ge weny at, ke únyi bi ge Khong. 14 Adre me bi unyin Logo bi, k' ame laba unyita (ke öhmun e wâ but anyin hmanenang, wale helâke me hmanenanginy Nokon a khaca a hnokoâ hnen Kamen), a unöngöt do ge ibetengiö bâu me hnathu. 15 Haba Ioane ame ohnathoâ e, me hongot, ka habe, Walang at, waleji oge me ha gan, ka habe, Ame he hotuk at ke wale hnyi hnyimakök : anyin a bân, ka bilik bi. 16 Eke, ate me hia but ve kap jekhou únyi hnyi anyin unöngöt, wale betenge bâu ke betenge bâu. 17 Anyin

adre ham hnanyibu a deny Mose ; ke ibetengiö bâu me hnathu a deny Iesu Keriso. 18 E ba at ame wâ Khong ; k' ame omanená e hnen Nokon a khaca thibi, wale at hnyi úlainy Kamen.

19 Ke walang hna ohnathoâ hnö Ioane hnyi únen adre me kunâ tavat bihut me at Levi hnen at Juda úhedra Jerusalema he ka hnö e, ka habe, U ia ? 20 Me e ame haimemenâ, k' ame ca ivinö bi ; e ame haimemenâ, ka habe, Iny ca Keriso bi nya. 21 Me adre me hnö e, ka habe, Ke ieu bi ? U Elia ? Haingen ka habe, Ohe. U perofeta ? E ame thu, ka habe, E ba. 22 Anyin a wale adre me ha kâu, ka habe, K' u ia bi ? m' öhmun e he ka ha ka tavat adre kun' öhmun. Ieu hwâm gam bi ? 23 Haingen, ka habe, Inya ang ifucin at ame hongot hnyi hnyebuba, ka habe, Owisa thö gethen deny Than, helâji me hna ha ga Isaia perofeta. 24 Ke adre hia but kun' ödra hnen ta je Faresaio. 25 Ke adre me hnö e me ha kâu, ka habe, Ieu gam u me bapataiso, k' u ca Keriso bi, ke ca Elia bi, ke u ca perofeta minya bi eling ? 26 Haba Ioane ame thu ködra, ka habe, Inya oge me bapataiso ge köiö : ke ame tot hnyi wanböbun ke at ae ca khan' öbun, 27 wale at ame biliny hotuk, iny ca úcú he ka thang hna húkâlâ taben li hnyeúcan. 28 Adre ányâ ta je únyi e hnyi Bethania hoton Joridano, wale dok ame bapataiso hnyin Ioane.

29 Nyi e ame ö Iesu ame he kâu, me haingen, ka habe, Wâ bi Arenio anyin Khong at ame hijen monu anyin hmeledrany ! 30 Wale at waleji oge me ha, ka habe, Ame he ka he hotuk at, ke e hnyi hnyimakök ; anyin a bân, ka bilik bi. 31 Ke oge me ca wâhmakhmeto e, ke so bi a

IOANE 2.

e ame he ka manen ka at Isaraela, can thibi e oge me o but he ka bapataiso ge köiö. 32 Haba Ioane ame ohnathoâ me ha, ka habe, Oge hia but wâ Hanu ame gâ but ûheny hnyi drany helâ me biny; me ame o hnyi hon. 33 Ke oge me ca wâ-hmakhmeto e: ke haba at a kunö nya he ka bapataiso ge köiö, e ame ha kõnya, ka habe, Haba hnâm hna he ka wâ Hanu ame gâ ka hnyi hon, me laba hon, wale at ame bapataiso ge Hanu Kap. 34 Ke oge hia but wâ me ohnatho, a e thibi Nokon Khong.

35 Hmetu nyi, Ioane ame tot me ke li laten; 36 ke e ame ö Iesu ame he, me haingen, ka habe, Wâ bi Arenio anyin Khong! 37 Ke a löng ut li laten hnen hna ha, me ödru me he hotu Iesu. 38 Haba Iesu ame hwiö thö me ö dru ödru me he hoton, me e ame ha ködru, ka habe, Ieü öbu me elâm? Haingödru kâu, ka habe, Rabi (bongon At ûne), ewa dok u ma laba hnyin? 39 Haingen ködru, ka habe, Ai öbu m' öbu me he ka wâ. Me ödru me he me wâ hnyaban; me ödru me tha laba mē hnyi bong eling, anyin a helâke awa a teniny. 40 Haba ke at hnyi li at ödru me löng ifuci Ioane, k' ödru he hotu Iesu, me Anederea, a liamekeiny me Simona Peteru. 41 E ame bân ka elâm liamekeiny mē a Simona me ha kâu, ka habe, Öhmun e wâ but Mesia, (bongon, Keriso). 42 Ke e ame hom e kö Iesu. Haba Iesu ame wâ e, ke haingen, ka habe, U Simona a nöku Iona: adre me he ka hwenyi u, me Kefa, (bongon, Peteru).

43 Nyi e ame behe Galilaia ai, ke e ame ö Filipino: ke haingö Iesu kâu, ka habe, He hotuk. 44 Haba Filipino, me at Bethesaida, wale taun ga Anederea me Peteru. 45 Filipino ame ö Nathaniela, me e ame ha kâu, ka habe, Öhmun e wâ but hna sihnalimen hnö Mose hnyi hnanyibu me ta je perofeta minya, wale Iesu at Nazareta, nöku Josefa. 46 Ke haba Nathaniela ame ha kâu, ka habe, Hawa, e khana ûnyi ae so he ka o ûnyi hnyi Nazareta? Haingö Filipino kâu, ka habe, Aiö u, u ma wâ. 47 Haba Iesu ame ö Nathaniela ame he kâu, me e ame ha gan, ka habe, Wâ bi at Isaraela ae hnathu, e ba tang iyawâ gan! 48 Haba Nathaniela ame thu kâu, ka habe, U je wâhmakhmetu nya ua? Iesu ame thu, me ha kâu, ka habe, Oge me ö u hnyi hmelen imeta ke tiga ca hawo u Filipino. 49 Haba Nathaniela ame thu kâu, ka habe, Rabi, u thibi Nokon Khong; u

thibi Than Isaraela. 50 Haba Iesu ame thu me ha kâu, ka habe, U me labageju anyin a oge me ha köu, ka habe, Oge me ö u hnyi hmelen imeta? u me he bi ka wâ ta je ûnyi ae gan hon e. 51 Ke e ame ha kâu, ka habe, E hnathu, e hnathu, inya oge me ha köbun, ka habe, Öbun e he bi ka wâ drany adre khöng, me ta je angela anyin Khong adre me he ka ölö thö me utut hon Nokon at.

HNYIMAKAN 2.

HABA hnyi bong a kuniny me adre me ânyâ faipoipo hnyi Kana hnyi Galilaia; eling hinyö Iesu: 2 ke adre me hao Iesu me laten ka hnyi faipoipo. 3 Ke a um dö waina, me haba hinyö Iesu ame ha kâu, ka habe, E ba but waina gadra. 4 Haba Iesu ame ha kâu, ka habe, Bai lö, ieü gam kõnya? e tiga ca o ûök. 5 Haba hinyen ame ha ka je lathnyaba, ka habe, Haba ûnyi e ame he ka ha köbun, ânyâ thö. 6 Ke e hu eling je kaia veto a siks, adre me ip hnân okâlâotâ helâ me hwakecin at Juda, úsa lo ame ne kun ta bath tulutiny. 7 Haingö Iesu ködrin, ka habe, Öunöngötâ thö je kaia ge köiö. Me ödrin e öunöngötâ ke ne o but hnyi hnyimen. 8 Haingen ame ha ködrin, ka habe, Sâü thö walang ang, me hom dö ka taben bijeü. Me ödrin e hom. 9 Ke a hia but taben bijeü drem cubecâ köiö adre wia me me waina, ke ca khana bi dok a ûnyi hnyin (ke e khana bi lathnyaba tavat adre sâü) haba taben bijeü ame hawâ at a tep faipoipo, 10 me ha kâu, ka habe, Hwakecin tavat he ka khenâ bâná waina ae so; ke e ka hia but ijem gâná, adre hom waina ae kong: ke haba u, u je tuö waina ae so ke ne o but ang. 11 Wale úöman a ânyâ Iesu a bân hnyi Kana hnyi Galilaia, me omanenâ anyin hmanenang; haba laten ödrin e labageju kâu.

12 Hwabab e, e ame he Kaperenauma ai, e, me hinyen, me je liamekeiny mē, me je laten: ke ca se je bong adre me laba eling.

13 E hakekeny jut paseka anyin at Juda, ke haba Iesu ame he Jerusalema ai. 14 Me e ame wâ hnyin uma kap tavat adre me úco je bolok, me mamoe, me biny, ke tavat adre me wia mone, adre me ûlala-bainy: 15 me e ame hom je ong tö hnan osö, me ob' ödrin hia ûnyi hnyin uma, me ta je mamoe, me bolok; me hingâlâ degecâ

IOANE 3.

ta je mone anyin tavat adre me wia mone, me ohnyimenâ hnyikânâi ta je laulau ; 16 me e ame ha ka tavat úco je biny, ka habe, Hom dö ta je únyi eang úheny ang ; ca wia bi uma umö Cica, me me uma úcú. 17 Haba laten adre me únykúme hna sihnalimen, ka habe, A hia but utö nya hnen weny ae gan hmâ ka umâm uma. 18 Me ame thu at Juda me ha kâu, ka habe, Ieú haten u me he ka omanenâ köhmun, a u me ânyâ ta je únyi e? 19 Iesu ame thu me ha ködrin, ka habe, Kia but uma eang, me oge me he ka otilâ hmetu e hnyi ta bong a kun. 20 Me haba at Juda adre me ha, ka habe, Fâte siks je huna adre otilâ hnyin uma eang, ke u me he ka otilâ e hnyi ta bong a kun? 21 Ke haba uma e ame ha, me, wale a unyin. 22 Ke hnyi únen ame möt hmetu thö e úheny hnyi hna mok, me ame únykúme laten a g' ame ha helâe ; ke ödrin e kap hna sihnalimen me hofuc a ha Iesu.

23 Tiga e bi hnyi Jerusalema hnyi bije-úny paseka, ödra se hia adre me labageju ka hnyi ien, anyin adre me wâ ta je úöman e ame ânyâ. 24 Ke haba Iesu ame ca ka hna e ködra, anyin a e ame wâhmakhmetoâ tavat hia, 25 ke ca únyi hnathu kâu a g' ame he at ka omanenâ hwakecin at ; anyin a e ame wâhmakhmetoâ ta je únyi eú hnyi hnyin at.

HNYIMAKAN 3.

HABA ke Faresaio, Nikodemo ien, ke taben at Juda : 2 ame he kâu hnyi hnyinghet me ha kâu ka habe, Rabi, e khan' öhmun dut a u at úne ame o únyi ge Khong : anyin ae ba at ae khana he ka ânyâ ke úöman u je ânyâ, a ne hia unyin Khong. 3 Iesu ame thu me ha kâu, ka habe, E hnathu, e hnathu, inya oge me ha köu, Adre ne ca hnokoâ hmetu bi at, e ca khana he ka wâ dökhu dokhon Khong. 4 Haba Nikodemo ame ha kâu, ha habe, Adre me he ka kâmâu ka hnokoâ at, ka hingat ut? hawa, e khana he ka olo didrö ka hnyi hnyekon hinyen me me huokoâ but? 5 Ke haingö Iesu, ka habe, E hnathu, e hnathu inya oge me ha köu, Adre ne ca hnokoâ bi at hnyi köiö me Hanu, e ca khana he ka didrö ka hnyi dökhu dokhon Khong. 6 Haba hna hnokoâ únyi hnyi unyin, me wale unyin bi, ke haba hna hnokoâ únyi hnyi Hanu, me wale hanu bi. 7 Ca láiiâ bi hnök hna ha köu, ka habe,

E únyi hnathu he ka hnöku öbun hmetu. 8 Ame si thö ang a ka hamen weny, u je löng ut a g' ame hmuhmu, ke ca khanö u úheny ua, k' ame he kâ : helâe tavat hia adre me hnokoâ únyi hnyi Hanu. 9 Nikodemo ame thu me ha kâu, ka habe, Ama kâmâu he ka helâe? 10 Haba Iesu ame thu kâu, ka habe, Hawa, u at úne hnyi Isaraela, ke u me ca wâ únykúme bi e? 11 E hnathu, e hnathu, öhmun e ha hnöhmun hna wâhmakhmeto, me ha hnathoâ hnöhmun hna wâ ; ke öbun e ca kap hnöhmun hna ohnathoâ. 12 Oge hia but ha köbun ta je únyi eang hmeledrany, ke öbun e ca labageju bi, awe, öbun e he ka kâmâu he ka labageju oge ne he bi ka ha köbun ta je únyi ethö hnyi drany? 13 E ba at ame hia but ölö hnyi drany ai ke so thibi at ame utut úheny hnyi drany, wale Nokon at a e hnyi drany. 14 Haba Mose ame ogöranyâ on hnyi hnyeububa, ke helâe adre me he ka ogöranyâ Nokon at : 15 me me he ka hu únyi gan möt ame ca ba balua ka tavat hia adre me labageju.

16 Anyin a Khong ame betenge ge hmeledrany, me e ame ham but Nokon a khaca thibi, me me ca he ka mok ke at ge tavat adre me labageju kâu, ke ame he bi ka hu möt ame ca ba balua. 17 Anyin a ca kunâ bi Khong Nokon ka hnyi hmeledrany he ka ohnaúhangöâ hmeledrany ; ke so bi he ka omelö hmeledrany a deny e. 18 Adre me ca ohnaúhangöâ at ame labageju kâu : k' adre hia but ohnaúhangöâ walang ang at ame ca labageju, anyin a e ame ca hia but labageju ka ien Nokon Khong a khaca. 19 Ke walang hnaúhangö, a ga o but melam ka hnyi hmeledrany, ke weny bi tavat menekholom hon melam ; anyin ae kong ut hwakecidra. 20 Anyin ame hûkötiâ melam hnen at ame mâdrâ monu, k' ame ca he bi thö ka hnyi melam, wâ e nye manen dut anyin ta je huliwa. 21 Ke haba at ame mâdrâ hnathu, e ame he ka hnyi melam, me me manen dut anyin ta je huliwa, a g' ame mâdrâ únyi ge Khong.

22 Hwaban ta je únyi eling Iesu ame tha he me laten ka hnyi hnyeí Juda ; ke ame tha laba eling mödrin, me bapataiso. 23 Ke Ioane minya ame bapataiso hnyi Aion hakekenyâ Šalim, anyin ae gan eling köiö : ke adre me o but, me e ame bapataisoí ödra. 24 Anyin adre tiga ca khúö Ioane ka hnyi uma ceat. 25 Me ame ivinö latö Ioane me ke at Juda ge hwakecin obosoâ. 26 Ke ödrin e he but kö Ioane

IOANE 4.

me ha kâu, ka habe, Rabi, haba at ame tha tot möu hnyi ke keihen hoton Joridano, waleji at u me ohnatho, wâ bi, haba at eling ame bapataiso, ke ame ok ut kâu tavat hia thithö. 27 Haba Ioane ame thu kâu, ka habe, E ca khana at he ka kap ke únyi, adre ne ca ham bi kâu únyi hnyi drany. 28 Haba öbun, me öbun e ohnathu nya a oge ha, ka habe, Iny ca Keriso bi, ke adre kunö nya bi hnyi hnyimakan. 29 Haba at ae hu hlu a teb faipoipo, me wale бага a teb faipoipo më, ke haba hanen бага a teb faipoipo, at ame tot ka löng e, me ame senyin gan hmâ ge ifucin at a teb faipoipo : anyin a wale e hwâdâ but anyik senyin ang. 30 E ame he ka gan tot, ke oge me he bi nya ka úhnyúkong tot.

31 Haba at úheny thö, me e thibi hon ta je únyi hia : ke haba at úheny hmeledrany, me at hmeledrany bi e, k' ame úhnenamö hmeledrany : haba at úheny thö, me e thibi hon ta je únyi hia. 32 Ke e ame ohnathoâ únyi e ame wâ me löng ; ke ba at ame kap hnen hna ohnathoâ. 33 Ke haba at ame kap hnen hna ohnatho, me wale at ame bi haten a e hnathu Khong. 34 Anyin a haba at ame kunâ hnen Khong, me wale at ame ha je hofuc hwan Khong : anyin a e ame ca ham Hanu hoton tulut. 35 Haba Kamen ame betenge ka Nokon, k' ame hna ta je únyi hia ka hnyi li hnyamen. 36 Haba at ame labageju ka Nokon, me hu but kâu möt ame ca ba balua ; ke haba at ame ca löng hoton Nokon, me ame ca he ka wâ möt, k' ame he ka takou e hnen hmönyin anyin Khong.

HNYIMAKAN 4.

KE a wâ but Than a g' ame löng hnen ta je Faresaio, ka habe, Iesu ame bi laten me bapataisoâ tavat ae se hia, ke wakhalet bi Ioane 2 (ke so bi ame ca bapataisoî ödra ga Iesu, ke hnen laten), 3 me e ame hna but Juda me he hmetu Galilaia ai. 4 Ke hamen he ka he hanyâúâ Samaria. 5 Me e ame o but hnyi ke taun hnyi Samaria, Sikara ien, e hakekeny ka hnyi utkânâ a ham Jakob ka nökon jia Josefa : 6 eling an beli Jakob. Ke ame laba ju Iesu hon an anyin ae sēnyin dut anyin he. Awa a siksiny eling. 7 Me ame o but ke momo Samaria he ka se köiö : ke haingö Iesu kâu, ka habe, Habelik. 8 Haba laten, me ödrin e he but ka hnyi taun he ka úcú

jeú. 9 Ke haingen momo Samaria kâu, ka habe, Ieú gam, a u at Juda, k' u me sumatö köiö gak, k' iny momo Samaria bi nya? (Anyin ae ca iate at Juda me at Samaria.) 10 Haba Iesu ame thu me ha ka momo, ka habe, A ne manen köu bwihlany anyin Khong, me at ame ha köu, Habelik ; me u je he ka sumâtâ gan, me e ame he ka ham köu köien möt. 11 Me haingen momo kâu, ka habe Than lö, e ba únyi gam hnân söú, ke dit an, ke únyi ua köien möt gam? 12 Hawa, u gan hu Jakob hanen lakamöhmun, at a ham köhmun an ang, ke belen e, me lakon, me ta je haleny? 13 Iesu ame thu me ha kâu, ka habe, Ame he ka beic hmetu tavat adre me ijem an ang : 14 ke haba at ame he ka ijem an oge me he ka ham, me ame ca he hmetu bi ka beic nyiele balua ; ke haba köiö oge me he ka ham kâu me ame he ka eú hnyi hnyekon wale an ame pupua ka hnyi möt ame ca ba balua. 15 Haba momo ame ha kâu, ka habe, Than lö, ham but könya an e, m' inye ca beic hmetu, m' inye ca hmetu jem kâang he ka se köiö. 16 Haingö Iesu kâu, ka habe, He thö ka hawâ jem âiâm. 17 Haba momo ame thu, ka habe, E ba öiök. Haba Iesu ame ha kâu, ka habe, E hnathu hnâm hna ha, ka habe, E ba âiâm : 18 anyin a ödrin thabúng ehac lâiâm, ke haba at u me tha laba më walang, me ca âiâm bi : waleling, e me hnathu hnâm hna ha. 19 Haingen momo kâu, ka habe, Than lö, oge wâ but a u perofeta. 20 Haba lakamöhmun adre me hmi hnyi bucen ang, ke öbun e ha, ka habe, E úcú ka tavat he ka hmi hnyi Jerusalema. 21 Iesu ame ha kâu, ka habe, Momo lö, labageju nya ju, a g' ame he ka o úen öbun e ca he ka hmi ka Kamen hnyi bucen ang, ke ba minya bi hnyi Jerusalema. 22 E ca khan' öbun hnöbun hna hmi kâu ; ke e khan' öhmun hnöhmun hna hmi kâu : anyin a únyi ge at Juda úhömeli. 23 Ke ame he ka o úen, ke wale but ang, a g' ame he ka he tavat adre me hmi hnathu ka hmi ka Kamen hnyi hanu me hnathu : anyin a Kamen ame elâm tavat helâe he ka hmi kâu. 24 Khong Hanu ; ke hamen tavat adre me hmi kâu he ka hmi hnyi hanu me hnathu. 25 Haingen momo kâu, ka habe, E khanö nya a g' ame he ka o Mesia (adre hwenyi ien Keriso) : ke hnyi úen e ame o but, e ame he ka omanenâ köta ta je únyi hia. 26 Iesu ame ha kâu, ka habe, Inya ang at ame úhnenamö möu.

IOANE 5.

27 Ke ame o but laten ; ke ödrin e läiä anyin a e ame ühnenamö me momo ; ke so bi, e ba at ame ha, ka habe, Ieü u me elâm ? ke, ieü e gam u me ühnenamö me momo ? 28 Haba momo ame ip ju belen kaia me he ka hnyi taun, me ha ka tavat, ka habe, 29 Ai öbun he ka hnyi wâ at ame hia but ha könya ta je ünyi hia oge hia but änyâ : hawa, ame ne e la Keriso ? 30 Me adre me he but ühedra hnyi taun, me o kâu. 31 K' ödra tiga bec, me ame üjengö e laten, ka habe, Rabi, ö u më han dö. 32 Ke haingen ködrin, ka habe, E hu ök ae ca khan' öbun. 33 Anyin a wale, ame ühnenamököüâ laten, ka habe, Ame ne hu at a hân ? 34 Haingö Iesu ködrin, ka habe, Walang ok, a oge me he ka mádrâ weny at a kunö nya, me umo anyik huliwa. 35 Hawa, ca hobun ang, ka habe, Vak biju ta tehi, me adre me menu ? ke wâ bi, inya oge me ha köbun, ka habe, Bwele th' öbun, me wâ je hna belök a hmahmat ut ang he ka menu. 36 Haba at ame hiny, me e ame kap hwaban, k' ame ükhöünâ troban hobi kâu möt ame ca ba ; me me tha senyin at ame tä me at ame hiny. 37 Waleling me me hnathu hna ha, ka habe, Ame tä hnen ke²at, k' ame hiny bi hnen ke at. 38 Oge me kun' öbun he ka hiny bnöbun hna ca huliwan : a hia but huliwa keihen, me öbun e didrö ka hnyi anyidra ta je huliwa.

39 Ke ame labageju kâu tavat Samaria ae se hia hnyi taun eling, can hofuc hwan momo, ka habe, E ame hia but ha könya ta je ünyi hia thithö oge hia but änyâ. 40 Ke ame e but kâu tavat Samaria, me adre me sumâtâ e he ka tha laba mödra : me e ame laba eling lo li bong. 41 Ke ame labageju tavat ae se hia hmönyin ünyi ge hofuc a hwan ; 42 m' ödrin e ha bi ka momo, ka habe, Öhmun e ca hake labageju thibi ünyi ge hwâm hofuc ; anyin a öhmun e hnyi löng ut me wâ a wale thibi e At omelö hmeledrany.

43 Hwaban lo li bong e ame hna but dok e, k' ame he Galiläia ai. 44 Anyin a Iesu ame ohnatho, a g' adre me ca ogânâ perofeta hnyi ka iny hnyei. 45 E ame o hnyi Galiläia, me ame kap e ge at Galiläia, anyin adre me wâ ta je ünyi e ame änyâ hnyi Jerusalema hnyi bjeü : anyin adre me hnyi mwi minya hnyi bjeü.

46 E ame o hmetu hnyi Kana hnyi Galiläia, waleji e ame wia hnyin köiö me me waina. Ke wale ke taben, k' ame mok nokon hnyi Kaperenauma. 47 E ame

löng a g' ame o but Iesu hnyi Galiläia üheny Juda, me e ame he but kâu, me sumâtâ e, me me he ka osoâ nokon ; anyin ae hakekeny jut he ka mok. 48 Haingö Iesu ame ha kâu, ka habe, Öbun e ne ca wâ ta je haten me üöman, öbun e ca he bi ka labageju. 49 Haingen taben kâu, ka habe, Than lö, he thö jem, e me tiga ca mok bi nökek. 50 Haba Iesu ame ha kâu, ka habe, He thö, a möt ut nokom. Haba at, me e ame labagejon hofuc a ha Iesu kâu, me e ame he. 51 Ke e ame tiga he, me ame ükhanö më lathnyabainy me ödrin e ha kâu a g' ame mödrut nokon. 52 Me e ame hnei ödrin ge ün ioiny möt. Me ödrin e ha kâu, ka habe, a hna but e et hnen kahwa, hnyi awa a seveniny. 53 Me ame wâhmakhmeto kamen ka habe, wale awa a ha hnyin kâu Iesu, ka habe, A mödrut nokom : me e ame labageju me anyin hia lap. 54 Wale üöman a loiny a änyâ Iesu, waleji ge ibi ioiny hnyi Galiläia üheny Juda.

HNYIMAKAN 5.

HWABAN ta je ünyi e, e hu bjeü anyin at Juda ; me ame he but Iesu Jerusalema ai.

2 E hnyi Jerusalema hnyi homagöuleny mamoe ke an, haba ion hnyi hwen Heberu, me, Betheseda, dok ae hu hnyin je poretiko a faiv. 3 Ame mokut eling tavat ae se hia a at senyin, me wadröu, me kong can, me mat. 5 Eling at ae mok thöte faiv je huna. 6 Iesu ame wâ e ame mokut, ke e khana ae beü hmâ but hnen hna mok, me e ame ha kâu, ka habe, E bewem he ka möt ? 7 Haba at ae mok ame thu kâu, ka habe, Than lö, e ba at he ka köp nya ka hnyi an, e ka hûnyûnye thö köiö : anyin a oge me tiga he ka utut, me ame ie logot ut ke at ke belik thiju. 8 Iesu ame ha kâu, ka habe, Todrö hom minya thö hnâm me he thö. 9 Me ame ie möt dö at, ke e ame hom dö hnen hna mokut me he.

Ke sabath bong eling. 10 Me ame ha at Juda ka at adre omelö, ka habe, Sabath ang, e ca ücü köu he ka vадren hna mokut. 11 Me e ame thu ködra, ka habe, Hnen at a omeli nya a ha könya, ka habe, Hom dö hnâm me he thö. 12 Me adre me hnö e, ka habe, Ie at a ha köu, ka habe, Hom dö hnâm me he thö ? 13 Ke haba at adre me omelö, me ca khana bi ia e ; anyin a Iesu ame he iyong, anyin a eling tavat ae se hia. 14 Ke hwaban e Iesu ame wâ e hnyi uma

IOANE 6.

kap, me haingen káu, ka habe, Wá bi, adre hia but omeli u, ca mádrá hmeto hulö, wá e nye o but monu ae gan hmá köu. 15 Ke e ame he but, k' ame thumeto at Juda, a Iesu ame omelö e. 16 Wale m' adre me oveci Iesu ge at Juda, anyin a e ame ányá ta je únyi e hnyi bong sabath. 17 Ke haingö Iesu ködra, ka habe, Ame huliwa Cica ke ne o but hnyi bong ang, ke oge me huliwa bi nya. 18 Waleling me ti hwege at Juda he ka heleú deny he ka hlingá e, ca únyi thibi ge hnen hna hanyáúá sabath, ke anyin minya bi e ame ha, ka habe, haba Khong, me hing Kamen, k' ame öúco e me Khong.

19 Haba Iesu ame thu me ha ködra, ka habe,

E hnathu, e hnathu inya oge me ha köbun, ka habe, E ca khana Nokon he ka ányá huliwa a ka únyi gan, ke so bi e ame wá hna mádrá hnen Kamen: anyin a haba ta je únyi e ame ányá, me ame ányá minya bi Nokon. 20 Anyin a kamen ame hnyoká Nokon, me omanená káu ta je únyi hia e ame ányá: ke e ame he ka omanená káu ta je huliwa ae gan hon e, m' öbun e he ka láia. 21 Anyin a Kamen ame otilá thö ta je komok me omeli ödra, heláe minya Nokon ame omelö tavat e ame weny. 22 Anyin a haba Kamen ame ca hnö ke at, ke e ame ham ka Nokon he ka hnö hia thö; 23 me me he tavat hia thithö ka ogáná Nokon helá me hnödra hna ogáná Kamen. Haba at ame ca ogáná Nokon, me ame ca ogáná Kamen at a kuná e. 24 E hnathu, e hnathu, inya oge me ha köbun, ka habe, Haba at ame löng hok ta je hofuc, k' ame labageju ka at a kunö nya, me hu but gan möt ame ca ba balua, k' ame ca he bi ka hnaúhangö, ke e ame he but úheny hnyi mok ka hnyi möt. 25 E hnathu, e hnathu inya oge me ha köbun, ka habe, ame he jem awa, ke walang ang, me ame he ka löng ifucin Nokon Khong hnen tavat adre mokcu; ke haba tavat adre me löng me adre me he ka möt. 26 Anyin ae ka hu bi ge Kamen anyin möt, ke heláe e ame hna ka Nokon he ka hu gan möt: 27 ke e ame ham minya káu man he ka hnei, anyin a e Nokon at. 28 Ca láia bi e, anyin ame he jem úen a g' ame he tavat hnyi ta je erkemok ka löng ifucin, 29 me he but; haba tavat adre me mádrá so, adre me he ka todrö ka hnyi möt; ke haba tavat adre me ányá hulö, me adre me he ka tot ka hnyi hnaúhangö.

30 E ca khanö nya he ka hake mádrá thiju ke únyi: oge me hnö hoton hnök hna löng: ke inya oge me hnö wisa; anyin oge me ca elám wek, ke so bi weny at a kunö nya. 31 Oge ne ohnathu nya bi, e ca hnathu bi hnök hna ohnathu nya. 32 E so ke hu ke at ame ohnathu nya; ke e khanö nya ae hnathu hnen hna ohnathu nya. 33 Öbun e hia but úkhúnöng kö Ioane, me e ame ohwádá hnathu. 34 Ke oge me ca kap hna ohnathoá únyi ge at: ke inya oge me ha ta je únyi eling me öbun e mödrut. 35 E thibi lamepa ame ubáhlá me umumelam: ke e webun he ka senyin ge iumumelaminy hnyi ke úen. 36 Ke hu but gak hnán ohnatho ae beönua hu Ioane: anyin a haba ta je huliwa a ham könya Kamen he ka ányá, me wale ta je huliwa oge me ányá hnán ohnathu nya a ga kunö nya Kamen. 37 Ke a hia but ohnathu nya hnen Kamen at a kunö nya. Öbun e ca löng bala ifucin, ke öbun e ca wá minya bi unyin. 38 Ke ca e bi eú hnyi je hnye-kubun hwan hofuc: anyin a öbun e ca labageju bi ka hnen hna kuná. 39 Öbun a elám hnyi je hna sihnalimen, anyin a öbun e únykúme ae hu but gabun möt eling ame ca ba balua; ke wale bi e at ame ohnathu nya; 40 ke öbun höcö he ka he könya me me hu möt gabun. 41 Oge me ca kap hna ogáná únyi ge at. 42 Ke oge wáhmakhmetu öbun dut ae ca hu gabun weny ka Khong. 43 Oge o but hnyi ien Kamök, ke öbun e ca köp nya: ame ne he ka o but ke at hnyi ka ien bi, öbun e he ka kap e. 44 Öhun e he ka kámáu he ka labageju, öbun hnyat úkapköuá hnán ogáná únyi gabun bi, ke ca elám bi hnán ogána únyi ge Khong a khaca thibi? 45 Ca únykúme öbun a oge me he ka hai öbun ka Kamök: e hu bi ke at ame he ka hai öbun. wale Mose, at öbun e labageju káu. 46 Anyin öbun e ne köp Mose, me öbun e he ka köp nya minya; anyin a e a sihnalimi nya. 47 Ke öbun e ne ca kap hnen hna sihnalimen, me öbun e he ka hawa he ka kap hok ta je hofuc.

HNYIMAKAN 6.

HWABAN ta je únyi e Iesu ame he hanyáúá köiö Galilaia, wale köiö Tiberia. 2 Haba tavat ae se hia adre me he hoton, anyin adre me wá ta je úöman e ame ányá ka tavat a ödra mok. 3 Ke haba Iesu ame öliá bucen, me tha laba eling me

IOANE 6.

laten. 4 E hakekeny jut bong paseka, bijeu anyin at Juda. 5 Iesu ame bwele thö, k' ame wâ tavat ae se hia hmönyin adre me he but kâu, me e ame ha kö Filipo, ka habe, Ötin e he ka úcú areto ua, m' adre me he ka han? 6 K' ame ha e he ka cubec e : anyin ae khana únyi ame he ka ányá. 7 Haingö Filipo kâu, ka habe, E ca úcú bi ködra je areto a hwaban lo li haded je denari, me me ve úcú ködra ong jeú ae úhnyú-kong. 8 Me ame ha kâu hnen ke aten jia Anedrea liamekeiny me Simona Peteru, ka habe, 9 Wale ke da ae hu je areto bali a faiv ke li ong wâ : ke hnân eú thö ling ke se hia tavat? 10 Ke haingö Iesu, ka habe, Olaba ju tavat. Ke gan hmâ hna önying hnyi dok eling. Me ame úlalabainy ju tavat, haba úseidra, me helâ me faiv thauzan. 11 Haba Iesu ame hom je areto, ke a hia but oleá, me e ame khenâ but ka tavat adre me ulalabainy ; helâe minya li ong wâ, hoton wedra. 12 Ke ame sekudra thö, me e ame ha ka laten, ka habe, Úkhö-únâ thö je ong kolon, me me ba únyi adre ma degec bi. 13 Me ödrin e úkhöúnâ thö, me ounöngötâ je tang a twelv wale je kolon je areto bali a faiv, a kolon hna han hnen tavat. 14 A wâ but hnen tavat úöman a ányá, me adre me ha, ka habe, E hnathu, walang perofeta adre me ha a g' ame he ka utut ka hnyi hmeledrany.

15 Ke a wâ but Iesu, a g' adre me he ka o thö he ka hom újengö e he ka otilâ e me than, me e ame hake he hmetu ka hnyi bucen.

16 Ke a sahac ut haba laten ödrin e utut ka hnyi köiö ; 17 ke ödrin e ölö hon hu, me hwân he ka kec hanyáúú köiö Kapere-nauma ai. Ke a lit ut, ke tiga ca o Iesu ködrin. 18 Me ame omun dö köiö ge ang ae gan. 19 Ke ödrin e hia but galu helâ me twente faiv, ame ne thöti je setadia, me ödrin e ö Iesu ame he hon köiö, me hakekeny ka hnyi hu : me ödrin e ot. 20 Ke e ame ha ködrin, ka habe, Inya bi ; ca ot. 21 Me ödrin e kap senyiná thö e ka hnyi hu : me ame ie khöp dö hu hnyi hnyei ödrin e kec ka hnyin.

22 Haba nyi, a wâ but hnen tavat adre me útitilen hnyi ke keihen köiö, ae ba ju ke hu e, ka ca tha ölö Iesu me laten hon hu, ke hake laten thibi, 23 (ke so bi ame khöp dö ke je ong galu úheny Tiberia hakekeny ka hnyi dok adre me han hnyin hwaban hna ole hnen Than) : 24 me ame wâ hnen tavat ae se hia ae hiö Iesu eling, me

laten minya, me adre me laba but hon je ong galu, me kec Kaperenauma ai he ka elöm Iesu. 25 Ke adre me wâ ju e hnyi ke keihen köiö, haingödra kâu, ka habe, Rabi, u je o eang kehö? 26 Haba Iesu ame thu ködra, ka habe, E hnathu, e hnathu inya oge me ha köbun, öbun e ca elöm nya anyin öbun e wâ ta je úöman, ke anyin bi öbun e han areto me ame sekubun dö. 27 Ca huliwa bi hobi kâu jeú wale únyi ame he ka bobot, ke so bi jeú ae tet hmâ ke ne o but ka hnyi möt ame ca ba balua, wale ame he Nokon at ka han köbun : anyin a wale at Kamen ame okeceâ haten hon, wale Khong. 28 Haingödra adre me ha kâu, ka habe, Ieú hanymöhmun m' öhmun e he ka ányá ta je huliwa anyin Khong? 29 Iesu ame thu ködra, ka habe, Walang huliwa anyin Khong, ka habe, öbun e he ka labageju ka at a kunâ. 30 Me adre me ha kâu, ka habe, Ieú haten u me he ka mádrâ, m' öhmun e wâ thö, me labageju köu? ieu ányâm huliwa? 31 Haba lakamöhmun adre me han mana hnyi hnyebuba ; helâ me hna sihnalimen, ka habe, E ame ham ködra areto únyi hnyi drany hnân han. 32 Me haba Iesu ame ha ködra, ka habe, E hnathu, e hnathu inya oge me ha köbun, ka habe, A ca ham köbun areto únyi hnyi drany ga Mose ; ke so bi Cica ame ham köbun hing areto únyi hnyi drany. 33 Anyin a areto anyin Khong, me wale at ame utut únyi hnyi drany, k' ame ham möt ka hmeledrany. 34 Haingödra kâu, ka habe, Than lö, ham bala ju köhmun areto e. 35 Me haingö Iesu ködra, ka habe, Inya ang aretoiny möt : haba at ame he ka o könya, me ame ca he hmetu ka mekihnânem, ke haba at ame he ka labageju könya, me ame ca he hmetu ka heic. 36 Ke oge me ha köbun, ka habe, öbun e ö nya, ke öbun e ca labageju bi. 37 Haba ödra hia a ham könya Kamen, me adre me he ka o könya ; ke haba at ame he ka o könya, me oge me ca he bi nya ka degec. 38 Anyin oge me ca utut úhek hnyi drany he ka mádrâ wek, ke so bi weny at a kunö nya. 39 Ke walang weny at a kunö nya, o oge me ca he ka hna ke at gadra a ham könya, m' oge me he bi ka otil' ödra hnyi bong a obiny. 40 Ke walang weny Kamök, a g' ame he ka hu möt ame ca ba balua ka tavat hia adre me wâ Nokon, me labageju kâu ; me oge me he bi nya ka otil' ödra hnyi bong a obiny.

41 Haba at Juda adre me ulidro e anyin a e ame ha, ka habe, Inya ang areto ame utut úheny hnyi drany. 42 Haingödra, ka habe, Hawa, ca Iesu e, nöku Josefa, ke khan' öta kamen me hinyen? a hawa hofuc e ame ha, ka habe, Ogo me utut úhek hnyi drany? 43 Haba Iesu ame thu ködra me ha, ka habe, Ca ulit öbun. 44 E ba at ae khana he ka he könya, a ne ca lelö bi e hnen Kamen, a at a kunö nya : ke oge me he ka otilá thö e hnyi bong a obiny. 45 Adre me sihnalimen hnyi tusi anyin je perofeta, ka habe, Ame he Khong ka n' ödra hia. Ke haba tavat hia adre me löng únyi ge Kamen, k' adre me úne bi, me adre me he ka o könya. 46 E ba at ame wá Kamen, ke so thibi at a únyi ge Khong, e ame wá Kamen. 47 E hnathu, e hnathu, inya oge me ha köbun, ka habe, Haba at ame labageju, me hu but káu möt ame ca ba balua. 48 Inya ang aretoiny möt. 49 Ame han mana lakamöbun hnyi hnyebuba ke adre mokcu. 50 Walang areto ame utut úheny hnyi drany, a ga ne an hnen ke at, e ame ca he ka mok. 51 Inya ang areto ae möt ame utut úheny hnyi drany : a ne an dö ke at areto eang e ame he ka möt nyiele balua : eke, ke haba areto oge me he ka ham me wale unyik, hnân malen hmeledrany.

52 Me ame iwatretra at Juda, ka habe, Ama hawa ka khana at ang ka ham köta unyin hnân han? 53 Haba Iesu ame ha ködra, ka habe, E hnathu, e hnathu, inya oge me ha köbun, ka habe, Öbun e ne ca an unyin Nokon at, me ijem dren, me ca hu möt bi eú hnyi je hnyekubun. 54 Haba at ama an unyik me ijem drök, me hu but káu möt ame ca ba balua ; ke oge me he ka otilá thö e hnyi bong a obiny. 55 Anyin a hing jeú unyik, ke hing möt hnathu drök. 56 Haba at ame he ka an unyik me ijem drök, me ame laba eú hnyi hnyik, ke inya bi eú hnyi hnyekon. 57 Haba Kamen ae möt ame kunö nya, ke inya oge möt únyi ge Kamen ; ke helâe ge at ame he ka han unyik, e ame he ka möt únyi gak. 58 Walang areto ame utut úheny hnyi drany : ca helâ me hna han hnen lakamen ke adre me mokcu : haba at ame han areto ang, me ame he ka möt nyiele balua. 59 E ame ha ta je hofuc eling hnyi sunago, hnyi hnen hna úne hnyi Kapernauma.

60 A löng ut hnen ke je laten ae se hia, me adre me ha ka habe, E hmak hofuc e ;

ke ia ae khana he ka löng? 61 Ke a wá but Iesu eú hnyi hnyekon hnen laten hna ulidro ge únyi eling, me e ame ha ködra, ka habe, Hawa hnân jönbun hofuc e? 62 Ame ne he ka hawa öbun ka he ka wá Nokon at ame ölö ka hnyi hnen bi ebac? 63 Haba at ame omelö, me hanu ; ke ca únyi hnathu bi unyin : haba ta je hofuc oge hia but ha köbun, wale hanu me möt. 64 Ke ame ca labageju keihen gabun. Anyin ae khanö Iesu tavat adre me ca labageju, me at minya bi ame he ka alecuá e. 65 Me e ame ha ködra, ka habe, Waleling me inye ha köbun, ka habe, E ba at ae khana he ka o könya, a ne ca ham káu hnen Kamen.

66 Anyin a wale, e se hia laten adre me hmetuhmetu me ca tha he hmetu mē. 67 Haba Iesu ame ha ka hnyat a twelv, ka habe, E webun minya he ka hmetuhmetu? 68 Haba Simona Peteru amē thu káu, ka habe, Than lö, öhmun e he ka he kö ia? e thibi gam je hofucin möt ame ca ba balua. 69 Ke öhmun e hia but labageju me wá hmakhmeto a u thibi At ae Kap anyin Khong. 70 Iesu ame thu ködrin, ka habe, Hawa, oge me ca úc' öbun a twelv, ke diablo ke at gabun? 71 E ame haiö Juda nöku Simona Isakariota, anyin a e at ame he ka alecuá e, ke hanen hnyat a twelv.

HNYIMAKAN 7.

HWABAN e Iesu ame vheno Galilaia : anyin ae ca weny bi he ka vheno Juda, anyin a at Juda adre me heleú deny he ka hlingá e. 2 E hakekeny jut bijeú anyin at Juda, wale bijeúiny uma menâ. 3 Me ame ka káu liamekeiny mē, ka habe, Hna but dok ang, ke he thö Juda ai, me me wá thö hnen latâm ta je huliwa u me ânyâ. 4 Anyin ae ba at ame ânyâ duöngá ke únyi, e ka weny bi he ka omanenâ e. U je ne ânyâ ta je únyi e, awe omanenö u thö ka hmeledrany. 5 Anyin ame ca labageju minya káu je liamekeiny mē. 6 Haba Iesu ame thu ködrin, ka habe, E tiga ca o úök ; ke úöbun bala bi. 7 E ca khana bi hmeledrany he ka húkoti öbun ; ke so bi ame húkotiö nya, anyin a oge me ohnathoá ae kong ta je huliwainy. 8 He th' öbun ka hnyi bijeú : oge me ca mē he ka hnyi bijeú ; anyin ae tiga ca hwádâ bi úök. 9 E ame ha je hofuc eling ködra, me ame mē laba ju hnyi Galilaia.

IOANE 7.

10 Ke ame he but ka hnyi bijeú je liamekeiny më, me e ame ka he minya, k' ame ca he manen bi, k' ame he duöng. 11 Haba at Juda adre me elâm e hnyi bijeú, haingödra, ka habe, Ewa? 12 Ke gan hmâ hna ûlidro gän ge tavat ae se hia: haingen keihen, ka habe, E at ae so; haingen keihen, Ohe, e ame omonu tavat ae se hia. 13 Ke ba at ame ha manená e anyin a ödra outen at Juda.

14 Ke haba hnyi wanben bijeú, me ame he Iesu ka hnyi uma kap, k' ame úne. 15 Haba at Juda adre me láia me ha, ka habe, A khana at ang tusi ga ia, ke adre ca ná bi? 16 Me Iesu ame thu ködra, ka habe, Ca únyi gak hnök hna úne, ke únyi ge at a kunö nya. 17 A ne weny ke at he ka mádrá weny, e ame he ka wáhmak-hmetoâ hna úne, a ne únyi ge Khong, oge ne ha ka únyi bi gak. 18 Haba at ame ha hofuc ka únyi gän bi e ame elâm he ka oganá e bi: ke haba at ame elâm he ka oganá at a kunâ e, e hnathu e, ke ba hwa-kecin ae ca wisa gän. 19 Hawa, a ca ham köbun Mose hnanyibu, ke ba ke at gabun ame vheno hnanyibu? Ieú gabun öbun e elâm he ka hlingö nya? 20 Haba tavat ae se hia adre me thu me ha, ka habe, E but gam demoni: ia ame elâm he ka hlingö u? 21 Iesu ame thu me ha ködra, ka habe, Oge hia but ányâ ke huliwa, ke öbun e láia hia. 22 Anyin a wale Mose ame hia but ham köbun peritom (ke so bi ca únyi ga Mose, ke únyi bi ge wahingat); ke öbun e peritomonâ at hnyi sabath. 23 Adre ne peritomonâ ke at hnyi sabath, k' adre me ca he ka hanyâúú hnanyibu anyi Mose; hawa öbun e hmönyibun könya, anyin a oge me ti osoâ at hnyi sabath? 24 Ca ha únykúme bi hoton hna wâ hnen ecmak, ke so bi ha únykúme ju hoton wisa.

25 Me haba keihen úhedra Jerusalema adre me ha, ka habe, Hawa, ca walang at adre me elâm he ka hlingâ? 26 Ke wâ bi, e ame fuc manen, ke ba hödrin kâu. Hawa, e khana je taben me ka e Keriso? 27 Ke haba at ang, me khan' öta dok a mwi hnyin: ke e ka o but Keriso, e ba at ame he ka wáhmakhmetoâ dok a mwi hnyin. 28 Me haba Iesu ame fuc hwege hnyi hnyin uma kap me nö 'dra me ha, ka habe, E khan' öbun dut inya, ke khan' öbun minya but dok oge mwi hnyin; oge ca o ka únyi gak, ke e hnathu e at a kunö nya, wale at ae ca khan' öbun. 29 E khanö

nya e, anyin a úhek unyin, ke e a kunö nya. 30 Me adre me elâm he ka kât e: ke ba ke at ame hinöbeny kâu, anyin ae tiga ca o bi úen. 31 Ke ödra se hia adre me labageju kâu; me ödrin e ha, ka habe, E ka o but Keriso, hawa, e ame he ka ányâ ta je úöman hon hna ányâ hnen at ang. 32 A löng ut ta je Faresaio hna iulidrokouâ ge tavat ta je únyi e gan; me haba je taben tavat bihut me ta je Faresaio, me adre me kunâ je taben tavat tue he ka kât e. 33 Haba Iesu ame ha, ka habe, E ca beú biju úök a úlabaik eang unyibun, ke oge me he ka he but ka at a kunö nya. 34 Öbun e he ka elöm nya, ke öbun e ca he ka wâ: ke ca khan' öbun he ka he ka hnyi dok oge me he ka labâ. 35 Me haba at Juda adre me úhnenamökouâ, ka habe, Ewa dok ame he at ang ka he ka hnyin m' ate me ca he bi ka wâ; hawa, e ame he ka he ka tavat adre vese unyin at Heleni, me ná at Heleni? 36 Ieú hofuc ang e ame ha, ka habe, Öbun e he ka elöm nya, k' öbun e ca he ka wâ: ke ca khan' öbun he ka he ka hnyi dok oge me he ka laba hnyin?

37 Hnyi bong a biliny bonginy bijeú, wale bong ae gan, Iesu ame todrö me ha hwegiâ, ka habe, A ne ke at ae beic, he but jem ka ic unyik. 38 Haba at ame labageju könya me ame he ka uoú únyi eú hnyi hnyekon je wageweiny möt, helâji me hna sihnalimen. 39 Ke e ame ha ge Hanu, wale ame he tavat adre me labageju kâu he ka kap: anyin adre me tiga ca ham Hanu; anyin adre me tiga ca ogânö Iesu. 40 Haba keihen tavat ae se hia, hnyi úen adre me löng ta je hofuc e, me haingödrin, ka habe, E hnathu, perofeta at ang. 41 Haingen keihen, ka habe, Walang Keriso. Ke haingen keihen, ka habe, Hawa, ame o Keriso úheny Galilaia? 42 Hawa, adre me ca ha bi hnyi hna sihnalimen, ka habe, Ame he ka o Keriso únyi ge mátrâni Davita, ke haba taun anyi Davita, me Betheleema. 43 Me ame khekke lo but tavat gan. 44 Ke e weny keihen he ka kât e; ke ba bi at ame hinöbeny kâu.

45 Me ame he hmetu but je taben tavat tue ka je taben tavat bihut me ta je Faresaio; ke ödrin e ha ködra, ka habe, Ieú gabun öbun e ca hom but e? 46 Haingen je taben tavat tue, ka habe, E ba at ame fuc helâe. 47 Me ame thu ködra ta je Faresaio, ka habe, Hawa, adre hia but omonu öbun minya? 48 Hawa, e

IOANE 8.

hu ke taben ame ne ke at Faresaio ame labageju kâu? 49 Ke hnaúhangö but houmonu ang ae ca khan' ödra bi hnanyibu. 50 Me ame ha ködra Nikodema, (e ke at gadra, k' ame he kâu ehac), 51 ka habe, Hawa ge anyita hnanyibu, adre me he ka hangâ at ke adre me ca më löng dö gan me me manen dut hnen hna mádrâ? 52 Me adre me thu me ha kâu, ka habe, Úhem minya Galilaia? Elâm dö me wâ, anyin ae ba ke perofeta ame o úheny Galilaia.

53 Me adre me vese but ka hnyi umödra ta je uma :

HNYIMAKAN 8

KE Iesu ame he but ka hnyi bucen Elaio. 2 Ke hnyi hnyomakatu kong e ame o hmetu ka hnyi uma kap, me ame he but kâu tavat hia ; ke e ame laba ju me n' ödra. 3 Haba tavat sihnalimen me ta je Faresaio adre me hom kâu ke momo adre lelö k' ame tiga bi únyi monu ; me adre me otilâ momo hnyi wanben, 4 me ha kâu, ka habe, At úne lö, haba momo ang öhmun e lelö k' ame tiga bi únyi monu. 5 Ka húna köta Mose hnyi hnanyibu he ka lúâ ge veto tavat adre me helâe ; iéú hnâm hna ha gan? 6 Adre me ha e he ka cubec e, me me hu únyi hnân bi fuco e. Ke Iesu ame nom but me set kânâ ge banyen. 7 Ke adre me hnö újengö e kâu, me e ame höhöi me ha ködra, ka habe, ama bán at ame ca munyi mádrâ hulö ka lúâ e. 8 Ke e ame nom hmetu ju me set kânâ. 9 Ke adre me löng ut me adre me ve dididrut, hwân ge at a bán ke ne o but ge at a biliny : ke hake Iesu thiju, ke momo ame hake tot. 10 Ke haba Iesu ame höhöi thö, me ha ka momo, ka habe, Ke momo lö, ödra but ua? e ba but at a ohnaúhangöi u? 11 Haba momo ame ha, ka habe, Than lö, e ba. Haba Iesu ame ha, ka habe, Oge me ca he minya inya ka ha hnaúhangöi u : he thö ; ca mádrâ hmetu monu hwân úen eang.

12 Iesu ame ha hmetu ködra, ka habe, Inya ang melaminy hmeledrany : haba at ame he ka he hotuk, e ame ca he ka he hnyi menekholom, k' ame he bi ka hu melaminy möt. 13 Me ame ha kâu ta je Faresaio, ka habe, U me ka hamâm ohnathu u ; e ca hnathu thö hnâm hna ohnathu u. 14 Iesu ame thu me ha ködra, ka habe, A ne inya oge me ohnathu nya bi, e hnathu

hnök hna ohnatho ; anyin ae khanö nya dok oge mwi hnyin, me dok oge me he ka hnyin. 15 Öbun e ha únykúme hoton unyin, ke oge me ca ha únykúme bi nya ke at. 16 Ke so bi oge ne ha únykúme, e hnathu hnök hna únykúme ; anyin a ca hake inya ke, ke tha inya me Kamök at a kunö nya. 17 Eke, adre me sihnalimen hnyi anyibun hnanyibu, ka habe, haba hna ohnathoá hnen li at a lo, me hnathu. 18 Haba inya oge me ka ohnathu nya bi, ke ame ohnathu nya minya bi Kamen at a kunö nya. 19 Me haingödra kâu, ka habe, Ewa Kâmâm? Iesu ame thu, ka habe, E ca khan' öbun inya, me Cica : a ne khan' öbun inya, me khan' öbun minya Kamök. 20 E ame ha ta je hofuc e hnyi dok adre hip mone, e ame tiga úne hnyi uma kap : ke ba at ame kât e ; anyin ae tiga ca o bi úen.

21 Iesu ame ha hmetu ködra, ka habe. Oge me he but ka he, ke öbun e he bi ju ka elöm nya, ke öbun e he ka mekiny anyibun ta je hulö : haba dok oge me he ka hnyin, me ca khan' öbun he ka he ka hnyin. 22 Me ame ha at Juda, ka habe, Hawa, ame ka he ka hamen hlingâ e bi, anyin a haingen, ka habe, Haba dok oge me he ka hnyin me ca khan' öbun he ka he ka hnyin. 23 Me e ame ha ködra, ka habe, Úkebun eang hmelen ; ke úhek thö : öbun aten hmeledrany, ke iny ca at hmeledrany bi nya. 24 Anyin a wale, oge me ha köbun, ka habe, Öbun e he ka mekiny anyibun ta je hulö : anyin a öbun e ne ca labageju, ka habe, Inya e, me öbun e he ka mekiny anyibun ta je hulö. 25 Ke haingödra kâu, ka habe, U ia? Haba Iesu ame ha ködra, ka habe, Wale únyi oge hia but ha köbun hwân hnyi can. 26 E hu gak ta je únyi ae se he ka ha köbun me he ka owisa : ke so bi e hnathu e at a kunö nya ; ke haba je hofuc a hwan oge me löng. me inya oge me ha e ka hmeledrany. 27 Ke adre me ca wâhmakhmeto a e ame ha ködra ge Kamen. 28 Ke haingö Iesu, ka habe, Öbun ka hia but kap göranyai Nokou at, me ame he ka khan' öbun, ka habe, Inya e, ke oge me ca mádrâ ke únyi ka únyi gak bi, ke haba hnen Kamök hna nya, me wale can oge me ha ta je hofuc ang. 29 Ke tha e mönya at a kunö nya : e ame ca hnö nya but ; anyin a inya oge me ányâ bala ta je únyi hnân osenyiná e. 30 E ame tiga ha ta je hofuc eling, me ame labageju kâu tavat ae se hia.

IOANE 9.

31 Haba Iesu ame ha ka at Juda, tavat adre me labageju kâu, ka habe, Öbun e ne he ka laba hmâ hnyi hok hofuc, me öbun je latök ae hnathu; 32 ke ame he ka khan' öbun hnathu, ke adre me he ka hn' öbun ge hnathu. 33 Me adre me thu kâu, ka habe, Öhmun je mâtrâni Aberahama, ke tiga ca hom hwenb' öhmun hnen ke at : a hawa, u me ha, ka kabe, Adre me he ka hn' öbun dut? 34 Iesu ame thu ködra, ka habe, E hnathu, e hnathu, inya oge me ha köbun, ka habe, haba at ame he ka mâdrâ monu e ame bi aten hulö. 35 Ke haba aten, me e ame ca laba hmâ bi hnyi hnyaba : ke so bi nokon ame laba hmâ. 36 Anyin a wale a ne he Nokon ka hn' öbun adre me he ka ti hn' öbun dut. 37 E khanö nya a öbun je mâtrâni Aberahama ; ke öbun bi öbun e elâm he ka hlingö nya, anyin ae ba hnen hok hofuc eü hnyi je hnyekubun. 38 Inya oge me ha ta je ünyi oge me hia but wâ unyin Kamök : ke öbun e mâdrâ minya öbun hnöbun hna wâ unyin kamöbun. 39 Ödra adre me thu, ka habe, Aberahama kamöhmun. Iesu ame ha ködra, ka habe, A ne je laku Aberahama öbun, m' öbun e he ka mâdrâ je huliwa anyi Aberahama. 40 Ke walang ang, öbun e elâm he ka hlingö nya, wale at ame ha köbun hnathu, waleji oge me löng ünyi ge Khong : ke ca ânyâ helâe Aberahama. 41 Öbun e ânyâ ta je huliwa anyin kamöbun. Haingödra kâu, ka habe, Öhmun ca je lakon gethen ; khaca thibi Kamöhmun, a wale Khong. 42 Iesu ame ha ködrin, ka habe, A ne Khong Kamöbun, öbun e he ka hnyok könya ; anyin oge me o but, me oge me o ünyi ge Khong ; ke oge ca ka hamök o, ke e a kunö nya. 43 Ieü gabun öbun e ca wâ ünyküme hok hofuc? anyin a e ca khan' öbun he ka löng hok hofuc. 44 Ünyi ge kamöbun öbun, wale diabolö, ke öbun e behe ka ânyâ weny ae kong anyin kamöbun. E at ühlingö hwân hnyi can, k' ame ca tethmä hnyi hnathu, anyin ae ba hnathu gan. E ka he ka ha thoi, me ka ünyi gan, anyin a e at thoi, ke kamen thoi. 45 Ke can anyin oge me ha hnathu, me öbun e ca labageju könya. 46 Ia gabun ame he ka ohnathö a g' ame hu monu gak? Ke oge ne ha hnathu, ieü gabun öbun e ca labageju könya? 47 Haba at a ünyi ge Khong, me e ame löng hofuc hwan Khong : waleling me öbun e ca löng anyin a ca ünyi ge Khong öbun. 48 Haba at Juda adre me

thu kâu, ka habe, Hawa, öhmun e ca ha hnatho, ka habe, U at Samaria, ke e gam demoni? 49 Iesu ame thu, ka habe, E ba demoni gak ; ke inya oge me ogânâ Kamök, ke öbun e ohnyikönö nya bi öbun. 50 Ke oge me ca elâm hnân ogânö nya bi : e hu at ame elâm, me owisa minya. 51 E hnathu, e hnathu, inya oge me ha köbun, ka habe, a ne hu at ame he ka vhenö hok hofuc, me e ame ca he ka wâ mok nyiele balua. 52 Me ame ha kâu at Juda, ka habe, E khan' öhmun dut walang ang, a e unyâm demoni. A mokcu Aberahama, me ta je perofeta, ke u me ha, ka habe, A ne hu at ame he ka vhenö hok hofuc, me e ame ca he ka wâ mok nyiele balua. 53 Hawa, u gan hon kamöhmun a Aberahama, waleji a mokcu? ke mok minya ju ta je perofeta : ke u ia bi u? 54 Iesu ame thu, ka habe, Oge ne ogânö nya bi, me ca ünyi hnathu üganik : ke hnen Kamök hna ogânö nya ; wale öbun e ha, a e Khongubun ; 55 e ca khan' öbun e : ke khanö nya e ; oge ne ha, ka habe, E ca khanö nya e, awe, oge ma at thoi bi helâ me öbun : ke khanö nya e, ke oge me vhenö hwan hofuc. 56 Ame senyin Aberahama a kamöbun he ka wâ bonguk je bong ; ke e ame wâ ju me e ame senyin. 57 Me haingen at Juda kâu, ka habe, Hawa, ca fite but ta je hunaiâm ke u je munyi ö Aberahama? 58 Haingö Iesu ködra, ka habe, E hnathu, e hnathu, inya oge me ha köbun, ka habe, Iny at kâü adrem, ke tiga hiö Aberahama. 59 Me adre me hom je veto he ka lûâ e : ke haba Iesu ame ka oiyongâ e hi, me didrut üheny hnyi uma kap.

HNYIMAKAN 9.

E AME he, k' ame wâ ke at a wadröu hwân hnyi hna knokoâ e. 2 Ke haba laten ödrin e hnö e, ka habe, Rabi, ie at a anyin hulö m' adre me hnokoâ wadröu eang, hawa, a ka ünyi gan, ame ne kamen me hinyen? 3 Iesu ame thu, ka habe, E ca monu at ang, ke ca monu minya kamen me hinyen : ke so bi me me manen dut ta je huliwa anyin Khong ge at ang. 4 E ücü köta he ka mâdrâ ta je huliwa anyin at a kunö nya e me tiga lany : ame he jem lit ke ca khana hmetu ke at he ka ânyâ ke huliwa. 5 Hnyi üen a inya ang hmeledrany, inya ang melaminy hmeledrany. 6 Ke e a hia but ha e, e ame hangöc ka hnyi kânâ, me ünyünya me botro li emakan at

ae wadröu ge kânâ, 7 me ha kâu, ka habe, He thö ka hneü hnyi an Siloama (walang bongon, Hna úkhúnöng). Me e ame he but me hneü, me e ame o hmetu but a ga bwela but. 8 Haba tavat adre me laba hakekenyâ, me tavat adre me wâ ehac ame labö sumat, adre me ha, ka habe, Ca at ke la ang ame labö sumat? 9 Ke haingen keihen, ka habe, Ka e at e: ke haingen keihen, ka habe, E tha úcú mē. Ke e ame ha, ka habe, Inya ang. 10 Me adre me ha kâu, ka habe, Adre kâmâu hna obwela li emákâm? 11 E ame thu, ka habe, Hnen at adre hwenyi ien Iesu hna mádrâ kânâ, me kina hnyi li emakök, me ha konya, ka habe, He thö Siloama ai ha hneü: me oge me he but me hneü, me oge me bwela but. 12 Ke haingödra adre me ha kâu, ka habe, Ke ne e but ua? Haingen, ka habe Khete.

13 Ödra adre me hom but at ae wadröu ehac ka ta je Faresaio. 14 Haba bong Iesu ame mádrâ kânâ, me obwela li emakan, me, bong sabath. 15 Haba ta je Faresaio adre me hnö hmetu e, ka habe, A hawa me u me bwela but? Haingen ame ha ködra, ka habe, E ame kina kânâ hnyi li emakök, me oge me he but ka hneü, me oge me bwela but. 16 Me ame ha keihen ta je Faresaio, ka habe, Ca únyi ge Khong at ang, anyin a e ame ca okabâ sabath. Ke haingen keihen, ka habe, A hawa at ae monu ka khana ka ányâ ta je úöman helâe? Me adre me khekhe lo but. 17 Me adre me ha hmetu ka at ae wadröu, ka habe, Ieü hwâm gan, anyin a e ame obwela li emákâm? Haingen, ka habe, E perofeta. 18 Ke haba at Juda, me adre me ca kap a e at eji ae wadröu, ka bwela hmetu but, ke ne o but adre me hawâ kamen me hinyen at adre obwela, 19 me hnei ödru, ka habe, Hawa nökubu at ang waleji öbu me ha a g' adre hnokoá ke wadröu? a hawa a ga bwela but walang ang? 20 Me ame thu kamen me hinyen, ka habe, E khan' öhmu a nökuhmu at ang, ke öhme hnokoá ke wadröu: 21 e bwela but walang, ke ca khan' öhmu a hawa; ke ca khan' öhmu minya at a obwela li emakan: bethe hnö öbun gan; e at hnathu but; hamen he ka háiâ e. 22 Ame ha kamen me hinyen helâe anyin a ödru ouden at Juda; anyin ame úhaköuâ at Juda he ka obâ únyi hnyi sunago at ame he ka ha, ka habe, E Keriso. 23 Waleling me me ha kamen me hinyen, ka habe, E at hnathu but; bethe hnö öbun

gan. 24 Me adre me olo hawâ at ae wadröu, me ha kâu, ka habe, Ogánâ Khong, anyin a öhmun e wâ but ae monu at ang. 25 Haba at ae wadröu ame thu, ka habe, A ne at ae kong, me ca khanö nya: khaca thibi únyi ae khanö nya, wale a iny wadröu ehac, ke walang ang oge me bwela but. 26 Me adre me ha kâu, ka habe, Ieü hnen hna ányâ köu? a kâmâu hna obwela li emákâm? 27 E ame thu ködra, ka habe, Oge hia but ha köbun eja, ke öbun e ca löng: anyin a ieü ame bewebun hmetu ka löng? e bewebun minya he ka bi laten? 28 Me ödrin e öü e, me ha, ka habe, U at bi u a aten; k' öhmun je latö Mose bi öhmun. 29 E khan' öhmun a Khong ame fuc kö Mose, ke haba at e, me ca khan' öhmun e at ua. 30 Haba wadröu ame thu ködra, ka habe, Hap wale ju ang únyi hnân láiâ, a öbun e ca wâ dok a mwi hnyin, ke a hia but obwela li emakök. 31 E khan' öta but, a g' ame ca he Khong ka löng tavat ae monu: ke a ne ke at ame ouden Khong me mádrâ weny, me e ame he bi ka löng kâu. 32 Adre me ca munyi löng adrem a g' ame obwela ke at li emakan at adre me hnokoá ke wadröu. 33 A ne ca únyi ge Khong at e, e ca khana he ka ányâ ke únyi. 34 Ödra adre me thu kâu, ka habe, Adre me hnöku u hnyi hulö ae gan, ke u me he bi ka n' öhmun? me adre me obâ but e.

35 A löng ut Iesu a g' adre hia but obâ e; me e ame wâ e me ha kâu, ka habe, Hawa, u me labageju ka Nokon Khong? 36 E ame thu, ka habe, Taböny Than, e ia, m' inye he ka labageju kâu? 37 Iesu ame thu kâu, ka habe, U je wâ but, ke e thibi e at ame úhnenamö möu. 38 Haingen ame ha, ka habe, Taböny Than, inya oge me labageju. Me e ame khudrung ju kâu. 39 Haingö Iesu, ka habe, Oge o but eang hmeledrany he ka owisa, me me bwela but tavat adre me ca hnyi bwela; me me ca bwela bi tavat adre me bwela. 40 Ame löng ut keihen ta je Faresaio a tha ödra mē ta je hofuc eling, me adre me ha kâu, ka habe, Hawa, öhmun je wadröu minya? 41 Iesu ame thu ködra, ka habe, Öbun e ne je wadröu me ba bi anyibun monu, ke walang ang öbun e ha, ka habe, Öhmun bwelâ: waleling me me e bala bi anyibun monu.

HNYIMAKAN 10.

EHNATHU, e hnathu, inya oge me ha köbun, haba at ame ca hnyi dit hnyi homagöuleny haginy mamoe, ke ame ölö bi ka hnyi ke gethen, e thibi at ae hok ta únyi me venöu. 2 Ke haba at ame dit hnyi homagöule e thibi at ame tuö mamoe. 3 Ame khöng ut kâu hnen at ame tuö homagöule; ke haba ta je mamoe, me adre me löng ifucin: ke e ame hawâ ien haleny ta je mamoe, me hum ödra but hnyöu ai. 4 E ka hia but hna haleny je mamoe hnyöu ai, e ame bân, ke haba ta je mamoe adre me he hoton: anyin adre me löng hmakhmetoâ ifucin. 5 Adre me ca he ka he hoton atkanyua ke adre me he ka kec gan: anyin adre me ca löng hmakhmetoâ ifucin ta je atkanyua. 6 Iesu ame ha ködra úhoúcu eling: ke adre me ca wâhmakhmetoâ ta je únyi e ame ha ködra.

7 Haba Iesu ame ha hmetu ködra, ka habe, E hnathu, e hnathu, inya oge me ha köbun, ka habe, Inya ang homagöule hobi kâu ta je mamoe. 8 Haba tavat hia thithö a bödrin, ka bilik bi, ödrin hnyat hok ta únyi me venöu: k' ame ca ling ödrin but ta je mamoe. 9 Inya ang homagöule, a ne ke at ame didrö unyik, e ame he ka möt, me didrö me didrut, k' ame he ka wâ jeú. 10 Ame ca o baú at venöu, ke so bi he ka venöu, me úhlingö me ohia: oge me o but m' adre me he ka hu möt, k' adre me he ka hu gâná. 11 Inya ang at ame tuö wia ta je mamoe: haba at ame tuö wia je mamoe, me e ame ham anyin möt hnân singiny ta je mamoe. 12 Ke haba at ame hok hwabân, wale ca at tuö mamoe bi, ke ca haleny minya bi ta je mamoe, haba at eling ame wâ luko ame he jem, me ame hna degecâ but ta je mamoe me kec, me ame úlú ödra luko, me ovesei ödra: 13 e ame kec dö anyin a e at ame hok hwabân, k' ame ca únykúme ka ta je mamoe. 14 Inya ang at ame tuö wia ta je mamoe; ke oge me wâhmakhmetoâ halek ta je mamoe, k' ame wâhmakhmetu nya minya hnen halek, 15 helâ me Kamök ame wâhmakhmetu nya, helâ minya me inya oge me wâhmakhmeto Kamök; ke inya oge me ham anyik möt hnân singiny ta je mamoe. 16 E hu minya ke ta je mamoe a halek, a ca hanen kak ang: ke úcu könya he ka hum ödra minya, ke adre me he ka löng ifucik; me me khaca thibi hnahat mamoe, ke khaca thibi at ame tuö. 17 Waleling ame hnyok könya

Cica, anyin a inya oge me ham anyik möt m' oge me he ka hom hmetu. 18 E ba at ame húgúnâ e gak, ke inya oge me ham ka únyi gak. E hu man gak he ka ham e, ke hu man minya gak he ka hom hmetu. Wale hnanyibu oge me kap únyi ga Cica.

19 Ke ame khekke lo hmetu but at Juda can ta je hofuc eling. 20 Ke se hia gadra adre me ha, ka habe, E but unyin at ang demoni, k' ame monu but; ieú gabun öbun e löng kâu? 21 Haingen keihen, ka habe, Haba ang, me ca ifucin at ae hu demoni unyin. Hawa, e khana demoni he ka obwela li emakan at ae wadröu?

22 Adre me bijeúâ bong adre me dilic uma kap hnyin hnyi Jerusalema; hnyi ke keihen huna ae megic; 23 ke haba Iesu ame vheno poretiko anyi Solomona hnyi uma kap. 24 Me ame úkhacaköu igigilö e at Juda me ha kâu, ka habe, U me he bi ka loloi öhmun ke ne o but kehö? A ne u Keriso, ha manená köhmun. 25 Iesu ame thu ködra, ka habe, Oge hia but ha köbun, ke öbun e ca kap: haba ta je huliwa oge me ányâ hnyi iö Cica, wale thibi e hnân ohnathu nya. 26 Ke öbun e ca kap anyin a ca halek ta je mamoe bi öbun. 27 A löng ut halek ta je mamoe ifucik, ke oge me wâhmakhmetu ödra, ke adre me he hotuk: 28 ke oge me ham ködra möt ame ca ba balua; ke adre me ca he ka mok nyiele balua, ke ba ke at ame he ka hugun' ödra únyi hnyi hnyamök. 29 Haba Cica, wale at ame ham ödra könya, me gan hmâ hon ta je únyi hia; ke ba at ae khana he ka húgún' ödra but únyi hnyi hnyamen Kamen. 30 Haba inya me Kamen, me öhmu khaca thibi. 31 Haba at Juda adre me hok veto hmetu he ka lûâ e. 32 Ke Iesu ame thu ködra, ka habe, E se hia ta je huliwa ae so oge hia but omanená köbun únyi ge Kamök; can ie huliwa öbun e lüö nya gan? 33 Haba at Juda adre me thu kâu, ka habe, Öhmun e ca lüö u can huliwa ae so, ke can bi bi gan; ke can minya anyin a u at, ke u me wiö u bi thö me Khong. 34 Iesu ame thu ködra, ka habe, Hawa, adre ca sihnalimen hnyi anyibun hnanyibu, ka habe, Oge ha, ka habe, Öbun ke je khong? 35 A ne hia but ha, ka habe, Ödrin je khong, wale tavat a o ködrin hofuc hwan Khong, (ke ca khana bi he ka ohavâ hna sihnalimen), 36 öbun e ha gan, wale hnen Kamen hna okabâ, me kunâ ka hnyi hmeledrany, ka habe, U me bi gan;

IOANE 11.

anyin oge me ha, ka habe, Inya ang Nokon Khong? 37 Oge ne ca mândrà ta je huliwa anyi Cica, ca köp nya öbun. 38 Ke o ge ne mândrà, eja ke ne öbun e ca köp nya, kap bi th' öbun ta je huliwa: m' öbun e he ka wâhmakhmeto me wâ ûnykúme a g' ame laba Kamen eú hnyik, ke inya eú hnyin Kamen. 39 Adre me elâm hmetu he ka kât e: me e ame he but ûnyi hnyi hnyamödra.

40 Me e ame he hmetu hoton Joridano, ka hnyi dok a bö Ioane ka bapataiso hnyin; ke e ame laba eling. 41 Me ame he but kâu tavat ae se hia, adre me ha, ka habe, A ca mândrà Ioane ke úöman: ke e hnathu ta je hofuc hia a ha Ioane ge at ang. 42 Ke se hia tavat adre me labageju elin kâu.

HNYIMAKAN 11.

EHU ke at ae mok, jia Lazaro at Bethania, hnyi taun anyi Maria me liamekeiny mē jia Maretha. 2 Haba Maria, me wale at ame osúâ Than ge muro, k' ame kot li can ge leúnen ban, haniny e a Lazaro at ame mok. 3 Ke haba li lahaniny, me ödru me úkhúnöng he ka ha kâu, ka habe, Taböny Than, mē wâ bi at u me betenge gan ame mok. 4 A löng ut Iesu, me e ame ha, ka habe, Ame ca he ka mekiny mok ang, ke so bi hnân ogânâ Khong, m' adre me he minya ka ogânâ Nokon Khong hnen e. 5 Haba Iesu ame betenge ga Maretha me liamekeiny mē me Lazaro minya. 6 E ame löng ae mok, ke e ame laba hmetu ju a lo bongon hnyi dok eling. 7 Hwaban e, e ame ha ka laten, ka habe, Ötin a hmetu Juda ai. 8 Me ame ha kâu laten, ka habe, Rabi, haba at Juda adre me elâm he ka lúu u ge veto, hawa, u me he hmetu kâe? 9 Iesu ame thu, ka habe, Hawa, ca twelv awa hnyi bong? A ne he ke at hnyi lany e ame ca he ka thö, anyin a e ame wâ melam eang hmeledrany. 10 Ke a ne he at hnyi hnyinghet, e ame he ka thö, anyin ae ba melam gan. 11 E ame ha hofuc eling, ke hwaban e, e ame ha ködra, ka habe, A mokut ut Lazaro a hanötin; ke oge me he bi nya ka ohmâkâ e hnyi hna mokut. 12 Me ame ha laten, ka habe, Taböny Than lö, a ne mokut, e ame he ka möt. 13 Haba Iesu ame ha a ga mokcu: ke ödrin e ûnykúme a g' ame ha ge mokut me menâ. 14 Me haba Iesu ame ha manenâ ködrin, ka habe, A mokcu Lazaro. 15 Ke inya oge me senyin gabun, anyin

ae hiö nya e, m' öbun e he bi ka labageju; ötin he thö kâu. 16 Ke ame ha Toma, adre wenyö Didumo, ka hnyat a tha laten mē, ka habe, Ötin he minya m' ate me he ka tha mok mē.

17 Me ame o but Iesu, ke e ame wâ a vak ut bongon hnyin erkemok. 18 Haba Bethania me Jerusalema, me úhakekeny helâke me fiftin je setadia: 19 ke se hia at Juda adre me he but kö Maretha me Maria he ka otubweli ödru anyina hanidru. 20 A löng ut Maretha a g' ame o but Iesu, me e ame he he ka úkhanö mē: ke haba Maria, me e ame laba biju eiö hnyin uma. 21 Haba Maretha ame ha kö Iesu, ka habe, Than lö, a ne hnâm ang, ma ca he ka mok hanik. 22 Ke walang ang, e khanö nya a g' ame he Khong ka ham köu ta je ûnyi hia thithö u me he ka sumâtá gan. 23 Iesu ame ha kâu, ka habe, Ame he ka möt hmetu hanâm. 24 Haingö Maretha kâu, ka habe, E khanö nya a g' ame he ka möt hmetu hnyi úen möt hmetu hnyi bong a obiny. 25 Iesu ame ha kâu, ka habe, Inya ang möt hmetu, me möt minya: haba at ame he ka labageju könya, eja ke ne a ne mokcu, e ame he ka möt: 26 ke haba at ame möt me labageju könya e ame ca he ka mok nyiele balua. Hawa, u me kap e! 27 Haingen ame ha kâu, ka habe, Eke Than, inya oge hia but kap a u thibi Keriso a Nokon Khong, ame he ka o eang hmeledrany. 28 E a hia but ha e, me e ame he but, me hawâ duöngi Maria, a liamekeiny mē, me ha, ka habe, A o thö ang At úne, ke e ame hawö u. 29 E a löng ut, me ame ie todrö, me he kâu. 30 (Ke tiga ca o bi Iesu ka hnyi taun, ke e ame tiga laba hnyi dok e ame úkhanö me Maretha hnyin.) 31 Ke haba at Juda adre tha laba mē eiö hnyin uma, a hnyat otubwelá, adre me ö Maria ame ie tot me he hnyöu ai, me adre me he hoton, adre me ûnykúme a g' ame ke ka hnyi erkemok he ka tenge eling. 32 Ame o but Maria ka hnyi dok ae hnyin Iesu, me e ame ta ju ka hnyi li can, me ha kâu, ka habe, Taböny Than, a ne hnâm ang ma ca he ka mok hanik. 33 Iesu ame wâ e ame tenge, me at Juda adre me tha he mē adre me hnyi tenge, me e ame mâng eú hnyi hnyekon, me hmak hmönyin, 34 me ha, ka habe, Ewa dok öbun e ip e hnyin! Haingödra kâu, ka habe, Than lö, aiö u ka wâ. 35 Iesu ame tenge. 36 Me ame ha at Juda, ka habe, Wâ bi, úganiny anyin ibe tengiö kâu! 37 Ke haingen keihen, ka

IOANE 12.

habe, Hawa e ca khana at e, wale at a obwela li emakan at ae wadröu he ka thawá me me ca he ka mok bi at ang? 38 Iesu ame máng hmetu eú hnyi hnyekon, me o ka hnyi erkemok, wale op, ke adre ip veto hnyi hnyimen. 39 Iesu ame ha, ka habe, Hom but veto. Haingö Maretha a haniny e a mokcu, ka habe, Thanlö, e bon dut, anyin a vak ut bongon. 40 Iesu ame ha káu, ka habe, Oge ca ha kôu, ka habe, U je ne he ka labageju, me u me he ka wá hmanenanginy Khong? 41 Me adre me hom but veto. Ke haba Iesu ame bwele thö görany ai me ha, ka habe, Cica lö, inya oge me ole kôu anyin a u me ling nya. 42 Ke e khanö nya a u me ling nya bala : ke oge me ha anyin a ödra se adre me tot igigili nya, m' adre me he ka kap a u je kunö nya. 43 E ame ha hofuc e, me e ame hongot hwege thö, ka habe, Lazaro lö, didrut. 44 Me ame didrut at a mokcu a g' adre lan li can me li benyin ge manoiny erkemok ; k' adre lan hnyimakan ge ecmáno. Iesu ame ha ködra, ka habe, Thang ut e, me hna but me me he but.

45 Me ame labageju káu at Juda ae se, a hnyat adre me o kö Maria, k' adre me wá ta je únyi e ame mádrá. 46 Ke haba keihen gadra, me adre me he but ka ta je Faresaio, me ha ködra ta je únyi ame ányá Iesu.

47 Me haba je taben tavat bihut me ta je Faresaio adre me hawá úhnenamö, me haingödra, ka habe, Hawa gata? anyin ae se hia but ta je úöman ame ányá at e. 48 Ate ne he ka hna e helâe, me ame he tavat hia ka labageju káu : me ame he ka o at Roma bi ka húgúná hnöta me ita minya hnyei. 49 Ke haba ke at gadra wale Kaiafa a taben tavat bihut hnyi huna eling, ame ha ködra, ka habe, E ba hmönyin ong únyi ae khan' öbun, 50 ke öbun e ca únykúme, ka habe, e únyi hnathu köbun a ga mok bi at a khaca hnân hwaban tavat ae se hia, me me ca mok bi hnyei hia. 51 Ke e ame ca ha e a ka únyi gan : ke so bi e taben tavat bihut hnyi huna eling, k' ame perofeta a g' ame he ka mok ; Iesu hnân hwaban hnyei eling ; 52 ke ca hake hnân hnyei eling, ke so bi m' adre me úkhacaköu lakon Khong adre vese, m' adre me khaca thibi. 53 Ke hwân hnyi bong eling adre me si hnân he ka hlingá e.

54 Waleling me me ca he manen hmetu Iesu hnyi hnyimakan at Juda, ke e ame he but ka hnyi ke keihen hnyei ae hakekeny

ka hnyi hnyebuba, ka hnyi taun Efaraima ien, k' ame tha laba eling me laten. 55 E hakekeny jut paseka anyin at Juda : ke se hia tavat adre me he Jerusalema ai úhedra he e, he ka obosoi ödra e me tiga ca úen paseka. 56 Ke adre me elöm Iesu, me úhnenamököuá hnyi úen adre me tot hnyin uma kap, ka habe, Ieú únykúmenöbun? Hawa, e ame ca he ka he jem ka hnyi bijeú? 57 Haba je taben tavat bihut me ta je Faresaio adre me otilá hnanyibu, ka habe, A ne ke at ae khana dok ame laba hnyin, hamen he ka omanená m' adre me he ka kát e.

HNYIMAKAN 12.

KE tiga siks biju ta bong adre me he ka ányá paseka, me Iesu ame he Bethania ai, wale dok a laba hnyin Lazaro waleji a omelö úheny hnyi hna mok. 2 Me ödrin e bi sahac eling hobi káu : ke haba Maretha ame bi aten ; ke Lazaro ke at gadrin ame hnyi han mē. 3 Maria ame hom litara tang muro ae hing narado ae gan hwaban, me hneú káu li ca Iesu, me kot li can ge leúnen ban : ke unöngötö uma ge bunen muro. 4 Me ame ha ke at unyin laten, jia Juda Isakariota, at ame he ka alecuá e, 5 ka habe, Ieú adre me ca úco gan muro eang me hnân hwaban je denari a theri haded, m' adre me he ka ham ka ta je theduoc? 6 Ame ca ha e anyin ame betenge ge ta je theduoc ; ke anyin bi a e at venöu, ke e unyin tang, ke e ame hom ta je únyi hnyin tang. 7 Iesu ame ha, ka habe, Ca háia bi momo, e ame ip e hnân hobi káu bong he ka könim nya hnyin. 8 E bala unyibun ta je theduoc ; ke oge me ca he bi nya ka laba bala unyibun.

9 Me ame löng houmonu a tavat Juda a e but ling : me adre me o thö ca hake ga Iesu thibi, ke adre me he minya ka ö Lazaro, waleji a omelö úheny hnyi hna mok. 10 Ke a úhnenamö je taben tavat bihut he ka hlingö Lazaro minya ; 11 anyin ae se hia at Juda adre me he me labageju kö Iesu únyi gan.

12 Haba nyi, e se hia tavat adre me he ka hnyi bijeú, ke adre me löng a g' ame he ka o Iesu hnyi Jerusalema, 13 me adre me bi lan pama me he ka úkhanö mē, me hongot, ka habe, Hosana : hnahic hnen Than Isaraela, ame o but hnyi ien Than. 14 Ke a wá but Iesu ke asina ae tiga úhnyúkong, me e ame tabá e, helâ me hna

sihnalimen, ka habe, 15 U ca he ka ot, hlu nöku Ziona ; wá bi ame o but Tuhám, ame tabá nokon asina. 16 Ame ca wáhma-khmetoá laten ta je hofuc eling únyi hnyi can : ke adre hia but oganó Iesu, me ödrin e únykúme a g' adre hia but sihnalimen ta je únyi e gan, ke adre me ányá ta je únyi e káu. 17 Me ame ohnathoá hnen tavat ae se hia a tha ödra mē waleji hnyi hnen hna hawo Lazaro únyi hnyi hnyin erkemok, me omelö e únyi hnyi hna mok. 18 Wale minya me me úkhanö mē tavat ae se hia, anyin adre löng ut hnen hna mádrá úöman eling. 19 Anyin a wale haba ta je Faresaio adre me úhnenamökouá, ka habe, Wá bi, a g' ame ca tubun : wá bi, ame he hoton hmeledrany hia.

20 Wale keihen ta je Heleni unyin tavat adre me he he ka hnyi hmi minya hnyi bijeú : 21 me adre me he but kö Filipo at Bethesaida hnyi Galilaia, me hnö e, ka habe, Taböny, öhmun be hnyi ö Iesu. 22 Filipo ame he me ha kö Anederea : haba Anederea me Filipo ödru me he me ha kö Iesu. 23 Ke haba Iesu ame thu ködrin, ka habe, A o but awa he ka ogáná Nokon at. 24 E hnathu, e hnathu, inya oge me ha köbun, A ne kölu ka hnyi káná ke wan hwit, ke ame ca bobot bi, ame he ka hake mokut ; ke a ne bobot, ame he ka wa se hia. 25 Haba at ame hnyoká anyin möt, me ame he ka ohia e ; ke haba at ame húkotiá anyin möt eang hmeledrany, e ame he ka tuö e ke ne o but ka hnyi möt ame ca ba balua. 26 A ne ke at ame he ka bi atök, e so e ame he hotuk ; ke haba dok o ge me he ka laba hnyin, me ame he minya atök ka laba eling : a ne he ke at ka bi atök ame he Cica ka ogáná e. 27 E hlohlo hnyekuk walang ang ; ke ieú oge me he ka ha ? Cica lö, bethe omeli nya hnyi úen ang. Ke so bi can e oge me o but ka hnyi úen ang. 28 Cica lö, ogáná thö iám. Me ame o but hofuc únyi hnyi drany, ka habe Oge hia but ogáná, ke oge me he hmetu ka ogáná. 29 Haba tavat adre me útilen eling adre me löng me ha, ka habe, Hendreng ang : haingen keihen, ka habe, Angela ame fuc káu. 30 Iesu ame thu, ka habe, A ca o hofuc e hnán hobi könya, ke so bi hnán hobi köbun. 31 Adre me he walang ang ka owisa hmeledrany : ke adre me he walang ang ka obá tuhan hmeledrany ang. 32 Ke haba inya, adre ne ogörany nya únyi eang hmeledrany, me oge me he bi nya ka lelö tavat hia thithö könya. 33 E

ame ha e, k' ame omanená bongon mok e ame he ka mekiny. 34 Haba tavat ae se hia adre me thu káu, ka habe, Öhmun e löng ut únyi hnyi hnanyibu a g' ame he ka tethmä Keriso nyiele balua : ieú gam u me ha a ga úcú he ka ogöranyá Nokon at ? ia Nokon at eling ? 35 Haba Iesu ame ha ködra, ka habe, E okhulit biju melam unyibun. He thö e me tiga e unyibun melam, wá e nye o but köbun lit : haba at ame he hnyi lit, me ca khana dok e ame he ka hnyin. 36 Kap ju melam e me tiga e unyibun melam, m' öbun e lakon melam bi.

Iesu ame ha hofuc e, me ame he but, k' ame labö duöng gadra. 37 Ke so bi, eja ke ne a ne ányá ta je úöman ae se hia hnyi hnyimaködra, adre me ca labageju káu : 38 me me hwádá hofuc ho Isaia perofeta waleji e ame ha, ka habe,

Than lö, ia ame labageju ka hnöhmun hna thumeto ?

K' adre me omanená kö ia benyin Than ?

39 Anyin a wale e ca khan' ödra he ka labageju, anyin a haingö Isaia minya, ka habe,

40 E ame owadruá ta je emaködra, ke e ame okhötá je hnyekudra ;

Wá adre nye wá ge je emaködra, me únykúme ge je hnyekudra,

Wá adre nye hmetu,
M' iny omeli ödra but.

41 Haba Isaia ame ha ta je únyi e, anyin a e ame wá anyin hmanenang ; k' ame háia e. 42 Ke so bi e se hia ta je taben adre me labageju káu ; k' adre me ca ha manená bi, can ta je Faresaio, wá adre nye ob' ödra but únyi hnyi sunago : 43 anyin ae nua wedra a g' ame he ka ogán' ödra hnen tavat, hon wedra a g' ame he ka ogán' ödra hnen Khong.

44 Ame ha hwegiá Iesu, ka habe, Haba at ame labageju könya, me ame ca labageju bi könya, ke káu minya bi at a kunö nya. 45 Ke haba at ame ö nya ; me ame wá minya at a kunö nya. 46 Inya oge me o m' inya melaminy hmeledrany, me me ca laba hnyi lit at ame labageju könya. 47 Ke a ne löng hok hofuc hnen ke at, k' ame ca vheno bi, oge me ca he bi nya ka owisa e, anyin oge me ca o he ka owisa hmeledrany, ke so bi he ka omelö hmeledrany. 48 Haba at ame digic nya, k' ame ca kap bi hok hofuc, me hu bi at ame owisa káu : haba hofuc, waleji oge me ha, me wale at ame he ka owisa káu hnyi bong a obiny.

49 Anyin a inya oge me ca fuc a ka únyi gak ; ke haba Kamen, wale at a kunö nya, me e ame hna kõnya hnanyibu a hanymök he ka ha, me únyi minya oge me he ka únö. 50 Ke e khandö nya a haba anyin hnanyibu, me möt ame ca ba balua : me haba ta je hofuc oge me ha, me helâ me hnen Kamen hna ha kõnya, me wale hnök hna ha.

HNYIMAKAN 13.

A TIGA ca bijeúâ paseka, ke a wâ Iesu a ga o but únen he ka he but ka Kamen úheny ang hmeledrany, ke a hia but hnyokâ lahanen eang hmeledrany, me e ame hnyoki ödra ke ne o but obiny. 2 Haba hnyi únen han sahac, ke a hia but diabolö ip hnyi hnyeku Juda Isakariota nöku Simona he ka alecuâ e, 3 ke a wâ but Iesu a g' ame hia but hna ta je únyi hia ka hnyi hnyamen hnen Kamen, ke úheny unyin Khong, k' ame he ka hmetu ka Khong, 4 awe e ame todrö hnyi hna han, me uny jut anyin je úkhau, me hom ecmano me weikâ. 5 Ke e ame hingâlâ köiö ka hnyi kaia, me hwân he ka hneú je li can laten, me kot ge ecmano ame weikâ. 6 Me e ame he but kö Simona Peteru. Me e ame ha, ka kabe, Than lö, u me he bi ka hneú li cak? 7 Iesu ame thu kâu, ka habe, Haba únyi oge me ányâ, me ca khandö u walang ang, ke u me he ka wâhmakhmetoâ nyiele. 8 Haingö Peteru kâu, ka habe, U me ca he bala ka hneú li cak. Iesu ame thu kâu, ka habe, Oge ne ca osúö u, me ba jekhom unyik. 9 Haba Simona Peteru ame ha kâu, ka habe, Than lö, ca hake li cak thibi, ke so minya li hnyamök me bök minya. 10 Iesu ame ha kâu, ka habe, Haba at adre me ösúâ, me úcú he ka hneú li can thibi, me ame he ka tha kalaöt hia but : öbun e kalaöt ut ke ca öbun hia bi. 11 Anyin a e ame wâhmakhmetoâ at ame he ka alecuâ e ; waleling me me ha, ka habe, Öbun ca kalaöt hia bi.

12 A hia but hneú je li cadrin, e ame hom hmetu je úkhaúen, me laba hmetu ju, me e ame ha ködrin ka habe, Hawa öbun e wâhmakhmetoâ hnök hna ányâ köbun? 13 Öbun e hawo nya, ka habe, At úne me Than : ke so hnöbun hna ha, anyin a eke. 14 Oge ne Than me At úne, ke oge hia but ösúâ je li cabun, me úcú köbun he ka úösúâköuâ je li cabun. 15 Anyin oge hia but ham köbun tulut, me öbun e he ka ányâ helâ me hnök hna ányâ köbun.

16 E hnathu, e hnathu, inya oge me ha köbun, ka habe, E ca gan aten hon tuhan ; ke ca gan minya at adre kunâ hon at a kunâ e. 17 A ne khandö öbun ta je únyi e, hnöbun hnahic öbun e ne he ka ányâ e. 18 Oge me ca hai öbun hia : e khandö nya hnök je hna úca : ke so bi me me hwâ-dâ hna sihnalimen, ka habe, Haba at ame an ök jeú me ame húki nya ge ohmáiny can. 19 Oge me ha ang köbun ke tiga ca hwâdâ bi, hobi kâu e ka hwâdâ thö, m' öbun e he ka labageju a inya e. 20 E hnathu, e hnathu, inya oge me ha köbun, ka habe, Haba at ame kap at oge kunâ, me e ame köp nya minya ; ke haba at ame köp nya, me e ame kap minya at a kunö nya.

21 Ke a hia but Iesu ha e, e ame hmak hnyekon, me thumetu me ha, ka habe, E hnathu, hnathu, oge me ha köbun ame he ke at gabun ka alecuo nya. 22 Haba laten ödrin e ibweleköu, me úcetköuâ hnen hna ha gan. 23 Ke wale ke aten ame laba hnyi úlai Iesu, ame hnyok kâu Iesu. 24 Haba Simona Peteru ame atmémakâ e, me ha kâu, ka habe, Ha thö at e ame ha. 25 Me e ame hwiö hnyi úlai Iesu me ha kâu, ka habe, Than lö, ia? 26 Me Iesu ame thu, ka habe, Haba at oge me he ka ham újeú kâu iny ka hia but hneú. Ke a hia but hneú, e ame hom me ham kö Juda nöku Simona Isakariota. 27 Ke hwaban dö ujeú, ame didrö Satana eú hnyi hnyekon. Haba Iesu ame ha kâu, ka habe, Haba únyi u me he ka ányâ, me ányâ mweimweiâ thö. 28 K' ame ca wâhmakhmeto ke at gadrin ödrin e laba hnyi laulau ge can e ame ha hofuc eling kâu. 29 Haba keihen ödrin e únykúme anyin a e unyi Juda tang, me ame ha kâu Iesu, ka habe, Úco thö únyi ae úcú ötin ka hnyi bijeú ; k' ame ne ha la, he ka ha omjehen ta je theduoc. 30 A hia but kap ujeú e ame ie didrut : ka lit ut.

31 E ame didrut, k' ame ha Iesu, ka habe, Adre me ogânâ walang ang Nokon at, ke adre me ogânâ Khong únyi gan ; 32 ke ame he Khong ka ogânâ e a ka únyi gan, k' ame he ka ie ogânâ e. 33 Lakuk lö, e ca beú biju úök unyibun. Öbun e he ka elöm nya : ke haba hnök hna ha ka at Juda, me oge me ha minya walang ang köbun, ka habe, E ca khandö öbun he ka he ka hnyi dok oge me he ka hnyin. 34 Inya oge me ham köbun hnanyibu a teb únyi, a öbun e he ka ibetengiököu ; oge hia but

betenge köbun, e so öbun e he ka helâe wale he ka ibetengiökou öbun. 35 Wale me me he tavat hia thithö ka wâhmakhmetoâ a latök öbun, hnyi hnöbun hna ibetengiökou.

36 Haba Simona Peteru ame ha kâu, ka habe, Taböny Than, u me he kâ? Iesu ame thu, ka habe, E ca khanö u walang ang he ka he hotuk ka hnyi dok oge me he ka hnyin; ke u me he ka he hotuk nyiele. 37 Haingö Peteru kâu, ka habe, Than lö, anyin a ieu ae ca khanö nya he ka he hotom walang ang? oge me he bi ka ham anyik möt hnân hobi köu. 38 Iesu ame thu, ka habe, Hawa u me he ka ham anyâm möt hobi könya? E hnathu, e hnathu, inya oge me ha köu, ka habe, Ame tiga ca he bi ka kokok khoto, me u me he bi ka ibi okun ivinö nya.

HNYIMAKAN 14.

CA hlohlo je hnyekubun : öbun e labageju ka Khong, labageju minya ju könya. 2 E se hia ta je hnyeule hnyi uma umö Cica; a ne ba m' oge hia but ha köbun; anyin oge me he but he ka anyâwia hnöbun. 3 Ke oge ne he but ka anyâwia ke dok hobi köbun, oge me he ka o hmetu, me oge me he ka köp öbun könya; me haba dok oge me laba hnyin, m' öbun e he ka laba hnyin minya. 4 Ke haba dok oge me he ka hnyin, e khan' öbun deny. 5 Haingö Toma, kâu, ka habe, Taböny Than, e ca khan' öhmun dok u me he ka hnyin; ke öhmun a kâmâu ka khân' öhmun deny? 6 Iesu ame ha kâu, ka habe, Inya ang gethen, me hnathu, me möt: e ba at ame he ka he kö Cica, e ka ca mē bân ka o könya. 7 Öbun e ne wâhmakhmetu nya, m' öbun e wâhmakhmetu Cica minya: ke hwân dö ang öbun e wâhmakhmetoâ e, me öbun e hia but wâ e. 8 Haingö Filipino kâu, ka habe, Taböny Than, omanenâ thö köhmun Kamen, me me soju köhmun. 9 Iesu ame ha kâu, ka habe, E kuek ut unyibun, ke ca khanö u bala inya Filipino? haba at ame ö nya, me e ame wâ minya Kamen; ke a hawa, u me ha, ka habe, Omanenâ thö köhmun Kamen? 10 Hawa, u me ca ünüküme bi a inya eü hnyi hnyin Kamen, ke Kamen eü hnyi hnyik? haba ta je hofuc wale oge me ha köbun, me o ge me ca ha thiju a ka ünüi gak: ke haba Kamen at ame laba eü hnyik e ame anyâ anyin ta je huliwa. 11 Labageju nya ju a inya eü

hnyi hnyin Kamen, ke Kamen eü hnyi hnyik: a ne ca kap e, labageju nya ju can ta je huliwa. 12 E hnathu, e hnathu, inya oge me ha köbun, Haba at ame labageju könya, me e ame he ka anyâ minya ta je huliwa oge mädra; ke ame he ka anyâ ta je huliwa ae gan hon e; anyin a inya oge me he ka Kamen. 13 Ke haba ta je ünüi hia thithö öbun e he ka sumâtâ hnyi iök, me oge me he ka anyâ me me he ka ogânâ Kamen hnen Nokon. 14 Öbun e ne he ka sumâtâ ke ünüi hnyi iök, oge me he bi nya ka anyâ. 15 Öbun e ne hnyok könya, öbun e he ka vheno anyik ta je hnanyibu. 16 Ke oge me he ka khöu ka Kamen, me me he ka ham köbun ke Ühadruo, me me he ka tha e m bun nyiele balua, 17 wale Hanu ünüi gan hnathu: ae ca khana bi hmeledrany he ka kap e; anyin adre me ca wâ e, k' adre me ca wâhmakhmetoâ e: ke öbun e wâhmakhmetoâ e; anyin a e ame laba unyibun, k' ame he ka laba eü hnyi je hnyekubun. 18 Oge me ca he ka hn' öbun helâ me je nakahme; ke oge me he ka o köbun. 19 E okhulit biju üen me ame ca he hmeledrany ka ö nya; ke öbun e he ka ö nya: anyin a oge me möt, me öbun e he minya ka möt. 20 Öbun e he ka wâ hnyi bong eling a inya eü hnyi hnyi Cica, ke öbun eü hnyi hnyik, ke inya eü hnyi hnyibun. 21 Haba at ae hu gan anyik je hnanyibu, k' ame vheno e, me wale bi e at ame hnyok könya: haba at ame hnyok könya, me ame he Cica ka hnyok kâu, ke oge me he bi nya ka hnyok kâu, ke oge me he minya ka omanenö nya kâu. 22 Me ame ha kâu Juda (ca Isakariota) ka habe, Than lö, Ama kâmâu a u me he ka omanenö u köhmun bi ke ca ka hnyi hmeledrany minya? 23 Iesu ame thu kâu, ka habe, A ne ke at ame hnyok könya, e ame he ka vheno hok hofuc: ke ame he Cica ka hnyok kâu, ke öhmu me he ka o kâu me tha laba mē. 24 Haba at ame ca hnyok könya, me e ame ca vheno bi hok hofuc: ke haba hofuc öbun e löng, me ca ünüi bi gak, ke ünüi bi ge Kamen at a kunö nya.

25 Oge hia but ha ta je ünüi e köbun, k' oge me tiga tha laba möbun. 26 Ke haba Ühadruo, wale Hanu Kap ame he Kamen ka kunâ hnyi iök, me e ame he ka n' öbun ge ta je ünüi hia, me öünükümi öbun ge ta je ünüi hia oge hia but ha köbun. 27 Oge me ip hnahic unyibun; oge me ham köbun anyik hnahic: oge me ca ham köbun helâ me hna ham hnen hmeledrany.

IOANE 15.

Ca hlohlo je hnyekubun, ke ca ot bi. 28 Öbun e hia but löng hnök hna ha köbun, ka habe, Oge me he but, ke oge me he ka hmetu köbun. Öbun e ne hnyok könya, öbun e he ka senyin anyin oge me he ka Kamen : anyin ae gan hmâ Kamen huk. 29 Ke oge me ha köbun walang ang, ke tiga ca hwädâ, me öbun e he ka labageju e ka hwädâ thö. 30 Oge me ca he hmetu ka ose hia fuc köbun, anyin ame he jem tuhan eang hmeledrany : 31 ke ba anyin ünyi ünyi gak : ke so bi me me wâ thö hmeledrany a inya oge me hnyok ka Kamen, ke oge me mâdrâ helâ me hnen Kamen hna hûna könya. Todrö, ötin e he thö eang.

HNYIMAKAN 15.

INYA eang vine ae hnathu, ke Kamök at ame belökâ. 2 E ame hom but ta je vheiny gak ame ca wa : ke haba ta je vheiny ae wa, e ame ânyâwia, me me wa gan dut. 3 Öbun e kalaöt ut hnyi bong ang ge hofuc oge hia but ha köbun. 4 Laba ju öbun eü hnyi hnyik, ke inya minya eü hnyi hnyibun. E ca khana vheiny he ka wa thibut, a ne ca tot hnyi vine ; ke helâe e ca khan' öbun, öbun e ne ca laba eü hnyi hnyik. 5 Inya ang vine, öbun ta je vheiny : Haba at ame he ka laba eü hnyi hnyik, inya minya eü hnyi hnyin, wale at ame wa gan dut : anyin ae ca khan' öbun ka ânyâ ke ünyi öbun e ne úsâkâüö mönya. 6 A ne ca laba ke at eü hnyi hnyik, adre me he ka degec ut helâ me vheiny, me ame he ka meleca thö ; ke adre me úkhacaköuâ thö, me khûâ ka hnyi meic, me adre me thong degecâ but. 7 Öbun e ne laba eü hnyi hnyik, ke hok ta je hofuc ame laba minya hnyi je hnyekubun, öbun e he ka sumâtâ ünyi öbun e weny, me adre me he ka ânyâ hobi köbun. 8 Hnân ogânö Cica, öbun ka he ka wa gan hmâ ; ke helâe öbun e he ka bi latök. 9 Inya oge me hnyok köbun helâ me Kamen ame hnyok könya : tet hmâ ju öbun hnyi anyik ibetengiö. 10 Öbun e ne vheno anyik ta je hnanyibu, öbun e he ka tet hmâ hnyi anyik ibetengiö ; helâ me inya oge me vheno hnanyibu anyi Cica me oge me tet hmâ hnyi anyin ibetengiö. 11 Oge hia but ha köbun ta je ünyi e, me me eü hnyi je hnyekubun anyik senyin, me me bekhöt dö anyibun senyin. 12 Walang anyik hnanyibu, ka habe, Öbun e he ka

ibetengiököu helâ me hnök hna betenge köbun. 13 A ne he ke at ka ham anyin möt hobi kâu lahanen, e ba betenge ae beönua hon e. 14 Öbun e ne he ka ânyâ ta je ünyi oge hûna köbun, je lahanök öbun. 15 Oge me ca ha hmetu, ka habe, lathnyaba ; anyin ae ca khana athnyaba ünyi a ânyâ tuhan : ke oge me hai öbun a lahanök ; anyin a haba ta je ünyi hia oge me löng ünyi ga Cica, m' oge hia but omanenâ köbun. 16 Öbun e ca úcö nya, ke oge me úc' öbun, me otil' öbun, m' öbun e he ka he me wa, me tet hmâ ju wan gabun : me me he Kamen ka ham köbun ta je ünyi hia öbun e he ka sumâtâ hnyi iök. 17 Oge me hûna köbun ta je ünyi e, m' öbun e he ka ibetengiököu. 18 A ne hûkötî' öbun hmeledrany, khan' öbun ju a ga bân ka hûkötîö nya. 19 Öbun e ne je lahanen hmeledrany, ame he hmeledrany ka betenge ka lahanen : ke anyin a öbun ca lahanen hmeledrany, ke oge me úc' öbun ünyi eang hmeledrany, waleling me me hûkötî' öbun hmeledrany. 20 Ünykúme ju hofuc oge me ha köbun, ka habe, E ca gan athnyaba hon tuhan. Adre ne hia but oveci nya, adre me he bi ka oveci öbun ; ke adre ne hia but vheno hok hofuc, adre me he bi ka vheno hobun hofuc. 21 Ke adre me he ka ânyâ ta je ünyi hia eling köbun can iök, anyin a ca khan' ödra at a kunö nya. 22 Oge ne ca o ehac he ka thumetu ödra, ame ne ba anyidra monu : ke walang ang e ba ünyi hnân haisoâ anyidra monu. 23 Haba at ame hûkötîö nya, me e ame hûkötîö Cica minya. 24 Oge ne ca mâdrâ unyidra ta je huliwa ae tiga ca mâdrâ ge at, ame ne ba anyidra monu : ke walang ang adre hia but wâ me hûkötîö Cica me inya minya. 25 Waleling me me hwädâ but hna sihnalimen hnyi anyidra hnanyibu, ka habe, Adre hia but hûkötîö nya ke ba can. 26 Ke e ka o Úhadruo wale oge me he ka kunâ köbun ünyi ge Kamen, wale Hanon hnathu, at ame he but ünyi ge Kamen, me e ame he ka ohnathu nya : 27 ke öbun minya öbun e ohnatho, anyin a öbun e laba unyik ünyi hnyi can.

HNYIMAKAN 16.

OGE hia but ha ta je hofuc e köbun, m' adre me ca he ka ohaü' öbun. 2 Adre me he ka ob' öbun ünyi hnyi ta je sunago : eke, ame he ka o üen, a g' ame he

IOANE 17.

at ka hling' öbun, me únykúme a e ame bi aten Khong. 3 Ke adre me he ka ányá ta je únyi e anyin ae ca khan' ödra inya me Kamen. 4 Ke oge hia but ha ta je hofuc e köbun hobi káu e ka o but úen, öbun e he ka únykúme hnök hna ha ta je únyi e köbun. Ke oge me ca ha köbun ta je únyi e únyi hnyi can, anyin a tha inya möbun. 5 Ke walang ang inya oge me he but káu at a kunö nya; ke ba ke at gabun a hnei nya, ka habe, U me he ká? 6 Ke unöngötö je hnyekubun ge hlöuhlöu hnyi hnök hna ha ta je únyi e köbun. 7 Ke so bi, inya oge me ha köbun hnathu, ka habe, E so hnân hobi köbun iny ka he but; anyin a oge ne ca he, me ame ca he ka o köbun Úhadruo; ke oge ne he but me oge me he ka kuná e köbun. 8 Ke haba e, e ka o but, e ame he ka ohmáká hmeledrany ge hwakecin ae kong, me hwakecin ae wisa, me hna owisa: 9 ge hwakecin ae kong, anyin adre me ca labageju bi könya; 10 ge hwakecin ae wisa anyin a inya oge me he but ka Kamen, ke öbun e ca he hmetu ka ö nya; 11 ge hna owisa anyin adre hia but owisa tuhan eang hmeledrany. 12 E hu bala gak ta je hofuc ae se hia he ka ha köbun, ke ca khan' öbun he ka kap walang ang. 13 Ke so bi e ka o but e, wale Hanon hnathu, me e ame he ka su öbun ka hnyi ta je hnathu hia: anyin a e ame ca he ka ha únyi gan bi; ke e ame he ka ha ta je únyi e ame löng: ke e ame he ka omanená köbun ta je únyi ame he ka o. 14 E ame he ka oganö nya: anyin a e ame he ka hom but únyi gak me omanená köbun. 15 Anyik ta je únyi hia anyin Kamen: anyin a wale oge me ha a e ame he ka hom but gak, me omanená köbun. 16 E me okhaca, me öbun e ca he hmetu ka ö nya; ke me okhaca hmetu, me öbun e he ka ö nya. 17 Me ame úhakouá keihen laten, ka habe, Ieú ang ge hnen hna ha kötin, ka habe, Me okhaca, me öbun e ca he but ka ö nya; ke me okhaca hmetu, me öbun e he ka ö nya: me, Anyin a inya oge me he but ka Kamen? 18 Me adre me ha, ka habe, Ieú ang a hnen hna ha, ka habe, Me okhaca? E ca khan' ötin hnen hna ha. 19 A wá but Iesu a ödrin e behnö e, me e ame ha ködrin, ka habe, Hawa, öbun e úhnökouá hnök hna ha köbun, Me okhaca, me öbun e ca he hmetu ka ö nya, ke, me okhaca hmetu me öbun e he ka ö nya? 20 E hnathu, e hnathu, inya oge me ha köbun, ka habe, öbun e he ka tenge me tenge

thungaú, k' ame he hmeledrany ka senyin: öbun e he ka hlöuhlöu, k' adre me he ka wia anyibun hlöuhlöu me me senyin bi. 21 E ka vec dö hnyekon momo a erkin, me e ame hlöuhlöu anyin a o but úen: ke e ka o but wanakat me e ame ca únykúme hmetu anyin vec, anyin ame senyin a ga hnokoá ke at ka hnyi hmeledrany. 22 E hu gabun walang ang hlöuhlöu: ke oge me he hmetu ka iouny m' öbun, me ame he je hnyekubun ka senyin, ke ba at ame he ka ohia anyibun senyin. 23 Ke ba únyi öbun e he ka hnö gak hnyi bong eling. E hnathu, e hnathu, inya oge me ha köbun. Haba ta je únyi hia öbun e he ka sumátá ge Kamen, me e ame he ka ham köbun únyi hnyi iök. 24 E tiga ba únyi öbun e hnyi sumátá hnyi iök: sumátá thö, m' öbun e he ka kap bi, me me bekhöt ut anyibun senyin.

25 Oge hia but ha ta je hofuc e hnyi úhöücú: ke ame he ka o úen oge me ca he hmetu ka fuc köbun hnyi úhöücú, ke oge me he ka ha manená köbun ge Kamen. 26 Hnyi bong eling öbun e he ka sumat hnyi iök: ke oge me ca ha köbun a oge me he ka hic ka Kamen hnân hobi köbun; 27 anyin a Kamen ame betenge gabun, can öbun e hnyok könya, ke can öbun e kap a oge me o únyi ge Kamen. 28 Oge me he but úhek unyin Kamen, me o eang hmeledrany; ke oge me he hmetu ka hna hmeledrany me he ka Kamen. 29 Haingen laten, ka habe, Wá bi, u me ha manená walang ang, ke u me ca ha hmetu je úhöücú. 30 E khan' öhmun dut walang ang a u me wá ta je únyi hia, ke ca únyi hnathu e ka he ke at ka hnei u: anyin a wale öhmun e únykúme a u me o únyi ge Khong. 31 Iesu ame thu ködrin, ka habe. Öbun e labageju but walang ang? 32 Wá bi, e hakekeny jut úen, ke e but ang, m' adre me he ka ovesei öbun ka hnyi je hnyababun, ka hake inya thiju: ke ca hake inya bi, anyin a tha inya me Kamen. 33 Oge hia but ha köbun ta je hofuc e me me hu gabun hnahic únyi gak. Haba hnyi hmeledrany, adre me he ka oveci öbun: ke hwege th' öbun anyin o ge hia but hcm dökhu hon hmeledrany.

HNYIMAKAN 17.

IESU ame ha ta je únyi e; ke e ame bwele hnyi drany ai me ha, ka habe, Cica lö, a o but úen; oganá thö Nokom,

IOANE 18.

me me oganö u minya bi Nokom : 2 waleling u je hna e he ka musö tavat hia, me me he ka ham möt ame ca ba balua ködra hia u je ham kâu. 3 Ke walang möt ame ca ba balua, a g' adre me he ka wâhmakhmetu u Khong hnathu a khaca thibi, me at u je kunâ, wale Iesu Keriso. 4 Oge me oganö u eang hmeledrany, ke oge hia but umo huliwa u je kunö nya he ka ânyâ. 5 Ke walang ang, Cica lö, oganö nya thö tha inya möu ge hmanangitu kâu adrem ke tiga hia bi hmeledrany. 6 Oge hia but omanenâ iâm ka tavat u je hna könya únyi eang hmeledrany : ânyâm ödrin ke u je hn' ödrin könya ; ke ödrin e vheno but hwâm hofuc. 7 Walang ang, e khan' ödrin but a únyi gam ta je únyi hia thithö, u je ham könya : 8 anyin oge ham ködrin ta je hofuc u je ham könya ; ke ödrin e hia but kap, ke e khan' ödrin wia but a oge o but únyi gam, ke ödrin e labagejon hnâm hna kunö nya. 9 Inya oge me hic hobi ködrin : oge ca hic hobi kâu hmeledrany, ke hobi ködrin bi u je ham könya ; anyin a ânyâm ödrin : 10 ânyâm, anyik ta je únyi hia, ke anyik, ânyâm ta je únyi ; ke ödrin e oganö nya. 11 Ke oge me ca he hmetu ka laba eang hmeledrany, ke ödrin e he biju ka laba eang hmeledrany, ke inya oge me he but köu. Kamök ae kap lö, tu' ödrin ju hnyi iâm waleji u je ham könya, m' ödrin e khaca thibi helâ me ötu. 12 Oge tu' ödrin hnyi iâm, waleji ke tiga inya unyidrin, hnyat u je ham könya : ke oge tu' ödrin me ba ke at gadrin ae hia, ke aten thiju hnaúhangö ; me me hwádâ hna sihnalimen. 13 Ke walang ang inya oge me he ka he but köu ; ke inya oge me ha ta je únyi e eang hmeledrany, me me he ka hwádâ anyik senyin eú hnyi je hnyekudrin. 14 Oge hia hut ham ködrin hwâm hofuc ; ke ame huköti ödrin ge hmeledrany, anyin a ödrin ca aten hmeledrany, helâ me inya a ca aten bi hmeledrany. 15 Oge me ca sumató u a u me he ka hum ödrin únyi eang hmeledrany, ke so bi he ka tu' ödrin hnyi hulö. 16 Ödrin ca aten hmeledrany, ke helâ me inya ca aten hmeledrany. 17 Okabi ödrin ju ge hnathu gam : he haba hnathu, me hwâm hofuc. 18 U je kunö nya ka hnyi hmeledrany, helâe minya oge me kun ödrin ka hnyi hmeledrany. 19 Oge me ka okabi nya hobi ködrin, m' ödrin e kap bi ödrin hnyi hnathu. 20 Ke oge me ca hic hnân hobi ködrin thibi, ke hobi ködra minya tavat

adre me labageju könya únyi ge hodrin ta je hofuc ; 21 m' adre me he bi hia thithö ka khaca thibi ; helâ me u Cica eú hnyi hnyik, ke inya minya bi eú hnyi hnyâm, me me tha ödra m' ötu : me me labageju hmeledrany a u je kunö nya. 22 Ke haba hmanenang u je hia but ham könya, oge hia but ham ködra ; m' adre me he bi ka khaca thibi, helâ me ötu a ötu khaca thibi ; 23 inya eú hnyi hnyidra, ke u eú hnyi hnyik, me adre me he ka khaca thibi hmönyin bi : me me he hmeledrany ka wâhmakhmetoâ a u je kunö nya, me u je hnyok ködra, helâji me hnâm hna hnyok könya. 24 Cica lö, haba wek, a g' me he ka tha ödra mönya bi hnyi hnök, tavat u je hia but ham könya ; m' adre me he bi ka wâ anyik hmanenang, waleji u je hna könya ; anyin a u je hnyok könya kâu adrem k' adre tiga ca bi taben hmeledrany. 25 Kamen ae wisa lö, e ca khana hmeledrany u, ke haba inya, me khanö nya u ; ke haba hnyat ang, me khan' ödrin a u je kunö nya ; 26 ke oge me omanenâ ködrin iâm, k' oge me he minya bi ka omanenâ e ; me me laba eú hnyi je hnyekudrin ibetengiö waleji a hnâm hna betenge gak, ke inya eú hnyi je hnyekudra.

HNYIMAKAN 18.

A HIA but Iesu ha ta je hofuc e, me e ame he hanyâúú wagewe Kederon tha e me laten, eling ke ong utkânâ, me e ame o ka hnyin me laten. 2 Ke e khanö Juda dok eling, at ame alecuâ e : anyin ame labö o eling Iesu me laten. 3 Ke haba Juda a hia but kap je soja me tavat tue únyi ge je taben tavat bihut me ta je Faresaio, adre me o eling me ta je lamepa me ta je okúnú me ta je únyi hnân vat. 4 Ke e khanö Iesu ta je únyi hia ame he ka o kâu, e ame he but, me ha ködra, ka habe, Ia öbun e elâm ? 5 Adre me thu kâu, ka habe, Iesu at Nazareta. Iesu ame ha ködra, ka habe, Inya ang. Ke haba Juda at ame alecuâ e, ame tha tot mödra. 6 Ke a hia but ha ködra, ka habe, Inya ang, me adre me kec nulötudra me ta ju eú hnyi kânâ. 7 Me e ame hnei ödra hmetu, ka habe, Ia öbun e elâm ? Ke adre me ha, ka habe, Iesu at Nazareta. 8 Iesu ame thu, ka habe, Oge hia but ha köbun, ka habe, Inya ang : öbun e ne elöm nya, hna but tavat ang, m' adre me he but : 9 me me hwádâ hofuc e ame ha, ka habe,

IOANE 19.

E ca hia ke at gadra u je ham könya. 10 Ke hu hele vat anyi Simona Peteru, me e ame oc dö, me kot athnyabainy taben tavat bihut, me ame subâ but hnyikönyen a metâ. Maliko ien athnyaba. 11 Haba Iesu ame ha kö Peteru, ka habe, Inâ hmetu ju hele vat ka hnyi umen : hawa, oge me ca he ka ijem kaia a ham könya Cica?

12 Me adre me köt Iesu me ca thö e hnen ta je soja me taben vat, me je taben tavat tue at Juda, 13 me lelö thö e a bân kö Ana; anyin a e ûngü Kaiafa taben tavat bihut hnyi huna eling. 14 Ke Kaiafa at ame ha ka at Juda, ka habe, E ûnyi hnathu he ka mok at a khaca hnân hwaban hnyei.

15 Haba Simona Peteru ame he hotu Iesu, me ke aten minya. Ke ame wâhmakhmetoâ aten eling hnen taben tavat bihut, me e ame dit minya me Iesu ka hnyi hnyeuleny uma umen taben tavat bihut; 16 ke haba Peteru ame tot eû hnyi hwanuma. Ke ame dit hmetu but aten eling, waleji ame wâhmakhmeto hnen taben tavat bihut me ha ka momo at ame tuö hwanuma he ka hum Peteru ka hnyin uma. 17 Me ame ha momo, at ame tuö hwanuma kö Peteru, ka habe, Hawa, u hanen laten at ang? Haingen, ka habe, Ca munyi inya. 18 Ke ame ütiten eling lathnyaba me tavat tue, k' adre me hû ke meic alep, anyin a ödra megic, me adre me hlök : k' ame tha tot Peteru mödrin, ame munyi hlök.

19 Haba taben tavat bihut ame hnei Iesu ge laten, me hnen minya hna ûne. 20 Haba Iesu ame thu kâu, ka habe, Oge hia but ha manenâ ka hmeledrany; oge me labö ûne hnyin je sunago, me hnyin uma kap, wale ame labö ûkhacaköu hnyin at Juda; ke ba hofuc oge me ha duöngâ. 21 Ieû gam u me hnei nya? hnei ödra bi tavat adre me löng hnök hna ha ködra : wâ bi e khan' ödra but hnök hna ha. 22 Ke a hia but ha e, me ame khaû e hnen ke at tue, at ame tot hakekenyâ, haingen, ka habe, U me thu helâe ka taben tavat bihut? 23 Haingö Iesu, ka habe, A ne kong hnök hna ha, omanenâ thö monu : ke a ne so, ieû gam u me kuc nya? 24 Ke haba Ana ame ca e me kunâ kö Kaiafa taben tavat bihut.

25 Ke haba Simona Peteru ame tot, k' ame hlök. Me adre me ha kau, ka habe, U ke aten minya? E ame ivinö me ha, ka habe, Ca inya. 26 Ke ame ha ke at hanen

athnyabainy taben tavat bihut, a liamekeiny me at eji a subâ Peteru hnyikönyen, ka habe, Oge me ca ö u mē hnyi ong utkânâ? 27 Haba Peteru ame ivinö hmetu : ke ame ie kokok dö khoto.

28 Ke ödrin e lili Iesu thö ûheny unyi Kaiafa ka hnyi uma umen than : ka hnyomakatu but; ke adre me ca hnyi dit ka hnyi uma umen than, wâ adre nye bo kong he ka hnyi an paseka. 29 Haba Pilato ame didrut ködra, me ha, ka habe, Ieû monu anyin at ang öbun e he ka ha? 30 Me adre me thu kâu, ka habe, A ne ba monu anyin at ang, öhmun e ca he ka hua köu. 31 Haingö Pilato ame ha ködra, ka habe, Hom d' öbun me hnö helâ me anyibun hnanyibu. Haingen kâu at Juda, ka habe. E ca úcú köhmun he ka hlingâ at : 32 me me hwädâ hofuc ho Iesu a ha, ame omanenâ bongon imekiny bi.

33 Anyin a wale Pilato ame dit hmetu thö ka hnyi uma umen than, me hawo Iesu, me ha kâu, ka habe, Hawa u Tuhan at Juda? 34 Iesu ame thu, ka habe, u me ha e ka ûnyi gam, ke hawa, e hu at a halö nya köu. 35 Pilato ame thu, ka habe, Iny at Juda? Hnen aten em hnyei me je taben tavat bihut hna hnö u könya : ieû u je mádrâ? 36 Iesu ame thu, ka habe, Ca ûnyi eang hmeledrany dökhuk dökhuk : a ne ûnyi eang hmeledrany dökhuk dökhuk, ame ne he lathnyabaik ka vat, m' adre me ca he ka hnö nya ka at Juda : ke walang ang ca ûnyi ang dökhuk dökhuk. 37 Me Pilato ame ha kâu, ka habe, Hawa gam, u than? Iesu ame ha, ka habe, U me ha e, a iny than. Adre hnöku nya hobi kâu e, ke oge o but eang hmeledrany hobi kâu e, me inye he ka ohnathoâ hnathu. Haba ta je aten hnathu hia, adre me löng ifucik. 38 Pilato ame ha kâu, ka habe, Ieû hnathu!

A hia but ha e, e ame dit hmetu but ka at Juda me ha ködra, ka habe, Oge me ca wâ thö ke monu gan. 39 Ke hwakecibun, oge me thang köbun ke at hnyi paseka : hawa, e webun oge me he ka thang ut köbun Tuhan at Juda? 40 Ödra adre me ha hwegiâ hmetu, ka habe, Ca e bi, ke so bi Barabasa. Ke haba Barabasa, me at venöu.

HNYIMAKAN 19.

ME haba Pilato ame hum Iesu thö me osöâ e. 2 Haba ta je soja adre me hwâwâ je tö ae údedö me hnân korona,

IOANE 19.

me obicâ kâu, me okhaûâ e ge ûkhaû ae udrudrâ hlit; 3 me adre me he thö kâu me ha, ka habe, Talofa Tuhan at Juda! me adre me khaû e. 4 Haba Pilato ame dit hmetu but, me ha ködra, ka habe, Wâ bi oge ma odilâ but e köbun, me me manen köbun a oge me ca wâ thö ke monu gan. 5 Ame dit minya but Iesu ame bicâ korona ae údedö me khavâ ûkhaû ae udrudrâ lit. Haba Pilato ame ha ködra, ka habe, Wâ bi at! 6 Ke a wâ but e hnen je taben tavat bihut me tavat tue, me adre me ha hwegiâ, ka habe, Osatauroâ thö, osatauroâ thö. Haingö Pilato ködra, ka habe, Hom bi th' öbun me osatauroâ: anyin oge me ca wâ ke monu gan. 7 Ame thu kâu at Juda, ka habe, E hu anyihmun hnanyibu, ke úcú kâu he ka mok hnyi hnanyibu eling, anyin a e ame ka háiâ e me Nokon Khong. 8 Ke a löng ut Pilato hofuc e, me e ame ot gan hmâ; 9 me e ame dit hmetu thö ka hnyi uma umen than, me ha kö Iesu, ka habe, Ühem ua? Ke haba Iesu ame ca thu kâu. 10 Haba Pilato ame ha kâu, ka habe, U me ca thu thö kõnya? e ca khanö u ae hu anyik musi he ka hnö u, ke hu anyik musi minya he ka osatauroi u? 11 Iesu ame thu kâu, ka habe, Adre ne ca ham köu únyi ethö me ba ányâm musi huk: waleling me me gan hulö anyin at a ham nya köu. 12 A hwân ang Pilato ka heleú deny he ka thang ut e: ke haba at Juda adre me hongot, ka habe, U je ne he ka thang ut at ang m' u ca hanö Kaisara but; anyin a haba at ame wia e me me than, me e ame tot úcú Kaisara. 13 A löng ut Pilato hofuc eling me e ame hum Iesu but hnyöu ai, me e ame laba hnyi taben owisa hnyi dok, ien, ka habe, Adre ave ge veto, ke haba hnyi hwen Heberu me, Gabatha. 14 Haba bong eling me bong Penapena paseka: ame ne awa a siksiny. Me e ame ha ka at Juda, ka habe, Wâ bi Tuhöbun! 15 Me adre me ha hwegiâ, ka habe, Hom dö, hom dö, osatauroâ thö. Haingö Pilato ködra, ka habe, Hawa, oge ma he ka osatauroâ Tuhöbun? Me ame thu je taben tavat bihut, ka habe, E ba minya ju ke tuhömun ke hake Kaisara thibi. 16 Me e ame hna but e ködra m' adre me he ka osatauroâ.

17 Me adre me hum Iesu thö: me e ame didrut ka vaden satauro hobi kâu, ka hnyi dok, ien, Iny ibokomok, ke haba hnyi hwen Heberu, me Gologotha: 18 me adre me osatauroâ e eling tha e me li at a lo hnyi

li ke keihen, ke Iesu eú hnyi wanben. 19 Ke haba Pilato ame set tusi me ip hon satauro. Ke walang hna sihnalimen, ka habe, IESU AT NAZARETA, TUHAN AT JUDA. 20 E se hia at Juda adre me aú tusi e: anyin ae hakekeny ka hnyi taun dok adre me osatauroi Iesu hnyin: k' adre me sihnalimen hnyi hwen Heberu, me Roma, me Heleni. 21 Me haingen ta je taben tavat bihut a hnyat Juda kö Pilato, ka habe, Ca sihnalimen, Tuhan at Juda; ke so bi a g' ame ha, ka habe, Inya ang Tuhan at Juda. 22 Haingö Pilato, ka habe, Haba hnök hna sihnalimen, me oge hia but sihnalimen.

23 Ke adre hia but osatauroi Iesu, me ame hom anyin je ûkhaû hnen je soja me khenâ vâkâ ka ouco je soja; helâe minya úkot: haba úkot, me adre me ca tibet, ke adre me hwâwâ bekhötâ. 24 Me adre me úhnenamökouâ, ka habe, Ate me ca he bi ka kia, ke so bi he ka uglekôbâ, a hamö ia he ka hom: me me hwâdâ hna sihnalimen, ka habe,

Adre me khenâ anyik je ûkhaû unyidra, Ke adre me uglekôbâ anyik úkot.

Wale ta je únyi ame ányâ ta je soja. 25 Ke ame tot hakekenyâ satauro hinyö Iesu, me liamekeiny me hinyen, jia Maria öiö Kaleopa, me Maria Magadalena. 26 Ke a wâ Iesu hinyen, me ke aten e ame betenge kâu, ödru me tot hakekenyâ, me e ame ha ka hinyen, ka habe, Bai lö, wâ bi nokom! 27 Ke e ame ha minya ka aten, ka habe, Wâ bi, hinyâm! Ke hwân hnyi awa e, haba aten eling ame hom dö momo ka hnyi hnyaban.

28 Hwaban dö e, a wâ Iesu a ga um but ta je únyi hia, me e ame ha, ka habe, Oge me beic dö; me me hwâdâ hna sihnalimen. 29 Ame mokut eling kaia ae unöngöt ge vinega: me adre me húlúlúâ ohmanená hnyin vinega, me ip hnyi ke hnyiban hisop, me inâ ka hnyi hnyimen. 30 A hia but Iesu kap vinega, me e ame ha, ka habe, A um dö: me e ame khudrung ju, me hna but hanon.

31 Haba at Juda ödrin e sumató Piliato he ka kot hmetro je li cadrin, me hum ödrin bi, anyin a bong Penapena, me me ca he ka hnen je unyidrin hnyi satauro hnyi sabath (bong ae gan hmâ sabath eling). 32 Me ame he but je soja me thu li can ke at, helâe minya ke at adre me osatauroâ mē: 33 ke adre me o but kö Iesu me wâ e a mokeu, me ödrin e ca thu li can: 34 ke

haba ke soja ame dâ vhaken ge ö, me ame ie hingölö but dra me köiö. 35 Ke ame ohnathoâ hnen at ame wâ, ke hnathu but hnen hna ohnatho: ke a wâ but ae hnathu hnen hna ha, m' öbun e he minya ka labageju. 36 Adre me ânyâ ta je ûnyi e me me hwâdâ hna sihnalimen, ka habe, Ame ca he ka hmetru ke jeien. 37 Ke haingen ke hna sihnalimen, ka habe, Adre me he ka wâ at adre me dâ.

38 Hwaban e, haba Josefa at Arimathea, wale ke atö Iesu, ke iyong bi anyin ae outen at Juda, haba at eling ame sumatö Pilato he ka hom unyi Iesu: haba Pilato ame ham. Me e ame he but me hom unyin. 39 Ame o minya Nikodemo, at eji ame senâ hnyi hnyinghet, k' ame hom muro, me aloe adre úhaniken, helâke me wan haded je litara. 40 Me adre me hom unyi Iesu, me lan ge mano lino me je ûnyi ae bo so, helâ me hwakecin at Juda ödra ka he ka khön komok. 41 Eling ke ong utkânâ hnyi dok adre hia but osatauroâ e hnyin; ke wale hnyi ong utkânâ thop ae teb ûnyi a ödra tiga ca hip komok hnyin. 42 Me adre me ip Iesu eling, anyin a bong Penapena anyin at Juda, (anyin a e hakekeny thop).

HNYIMAKAN 20.

HNYI bong a bân hnyi seven ame he but Maria Magdalena hnyi hnyomakatu kong ka hnyi erkemok, k' ame wâ veto adre me hom but ûnyi hnyi hnyimen erkemok. 2 Me e ame wadring me he kö Simona Peteru, me ke aten wale ame betenge gan Iesu, me ha ködru, ka habe, Adre hia but hom Than ûnyi hnyi hnyin erkemok, ke ca khan' öhmun dok ödrin e ip e hnyin. 3 Haba Peteru me aten eling ödru me didrut me he ka hnyi erkemok. 4 Ke ödru me tha wadring, me ame khaletö Peteru hnen at eling, me bân ka o hnyi erkemok; 5 me e ame nom me selâtâ, k' ame wâ je mano lino ame mokut; k' ame ca didrö. 6 Ke ame o but Simona Peteru a he hoton, k' ame didrö ka hnyi erkemok; me e ame wâ je mano lino ame mokut, 7 me ecmano minya waleji adre me lan kâu ban, ame ca tha mokut me je mano lino, ame ka hake mokut adre vhec. 8 Me ame didrö minya ke aten waleji a bân ka o hnyi erkemok, me e ame munyi wâ me labagejon. 9 Anyin a ödrin e tiga ca wâ ûnykúme bala hna sihnalimen, ka habe, E úcú kâu

be ka möt hmetu úheny hnyi hna mok. 10 Haba li laten ödru me hmetu but ka hnyi hnyabadru.

11 Ke haba Maria ame tot eú hnyi erkemok ame tenge: ke ame tiga tenge me nom but me selâtâ erkemok; 12 me e ame wâ li angela ödre khaú hau, ödru me laba ke at hnyi hnen ban, ke ke at hnyi hnen li can, wale dok a mokut hnyin unyi Iesu. 13 Ke ödru me ha kâu, ka habe. Ke momo lö, ieú u me tenge gan? E ame ha ködru, ka habe, Anyin adre hia but hom Tuhök, ke ca khanö nya dok adre ip e hnyin. 14 A hia but ha e, me e ame hwiö thö me ö Iesu ame tot, ke ca khana bi me Iesu ling. 15 Iesu ame ha kâu, ka habe, Ke momo lö, ieú u me tenge gan? ia u me elâm? E ame ûnykúme ame ne at ame tuö utkânâ, me e ame ha kâu, ka habe, Than lö, u je ne hom e, mē ha thö könya dok u je ip e hnyin, me inye he ka hom e. 16 Iesu ame ha kâu, ka habe, Maria. Eame hwiö thö me ha kâu, a hwen Heberu, ka habe, Raboni; walang bongon, At úne. 17 Iesu ame ha kâu, ka habe, Ca kalö nya bi; anyin a iny tiga ca ölö ka Kamen: ke he thö ka je liamekeiny mönya, me ha ködrin, ka habe, Inya oge me he ka ölö ka Kamök a Kamöbun, ke Khonguk a Khongubun minya. 18 Haba Maria Magdalena ame he but me thumeto laten, ka habe, Oge wâ ju Than; me e ame ha ta je ûnyi e ame ha kâu.

19 Hnyi sahacin bong eling, wale bong a bân hnyi seven, ke adre hlöng ut je hwanuma hnyi dok a laba hnyin laten, anyin a ödrin outen at Juda, me ame o thö Iesu me tot hnyi wanben, me ha ködrin, ka habe, Hnabic köbun. 20 Ke a hia but ha e, e ame omanenâ ködrin li hnyamen me vhaken. Haba laten ödrin e senyin ödrin e wâ Than. 21 Me Iesu ame ha hmetu ködrin, ka habe, Hnabic köbun: inya oge me kun' öbun helâ me Kamen ame kunö nya. 22 Ke a hia but ha e, e ame menâ ködrin, me ha, ka habe. Kap ju Hanu Kap: 23 haba ta je hulö anyin tavat öbun e hna, me adre me thang gadra; ke haba hnöbun hna ca thang, me ame ka hnen ju.

24 Ke haba Toma ke at hnyi twelv, Didumo ke ien, ame ca tha e mödrin hnyi úen a o hnyin Iesu. 25 Ke ame ha kâu laten, ka habe, Öhmun e hia but wâ Than. Ke e ame ha ködrin, ka habe, Oge ne ca mē wâ thö deny fao hnyi li hnyamen, me

inâ banyök ka hnyi hwaden li fao, me inâ hnyamök ka hnyi vhaken, me oge me ca he bi nya ka labageju.

26 Ke hwaban je bong a eit, e hmetu thö laten hnyin uma, ke Toma unyidrin. Adre hia but hlöng je hwanuma, me ame o Iesu me tot hnyi wanbödrin, me ha, ka habe, Hnahic köbun. 27 Ke e ame ha kö Toma, ka habe, Hö jem banyâm me wâ bi ang li hnyamök; ke hö jem hnyamâm, me inâ ju ka hnyi vhakök: me ca lolo bi, ke labageju ju. 28 Haba Toma ame thu kâu, ka habe, Tuhök me Khonguk. 29 Iesu ame ha kâu, ka habe, U me labageju anyin a u je ö nya: hnahic hnen tavat adre me labageju, k' adre me ca munyi wâ.

30 E se hia ta je haten ame ânyâ Iesu hnyi hnyimakan laten, k' adre me ca sihnalimen hnyi tusi eang: 31 ke adre hia but sihnalimen ta je ûnyi e me öbun e he bi ka labagejon a Nokon Khong Iesu Keriso: ke ûnyi ge hnöbun hna labageju me ame he ka ha möt köbun ûnyi hnyi ien bi.

HNYIMAKAN 21.

HWABAN ta je ûnyi e haba Iesu ame ka omanenâ e bi hmetu ka laten hnyi köien Tiberia; ke walang hwakecin hnen hna omanenâ e bi. 2 Ame ûkhacäköu thö Simona Peteru, me Toma ke ien Didumo, me Nathaniela at Kana hnyi Galilaia, me li laku Zebedαιο, me ke li aten minya. 3 Haingö Simona Peteru ködrin, ka habe, Oge me he but ka thut. Haingödrin kâu, ka habe, Öhmun a hnyi he. Ödrin e he but me ölö thö ka hnyi hu; ke ba hanidrin hnyi lit eling. 4 Ke hnyi okubelit ame tot Iesu hnyi hobatköiö, ke ca khana laten me Iesu ling. 5 Iesu ame ha ködrin, ka habe, Lakuk lö, e hu hanibun? Me ödrin e thu kâu, ka habe, E ba. 6 Me haingen ködrin, ka habe, Thong ut ert hnyi ke keihen metân hu, m' öbun e ka wâ. Me ödrin e thong ut, ke walang ang, e ca khan' ödrin he ka lelö ert anyin ae se hia hmönyin ta je wâ. 7 Haba aten waleji ame hnyok kâu Iesu, ame ha kö Peteru, ka habe, Than e. Ke a löng ut Simona Peteru a Than e, me e ame khavâ anyin ûkot (anyin a ga uny), me e ame utut hnyiköiö ai. 8 Ke e but ang keihen laten hon hu ae ûhnyükong (e ca sâkâu gadrin hobatköiö, ame ne tu

haded je kubit) adre me lelö tilâ ert me ta je wâ. 9 Ke ödrin e o thö hot, ödrin e wâ meic alep, me je wâ hnyi hon, me areto. 10 Iesu ame ha ködrin, ka habe, Hö jem ke je wâ öbun e hom walang ang. 11 Me ame ölö thö Simona Peteru, me lelö ert hot ai, ae unöngöt ge ta je wâ ae gan a wan haded me fifte theri: ke a ca khekhe bi ert ge ta je wâ ae se hia. 12 Iesu ame ha ködrin, ka habe, Ai öbun ka han. Ke ba ke at ge laten ae hwege hnyekon he ka hnö e, ka habe, U ia? anyin ae khan' ödrin a wale Than. 13 Ame o Iesu, me hom areto, me je wâ, me ham ködrin. 14 Wale hnö Iesu hna okun omanenâ e bi ka laten, hwaban hnen hna möt hmetu ûheny hnyi hna mok.

15 Ke ödrin e hia but han haba Iesu ame ha kö Simona Peteru, ka habe, Simona nöku Jona, u me hnyok könya hon hnyat ang? Haingen kâu, ka habe, E, Than; u me wâ a inya oge me hnyok köu, E ame ha kâu, ka habe, Hân bi ju halek je arenio. 16 E ame olo ha kâu, ka habe, Simona nöku Jona, u me hnyok könya? Haingen kâu, ka habe, E Than u me wâ inya oge me hnyok köu. E ame ha kâu, ka habe, Tuö biju halek je mamoe. 17 E ame ibi okun ha kâu, ka habe, Simona nöku Jona, u me hnyok könya? Peteru ame hwak hnyekon anyin a e okun dut ha kâu, ka habe, U me hnyok könya? Me e ame ha kâu, ka habe, Than lö. u at ame wâ ta je ûnyi hia; u je wâ but a inya oge me hnyok köu. Iesu ame ha kâu, ka habe, Hân biju halek je mamoe. 18 E hnathu, e hnathu, inya oge me ha köu, ka habe, Hnyi ânyâm hidröu, u me ka hamâm bi oweikö u, me he ka hnyi dok u me wem; ke u ka hingat ut, u me he ka inâ li hnyamâm, k' ame he ke at ka oweikö u, me hum u ka hnyi dok u me ca wem. 19 E ame ha e, ame omanenâ bongon mok ame he ka moko me hnân ogânâ Khong. Ke a hia but ha e, e ame ha kâu, ka habe He hotuk. 20 Peteru ame hwiö thö me wâ aten ame hnyok kâu Iesu, ame he hoton, waleji at ame laba hnyi ûlainy hnyi ûen han, me ha, ka habe, Taböny Than ie at ame he ka alecuö u? 21 Peteru ame wâ e, me e ame ha kö Iesu, ka habe, Than lö, ame he ka hawa at ang? 22 Iesu ame ha kâu, ka habe, Oge ne wek e ame he ka ulubahing ke ne o but oge me o, hnân eü köu? he bi u hotuk. 23 Me ame lung igigilö hofuc e unyin je liamekeiny, a g' ame ca he ka mok aten eling: ke a ca ha

TA JE HULIWA 1.

Iesu kâu, a e ame ca he ka mok ; ke so bi, Oge ne wek e ame he ka ûlubahing, ke ne o but e ame o, hnân eû köu? 24 Walang aten at ame ohnatho ta je ûnyi e me sihnalimen : ke e khan' öta but ae hnathu.

25 Ke se hia hmönyin minya bi ta je ûnyi a mâdrâ Iesu, ke adre ne tha sihnalimen hia, oge me ûnykûme e ca ûcû bi hmeledrany ka ta je tusi adre me he ka sihnalimen.

TA JE HULIWA ANYIN TA JE

APOSETOLO.

HNYIMAKAN 1.

THEOFILA lö, haba tusi oge me sihnalimen a bân, me ame ha ta je ûnyi hia ame ânyâ Iesu, ke hnen hna ûne, 2 ke ne o but bong adre me kap dö e hnyi drany ai, hwaban hnen hna hûna ka je aposetolo a deny Hanu Kap, wale hnyat e ame ûca : 3 ke e ame ka omanená e ködrin ae möt, hwaban anyin mok k' ame osehia ohnathoâ me labö o ködrin hnyi fâte je bong, k' ame ha bongon dökhu dokhon Khong : 4 ke hnyi ke ûen e ame tha laba mödrin me hûna ködrin a ödrin e ca he ka vese ûhedrin Jerusalema, ke ödrin e he bi ka halubahingen ûnyi ame ha bânâ Kamen, haingen, ka habe waleji öbun e löng ûnyi gak : 5 anyin a Ioane ame bapataiso ge köiö ; ke adre me he ka bapataiso öbun ge Hanu Kap hwaban ke je beng ae wakhalet.

6 Ke ödrin e hnö e hnyi ke bong ödrin e ûkhacaköu hnyin, ka habe, Than lö, ûen dut ang u me he ka odokho hmetu at Isaraela? 7 Haingen ködrin, ka habe, E ca hanymöbun he ka wâ je bong me je huna ame ip ge Kamen k' ame musö bi. 8 E ka o but köbun Hanu Kap, me öbun e he ka tren man : m' öbun e he ka ohnathu nya hnyi Jerusalema, me Juda hia me Samaria ke ne o but hnyi je can hmeledrany. 9 E ame ha e, me adre me hom dö e hnyi drany ai, k' ödrin e wâ ; me ame kap e hnyi ûlâ me me ca manen bi. 10 Ke ödrin e tiga ngele hnyi drany ai, k' ame tiga ölö thö, me wâ bi, li at

ödrü me tot unyidrin, ödre khaû hau ; 11 haingödrü, ka habe, At Galilaia lö, ieü gabun öbun e ngele drany ai? ame he ka o hmetu Iesu at adre me hom unyibun hnyi drany ai, helâ me hnen hna ölö hnyi drany ai, k' öbun e wâ.

12 Ke ödrin e hmetu but Jerusalema ai ûhedrin hnyi bucen, Elaio ien, wale ae hakekeny Jerusalema, e ûcû he ka he hnyi Sabath. 13 Ke ödrin e o but, me ödrin e ölö thö ka hnyi hnyeule ethö, wale ödrin e laba hnyin ; jia Peteru, me Ioane, me Iakobo, me Anederea, me Filipino, me Toma, me Batolomaio, me Mataio, me Iakobo nöku Alefaio, me Simona a Zeloti, me Juda liamekeiny me Iakobo. 14 Ödrin hia e, ödrin e labö hic hnyi hnyok a khaca, tha ödrin me watamomo, me Maria hinyö Iesu, me je liamekeiny minya më.

15 Haba hnyi ûen eling, Peteru ame tot hnyi wanben je liamekeiny (haba üseidra eling me helâke me wan haded ke twente) ke ame ha, ka habe, 16 Hnyat me lakeiny lö, e ûcû he ka ohwâdâ hna sihnalimen a hia but ha adrem Hanu Kap ge hnyimö Davita ga Juda, at ame su ödra ka köt Iesu. 17 Anyin adre tha aû e möhmun, ke adre khene hanymen hnyi huliwa eang. 18 (Haba at e ame ûco utkânâ ge hwaban hwakecin ae kong ; ke e ame ta but ame bân ban, me ame hmouca but hnyekon, me hingölö hia but tang tiny. 19 Ke e khana e tavat hia adre me laba hnyi Jerusalema ; me adre me hwenyi ien utkânâ eling hnyi ifucidra, ka habe, Akeledama, walang bongon, Iny dra.) 20 Anyin adre sihnalimen hnyi tusi Salamo, ka habe,

TA JE HULIWA 2.

Ame he ka ba wan anyin lap,
Ke ba at ame he ka laba e :

ke

Ame he biju ke at ka hom hanymen.

21 Anyin a wale haba tavat eang adre me tha hien m' öhmun hnyi ta je bong hia waleji ke tiga tha ötin me Than Iesu, 22 hwân hnyi hna bapataiso hnö Ioane, ke ne o but hnyi bong adre me hom dö e göranyai gata, e úcû he ka úca ke at gadra he ka hnyi ohnatho möta möt hmetu thö a e. 23 Me adre me otílâ li at, jia Josefa ke ien Basabasa, ke haba ke ien minya Juseto, me Matathia. 24 Me adre me hic me ha, ka habe, Taböny Than lö, u at ame wâbmakheto ta je hnyok hia thithö, omanená thö köhmun at u me he ka úca ge li at ang, 25 me me he ka hnyi hanen huliwa eang, me hanymen aposetelo, waleji a degec Juda, me he ka hnyi hnen bi. 26 Me adre me uglekóbâ gadru, me ame hwâdâ thö kö Matathia ; me adre me tha aú e me je aposetolo a eleven.

HNYIMAKAN 2.

KE ame o but bong Penetekos, ödrin hia adre me tha laba hnyi dok a khaca. 2 Ke ame o uthmâhmâ but lung únyi hnyi drany, helâ me ang ame hmuhmu, me öunongötâ thö uma hia wale ödrin e laba hnyin. 3 Me ame manen dut ködrin je bohmen ae vheivhei, ke helâke meic ; ke ame ve laba hudrin. 4 Me ödrin e unöngöt hia thö ge Hanu Kap, me hwân he ka fuc hnyi je ve hwen hneyi bi, helâ me hnen Hanu hna ham ködrin he ka fuc.

5 Ke e hu tavat Juda adre me outen Khong, adre me laba hnyi Jerusalema, úhedra hnyi ta je hneyi hia eang hmeledrany. 6 Ke adre me löng ut lung eling, me ame úkhacaköu thö tavat ae se hia, ke adre me láîâ gan hmâ, anyin adre me löng ödrin e fuc hnyi je ve hodra bi. 7 Me adre me ve uthmâhmâ me láîâ, me ha, ka habe, Wâ bi, ca at Galilaia hia bi hnyat ang? 8 Ke a hawa ate me ve ling ödrin hnyi ve hwen hota bi adre hnöku öta hnyin? 9 At Parathia, me Madai, me Elama, me tavat adre me laba hnyi Mesopotamia, me Juda, me Kapadokia, me Ponoto, me Asia, 10 me Ferugia, me Pamefulia, me Aigupito, me je hneyi hnyi Libua hakekeny Kurene, me je atkanyua úhedra Roma, at Juda me tavat adre me tha hmi mödra, 11 at Kerete,

ma Arabic, ate me ling ödrin ödrin e fuc hnyi je ve hwen ita, k' ödrin e ha ge ta je huliwa ae man anyin Khong. 12 Ke ödra hia adre me uthmâhmâ, me loloâ, me úhnenamököuâ, ka habe, ieú bongon únyi eang? 13 Ke haba keihen adre me úhiö, ka habe, A ijem gâná waina ae teb únyi hnyat ang.

14 Ke haba Peteru ame tha tot me hnyat a eleven, me ha göranyâ, ka habe, Öbun at Juda, me öbun hia tavat öbun e laba hnyi Jerusalema, wâhmakhmeto ju öbun únyi eang, ke löng ju öbun hok hofuc. 15 Anyin a ca monu bi hnyat ang ge waina, helâ me hnöbun hna únykúme ; ke tiga awa a kuniny ang ; 16 ke walang hofuc a ha perofeta Joela, ka habe,

17 Haingen Khong, ka habe, Hnyi ta je bong a biliny,

Oge me he ka hingâlâ hanuk hon tavat hia thithö :

Ke ame he lakubun obaga me wahlu ka perofeta,

Ke ame he lakubun wahidröu ka wâ je hna omanená,

K' ame he wahingatibun ka bwo ta je bwi.

18 Eke, hnyi ta je bong eling oge me he ka hingâlâ hon lathnyabaik obaga me omomo

Hanuk ; me adre me he ka perofeta.

19 Ke oge me he ka omanená je úöman ethö hnyi drany,

Ke ta je haten eang hmeledrany ;

Wale dra, me meic, me hai ame sâ göranyai ;

20 Adre me he ka bödra ka wia seúnö me me lit bi,

Me tehi me me dra,

Me ame he ka o but bong bongon Than, Wale bong ae gan me lung :

21 Ke ame he ka möt tavat hia adre me he ka hawâ ien Than.

22 At Isaraela lö, löng ju öbun hofuc ang : Haba Iesu at Nazareta, at a ohnathoâ köbun hnen Khong ge je huliwa ae gan me je úöman me je haten, waleji hnen Khong hna ânyâ únyi gan hnyi wanböbun, ke manen e köbun ; 23 wale at adre me hna but únyi hnyi musi wisa me wâ bánâ hnen Khong, k' öbun e hia but osatauroâ me hlingâ hnen hnyamen tavat adre me hanyâúâ hnanyibu : 24 k' ame omelö hmetu thö e, me thang ut ta je töiny mok ; anyin ae ca khana únyi eling he ka ohmâ e. 25 Anyin a háîâ e Davita, ka habe,

TA JE HULIWA 3.

Oge me wá bala Than hnyi hnyimakök ; Anyin a e but hnyi ke keihen a metök, m' adre me ca he ka bwebweli nya.

26 Wale me me senyin hnyekuk k' ame hobâ bohömök ;
Ke ame he unyik ka menâ ju me gejon :

27 Anyin a u me ca he bi ka hna but hanuk hnyin hedis,
U me ca he ka hna but Âtâm ae Kap he ka wâ hna bobot.

28 U je hia but omanenâ könya je gethen deny möt ;
Ke u me he ka ounöngöti nya ge senyin hnyi hnyimákâm.

29 Hnyat me lakeiny lö, oge me behâiâ wia Davita pateriaka köbun, ka habe, a mokcu, ke adre hia but konâm, ke e unyita hon ke ne o but hnyi bong ang. 30 Anyin a e perofeta, ke e ame wâhmakhmeto a ga hia but Khong khemanynin kâu a e ame he ka ip ke at hon anyin theron únyi hnyi mátrâniny ; 31 me haba Davita áme wâ bánâ e, k' ame ha ge möt hmetu anyi Keriso, a g' adre me ca he ka hna degecâ e bi ka hnyi Hedis, k' ame ca he unyin ka wâ bobot. 32 Haba Khong ame omelö hmetu Iesu, ke öhmun hia ang je hnyat ohnatho. 33 Ke walang ang e ame laba göranyai únyi ge hnyam a metân Khong, k' ame hia but kap únyi ge Kamen Hanu Kap waleji e ame ha bánâ, me e ame hingâlâ but únyi ang öbun e wâ me löng. 34 Anyin a ca ölö ka hnyi drany Davita : ke e ame ha, ka habe

Haignen Than ka Tuhök, ka habe, Laba ju hnyi ke keihen a metök,

35 Ke ne o but oge me he ka wia ta je iwahnaihmiöny möu me taben li cam.

36 Anyin a wale, e so e he lap anyi Isaraela hia ka wâhmakhmeto a g' ame hia but Khong wia Iesu at öbun e osatauroâ me me Than me Keriso.

37 Adre me löng e, me ame dá but je hnyekudra, me adre me ha kö Peteru me ta je aposetolo, ka habe, Hnyat me lakeiny lö, ieú hanymöhmun he ka ányâ? 38 Haingö Peteru ködra, ka habe, Ietra ju, m' adre me ve bapataisoí öbun hnyi iö Iesu Keriso, m' adre me thang degecâ but anyibun ta je hulö ; me öbun e he bi ka kap bwihlany a Hanu Kap. 39 Anyin a haba hna ha bánâ, me hnân hobi köbun me je lakubun, me hobi kâu hnyat a ödra sákâ, wale hnyat hia ame he Than a Khonguta ka hawâ kâu. 40 Haba Peteru ame khetâ,

k' ame khöü ködra ge ta je hofuc ae se hia, haingen, ka habe, Omeli öbun dö únyi hnyi dö eang ae hwali. 41 Ke adre me bapataisoâ tavat adre me kap hwan : me adre me bihanen ködra hnyi bong eling helâ me theri thauzan tavat. 42 Ke adre me tethmâ hnyi hna úne hnen je aposetolo, me tha hnyok, me susubâ areto me hic.

43 Ke ame o but ot ka tavat hia : ke se hia ta je úöman me haten ame ányâ hnen je aposetolo. 44 Ke ame tha laba tavat hia adre me labageju, ke adre me ve ip anyidra ta je únyi, me ka tha anyidra thibi ; 45 ke adre me ve úco idra ta hnyei, ke ta je omjehedra, me ve khenâ öuco ka tavat hia ae theduoc. 46 Ke adre me laba bala me hnyok a khaca hnyin uma kap hnyi je bong, me susubâ areto hnyi ke uma me ke uma, me an ö 'dra jeú me senyin me hnyok a khaca, 47 me oganá Khong, ke ame betenge gadra tavat hia. Ke haba Than ame bi hanen ködra hnyi je bong tavat adre me he ka möt.

HNYIMAKAN 3.

HABA Peteru me Ioane ödru me tha he ka hnyin uma kap hnyi úen hic, hnyi awa a naininy. 2 Ke wale ke at ae mat hwân hnyi hna hnokoâ e, adre me v-dren me ip hnyi je bong hnyi homagöuleny uma kap, ien Hmanenang, he ka sumâtâ ta únyi ge tavat adre me dit ka hnyi uma kap ; 3 ke e ame ö Peteru me Ioane ödru me he ka dit ka hnyi uma kap, me e ame sumâtâ ta únyi. 4 Haba Peteru me Ioane ödru me wâ hmâ e, me ha, ka habe, Ö 'hmu thö. 5 Me e ame löng ködru, ame únykúme he ka hu ke únyi gadru. 6 Ke haba Peteru ame ha, ka habe, E ba gak sileva me gol, ke oge me he ka ham köu hnök hna hu. Hnyi iö Iesu Keriso at Nazareta, he thö u. 7 Me e ame lelö thö hnyamen a metân me otillâ thö e : me ame ie hwege thö li can me li omakhnâiny can. 8 Me e ame ut göranyai, me tot, me hwân ka he ; me e ame tha didrö m' ödru ka hnyi úma kap, ame he, me utut, me oganá Khong. 9 Ke adre me wâ e hnen tavat hia ame he me oganá Khong : 10 ke adre me wâhmakhmeto e, a e at ame labö sumat hnyi homagöule, Hmanenang ien, hnyi uma kap : me adre me láia gan hmâ me uthmâhmâ ge únyi a o kâu.

11 Ke e ame tiga köt Peteru me Ioane, me ame wadring úkhacaköu thö tavat hia

TA JE HULIWA 4.

ködrin hnyi poretikö, Solomona ien, ke adre me láia gan hmâ. 12 Ke a wâ but Peteru e ame ha ka tavat, ka habe, At Isaraela lö, ieu gabun öbun e láia únyi ang? ke ieu gabun öbun e wâ hm' öhmu helâke me hnen manihmu man me hwakecihmu ae úcú ka Khong me me he thö at ang? 13 Haba Khongu Aberahama, me Isaaka, me Jakob, Khongon lakamöta, ame ölungâ Aten a Iesu; waleji öbun e hna but, me ivinöâ hnyi hnyimakö Pilato, ke mou thö gan a g' ame he ka hna e. 14 Ke öbun e ivinöâ At ae Kap ke At ae Wisa, me sumâtâ he ka hna köbun at úhlingö, 15 ke öbun e hlingâ Thaniny möt; wale hnen Khong hna omelö hmetu únyi hnyi hna mok; ke öhmun e ohnathoâ únyi e. 16 Ke haba at ang öbun e wâ, ke khan' öbun, me ame hwege bi únyi hnyi labageju ka hnyi ien, ke can ien bi: eke, adre me ham kâu hwege eang ae bekhöt hnyi hnyimaköbun hia hnen labageju a únyi gan. 17 Hnyat me lakeiny lö, e khaö nya a öbun e ányâ e ke ca khan' öbun bongon, helâe minya anyibun je taben. 18 Ke haba Khong ame ohwâdâ hofuc e ame bán ka ha a deny anyin ta je perofeta hia, wale a g' ame he Keriso ka hom vec. 19 Anyin a wale ietra ju öbun me hwiö thö, m' adre me he ka kot degecâ but anyibun ta je hulö, me me he ka o but je úen hnân okahwa únyi ge Than; 20 me me he minya ka kunâ Keriso, wale at adre me bödra ka ham hobi köbun, a Iesu; 21 at a kap hnen drany ethö ke ne o but hnyi je úen ame he ka hwâdâ hnyin ta je únyi hia waleji ame ha hnen Khong a deny anyin ta je perofeta hia thithö ae kap hwân kâu adrem bala. 22 Ke haba Mose ame ha, ka haba, Ame he Than a Khong ka oâ ke perofeta hobi köbun únyi ge je liamekeiny m' öbun, helâ me inya; öbun e he ka löng kâu hnyi ta je únyi hia e ame he ka ha köbun. 23 Ke haba at ame ca he bi ka löng perofeta eling, me adre me he ka ohia e únyi hnyi hnyei. 24 Eke, haba ta je perofeta hia hwân ga Samuela me tavat minya a bilidra, a ödra hia adre hia, but khetâ, me ödrin e ha minya ge je bong ang. 25 Haba öbun, me öbun lakon ta je perofeta, a hanen hna úhinyköu anyin Khong me lakamöbun, waleji ame ha kö Aberahama, ka habe, Ame he ka hnâhic ta je lap hia eang hmeledrany únyi ge mâtrânâm. 26 Ke haba Khong ame oâ Aten, k' ame kunâ bánâ köbun he ka ohnâhici öbun, wale he ka ve

ohmetu öbun únyi hnyi anyibun ta je hulö.

HNYIMAKAN 4.

KE ödru me tiga fuc ka tavat, me ame o but ködru tavat bihut, me taben uma kap, me je Sadukaio, 2 adre me kong hnyekudra anyin ödru me nâ tavat, me khetâ möt hmetu únyi hnyi mok hnyi iö Iesu. 3 Me adre me köt ödru me ip ödru hnyi uma ceat ke ne o but nyi: anyin a sahac ut. 4 Ke ame labageju but tavat ae se hia adre me löng hofuc; ke haba úseiny obaga, me helâ me faiv thauzan.

5 Ke nyi, ame úkhacaköu thö hnyi Jerusalema tavat musi ködra, me wahingat, me hnyat sihnalimen; 6 me Ana at bihut ae nua, me Kaiafa, me Ioane, me Alesanedo, me je liamekeiny me at bihut ae nua. 7 Me adre me otíl' ödru hnyi wanben, me hnö, ka habe, Hnen ie man, ke hnen iö ia öbu me ányâ ta je únyi e? 8 Haba Peteru ame fuc ködra, ae unöngötö ge Hanu Kap, me ha, ka habe, Öbun tavat musö hnyei me wahingat lö, 9 öbun e ne hnei öhmu hnyi bong ang ge huliwa ae so öhme ányâ ka at ae mat, ka habe, adre kâmâu hna omelö e; 10 wâhmakhmeto ju öbun hia, me tavat Isaraela hia, a hnen iö Iesu Keriso at Nazareta waleji öbun e osatauroâ, ke Khong ame omelö hmetu thö e úheny hnyi hna mok, haba únyi thibi gan, me ame tot at ang hnyi hnyimaköbun adre osoâ. 11 E thibi veto öbun e degec öbun hnyat bi uma, adre hia but ányâ hnân vetoiny ban kopiny. 12 Ke ba úhömeli ge ke at bi: anyin ae ba ke ien eang hmeledrany adre ham ka at, ae khana he ka omeli öta.

13 Ke ödrin e wâ ihwegiö Peteru me Ioane, ke ödrin e wâhmakhmeto a ödru li at ae ca khan' ödru tusi, ke adre ca nâ, me ödrin e láia; ke ödrin e wâhmakhmeto a únyi ödru ga Iesu. 14 Ke ödrin e wâ at adre osoâ ame tha tot m' ödru, ke ba hofuc gadrin hnân thu. 15 Ke ödrin e hia but kun' ödru hnyöu ai únyi hnyi úkhacaköu, me ödrin e úhnenamö ju, 16 haingödrin ka habe, Ieu ate me he ka ányâ ka li at e? anyin a manen dut ka tavat hia adre me laba hnyi Jerusalema a ödru me hia but ányâ hing úöman; ke ca khan' öta he ka ivinöâ e. 17 Ke so bi me me ca lung igigiloâ bi ka aten hnyei, e so ate me he ka húna wia ködru, he ka ca fuc hmetu bi ka ke at hnyi ien e.

TA JE HULIWA 5.

18 Me ödrin e haw' ödrü me hûna ködrü, ka habe, Ca ha hmetu bi me ûne hnyi iö Iesu. 19 Ke haba Peteru me Ioane ödrü me thu ködrin, ka habe, ûnykûme ju öbun ame ne wisa hnyi hnyimakan Khong he ka ling öbun, ame ne he ka löng Khong : 20 anyin ae ca khan' öhmü he ka ca ha ta je ûnyî öhmü me wâ me löng. 21 Ke ödrin e hia but thawâ ooti ödrü, me ödrin e hn' ödrü but, anyin a ödrin e ca wâ deny he ka bi hwaban ködrü ge tawat ; anyin a tawat hia adre me ogânâ Khong can ta je ûnyî a ânyâ. 22 Anyin ae nua hon fâte ta je hunainy at ödre ânyâ kâu ûöman e me omelö.

23 Ke adre hia but hn' ödrü, me ödrü me he but ka lahanödrü, me thumetu ödrin ge ta je ûnyî hia a ha ködrü tawat bihut ae nua me wahingat. 24 Ke ödrin e hia but löng, me ödrin e ha ka Khong hnyi hnyok a khaca ke hwege ifucidrin, ka habe, Tabony Than lö, u thibi at a op drany me hmeledrany, me köiö, me ta je ûnyî hnyin : 25 u je fuc a deny Hanu Kap me hnyimen kamöhmün Davita a atâm, ka habe,

Anyin a ieu ame imonumonunyköu Aten
ke je Hnyei,
Me ta je hnyei adre me ûnykûme ta je
ûnyî ae ba troban ?

26 Haba je thaniny hmeledrany, me adre me tet metâ,

Ke ame ûkhacaköu thö je taben,
Ûcon Than me Hnen hna Hû :

27 E hnathu adre hia but ûkhacaköu hnyi taun ang Heroda me Ponetio Pilate me Aten ke je hnyei me at Isaraela, je ûcon Atâm ae kap a Iesu at u je hû, 28 ke so bi he ka ânyâ thibi ta je ûnyî adre ip hmâ adrem ge hnyamâm me ânyâm musi he ka mâdrâ. 29 Ke walang ang, Than, ö u wâ ju anyidra ta je hna ootâ : me ham dö ka lathnyabaem he ka hwege ha hwâm hofuc, 30 ke u je lau hnyamâm he ka osoâ ; m' adre me he ka ânyâ ta je ûöman me ta je haten hnyi ien Atâm ae kap a Iesu. 31 Ke ödrin e um dö hic, me ame jijing uma ödrin e laba hnyin ; me ödrin e unöngöt hia thö ge Hanu Kap, me ödrin e ha hofuc hwan Khong hnen hwege.

32 Ke haba useiny tawat adre me labageju, adre me tha hnyok me tha ûnykûme : k' ame ca ha bi ke at gadra, a ga ka anyin bi ûnyî eling e ame hu ; ke ka tha anyidra thibi. 33 Haba je aposetolo ödrin e ohna-thoâ ge man ae gan hmâ möt hmetu thö a Than Iesu ; ke e but hnyi hudrin hia ibe-

tengiö baú ae gan hmâ. 34 Ke ba ke at gadre ae ba ta ûnyî : anyin a haba tawat a ödra tren hnyei me je uma, me adre me úco e me hom hwaban ta je ûnyî adre úco, 35 me ip ju e hnyi je hnyeúcan ta je aposetolo : me adre me ve khenâ öúco ka ta je theduoc.

36 Haba Josefa, adre wenyö Banaba hnen je aposetolo, (walang bongon Nokon kaukahwa,) e at Levi, ke aten hnyei Kuperu, 37 e hu iny utkânâ, ame úco, me hom hwaban me ip e hnyi je hnyeúcan ta je aposetolo.

HNYIMAKAN 5.

KE haba ke бага Anania ien, me Safaira a âiân, ödrü me úco ke hnyei, 2 me behânâ duöngâ ke keihen hwaban, ke e khana minya momo, me hom ke keihen, me ip e hnyi je hnyeúcan je aposetolo. 3 Ke haba Peteru ame ha, ka habe, Anania lö, ieu ga Satana ame ounöngötâ hnyekom, me u me he ka thoi ka Hanu Kap, me behânâ duöngâ ke keihen hwaban hnyei. 4 Hawa, ca ânyâm ehac k' ödra tiga ca úco ? ke hwaban hnâm hna úco, hawa ca hamâm bala bi he ka musö ? ieu gam u me ûnykûme ûnyî eang hnyi hnyekom ? u me ca thoi ka at, ke ka Khong bi. 5 Ke a löng ut Anania hofuc e, me e ame ü but a ga mokcu : me ame o but ot ae gan hmâ ködra hia adre me löng. 6 Me ame todrö wahidröu ka lan e, ke adre me sam e hnyöu ai me konâm.

7 Ke hwaban e, helâ me kun ta awa, me ame didrö âiân, ke ca khana hna ânyâ. 8 Haba Peteru ame ha ka momo ka habe, Ha thö könya, hawa, wale thibi ang hwaban hnyei obe úco ? Ke haba momo ame ha, ka habe, E, wale thibi e. 9 Haba Peteru ame ha kâu, ka habe, Ieu gabu ae tha hnyekubu he ka cubec Hanon Than ? wâ bi, eü hnyi hwanuma tawat adre me konâm âiâm, ke adre me he minya ka sam u. 10 Me ame ie ü but momo hnyi li hnyeúcan k' ame mokcu : ke ame didrö wabidröu me wâ e a mokcu, me adre me sam but hnyöu ai, me tha konâm me âiân. 11 Me ame o but ot ae gan hmâ ka ekalesia hia, m' ödra hia minya adre me löng ûnyî e.

12 Ke se hia ta je haten me ûöman adre me ânyâ unyin tawat ge je hnyamen ta je aposetolo ; ke ödrin e labö ûkhacaköu hia hnyi poretiko anyi Solomona. 13 Ke ca hwege hnyekon keihen he ka tha e mödrin ;

TA JE HULIWA 6.

haba tavat, me adre me ogan' ödrin ; 14 ke se hia obaga me omomo adre me labageju ka Than me hwege tot he ka tha hien mödrin ; 15 waleling m' adre me hom ta je komok ka hnyi je getheniny taun, me ip ödrin hon je hna mokut me je tap, me me na omi hnedrong keihen ge hmenu Peteru, e ka he. 16 Ke ame o but minya keihen ae se hia úhedra hnyi ta je taun igigilö Jerusalema, adre me hom ta je komok, me tavat minya ame oveci ödra hnen je hanu ae kong : ke adre me ve omeli ödra hia.

17 Me ame todrö at bihut ae nua, m' ödra hia a tha ödra mē, (wale hnyat hanen ta je Sadukaio), ke ödra unöngöt ge ihu-hnyinköu, 18 m' adre me kät je aposetolo, me ip ödrin hnyin uma ceat. 19 Ke ame khöng je hwanumen uma ceat hnen angela anyin Than hnyi hnyinghet, me hum ödrin dut hnyöu ai, me ha, ka habe, 20 He th' öbun ka tot hnyi uma kap, me khetâ ka tavat ta je hofuciny Möt eling. 21 Ke ödrin e löng ut, me ödrin e didrö ka hnyin uma kap hnyi hnyomakatu kong, me úne. Ke ame o but at bilut ae nua, me tavat a tha e mē, me hawâ úkhacaköuâ tavat úhnenamö, me tavat musi hia unyin at Isaraela, me e ame úkhúnöng ka hnyi uma ceat he ka hum ödrin. 22 Me ame he but lathnyaba, ke ba at ut hnyi uma ceat ; me ödrin e hmetu me thumetu, ka habe, 23 Öhmun e wâ but uma ceat, k' adre me hlöng wia, k' ame tot eü hnyi je hwanuma tavat tue : ke öhmun e hia but khöng, me ba at öhmun e wâ hnyin. 24 A löng ut hofuc e hnen taben uma kap me je taben tavat bihut, me ödrin e loloâ gadrin ame ne he ka hawâ bi. 25 Me ame o but ke at he ka thumetu ödrin, ka habe, Wâ bi, haba hnyat öbun e ip ödrin hnyin uma ceat, me ödrin e tot hnyin uma kap me ná tavat. 26 Me ame tha he but taben me je lanyin, me hum ödrin, wi' ödrin, anyin a ödrin e outen tavat, wâ adre nye lú' ödrin ge veto. 27 Ke ödrin e hia but hum ödrin dut, me adre me otil' ödrin dö hnyi hnyimakan úhnei. Me at bihut ae nua ame hnei ödrin, ka habe, 28 Öhmun e húna wia köbun, m' öbun e ca he ka úne hnyi ien e : ke wâ bi, öbun e ounöngötâ Jerusalema ge hnöbun hna úne, ke öbun e únykúme he ka jönihmun dren at e. 29 Haba Peteru me je aposetolo ödrin e thu, ka habe, E úcú köhmun he ka löng hoton Khong hon at. 30 Haba Khongon lakamötâ e ame otilö

Iesu, waleji öbun e hlingâ me uhno hnyi úö. 31 E thibi at Khong ame ogöranyâ hnen hnyamen a metân hnân Than me At úhömeli, me me he ka ham ka at Isaraela ietra, me hna thang ta je hulö. 32 Ke öhmun ang hnyat ohnathoâ ta je únyi e ; ke helâe minya Hanu Kap, waleji hnen Khong hna ham ködra tavat adre me löng hoton.

33 Adre hia but löng e, me adre me hmönyidra gan hmâ, me behling' ödrin. 34 Ke ame todrö ke at, at Faresaio, hnyi úhnenamö, Gamaliela ien, at ame únö hnan-yibu, ke e lung so ka tavat hia, ke e ame húna he ka bödra ka kunâ hnyat eling hnyöu ai hnyi úen ae okhulit. 35 Ke haingen ködra, ka habe, At Isaraela lö, wâ eäu öbun hna he ka ányâ ka hnyat ang. 36 Anyin a hnyi je bong ehac a o thö Theuda, me ha, a e at ae beönua ; me ame úhkacaköu kâu tavat ae se hia, helâ me foa haded ; ke adre me hlingâ e ; ke haba tavat hia adre löng hoton me adre me vese but, me hi' ödra bi. 37 Hwaban at eling ame o but Juda at Galiläa hnyi úen he ka sihnalimen tavat, me lelö kâu keihen tavat : k' ame hia minya ju ; me adre me vese hia but tavat adre me löng kâu. 38 Ke walong ang inya oge me ha köbun, ka habe, Úsákâúö but me hnyat ang, me hn' ödrin dut : anyin a ne únyi ge at hwakecin ang, me huliwa eang, ame he ka hia thiju : 39 ke a ne únyi e ge Khong, e ca khan' öbun he ka ohia ; wâ adre nye ö' bun, öbun e vat me Khong. 40 Me adre me ogâ e : ke adre hia but hawâ je aposetolo me osi ödrin, me húna ködrin he ka ca fuc hmetu hnyi iö Iesu, me adre me hn' ödrin dut. 41 Me ödrin e he but úhedrin hnyi hnyimakan tavat úhnenamö, me senyin anyin adre me hna ködrin he ka kong can Ien. 42 Ke ödrin e ca menâ bi hnyi je bong hia he ka úne, me kheti Iesu Keriso hnyi uma kap me ta je hnyaba.

HNYIMAKAN 6.

AME gan tot úseiny laten hnyi je bong e, ke ame kú thö ulit ge at Helenisi ka at Heberu, anyin adre me hnying ut ta je safac gadrin hnyi hna kheuâ ta únyi hnyi je bong hia. 2 Haba hnyat a twelv, ödrin e hawâ je laten ae se hia, me ha, ka habe, E ca so köhmun he ka hna hofuc hwan Khong, me he ka khenâ je jekhöü. 3 Anyin a wale, hnyat me lakeiny, úca thö

hnyat a seven gabun, je hnyat adre me lung so, hnyat ae unöngöt ge Hanu Kap me metâ, me öhmun e he ka otil' ödrin ka hnyi huliwa eang. 4 Ke haba öhmun ang, m' öhmun e he balua ka hwege hnyi hic, me huliwa hnyi hwan hofuc. 5 Ke so hofuc e ka tavat hia : me adre me úcö Setefano, at ae unöngöt ge labageju me Hanu Kap, me Filipino, me Prokoro, me Nikanora, me Timona, me Paramena, me Nikolas at Anetioka, at ame dit elac ka hnyi hmi Juda : 6 adre me otil' ödrin hnyi hnyimakan je aposetolo : ke ödrin e hia but hic, me ödrin e ip je hnyamödrin hudrin.

7 Ke ame khulelau hofuc hwan Khong, ke ti se hia tavat adre me löng hnyi Jerusalema ; ke se hia minya tavat bihut adre me hnyi labageju.

8 Ke haba Setefano, ae unöngöt ge ibetengiö baú me man, ame ânyâ je úöman me haten ae gan hmâ unyin tavat. 9 Me ame todrö keihen úhedrin hnyi sunago, haba ien, me sunago anyin at Libetino, me at Kurene, me at Alesanedria, me tavat úhedra Silikia, me Asia, me adre me ivinö me Setefano. 10 Ke ca khan' ödra thu hmetu anyin metâ me Hanu at ame ofucâ e. 11 Me adre me ha duöngâ ka keihen, mödrin e ha, ka habe, Öhmun e long ut a e ame fuc bi gan kö Mose me Khong. 12 Me adre me omonumonoâ tavat, me wahingat, me hnyat sihnalimen, me adre me o but kâu, me kât e, me hom ka tavat úhnenamö, 13 me otilâ tavat sit hofuc thoi, tavat adre me ha, ka habe, Ame ca menâ bi at ang he ka hai-kongoâ dok ang ae kap, me hnanyibu : 14 anyin a öhmun e löng ut, e ame ha, ka habe, Ame he Iesu at Nazareta ka ohia dok ang, me via ta je hwakecin a ham köta Mose. 15 Ke haba tavat úhnenamö hia adre me wâ hmâ e, me wâ hnyimakan, helâ me hnyimakan angela.

HNHYIMAKAN 7.

ME ame ha at bihut ae nua, ka habe, Hawa e hnathu bi ta je únyi e? 2 Me e ame ha, ka habe,

Hnyat me lakeiny me lakamök lö, löng ju. Haba Khong ae hmanenang ame manen dut kö Aberahama a kamöta, waleji ke tiga e bi hnyi Mesopotamia, ke tiga ca laba bi hnyi Karan, 3 me ha kâu, ka habe, Hna but em hnyei, me je liamekeiny möu, ke he thö ka hnyi hnyei oge me he ka omanenâ köu. 4 Me e ame he but únyi hnyi

hnyei iny at Kaledaia, me laba hnyi Karan : ke hwaban dö mok a kamen, Khong ame hom e ka hnyi hnyei ang öbun e labâ walong ang : 5 ke e ame ca ham kâu ke hwajekhön hnyin, e ba hmönyin ke ong dok helâ me hwadeny hnyeúcan : ke e ame ha bânâ he ka ham kâu me hnân iny, me huân iny je mâtrâniny hwaban, waleji ke tiga ba nokon. 6 Ke haba Khong ame ha helâng ka habe, ame he je mâtrâniny ka laba kanyua hnyi ke hnyei bi, ke adre me ha ka hwenb' ödra, me okongoâ hnyi foa haded je huna. 7 Haingen minya Khong, ka habe, Oge me he ka bi hwaban ka hnyei adre me he ka huliwa kâu, ke hwaban e adre me he ka he but me bi atök hnyi hnyei ang. 8 Ke e ame ham kâu úhinyköu, wale peretom : me e ame hnöku Isaaka me peritomonâ e hnyi bong a eitiny ; ke haba Isaaka ame hnöku Jakob ; ke Jakob ame hnokoâ je pateriaka a twelv. 9 Ke haba je pateriaka ödrin e úcú Josefa hnyi Aigupito can ödrin e hunyinyâ : ke e bi unyin Khong, 10 k' ame omelö e únyi hnyi anyin ta je vec hia, me ham kâu ibetengiö me metâ hnyi hnyimako Farao than Aigupito ; ke e ame otilâ e me me musi hnyi Aigupito me hnyaban hia. 11 Ke ame o but hmiâ me vec ae gan hmâ hnyi Aigupito hia me Kanana : me ba jeú an lakamöta. 12 Ka löng ut Jakob a ga hu hwit hnyi Aigupito, me e ame kunâ lakamöta, úhedrin a bân ling. 13 Ke ame manen dut Josefa ka je liamekeiny me hnyi úhedrin a loiny ; k' adre omanenâ je liamekeiny me Josefa kö Farao. 14 Haba Josefa ame úkhünöng he ka hawâ kamen a Jakob, me anyin lap hia, ödrin sevente faiv tavat. 15 Me ame he Jakob Aigupito ai ; ke e ame mokcu me je lakamöta ; 16 ke adre me sam ödrin Sekema ai, m' adre me ip ödrin hnyi erkemok waleji a úcú silevai Aberahama unyin laku Hamora hnyi Sekema. 17 Ke hakekeny jut úen adre me ha bânâ, waleji a ha Khong kö Aberahama, me ame osehia me si but tavat hnyi Aigupito, 18 ke ne o but ame o ke than Aigupito, at ae ca khana Josefa. 19 Wale at bibihwakecin ka je lakamöta, k' ame okongoâ lakamöta, k' ame kun' ödra he ka dedegec lakudra je mendring, m' adre me ca möt bi. 20 Wale úen adre me hnöku Mose hnyin, e wanakat ae hmanenang ; ke adre hat e hnyi uma umen kamen kun ta tehi : 21 ke adre me me degecâ e, me ame hom dö e hnen hlu nöku Farao, me hat e me me nokon bi.

TA JE HULIWA 7.

22 Ke adre me nö Mose hnyi ta je metâ hia anyin at Aigupito; k' ame metâ but hnyi hofuc a hwan, me anyin ta je huliwa. 23 Ke hakekeny fâte but ta je hunainy, me ame kû thö weny eü hnyi hnyekon he ka senâ je liamekeiny mē, a lakon Isaraela. 24 Ke e ame wâ ke at adre me okongoâ, me e ame hadruâ, me bi hien at adre me okongoâ, me kot moko at Aigupito: 25 anyin a e ame ûnykûme a g' ame he je liamekeiny ka wâ ûnykûme a g' ame he Khong ka omeli ödra ûnyi ge hnyamen bi; ke adre me ca wâ ûnykûme. 26 Nyi e ame o ka li at ödru me ûkûc, me e ame thaw' ödru me me soju, haingen, ka habe, Ke lin lö, öbu liamekeiny, ieü gabu, öbu me úokongu öbu köu. 27 Ke haba at, wale ame okongoâ hanen, e ame hagutâ e me ha, ka habe, Ia otilö u he ka musi me owisa köhmun? 28 Hawa, e wem he ka hlingö nya, helâ et me hnâm hna hlingâ at Aigupito? 29 Me ame kec ut Mose can hofuc eling, me laba atkanyua hnyi hnyei Midiana, waleji e ame hnokoâ hnyin lakon li бага. 30 Ke hwaban je huna a fâte, ame manen dut kâu hnyi hnyebubainy bucen Sinai angela hnyi bâhlân meic hnyi ong úö. 31 Ka a wâ but Mose, me e ame láia hnen hna wâ: ke e ame tiga he hakekeny he ka wâ, me ame o but hofuc hwan Than, 32 ame ha, ka habe, Inya ang Khongon lakâmâm, wale a Khongu Aberahama, me Isaaka, me Jakob. Haba Mose ame öbubuny me ot ka wâ. 33 Haba Than ame ha kâu, ka habe, Thang ut tangen li hnyeûcam, anyin ae kap utkânâ e u me tot hnyin. 34 Inya oge hia but wâhmakhmetoâ hna okongoâ lakeik hnyi Aigupito, ke oge löng ut anyidra mâng, ke oge me o but ang he ka hoi ödra: ke walang ang aiö u, oge me he ka kunö u Aigupito ai. 35 Wale Mose at ame hmi' ödra me ha kâu, ka habe, Ia otilö u he ka musi me owisa? wale Khong ame kunâ hnân at musi me at úhömeli ge hnyamen angela wale a manen kâu hnyi ong úö. 36 Haba at eling ame hum ödra but, hwaban hnen hna omanenâ ta je úöman me haten hnyi hnyei Aigupito, me hnyi Köiö ae dra, me hnyebuba hnyi fâte je huna. 37 Wale Mose at ame ha ka lakon Isaraela, ka habe, Ame he Khong ka oâ hobi köbun a liamekeiny möbun ke perofeta helâ me inya. 38 Waleji at ae hnyi úkacakâu hnyi hnyebuba tha e me angela at ame fuc kâu hnyi bucen Sinai, me tha e me lakamöta: at ame kap hofucin

möt he ka ham köta: 39 waleji a höcö löng kâu hnen lakamöta, ke adre me hna degecâ e, ke ame hmetu je hnyekudra Aigupito ai, 40 adre me ha kö Arona, ka habe, Ânyâ thö ke je khonguta he ka he hnyi hnyimaköta: anyin a haba Mose e, at a hum öta ûnyi hnyi hnyei Aigupito, e ca khan' öta ûnyi a o kâu. 41 Me adre me ânyâ nokon kau hnyi úen eling, me bi hut ka hnatheat, me senyin ka hnyi huliwa hnen je hnyamödra. 42 Haba Khong ame hwiö thö me hn' ödra but he ka bi athnyabainy ta je ûnyi hnyi drany; helâ me hna sihnalimen hnyi tusi anyin je perofeta, ka habe,

Hawa, öbun e hudo könya ta je meno adre me hlingâ me ta je hut

Hnyi hnyebuba hnyi je huna a fâte, lap anyi Isaraela?

43 Ke öbun e hom minya uma menâ uma Moloka,

Ke okhuiny khongubun a Refana,

A je hnatheat öbun e ânyâ he ka khudrung ködrin:

Awe, oge me he bi nya ka hum öbun ka hnyi Babulona.

44 E hu uma menâ a uma ohnatho unyin lakamöta hnyi hnyebuba, helâji me hna hûna kö Mose ame ha, ka habe, hamen he ka ânyâ hoton tulut e ame wâ. 45 Ke haba lakamöta unyi Josua, me adre me hom ûnyi eling hnyi úen adre me kap hnyei iny Aten ta je hnyei, waleji hnen Khong hna obâ hnyi hnyimakan lakamöta, ke ne o but hnyi ta je bong bongu Davita; 46 wale at a wâ ibetengiö ûnyi ge Khong, k' ame sumâtâ he ka wâ uma umen Khongu Jakob. 47 Ke haba Solomona ame otilâ uma umen Khong. 48 Ke so bi ame ca laba Beönua hnyi je uma adre me ânyâ ge hnyam; helâ me hna ha hnen perofeta, ka habe,

49 Haba drany, me anyik theron,

Haba hmeledrany, me taben li cak:

Ke haingen Than, ka habe, Ie uma öbun e he ka otilâ hobi könya?

Ke ewa bi dok oge ma menâ hnyin?

50 Hawa, a ca op ta je ûnyi e ge hnyamök?

51 Öbun hnyat ae hwege je nyibun, k' adre ca peritomonâ je hnyekubun me je hnyikönyöbun, öbun e labö tot metâ úcon Hanu Kap: helâji me lakamöbun, me helâ minya ju e öbun. 52 Ewa perofeta a ca ovecâ hnen lakamöbun? ke ödrin e hlingâ minya tawat a bödra ka omanenâ a g' ame

he ka o At ae Wisa ; wale öbun e alecua me hlingâ walang ang ; 53 öbun tavat öbun e kap hnanyibu a hûna hnen je angela, k' öbun e ca vheno bi.

54 Adre me löng ta je hofuc e, me ame hmönyidra gan hmâ, me adre me hoc nyu kâu. 55 Ke e a unöngötö ge Hanu Kap, k' ame wâ hmâ drany, me wâ hmanenanginy Khong, me Iesu ame tot hnyi ke keihen a metân Khong, 56 me haingen, ka habe, Wâ bi, inya oge me wâ drany adre khöng, me Nokon at ame tot hnyi ke keihen a metân Khong. 57 Me adre me fuc hwege göranyai, me hlöng je hnyikönyödra, me tha utut kâu ; 58 me adre me hagutâ e ka hnyi hoton hnyei, me lûâ ge veto : ke haba hnyat ödrin e bifuco e adre me khuâ je khaüödrin hnyi li can hidröu, Saulo ien. 59 Ke adre me lûö Setefano, k' ame tiga hic me ha, ka habe, Than Iesu lö, kap ju hanuk. 60 Ke e ame cibouca, me fuc hwege göranyai, ka habe, Than lö, ca bi hwaban ködra monu eang. Ke a hia but ha e, e ame mokut ut.

HNYIMAKAN 8.

KE Saulo minya ame ogâ anyin mok. Ke haba hnyi bong eling ame kû gan hmâ but hna ovecâ ekalesia hnyi Jerusalema ; ke adre me vese hia but ka hnyi ta je ke keihen hnyei Juda me Samaria, ke hake je aposetolo thiju. 2 Ke haba tavat adre me ouden Khong adre me könim Setefano, me tenge thungau gan hmâ gan. 3 Ke haba Saulo, e ame vekia okongoâ ekalesia, me dit ka hnyi ta je uma, me lelö but obaga me omomo, me ip ödra hnyi uma ceat.

4 Anyin a wale haba tavat adre me oveseâ adre me he but ka hnyi je dok me khetâ hofuc. 5 Me ame he but Filipino ka hnyi taun ien Samaria me khetâ Keriso ködra. 6 Haba tavat adre me tha kap ta je hofuc ame ha Filipino, adre me löng me wâ ta je haten e ame ânyâ. 7 Anyin a ta je hanu ae kong adre me didrut ge tavat ae se hia ae hu gadra, adre me fuc hwege göranyai ; ke se hia tavat ae mat, me tavat ae kong je cadra, adre so but. 8 Ke e gan hmâ senyin hnyi taun eling.

9 Ke wale ke at Simona ien, at bibihwakecin e hac hnyi taun eling, me me lâiâ gan at Samaria, haingen, e thibi at ae gan : 10 ke ame kap e hnen tavat hia, hwân ge tavat ae ûhnyûkong ke ne o but ge tavat

ae gan, haingödra, ka habe, Haba at ang me, man maniny Khong adre wenyö Gan Hmâ. 11 Ke adre me kap e anyin ae beü hnen hna olai' ödra ge anyin bibihwakecin. 12 Ke adre hia but köp Filipino at khetâ úthumetu ae so anyin dökhü dokhon Khong, me iö Iesu Keriso, me e ame bapataisoi ödra obaga me omomo. 13 Ke haba Siuona ame hnyi kap, k' adre hia but bapataisoi, k' ame tha e bala me Filipino ; ke e ame wâ je haten me je úöman ae gan hmâ adre me ânyâ, me e ame lâiâ.

14 A löng ut ta je aposetolo hnyi Jerusalema a g' adre me kap soâ hofuc hwan Khong hnen at Samaria, me ödrin e kunö Peteru me Ioane ködra : 15 ke ödrü me he but me hic hobi ködra, me me hu gadra Hanu Kap : 16 anyin ae tiga ca o ködra : ke adre hia but bapataisoi ödra thibi ka hnyi ien Than Iesu. 17 Ke ödrü me ip li hnyamödrü hudrin, me ame o thö ködra Hanu Kap. 18 Ke a wâ but Simona a g' adre me ham Hanu Kap únyi ge hna ip hnyamen li aposetolo, me e ame inâ ködrü mone, 19 me ha, ka habe, Ham but könya man e, me me he at oge me ip li hnyamök hon ka hu Hanu Kap. 20 Me haba Peteru ame ha kâu, ka habe, A hnaühangö but ânyâm mone möu, anyin a u je únykûme he ka úcû moniny únyi a ham bâúâ hnen Khong. 21 Haba u, me, ba gam ke únyi me hanymâm hnyi únyi eang : anyin ae ca wisa hnyekom hnyi hnyimakan Khong. 22 Anyin a wale ietra ju ânyâm monu eang, me hic ka Than, ame ne he bi ka thang ut köu únykûmenen hnyekom. 23 Anyin a oge me wâhmakhmeto a u bala but hnyin waada ae hiny, ke u hwenbâ hnyi hulö. 24 Haba Simona ame thu, ka habe, Hic d' öbu ka Than hobi könya, me me ba únyi ame he ka o könya hnyi ta je únyi öbe ha.

25 Ke ödre hia but thumetoâ me ha hofuc hwan Than, me ödrü me hmetu but Jerusalema ai, me khetâ úthumetu ae so hnyi je taun ae se hia hnyi Samaria.

26 Haba angela anyin Than ame ha kö Filipino, ka habe, Todrö, he thö ka hnyi hwaiöu, ka hnyi gethen úheny Jerusalema Gaza ai : wale hnyebuba. 27 Me e ame todrö me he : ke wâ bi ke at Aithiope, wale eunuka ae nua hanymen unyi Kanadaki. momo than Aithiope, k' ame tuö tang omjehen momo eling hia, k' ame o thö Jerusalema ai he ka hnyi hmi ; 28 ke e ame he hmetu ka hnyi hwaiöu, k' ame laba

hon anyin kariota, me aú perofeta Isaia. 29 Ke haba Hanu ame ha kö Filipo, ka habe, He hakekenyâ thö me tha he me kariota eling. 30 Haba Filipo ame wadring kâu, me löng hnen hna aú perofeta Isaia, me e ame ha, ka habe, U me ka únykúme e hnâm hna aú? 31 Haingen, ka habe, Ame he ka kâmâu ka khanö nya, ke ba bi at ame owisa kõnya? Me e ame sumatö Filipo he ka ölö, me tha laba mē. 32 Walang hna sihnalimen e ame aú, ka habe, Adre me lelö e helâ me mamoe he ka hlingâ ;

Ke helâ me nokon mamoe hnyi hnyimakan at ame sö leünen, ame tet hnyibú,

Helâ minya e, ame ca khöng hnyimen : 33 Hnyi úen hna öúhnyúkongoâ e adre hom gan anyin hna owisa :

Ke ie at ame he ka omanenâ anyin dö?

Anyin adre hom anyin möt úheny ang hmeledrany.

34 Haba eunuka ame thu kö Filipo, ka habe, Inya oge me hnei u, ia ame ha perofeta eang? hawa ka e bi, ame ne ke at bi?

35 Haba Filepo ame fuc kâu, me omanenâ kâu Iesu, hwân hnyi hna sihnalimen eling.

36 Ödru me tiga he eú hnyi gethen, me ödru me o but ka hnyi ke an ; me ame ha eunuka ka habe, Walejo an ; hawa, e kong he ka bapataisoï nya? 38 Me e ame ha me me todru kariota : me ödru me tha utut ka hnyi an, wale Filipo me eunuka ; me e ame bapataisoâ e. 39 Ke ödru me ölö thö úhedru hnyi an, haba Hanon Than ame hûgûnö Filipo but ; ke ame ca wâ hmetu e hnen eunuka, anyin a e ame he senyiná hnyi deny gethen. 40 Ke adre ö Filipo hnyi Azota : ke e ame khetâ tilâ úthumetu ae so hnyi ta je taun hia ke ne o but e ame o hnyi Kaisaria.

HNYIMAKAN 9.

KE Saulo bala ame kong hnyekon he ka ootâ me hlingâ je laten Than, me e ame he ka at bihut ae nua, 2 me sumatâ je tusi gan he ka hom ka hnyi ta je sunago hnyi Damaseko, me me he ka c' ödra, me hom Jerusalema ai obaga me omo, e ka hu tavat hmi ame he ka wâ. 3 Ke tiga eú hnyi gethen hakekenyâ Damaseko : ke ame ie umumelam igigilö e melam únyi hnyi drany : 4 me e ame ta but ka hnyi kânâ, me ame löng ke hofuc

ame ha kâu, ka habe, Saulo, Saulo lö, ieú gam u me okongu nya? 5 Ke haingen, ka habe, U ia Than? Me e ame ha, ka habe, Inya Iesu wale u me labö okongoâ : 6 todrö, he thö ka hnyi taun, ke adre me he ka ha köu hanymâm he ka ányâ. 7 Ke ame tot hnyibú tavat adre me tha he mē, adre me löng hofuc ke ba bi at adre me wâ. 8 Me ame todrö Saulo úheny ú hnyi kânâ, ke e ame bwele but, ke ba únyi ame wâ : me adre me lelö thö benyin, me hom e Damaseko ai. 9 Ke kun ta bongon ka wadröu but, ke ame ca han me ic.

10 Ke e hu ke aten hnyi Damaseko, Anania ien ; ke haba Than ame ha kâu hnyi hna omanenâ, ka habe, Anania lö. Me e ame ha, ka habe, Than lö, inya ang. 11 Ke haingen Than kâu, ka habe, Todrö, he thö ka hnyi getheniny taun, Wisa ien, me hnö hnyi uma umö Juda ge ke at a ien Saulo, at Taraso : anyin a wâ bi, e ame hic ; 12 ke e a hia but wâ at, Anania ien, ame didrö, me ip li hnyamen hon e, me e ame he ka bwele hmetu but. 13 Haba Anania ame thu, ka habe, Than lö, o ge löng ut únyi ge tavat ae se hia bongon at ang, a g' ame ányâ gan hmâ monu ka ányâm tavat ae kap hnyi Jerusalema : 14 ke e hu anyin dut musi eang únyi ge je taben tavat bihut he ka c' ödra hia adre me hawâ iâm. 15 Haba Than ame ha kâu, ka habe, He thö, anyin adre úca e hnân anyik utkaia he ka kap tilâ iök ka Aten ke je hnyei, me ta je than, me lakon Isaraela : 16 anyin oge me he ka omanenâ kâu úganiny vec e ame he ka hom can iök. 17 Me ame he but Anania, me didrö ka hnyi uma ; ke e ame ip li hnyamen hon e, me ha, ka habe, Saulo lö, liamekeiny mönya, a kunö nya Than Iesu, waleji a manen köu eú hnyi gethen u je he hnyin, m' u me bwela but, me unöngöt ge Hanu Kap. 18 Me ame ie kölu but únyi hnyi li emakan, helâ me je unö, me e ame bwela but ; ke e ame todrö, me ame bapataisoâ e ; 19 ke a hia but han, me e ame hwege but.

Ke e ame tha laba me laten hnyi Damaseko hnyi ke je bong. 20 Ke e ame ie kheti Iesu hnyi je sunago, a e thibi Nokon Khong. 21 Ke haba tavat hia adre me löng hwan, k' adre me láiâ me ha, ka habe, Ca e at ame okongu ödra hnyi Jerusalema adre me hawâ ien e? ke e ame o but eang he ka helâe, me me c' ödra me hom but ka hnyi hnyimakan je taben tavat bihut. 22 Ke ame hwege tot Saulo, k' ame ohnyi-

TA JE HULIWA 10.

bö tavat Juda hnyi Damaseko, me ohnathoä a haba Iesu, me Keriso.

23 Ke hwaban ta je bong ae se hia, me ame ûhnenamö at Juda he ka hlingâ e : 24 ke ame manen kö Saulo hnödra hna si hnân. Ke adre me labö tue hnyi ta je homagöule hnyi lany me lit he ka hlingâ e : 25 ke ame hom e hnen laten hnyi hnyinghet, me hnahna e hnyi tang ûnyi hnyi dok ae memang hnyi hak veto.

26 Ke e ame o hnyi Jerusalema, k' ame cubec he ka tha laba me je laten : ke ödra hia adre me outen e, ke adre me ca ûnykû-me bi a e ke aten minya. 27 Ke haba Banaba ame hom e, me ame tha he mē ka ta je aposetolo, me e ame omanenâ ködrin a e ame wâ Than eû hnyi gethen, ke a hia but ha hofuc kâu, me hnen minya hna khetâ hwegiâ iö Iesu hnyi Damaseko. 28 Me e ame labö tha he mödrin hnyi Jerusalema, 29 k' ame khetâ hwegiâ hnyi ien Than : ke e ame ha hofuc me ivinö me at Helenisi ; ke adre me elâm he ka hlingâ e. 30 Ke e khana but je liaukeiny, me adre me hom but e Kaisaria ai, me kunâ e Taraso ai.

31 Ke hnahic ut ekalesia hnyi je ke keihen Juda hia, me Galilaia, me Samaria, k' ame khulelau bi ; ke adre me labö he me ot ka Than, k' ame kahwa je hnyekudra ûnyi ge Hanu Kap, k' adre me osehia but.

32 Haba Peteru ame he hnyi je ke keihen hnyi hia, me e ame o ka tavat ae kap adre me laba hnyi Lida. 33 Ke e ame wâ eling ke at, Ainea ien, at ame mokut hon hnen hna mokut eit ta huna ; anyin e ame mokulec mok ae mat. 34 Haba Peteru ame ha kâu, ka habe, Ainea lö, haba Iesu Keriso ame osoi u : todrö, me ânyâwia hnâm hna mokut. Me e ame ie todrö. 35 Ke haba tavat hia adre me laba hnyi Lida, me Sarena adre me wâ ûnyi eling me hwiö ka Than.

36 Ke e hu hnyi Jopa ke aten, Tabitha ien, k' adre me wia bongon ien, me Doreka : haba momo e, me unöngöt ge ta je huliwa ae so k' ame betenge ka ta je theduoc. 37 Ke hnyi je bong eling e ame mok, me e ame mokcu : ke adre hia but osûâ e, me adre me ip e hnyi hnyeule ethö. 38 Ke ca sâkâû Lida me Jopa, ke a löng ut laten a e but ling Peteru, me adre me kunâ kâu li at he ka sumâtâ, ka habe, Ca bec he ka o köhmun. 39 Haba Peteru ame todrö me tha he mödrü. E ame o but, me adre me hom e ka hnyi hnyeule ethö : ke ame tha

tot mē ta je safac hia adre me ütengiö, k' ödrin e omanenâ ta je ûkot me je ûkhaü ame tibet Doreka, ke tiga e bi unyidra. 40 Ke haba Peteru ame ob' ödrin dut hnyöu ai, k' ame cibouca me hic ; ke e ame hwiö thö ka komok, me ha, ka habe, Tabitha lö, todrö. Me ame bwela but li emakan momo ; ke e ame ö Peteru, me e ame laba thö. 41 Ke e ame inâ hnyamen ka momo, me otilâ thö e ; ke a hia but hawâ tavat ae kap, me wasafac, me e ame ham e ködrin a ga mödrut. 42 Ke ame lung ûnyi eling hnyi Jopa hia : ke se hia tavat adre me hnyi labageju ka Than. 43 Ke se hia je bong e ame laba hnyi Jopa unyin ke at jia Simona, at ame huliwan je unen meno.

HNYIMAKAN 10.

E HNYI Kaisaria ke at, Konelio ien, e keneturio hnyi utbavat adre me hwenyi ien, vat Italia, 2 e at fâfâ hnyekon, k' ame outen Khong tha e me anyin lap hia, me ham ta je betenge ae se ka tavat, me hic bala ka Khong. 3 Ke e ame wâ hna omanenâ, ame ne hnyi awa a naininy, wale ame dit kâu angela anyin Khong, me ha, ka habe, Konelio lö. 4 Ke e ame wâ hmâ e, me ame ot me ha, ka habe, Than lö ieü ! Me haingen ame ha kâu, ka habe, A o but hijâm je hic me hnâm je hna betenge hnyi hnyimakan Khong hnân oûnykûmeâ. 5 Ke walang ang kunâ thö hnyat Jopa ai he ka hawo Simona, ke ien minya bi Peteru : 6 e ame tha laba me ke Simona at ame huliwan unen je meno, e hnyi hobat köiö umen uma. 7 Ke ame he but angela at a fuc kâu, me e ame hawâ li lanyin me ke soja at ame outen Khong hanen tavat adre me bi athnyabainy hnyi je bong ; 8 ke a hia but thumetu ödrin ge ta je ûnyi hia, e ame kun ödrin dut Jopa ai.

9 Nyi, tiga ödrin eû hnyi gethen, ödrin hakekeny jut ka hnyi taun, haba Peteru ame ölö thö ka hnyi hon uma he ka hic hnyi awa a siksiny : 10 me e ame mekih-nânem, me behan : ke adre me tiga penapena, me ame o but kâu hna omanenâ ; 11 me e ame wâ drany adre khöng, me tang ame utut, helâ me mano ae gan adre me hnahna ka hnyi hmeledrany hnyi ta baten a vak : 12 ke ta je meno hia ae ûsa vak can eû hnyin, me je meno ame iyâû eang hmeledrany, me je meno ame gâ ethö. 13 Me ame o but kâu hofuc, ka habe, Peteru lö, todrö, hlingâ but, me an ju. 14 Ke

TA JE HULIWA 10.

haba Peteru ame ha, ka habe, Than lö, ca e, anyin a oge me ca hnyi an ke únyi ae kap me ikiki. 15 Me adre me olo ha káu, ka habe, Haba hna ányáwia hnen Khong, u ma ca ha, ka habe, e kap. 16 Ödra okun ányá helâe; me adre me kap hmetu thö tang hnyi drany ai.

17 Ke haba Peteru ame tiga únykúme loloá bongon hna omanená e ame wá, wá bi, hnyat a kuu' ödrin Konelio, ödrin e elâm una umö Simona, ke ödrin e tot hnyi homagöule, 18 me hongot, me hnei, ka habe, hawa, ame hnyi laba eang Simona, ke ien minya Peteru? 19 Ke Peteru ame tiga únykúme hna omanená, haba Hanu ame ha káu, ka habe, Wá bi, kun ta hnyat ödrin e elöm u. 20 Ke todrö, utut, me tha he mödrin, ke ca loloá bi: anyin oge kun ödrin. 21 Haba Peteru ame utut ka ta hnyat a kun, me ha, ka habe, Wá bi, inya ang öbun e elâm: ieü öbun e vhenojem? 22 Ke haingödrin, ka habe, Haba Konelio, keneturio, at ae wisa hwakecin, me outen Khong, me hna haisoá hnen at Juda hia, ame kú káu hnen angela ae kap he ka hawo u ka hnyi umen uma, me me he ka löng hofuc gam. 23 Me e ame haw' ödrin hnyi uma ai he ka mokut.

Ke hnyi e ame tot, me tha he mödrin, ke haba ke je liamekeiny úhedrin Jopa ödrin e tha he mē. 24 Hmetu nyi, ödrin e o hnyi Kaisaria. Ke haba Konelio ame lubahing' ödrin, ke e ame ukhacaköuá je liamekeiny me, me je lahanen. 25 Ame didrö Peteru, me Konelio ame he he ka iouny mē, me ta ju ka hnyi hmelen li can, me khudrung káu. 26 Ke haba Peteru ame otílâ thö e, me ha, ka habe, Todrö; iny at minya bi nya. 27 E ame úhnenamö mē, k' ame didrö, ke e ame wá tavat ae se hia adre me úkhacaköu: 28 me e ame ha ködra, ka habe, E khan' öbun a g' adre hnyiboá at Juda he ka úkhacaköu me úhakekenyi me aten ta je hnyei; ke so bi Khong ame hia but omanená könya, a oge me ca he bi ka háia at, ka habe, e kap, me ikiki: 29 waleling oge me he jem ka ha ihut hnyi úen adre me hawo nya. Ke oge me hnö walang ang can öbun e hawo nya? 30 Ke haingö Konelio, ka habe, Haba vak ta bong et ang, me oge me hic hnyi awa a naininy hnyi umök uma, ke wá bi, ame tot ke at hnyi hnyimakök a khavá úkhaú ae hadröngöc, 31 k' ame ha, ka habe, Konelio lö, adre hia but löng hijâm hic, ke adre hia but únykúme hnâm je hna betenge hnyi

hnyimakan Khong. 32 Anyin a wale úkhúnöng dö Jopa ai, he ka hawo Simona, ke ien Peteru, e ame laba hnyi uma umen ke Simona at ame huliwan unen je meno, wale hnyi hobat köiö. 33 Anyin a wale oge me ie úkhúnöng köu; ke so anyin a u but ang, a u je o thö. Anyin a wale öhmun hia but ang hnyi hnyimakan Khong, he ka löng ta je únyi hia ame he Than ka húna köu. 34 Haba Peteru ame ha hofuc, ka habe,

E hnathu oge me wá únykúme a haba Khong ame ca wáhmakhmeto tavat: 35 ke e ame kap at ame outen e hnyi ta je hnyei hia, wale at ame ányá hwakecin ae wisa. 36 Haba hofuc waleji e ame kuná ka lakon Isaraela, k' ame khetá úthumetu ae so hnyi úsoköu a deny Iesu Keriso, (e thibi Tuhan ae nua)—37 me manen hofuc e köbun, waleji adre me haimemená hnyi Juda hia hwân hnyi Galilaia, hwaban bapataiso ame khetá ga Ioane; 38 wale Iseu at Nazareta, ke haba Khong ame hú e hnen Hanu Kap me man; ke e ame labö vhenojem he ká betenge ge at, me osoá tavat ame oveci ödra diablo; anyin a tha mē Khong. 39 Ke öhmun ang hnyat ohnatho ta je únyi hia e ame ányá hnyi hnyei Juda, me hnyi Jerusalema; wale adre hlingá minya me uhno hnyi úö. 40 Ke haba Khong ame omelö hmetu e hnyi bong a kuniny, me ti omanená e, 41 ca ka tavat hia, ke ka tavat thibi adre ohnatho, waleji tavat a bán Khong ka uc' ödrin, a wal' öhmun ang hnyat öhmun e tha han me tha ic mē hwaban hnen hna möt hmetu úheny hnyi hna mok. 42 Ke e ame húna köhmun he ka khetá ka tavat, me ohnathoá a e at a úca Khong hnân hnö tavat ae möt me tavat ae mok. 43 Ame ohnathoá gan hnen ta je perofeta hia, a adre me he ka thang degecá but ta je hulö hia anyin tavat adre me labageju káu, únyi hnyi ien.

44 Peteru ame tiga ha hofuc e, me ame ta Hanu Kap hudrin hia adre me löng hofuc. 45 Me ame uthmáhmá tavat adre me labageju a tavat adre peritomon, wale hnyat adre tha he me Peteru, anyin adre me hingálâ minya bwihlany wale Hanu Kap hon Aten ta je hnyei. 46 Anyin adre me ling ödrin ödrin e fuc hnyi ta je hwen hnyei me ogáná Khong. 47 Haba Peteru ame ha, ka habe Ia ae khana he ka beháná köiö m' adre me ca he ka hnyi bapataiso ödra, tavat adre me hnyi kap Hanu Kap, helá m' öta? 48 Me e ame húna he ka

TA JE HULIWA 11, 12.

bapataisoi ödra hnyi iö Iesu Keriso. Ke adre me hom behânâ e he ka tha laba mödra hnyi ke je bong.

HNYIMAKAN 11.

KE a löng ut je aposetolo me je liame-keiny hnyi Juda a ga hia but minya Aten ke je hnyi kap hofuc hwan Khong. 2 Ke ame o thö Peteru hnyi Jerusalema, me adre me iwatretra ju më tavat adre peritomonâ, 3 me ha, ka habe, U je he ka tavat adre ca peritomonâ me tha han m' ödra. 4 Ke haba Peteru ame hwân he ka omanenâ gaga ködra, ka habe, 5 Inya bi oge me laba hnyi taun Jopa, oge me hic: me oge me wâ hna omanenâ hnyi hnök hna ta mokut, wale ke tang ame utut helâ me mano ae gan adre me hnahna únyi hnyi drany hnyi ta baten a vak; me ame o kõnya únyi eling: 6 ke oge hia but wâ hmâ e, inya oge me únykúme, me wâ ta je menoiny hmeledrany ae úsa vak can, me je meno ae hiny, me je meno ame iyâú, me je meno ame gâ ethö. 7 Ke oge me löng minya ifucin adre me ha kõnya, ka habe, Peteru lö, todrö, hlingâ but, me an ju. 8 Ke haingök, ka habe, Than lö, ca e; anyin ae ba ke únyi ae kap me ikiki ame hnyi dit ka hnyi hnyimök. 9 Me ame olo thu hnen ifucin únyi hnyi drany, ka habe, Haba hna ányâwia hnen Khong u ma ca ha, me kap. 10 Ke adre ökun ányâ e: me adre me aú hmetu hia thö hnyi dranyai. 11 Ke wâ bi, ame ie tot hnyi hoton uma öhmun e laba hnyin, hnyat a kun, adre kun' ödrin kõnya úhedrin Kaisaria. 12 Me ame ha kõnya Hanu he ka tha he m' ödrin me ba loloâ me ca wâhmakhmeto. Ke ame tha he mönya ke je liamekeiny eang a ödrin siks; me öhmun e didrö ka hnyi uma umen at eling: 13 me e ame omanenâ köhmun hnen hna wâ angela hnyi umen uma, wale ame tot me ha kâu, ka habe, Úkhúnöng dö Jopa ai he ka hawo Simona, ke ien Peteru; 14 at ame he ka ha köu ta je hofuc, hnân omeli u me ányâm lap hia. 15 Ke inya oge me tiga hwân he ka fuc, me ame o but ködrin Hanu Kap, helâ me köta ehac hnyi can. 16 Me oge me únykúme thö hofuc hwan Than ame ha, ka habe, Ioane ame bapataiso ge köiö; ke adre me he ka bapataisoi öbun ge Hanu Kap. 17 Anyin a wale haba bwihlany a han kötin Khong hnyi úen ötin e labageju ka Than Iesu Keriso, ame ne ham minya

ködrin, iny ia, me inya he ka thawá Khong! 18 Ke adre hia but löng hofuc e, me adre me laba hnyibú me ogânâ Khong me ha, ka kabe, E hnathu Khong ame ham ietra ka Aten ta je hnyi minya, m' adre me möt.

19 Ke haba tavat adre vese hnyi úöveci a kú kö Setefano, me adre me he ke ne o but hnyi Foinike, me Kupro, me Anetioka, adre me ha hofuc hwan Khong ka at Juda thibi. 20 Ke haba keihen gadra a je at Kupro me Kurene, adre me o but hnyi Anetioka, me ha hofuc minya ka at Heleni, me khetâ úthumetu ae so anyin Than Iseu. 21 Me ame tha e mödra hnyamen Than: ke ödra se hia adre me labageju me hwiö ka Than. 22 Ke a löng ut e huen hnyikönyen ekalesia hnyi Jerusalema: me adre me kunö Banaba Anetioka ai: 23 ke ame o but me wâ ibetengiö baú anyin Khong, me e ame senyin, me khöu ködra hia he ka kece ka Than ge hnyok ae tethmâ: 24 anyin a e at ae so, ke unöngöt ge Hanu Kap me labageju: ke se hia tavat adre me bi hanen ka Than. 25 Ke e ame he Taraso ai he ka elöm Saulo: 26 k' ame wâ e me hom e Anetioka ai. Ke tha ödrü me ekalesia hnyi khaca huna, k' ödrü nâ tavat ae se hia; ke adre me ibi hwân hnyi Anetioka ka hwenyi ien laten ka habe, Je Kerisiano.

27 Haba hnyi úen eling ame o but hnyi Anetioka ta je profeta úhedrin Jerusalema. 28 Ke ame todrö ke at gadrin, Agabo ien, me omanenâ ge Hanu a g' ame he ka hu hmiâ ae gan hmâ hnyi hmeledrany hia: wale a hwâdá thö hnyi úö Kalaudio. 29 Haba laten adre me tha ha he ka kunâ ta je bwihlany ka je liamekeiny adre me laba hnyi Juda, e úcú me hnödra hna ve khana: 30 me adre me ányâ e, me kunâ ka wahi-ngat a deny Banaba me Saulo.

HNYIMAKAN 12.

HNYI úen eling haba Heroda than ame hai hnyamen he ka okongo keihen ekalesia. 2 Me e ame hlingö Iakobo liamekeiny me Ioane ge hele vat. 3 Ke a wâ but a g' ame senyin at Juda, me e ame hwân minya he ka köt Peteru. Wale úen adre me han areto adre me ca levenâ. 4 A hia but kât e, me e ame ip e hnyi uma ceat, k' ame hna e ka je deö soja a vak a úsa vak hnyi je deö, he ka tuö e, k' ame únykúme he ka hom e ka tavat hwaban paseka. 5 Anyin a wale adre me tuö Peteru hnyin

uma ceat : ke haba ekalesia adre me hic újông ka Khong hobi kâu. 6 Ke ame o but úen ame he Heroda ka hom e hnyôu ai, k' ame mokut Peteru wanben li soja hnyi hnyinghet eling, k' adre me ca e ge li tö fao : ke ame tuö uma ceat ge hnyat tue cicö hwanuma. 7 Ke wâ bi angela anyin Than ame tot unyin, ke ame melam hnyin uma ceat : me e ame khaú vhaö Peteru, me ohmâkâ e, me ha, ka habe, Ie todrö. Me ame ka kölu but li tö fao únyi hnyi li hnyamen. 8 Ke haba angela ame ha kâu, ka habe, Khaú thö, ke ohmâ tangen li hnyeúcam. Me e ame ânyâ. Ke haingen kâu, ka habe, Khavâ thö ânyâm úkhaú me he hotuk. 9 Me e ame didrut me he hoton ; ke ame ca únykúme bi a e hnathu hna mádrâ hnen angela, ke haingen, hna omanená ling. 10 Ke ödre hia but nulâ tue a bán me loiny, me ödrü me o but ka hnyi homagöule fao gethen ka he ka hnyi taun ; me ame ka hamen thibut memang ködrü, me ödrü me didrut hnyöu ai, me vhenö ke getheniny taun ; me ame ie hna but he hnen angela. 11 Peteru ame únykúme metoâ me e ame ha, ka habe, Oge me wâhmakhmetoâ walang ang a Than ame kunâ anyin angela he ka húgúnö nya únyi hnyi hnyamö Heroda, me hna únykúme hia hnen at Juda. 12 Ke a hia but únykúme wia, e ame he ka hnyi uma umö Maria hinyö Ioane, ke ien minya Mareko ; wale ame úkhacaköu hnyin tavat ae se hia he ka hic. 13 E ame tiga seseto blinginy hwanuma, me ame o but ke hlu he ka wâ, Roda ien. 14 Ke e ame wâhmakhmetoâ a ifuci Peteru e, me ame ca khöng hwanuma ge senyin, ke e ame wadring ka hnyin uma me úthumetu, ka habe, Wale but eü Peteru ame tot hnyi hwanuma. 15 Ke haingödrin kâu, ka habe, U je monu but. Ke e ame hwege bala ha, ka habe, e hnathu. Me ödrin e ha, ka habe, Ame ne angela e. 16 Ke ame labö seseto bala Peteru : ke ödrin e hia but khöng me ödrin e wâ e, me adre me uthmâhmâ. 17 Ke e ame tutubi ödrin ge hnyamen he ka laba hnyibú, me e ame thumetu ödrin ge hnen Than hna hom e únyi hnyi hnyin uma ceat. Ke haingen, ka habe, Thumetu Iakobo me ta je liamekeiny ge ta je únyi eang. Me e ame he but, me he ka hnyi kè dok. 18 Ke a lany jut, me ame hlohlo gan hmâ je soja, a hawa ang Peteru a hia thö. 19 Ke a hia but Heroda elâm e, ke ame ca wâ bi, me e ame hnö tavat tue, me húna he ka hling'

ödrin. Me e ame he Kaisaria ai úheny Juda ka laba eling.

20 Ke ame hmönyin hnyekon ka at Turo me Sidona : me adre me tha he kâu hnyi hnyok a khaca, ke adre hia but hum Bala-seto at ame tuö je hnyeuleny than, me ihumidra, ke adre me sumat úsoköu, ke e hu jeú hnyi idra hnyei únyi hnyi hnyei iny than. 21 Ke hnyi ke bong adre hia but thu, Heroda ame khavâ je úkhaúen than, me tabâ anyin theron, me khet ködra. 22 Haba tavat adre me hongot, ka haba, Ifucin ang khong, ke ca ifucin bi at. 23 Me ame ie kot e angela anyin Than, anyin a e ame ca ogânâ Khong : me ame an e ge ahnyöng, me me mokcu.

24 Ke ame khulelau hofuc hwan Khong me kú gan hmâ.

25 Ke haba Banaba me Saulo, ödrü me hmetu úhedru Jerusalema, k' ame um dö hanymödrü, k' ödrü tha hum Ioane, ke ien minya Mareko.

HNYIMAKAN 13.

E HU ke je perofeta me hnyat úne hnyi ekalesia Anetioka, wale Banaba, me Simeona ke ien minya Nigeru, me Lukio at Kurene, me Manaen a tha hat me Heroda than, me Saulo. 2 Ke ödrin e huliwa ka Than, ke ânyâ ca han, me ame ha Hanu Kap, ka habe, Ovesei Saulo thö me Banaba könya hobi kâu huliwa oge me haw' ödrü kâu. 3 Ke adre hia but ânyâ ca han me hic, me ip je hnyamödrin hudru, me ödrin e kun' ödrü but.

4 A hia but kun' ödrü hnen Hanu Kap, me ödrü me he Selukia ai ; me tabâ hu úhedru e Kuperö ai. 5 Ke ödrü but hnyi Salamis, me ödrü me omanená hofuc hwan Khong hnyi ta je sunago umen at Juda : ke haba Ioane ame bi atödrü. 6 Ke ödrin e hia but vhenö bomene hia ke ne o but Pafö, me ödrin e wâ ke at bibihwakecin, a perofeta thoi, Bar-Iesu ien, at Juda ; 7 k' ame tha e me konesula a Segio Paulo at ae metâ. Ke e ame hawö Banaba me Saulo, ame weny he ka löng hofuc hwan Khong. 8 Ke haba Eluma (adre me wia ien helâe) at bibihwakecin ame ivinö mödrü, k' ame heleú deny he ka wia konesula únyi hnyi labageju. 9 Ke haba Saulo (wale Paulo) a unöngötö ge Hanu Kap, e ame wâ hmâ e, 10 me ha, ka habe, At ae unöngötö ge je thoi hia, me monu, u nokon diabolö, ke iwahnai-hmiöny me hwakecin hia ae wisa, hawa, u

TA JE HULIWA 13.

me ca menâ he ka ohwalö je hwakecin hia ae wisa anyin Than? 11 Ke wâ bi, walang ang e but hom hnyamen Than, me u me he ka wadröu, k' u me ca he hmetu ka wâ seünö ke ne o but hnyi ke ûen. Me ame ie o but kâu hadedak helâ me lit; me e ame he monumonu k' ame khaütetâ at he ka lelö e. 12 Ke a wâ but konesula hna mâdrâ, me e ame labageju, ame lâiâ hna ûne ûnyi ge Than.

13 Ke haba Paulo me anyin bunyen ödrin e tabâ hu ûhedrin Pafo, me ödrin e khöp dö Perega hnyi Pamafulia: ke haba Ioane ame hn' ödru but me hmetu Jerusalem a. 14 Ke ödre hia but he ûhedru Peraga, me ödru me o but hnyi Pisidia; me ödru me didrö ka hnyi sunago hnyi bong sabath, me laba ju. 15 Ke adre hia but aú hnanyibu me je perofeta haba je taben sunago ödrin e úkhünöng ködru he ka ha, ka habe, Liamekeiny many lö, a ne hu hofuc hnân sihwege gabu hobi kâu tavat, ha th' öbu. 16 Haba Paulo ame todrö me hinöbeny, me ha, ka habe,

At Isaraela lö, me öbun tavat öbun e outen Khong, löng ju. 17 Haba Khongon hnyei ang Isaraela, ame úca lakamöta, me ogöranyâ tavat waleji k' adre me tiga laba kanyua hnyi hnyei Aigupito, ke e ame hum ödra úheny e ge hnyamen ae hwege. 18 Ke helâ me fâte je huna e ame hokhnyokâ hwakecidra hnyi hnyebuba. 19 Ke a hia but ohia je hnyei a seven hnyi hnyei Kanana, e ame khene idra m' adre me labâ helâke foa haded me fitte je huna: 20 ke hwaban e, e ame ham tavat owisa ködra ke ne o but hnyi ûö Samuela perofeta. 21 Ke hwaban e, adre me sumâtâ than: me laba Khong ame ham ködra Saulo a nöku Kiso, aten tribu Beniamina hnyi je huna a fâte. 22 Ke a hia but hom e, e ame otilö Davita me me tuhödra; ke e ame ohnathoâ e, ka habe, Oge ö Davita nöku Jese, at a helâ me hnyekuk, at ame he ka ânyâ hia wek. 23 Ke haba Khong ame hia but oâ ka at Isaraela ûnyi hnyi je mâtrâniny at eling At úhömeli, a Iseu, helâ me hna ha bânâ gan; 24 ke a bân Ioane ka khetâ bapataisoiny ietra ka at Isaraela hia, ke e tiga ca o bi. 25 Ke ame tiga ohwâdâ hanymen hnö Ioane, me e ame ha, ka habe, leú ûnykúmenöbun gak? Ca inya bi. Ke wâ bi, ame he jem ke at hotuk, e ca úcú bi nya he ka thang ut taben li hnyeúcan. 26 Hnyat me lakeiny lö, je lakon je mâtrâni Aberahama, me

tavat adre me outen Khong unyibun, adre kunâ köta hofucin úhomeli ang. 27 Anyin a tavat adre me laba hnyi Jerusalem, me ta je taben, adre me ca wâhnakhmeto e me hofuc hwan je perofeta adre me labö aú hnyi je sabath, me adre me ohwâdâ bi hofuc e hnyi hnödra hna ohnauhangoâ e. 28 Eja ke ne ba can mok adre me wâ gan, adre me sumatö Pilato he ka hlingâ e. 29 Ke adre hia but ohwâdâ hia hna sihnalimen gan, me adre me hom but e ûnyi hnyi úö, me ip hnyi erkemok. 30 Ke haba Khong ame omelö hmetu thö e úheny hnyi hna mok: 31 ke haba hnyat waleji ödrin e tha he mē ûhedrin Galilaia Jerusalem a ödrin e wâ e hnyi je bong ae se, wale hnyat ödrin e ohnathoâ e walang ang ka tavat. 32 Ke öhmu me khetâ köbun uthumetu ae so, a haba hna ha bânâ ka lakamöta, 33 me a hia but ohwâdâ hnen Khong ka lakuta hnyi hnen hna omeli Iesu hmetu thö; helâ me hna sihnalimen hnyi salamo a loiny, ka habe, U thibi Nökuk, oge me hnöku u hnyi bong ang. 34 Ke e ame omelö hmetu thö e úheny hnyi hna mok, k' ame ca he hmetu bi ka wâ hna bobot, me walang hnen hna ha ehac, ka habe, Oge me he ka ham köbun ta je ûnyi ae kap ke ûnyi hnathu anyi Davita. 35 Anyin a e ame ha hmetu hnyi ke salamo, ka habe, U me ca he ka hna Âtâm ae Kap he ka wâ hna bobot. 36 Haba Davita ame ânyâ weny Khong hnyi anyin dö, me ame mokut bi, k' adre me ip e unyin lakamen, ke ame wâ hna bobot: 37 ke ame ca hnyi wâ hna bobot hnen at wale Khong ame omelö. 38 Anyin a wale, hnyat me lakeiny lö, e so öbun e wâ ûnykúme a g' adre me khetâ köbun degecâ hulö deny at ang: 39 ke kaba hnyat adre me labageju, me adre hai wis' ödra hnyi ta je ûnyi hia, wale ae ca khana hnanyibu anyi Mose he ka hai wis' öbun hnyin. 40 Anyin a wale, o 'bun âu, wâ e nye o but köbun hna ha hnen ta je perofeta, ka habe,

41 Öbun tavat öbun e hmiâ, wâ ju, me lâiâ, me laba iyong bi;

Anyin a oge me ânyâ huliwa hnyi bongubun je bong,

Wale huliwa, ame ne he ke at ka omanenâ e köbun, me öbun e ca he ka kap.

42 Ke ödrin e didrut, me ödrin e sumâtâ e he ka khetâ hofuc hmetu ködra hnyi sabath ame he ka o. 43 Ke ame vese but úkhacaköu, me ame he hotu Paulo me

TA JE HULIWA 14.

Banaba tavat Juda ae se hia, me hnyat outen Khong adre me kap ka hnyi hmi Juda : me ödru me ha me úne ködra he ka tethmä hnyi betenge baú anyin Khong.

44 Ke ame o sabbath me ame ok minya but heláke taun hia he ka löng hofuc hwan Khong. 45 Haba at Juda adre me wá tavat ae se hia, me adre me gan hmâ hmönyin, me ivinöâ ta je únyi ame ha Paulo, k' adre me fuc bi gan. 46 Me ame hwege thö Paulo me Banaba he ka ha, ka habe, E úcú he ka bán ka omanená köbun hofuc hwan Khong. Ke can bi anyin a öbun e hna degecâ me oúnyibâúâ hobi köbun bi möt ame ca ba balua ; waleling me öhmu me hwiö ka Aten ta je hnyei. 47 Anyin a haba Than ame húna köhmun, ka habe,

Oge me otilö u, me hnân melaminy Aten ta je hnyei,

Me u me he ka tot hnân úhömeli ke ne o but hnyi can hmeledrany.

48 Ame löng e hnen Aten ta je hnyei, me adre me senyin me ogânâ hofuc hwan Khong : me ame labageju hnen tavat hia adre me hawâ ka hnyi möt ame ca ba balua. 49 Ke ame khulelau hofuc hwan Than hnyi hnyei hia. 50 Ke haba at Juda adre me cubec omomo ae nua a hnyat outen Khong, ke hnyat ae hnathu hnyi taun he ka oveci Paulo me Banaba, me ob' ödru únyi hnyi je hnyigöülödra. 51 Me ödru me jijingâ ködra kânâny li hnyeúca-dru, me he but Ikonio ai. 52 Ke a unöngötö laten ge senyin me Hanu Kap.

HNyimakan 14.

KE ödru e Ikonio, me ödru me tha didrö ka hnyi sunago anyin at Juda, me ha hofuc, me se hia at Juda me Heleni adre me labageju. 2 Ke haba hnyat Juda a tavat adre me ca úling, adre me cubec me ohmönyinâ hnyekon aten ta je hnyei ka je liamekeiny. 3 Anyin a wale e beú hmâ hnödrü hna laba eling me ha hwegiâ ge Than, ke e ame ohnathoâ hofucin anyin ibetengiö, k' ame hna ködra he ka ányâ je haten me úöman ge je hnyamödrü. 4 Ke ame khekhe lo but tavat ae se hia hnyi taun ; ame tha hien keihen me at Juda, k' ame tha hien me je aposetolo keihen. 5 Ke ame utut Aten je hnyei me at Juda tha ödra me anyidra je taben, he ka okongu ödru, me lú' ödru ge veto, 6 me e khan' ödru but, me kec ut ka hnyi li taun Lukaonia, wale Lusetera, me Derebe,

me je ke keihen igigilö : 7 ke ödru me khetâ eling úthumetu ae so.

8 Wale ke at ame laba hnyi Lusetera ae mat li can, ae hwali únyi hnyi hnyekon hinyen, ke ame ca munyi he bala. 9 E ame ling Paulo ame fuc : me e ame wá hmâ e, me wáhmakhmeto ae unyin labageju hnân osoâ, 10 me ame ha hwegiâ, ka habe, Tot wisa thö ge li cam. Me e ame ututut me he. 11 Ke a wá but tavat ae se hia hna ányâ hnö Paulo, me adre me ogöranyâ ifucidra hnyi hwen Lukaonia, ka habe, Ame utut köta je khong helâ me je at. 12 Ke adre me hwenyi iö Banaba, me Zeus, ke haba Paulo, me Heremes, anyin a e at ame hnyimen úhnenamö. 13 Ke haba at bihut kö Zeus, a cicö taun, e ame hom but ka hnyi homagöuleny je bolok, me je vongon úö adre hwâwâ, ame tha weny me tavat he ka hudo. 14 A löng ut li aposetolo wale Banaba me Paulo, me ödru me kia but anyidru li úkhaú, me wadring ka hnyi wanben tavat ae se hia, me fuc hwege, 15 ka habe, je than lö, ieú gabun öbun e ányâ je únyi e? Öhmu li at ang helâ me öbun, öhme hom köbun úthumetu ae so, m' öbun e he ka hna degecâ ta je únyi e ae únyi baú, me hwiö ka Khong ae möt, at a op drany me hmeledrany me köiö, me ta je únyi hia hnyin : 16 at ame hna ta je hnyei hia ehac he ka vheno dedra ta je gethen. 17 Ke e bala bi anyin hna ohnatho, anyin a e ame mádrâ so, wale ame ham köbun we únyi hnyi drany, me je úen ae widrany, me osekunâ je hnyekubun ge jeú me senyin. 18 Ke ödru me ha hofuc e, ke gan hmâ anyidru huliwa he ka thawâ tavat m' adre me ca bihut ködru.

19 Ke ame o but kâe, at Juda úhedra Anetioka me Ikonio, me hinö fuc ka tavat, me adre me luö Paulo ge veto, me adre me lelö thö e ka hnyi hoton taun, adre me únykúme ma mokcu. 20 Ke haba laten ödrin e tiga tot igigilö e, me e ame todrö, me he ka hnyi taun : ke nyi e ame tha he me Banaba Derebe ai. 21 Ke ödre hia but khetâ úthumetu ae so ka taun eling me ohmehmela tavat ae se hia he ka löng, me ödru me hmetu but Lusetera ai, me Ikonio, me Anetioka, 22 ödru me ohmâ je hnyekon laten, me sihwegi ödra he ka tethmä hnyi labageju, me ha, ka habe, hamöta he ka dit ka hnyi dökhü dokhon Khong deny ta je vec ae se hia. 23 Ke ödre hia but otilâ wahingat hobi ködra hnyi ta je ekalesia, ke ödre hic me ányâ ca

TA JE HULIWA 15.

han, me ödrü me hn' ödra but ka Than, at adre me labageju kâu. 24 Ke ödre vheno Pisidia me o but hnyi Pamafulia. 25 Ke ödre hia but ha hofuc hnyi Peregä, me ödrü me o but Atalia ai; 26 me ödrü me tabâ hu ûhedru e Anetioka ai, dok adre me hn' ödrü hnyin ehac hnyi ibetengiö bâû anyin Khong hobi kâu huliwa ödrü me ohwâdâ. 27 Ke ödrü me o but, me ödrü me úkhacaköuâ ekalesia, me omanená ta je únyi hia thithö ame tha ânyâ mödrü Khong, waleji a g' ame khöng hwanumen labageju ka Aten ta je hnyei. Ke e beû bi hnödrü hna tha laba me laten.

HNYIMAKAN 15.

KE ame o thö keihen ûhedrin Juda, me nâ je liamekeiny, ka habe, Adre me ne ca peritomoni öbun helâ me hwakeci Mose, me ca khan' öbun he ka möt. 2 Haba Paulo me Banaba ödrü me iwatetra me ivinö m' ödra, me adre me thamuâ he ka kunö Paulo me Banaba me keihen gadra Jerusalema ai ka ta je aposetolo me wahingat, can hnödra hna ivinö. 3 Ke ame su ödrin ekelesia, ke ödrin e gethen hnyi Foinike me Samaria, k' ödrin e omanená ihwiöiny Aten ta je hnyei; me ödrin e okûâ senyin ka je liamekeiny hia. 4 Ke ödrin e o but hnyi Jerusalema, ke ame köp ödrin hnen ekalesia, me je aposetolo, me wahingat, me ödrü me omanená ta je únyi hia thithö ame ânyâ Khong únyi gadru. 5 Ke ame todrö keihen je Faresaio a hnyat labageju, me ha, ka habe, E únyi hnathu he ka peritomoni ödra, me húna ködra he ka vheno hnanyibu anyi Mose.

6 Me ame úkhacaköu thö je aposetolo me wahingat he ka úhnenamö únyi eling. 7 Adre hia but ivinö gan hmâ, me ame todrö Peteru me ha ködra, ka habe,

Hnyat me lakein lö, e khan' öbun dut ehac a hnen Khong hna úca ke at gabun, me me he Aten ta je hnyei ka hnyi löng hofucin úthumetu ae so únyi hnyi hnyimök, me me labageju. 8 Ke haba Khong at ame wâhmakhmetoâ je hnyok ame ohnathoâ ködra, k' ame ham ködra Hanu Kap, helâ minya ji kötin; 9 ke e ame ca wâhmakhmetu ötin bi mödra, ame ânyâwia je hnyekudra ge labageju. 10 Anyin a wale ieû gabun öbun e cubec Khong, me ip hnân úhúkâláköuâ hon nyin je laten, waleji ae ca khana lakamötin, m' ötin minya he ka vadren? 11 Ke ötin e labageju a g' adre me

he ka omeli ötin helâ me ödra ge betenge baû anyin Than Iesu.

12 Me ame laba hnyibú but úkhacaköu hia; me adre me vehling Banaba me Paulo ödrü me úthumetu ge je haten me je úöman ame ânyâ Khong únyi gadru unyin Aten ta je hnyei. 13 Ke ödre hia but fuc, haba Iakobo ame ha, ka habe,

Hnyat me lakeiny lö, ling nya ju: 14 Haba Simona ame hia but omanená hnen Khong hna senâ bánâ Aten ta je hnyei, he ka hom únyi gadra hnyei hobi kâu ien. 15 Ke khaca thibi e me hofuc hwan je perofeta; helâji me hna sibnalimen, ka habe,

16 Hwaban ta je únyi e oge me he ka hmetu,

Ke oge me he ka hai uma menâ umö Davita a ü;

Me oge me he ka op hmetu je dok ae hmouca hnyin,

Me oge me he ka otilâ e:

17 Madre me he ka elâm Than hnen ta je kolon tavat,

Me Aten ke je hnyei hia wale adre hwenyi iödra únyi hnyi iök,

18 Haingen Than, at ame haimemenâ ta je únyi e hwân hnyi hna op hmele-drany.

19 Anyin a wale, haba únykúmenök, e so ötin e ca ohmakâ tavat unyin Aten ke je hnyei adre me hwiö ka Khong; 20 ke so ötin e he ka sibnalimen ködra he ka úsâ-kâü me ta je únyi ae ikiki anyin je hnatheat, ke bi únyi monu, ke je meno adre me noc nyin, ke dra. 21 Anyin ae hu ga Mose tavat hwân hnyi je dö kâú adrem, adre me khetâ e hnyi ta je taun hia, k' adre me labö aú eiö hnyin je sunago hnyi je sabath hia.

22 Ke so ling ka ta je aposetolo, me wahingat, me ekalesia hia he ka úca ke li at gadra bi, me kun' ödrü Anetioka ai tha ödrü me Paulo me Banaba; jia Juda, ke ien minya Basabasa, me Sila, li at ae nua unyin je liamekeiny: 23 k' ödrü me hom adre me sibnalimen, ka habe, Haba je aposetolo, me je liamekeiny a wahingat, me adre me italofa me je liamekeiny a Aten ta je hnyei hnyi Anetioka, me Suria, me Sili-kia: 24 Öhmun e löng a g' ame ohmaki öbun ge ifucin ke je hnyat ûhedrin ang unyihmun, k' ödrin e omonâ je hnyekubun; waleji öhmun e ca húna ködrin; 25 ke tha hnyekuhmun dut, me so köhmun he ka kunâ li at köbun adre me úca he ka tha he me

Banaba me Paulo, laounykumihmun, 26 wale li at ödrü me ca ounyihnathoa anyidru möt ehac hobi kau ien Tuhöta a Iesu Keriso. 27 Anyin a wale, öhmün e kunö Juda me Sila, m' ödrü me he ka ha ta je üny a ka ege li hnyimödrü. 28 Anyin ae so ka Hanu Kap, ke so minya köhmün, a g' adre me ca he bi ka hügo gänâ hok köbun, hon ta je üny eang ae ücü, ka habe ; 29 ca kâlâ je meno adre me hudo ka je hnatheat, me dra, me ta je meno adre me noc nyin, ke ca bi üny monu ; öbun e ne üsâkâüö me ta je üny e, me öbun e so but. Ötin iouny dö.

30 Ke adre me kun' ödrin, me ödrin e o but hny Anetioka ; ke ödrin e hia but ükhacaköuâ tavat ae se hia, me ödrin e ham tusi. 31 Ke adre hia but aü, me adre me senyina hna okahw' ödra. 32 Ke haba Juda me Sila, a li perofeta ödrü, me ödrü me okahwâ je liamekeiny me ha hwegiödra ge ta je hofuc ae se hia. 33 Ke beü hmâ hnödrü hna laba, me ame kun' ödrü soi ödrü but hnen je liamekeiny ka tavat adre me kun' ödrü. 35 Ke haba Paulo me Banaba, me ke je hnyat ae se, ödrin e laba hny Anetioka, k' ödrin e üne me khetâ hofuc hwan Than.

36 Hwabän ke je bong, haba Paulo ame ha kö Banaba, ka habe, Ötu he hmetu ka wâ je liamekeiny hny ta je taun hia waleji öte khetâ hnyin hofuc hwan Than, adre me hawa la. 37 Ke we Banaba he ka hawo Ioane minya, ke ien Mareko. 38 Ke haba Paulo ame ünyküme e ca so bi he ka tha he mödrü at a kec ehac gadru üheny Pamafulia, ke ca tha he mödrü ka hny huliwa. 39 Me ödrü me iwatetra; me ödrü me üsâkâüö but, haba Banaba ame hawo Mareko, me tabâ hu Kuperö ai ; 40 ke Paulo ame ücü Sila me he, ame hn' ödrü but ka hny ibetengiö baü anyin Than ge je liamekeiny. 41 Me e ame vhenö Suria me Silikia, ame sihwegiâ ta je ekalesia.

HNYIMAKAN 16.

ME e ame o minya hny Derebe me Lusetara : ke wâ bi eling ke aten, Timoteo ien, nokon momo Juda at ame labageju ; ke at Heleni bi kamen. 2 Adre haisoâ e hnen je liamekeiny hny Lusetara me Ikonio. 3 Ewe Paulo e ame he ka tha he mē ; me e aue hom e me peritomonâ, anyin ae hu tavat Juda hny je ke keihen eling : anyin ae khan' ödra hia a at Heleni kamen. 4 Ke ödrin e vhenö je taun, me

ödrin e ham ködra ta je hnanyibu, waleji a otillâ je aposetolo me wahingat hny Jerusalema. 5 Me adre me otethmâ ekalesia hny labageju, me bi hanen hny je bong.

6 Ke ödrin e vhenö Ferugia hia me hnyei Galatia, haba Hanu Kap ame thaw' ödrin he ka ca ha hofuc hny Asia ; 7 ke ödrin e o but cicö Musia, me ödrin e ünyküme he ka he Bithunia ai ; ke ame ca hn' ödrin bi Hanu Iesu ; 8 me ödrin e nulâ Musia me o hny Troas. 9 Ke Paulo ame wâ hna omanenâ hny lit ; Ame tot at Makedonia, me sumâtâ e, ka habe, He but jem Makedonia ai he ka hadru' öhmün. 10 Ke a hia but wâ hna omanenâ, öhmün e ie penapena ka he Makedonia ai, anyin a öhmün e wâhmakhmeto a ga hia but Than kun' öhmün he ka khetâ ködra üthümetu ae so.

11 Anyin a wale öhmün e tabâ hu üheny Troas, me kec wisa Samotheraki ai, me nyi Neapoli ai ; 12 ke ühehmün e, Filipi ai, taun ae beönua hny ke keihen eling hny Makedonia, ke koloni : ke öhmün e laba hny taun ang hny ke je bong. 13 Ke hny bong sabath, öhmün e he ka hny hoton taun hny baten wagewe, waleji öhmün e ünyküme he ka wâ ke dok hnân hic ; ke öhmün e laba ju, me ha hofuc ka watamomo adre me ükhacaköu eling. 14 Ke ame ling öhmün hnen ke momo Lidia ien, at ame ücü mano ae udrudrâ hlit, aten taun a Thuataira, at ame hmi ka Khong : ke haba Than ame khöng ut hnyekon he ka löng ta je hofuc ame ha Paulo. 15 Ke adre hia but bapataisoâ e me anyin lap, me e ame haw' öhmün, ka habe, Öbun ka ünyküme a inya oge me labageju ka Than, me ai öbun ka hny umök uma, ka laba. Me e ame thaw' öhmün.

16 Ke hny ke bong öhmün e he ka hny dok adre me hic hnyin, me ame ükhanö thö möhmün hlu a delec hanu ame bi obotkong, ke se hia omjeü ame o ka latuban, troban anyin bibihwakecin. 17 K' ame he hotu Paulo hlu eling, me öhmün, k' ame ha hwegiâ, ka habe, Lathnyabainy Khong ae beönua hnyat ang, tavat adre me haime-menâ köbun gethen deny möt. 18 Ke se hia je bong e ame änyâ e. Me ame hmak hnyekon Paulo, me e ame hwiö me ha ka hanu, ka habe, Inya oge me ha köu hny iö Iesu Keriso he ka didrut ühem hny hnyin. Me e ame didrut hny awa eling.

19 Ke a wâ but hnen latuhan ae ba hmetu deny omjeü ködrü, me ödrin e köt

TA JE HULIWA 17.

Paulo me Sila, me lili ödru ka tavat musi hnyi hna úcú, 20 me ödrin e hum ödru ka je taben, me ha, ka habe, Haba li at Juda eang, ödru me omonoâ anyita taun, 21 me únö je hwakecin ae ca úcú köta a at Roma he ka kap me mádrá. 22 Me ame tha todrö tavat ae se hia ködru : ke haba je taben, ödrin e kia but je khauödru, me úkhúnöng he ka kuc ödru ge je osö. 23 Ke ödra osehia kuc ödru, me adre me khu' ödru thö ka hnyi uma ceat, me húna ka at tuö uma ceat he ka tu' ödru wia : 24 e ame löng hofuc eling, me e ame khu' ödru ka hnyi hnyeule eiö hnyi hnyin uma, k' ame ohmâ li cadru hnyi utö. 25 Ke hnyi wanbenset haba Paulo me Sila ödru me hic me khumöng ka Khong, k' ame ling ödru hnen tavat wale adre me c' ödrin minya ; 26 me ame ie o but hwiöi ae gan hmâ, me jijingâ je taben uma ceat : me ame ie memang ut hlinginy je hwanuma hia ; me ame ok ut je hna c' ödrin. 27 Ke ame hmak dö at tuö uma ceat, me wâ ta je hwanumen uma ceat adre hia but khöng, me e ame oc dö anyin bele vat he ka hlingâ e bi, anyin a e ame únykúme a kec ut tavat adre ca. 28 Ke haba Paulo ame ha hwegiâ, ka habe, Ca mē okongu u bi, anyin a öhmun hia ang. 29 Me e ame ie hongot he ka hom je okúnú, me wadring ka hnyin uma, k' ame ta öbubuny hnyi hnyimakö Paulo me Sila, 30 me hum ödru but hnyöu ai, me ha ka habe, Li than lö, ieú hanyök oge me he ka ányâ me inye mödrut? 31 Ödru me ha, ka habe, Labageju ka Than Iesu, me u me he ka möt, me ányâm bi lap. 32 Me ödru me ha hofuc hwan Than kâu, me ködra hia hnyin umen uma. 33 Me e ame hum ödru hnyi awainy lit eling me hneú hwadeñy je osö ; me ödru me bapataisoâ e me anyin hia lap. 34 Me e ame su ödru ka hnyi umen uma, me ip jeú hnyi hnyimaködrü, ke haba e me anyin lap hia ödrin e senyin me labageju ka Kkong.

35 Ke a lany jut, haba je taben adre me kunâ je athnyaba he ka ha, ka habe, Hna but li at e he ka he. 36 Me ame ha at ame tuö uma ceat hofuc eling kö Paulo, ka habe, A úkhúnöng je taben he ka hn' öbu but ; anyin a wale, didrut öbu, ke tha he th' öbu me hnahic. 37 Ke haba Paulo ame ha ködrin, ka habe, Adre hia but kuc' öhmun hnyi hnyimakan tavat, k' at tiga ca hnei öhmu, a li at Roma öhmu, ke adre hia but c' öhmu ; ke walang ang, adre me

he ka ob' 'öhmu duöngi öhmu? ohe ; e so adre me he jem he ka hum öhmu hnyöu ai. 38 Haba je athnyaba adre me ha ta je hofuc eling ka je taben : ke ödrin e löng ut a ödru li at Roma, me ödrin e ot ; 39 me ödrin e he but me bi so ködru ; ke a hia but hum ödru hnyöu ai, me ödrin e sumat ödru he ka he but únyi hnyi taun. 40 Me ödru me didrut úhedru hnyi hnyin uma ceat, me didrö ka hnyi uma umö Lidia : ke ödre hia but iouny me je liamekeiny, me ödru me sihwegi ödra, me ödru me he but.

HNYIMAKAN 17.

KE ödru me he hnyi Amefipoli me Apolonia, me ödru me o hnyi Thesalonika, ke e hu sunago eling anyin at Juda : 2 ke haba Paulo ame didrö ködra, helâ me hwakecin, ke kun ta sabath e ame úhnenamö mödra je hna sihnalimen, 3 ame lau, me ha ködra, ka habe, e úcú Keriso he ka hom vec, me möt hmetu úheny hnyi hna mok ; haingen minya, ka habe, haba Iesu eling wale oge me omanená köbun, me wale thibi e Keriso. 4 Haba keihen gadra, adre me kap, me tha laba me Paulo me Sila : helâe minya, se hia at Heleni, tavat adre me outen Khong, me ke je momo minya hnyat ae únyi hnathu. 5 Ke haba at Juda adre me hmönyidra, me hawâ tavat ae kong úhedra hnyi hna úcú, me bi hanödra, me omonumonoâ taun hia ; me adre me utut ka hnyi uma umö Jasona, me adre me elâm deny he ka hum ödru ka tavat eú hnyöu. 6 Ke adre me ca ö 'dru, me adre me lili Jasona me ke je liamekeiny ka tavat musö taun, k' adre me fuc hwege, ka habe, Haba hnyat ang a tavat adre me omonumonoâ hmeledrany, me ödrin e o but minya eang : 7 ke e köp ödrin Jasona : ke odra hia hnyat hanyâúá ta je hnanyibu anyi Kaisara, haingödra, ka habe, e hu ke than bi a Iesu. 8 Ke adre me ohmakâ hnyekon tavat ae se hia, me hnyat musö taun, at ka löng je hofuc e. 9 Ke ödrin e kap haten únyi ga Jasona me keihen, me adre me hn' ödrin dut.

10 Haba je liamekeiny, me adre me ie kunö Paulo me Sila hnyi lit Berea ai : ke ödru me o but me ödru me didrö ka hnyi sunago anyin at Juda. 11 Ke beönua hwakecin ae so ge tavat ang hon at Thesalonika, anyin adre me kap hofuc ge je hnyekudra ke wedra, k' adre me elâm je hna sihnalimen hnyi je bong, he ka wâ hna-

TA JE HULIWA 18.

thuiny ta je únyi e. 12 Anyin a wale, ödra se hia adre me labageju; helâe minya ke je momo Heleni hnyat ae únyi hnathu, ke se hia minya obaga. 13 Ke ame löng at Juda hnyi Thesalonika, a ga hia but Paulo khetâ hofuc hwan Khong hnyi Berea, me adre me he kâe, me obwebwelâ me omonumonoâ tavat ae se hia. 14 Me haba je liamekeiny adre me ie kunö Paulo ka hnyi hobat köiö: k' ame laba biju eling Sila me Timoteo. 15 Ke haba hnyat ödrin e ip Paulo me ödrin e tha he mē ke ne o but hnyi Athenai: ke e ame hûna küdra he ka ha kö Sila me Timoteo, ka habe, e so ödru ma ie he but kâu, me ödrin e hmetu.

16 Ke haba Paulo ame tiga halubahing' ödru hnyi Athenai k' ame hmak hnyekon anyin a e ame wâ taun ae unöngöt ge ta je hnatheat. 17 Anyin a wale, e ame ivinö me at Juda hnyi sunago, me tavat adre me outhen Khong, me tavat minya adre me iouny mē hnyi je bong hnyi hna úcú. 18 Me ame ivinö me keihen hnyat bemetâ a latö Epikureo, me hnyat Setoiko. Huingen keihen ka habe, Ieú ame he ka ha hnen at ang ame fuc bebehu? Ke haingen keihen, ka habe, Haba e, me helâ me at ame omanenâ ta je khong kanyua: anyin a e ame kheti Iesu ke möt hmetu. 19 Me adre me kât e, me hom e Areopago ai, me adre me ha, ka habe, Hawa e so köhmun he ka hnyi khan' öhmun hna úne eang ae teb únyi u me ha? 20 Anyin a u me hom ka hnyi je hnyikönyöhmun ke ta je únyi bi: anyin a wale, e bewehmun he ka wâ únykúme bongon ta je únyi e. 21 (Ke ba ke únyi ame vheno at Athenai hia, me ta je atkanyua adre me laba eling, ke so bi he ka omanenâ me löng ke únyi ae teb únyi.) 22 Haba Paulo ame todrö hnyi wanben Areopago me ha, ka habe,

At Athenai lö, oge me wâhmakhmeto a e gan hmâ anyibun ot ka ta je khong thoi hnyi ke ta je únyi. 23 Anyin a oge me ngeny me wâ ta je únyi öbun e hmi kâu, ke oge me wâ minya ke taben hut adre sihnalimen hon, ka habe, **HOBİ KÂU KHONG ADRE CA WÂ.** Anyin a wale haba únyi öbun e hmi kâu me ca wâ, e thibi ang oge me he ka omanenâ köbun. 24 Haba Khong at ame op hmeledrany me ta je únyi hia eú hnyin, e thibi Tuhan drany me hmeledrany, e ame ca laba hnyin ta je uma adre ányâ ge je hnyamen; 25 ke ame ca huliwa minya kâu hnen ta je hnya-

men at, helâke adre me ányâ ka theduoc, anyin a e ame ham hia möt, me homenâ, me ta je únyi hia ka ta je únyi hia; 26 ke e ame op hnyi dra a khaca tavat hia he ka labâ hmeledrany, ke a hia but thu je únen adre otilâ ehac, me je hnyigöulen je idra; 27 m' adre me he ka elâm Khong, ame ne khan' ödra he ka khaúteta e, me wâ e, ke so bi e ca úsákákâú m' öta hia thithö: 28 anyin a öta möt me bwebwet, me e bi unyin; helâ me hna ha hnen keihen adre sit khumöng gabun, ka habe, Anyin a je mâtrânyin öta. 29 Awe ötin e ne je mâ-tâniny Khong, e ca so köta he ka únykúme a ga úcú Khong me gol, me sileva, me veto adre me huliwan ge metâiny at, me bibi-hwakecin anyin at. 30 Haba Khong ame hokhnyokâ ta je únen waleji adre me ca wâ únykúme hnyin; ke e ame hûna ka tavat hia thithö hnyi je hnyei hia he ka ietra: 31 anyin a e ame hia but thu bong he ka úhnei me owisa hmeledrany hnen at e ame hia but otilâ; ke e ame ohnathoâ e ka tavat hia hnyi hnen hna omelö hmetu thö e únyi hnyi hna mok.

32 Adre me löng möt hmetu únyi hnyi hna mok, me haba keihen adre me hiâ; ke haingen keihen, ka habe, Öhmun e he ka ling u hmetu ge únyi e hnyi ke únen. 33 Ame he but Paulo gadra. 34 K' ame kece kâu bi keihen me labageju: e unyidrin Dionusio at Areopago, me ke momo Demari ien, me ke je hnyat mödrü.

HNYIMAKAN 18.

HWABAN ta je únyi e, e ame he úheny Athenai me o hnyi Korinito. 2 Ke e ame wâ ke at Juda, Akula ien, at adre hnokoâ hnyi Ponoto, e ame hap o thö úheny Italia tha e me áiân Perisila, anyin a Kalaudio ame obâ at Juda hia únyi hnyi Roma: e ame he but ködrü; 3 ke e ame tha laba mödrü me huliwa, ke khaca thibi anyin huliwa m' ödrü; haba anyidrin huliwa, me ödrin e tibet je uma mano. 4 Ke e ame úne hnyi sunago hnyi ta je sabath, k' ame ohmehmela at Juda, me at Heleni.

5 Ke ame o but Sila me Timoteo úhedru Makedonia, me ame hwege thö hnyeku Paulo hnyi hofuc, k' ame ohnathoâ ka at Juda, ka habe, Iesu thibi a Keriso. 6 Ke adre me hna degecâ, ke fuc bigan, me e ame jijingâ anyin je úkhaú me hâ ködra, ka habe, Ame he dröbun ka tabâ je böbun bi; ke iny gufa bi nya: hwan walang ang

oge me he bi nya ka Aten ta je hnyei. 7 Me e ame he úheny e, me didró ka hnyi uma umen ke at ame outen Khong, Tito Juseto ien, k' ame útangköu umen uma me sunago. 8 Ke haba Kerisepo, taben sunago ame labageju ka Than, me anyin lap hia ; ke se hia minya at Korinito adre me löng me labageju, me adre me bapataisoi ödra. 9 Me ame ha Than kö Paulo hnyi hna omanená hnyi lit, ka habe, Ca ot bi, ke fuc dö, ca laba hnyibú bi : 10 anyin a inya unyám ke ba at ame he ka utut he ka okongu u : anyin ae se hia ta je latök hnyi taun ang. 11 Ke khaca huna me siks ta tehi e ame laba eling, ame n' ödra ge hofuc hwan Khong.

12 Ke hnyi úen ame konesula hnyin Galiona hnyi Akaia, haba at Juda adre me tot kö Paulo hnyi hnyok a khaca, me lelö thö ka hnyi tahen owisa, 13 me ha, ka habe, Haba at eang ame ohmehmela tavat he ka hmi ka Khong ae ve e me hnanyibu. 14 Ame he but Paulo ka fuc, me haba Galiona ame ha ka at Juda ka habe, At Juda lö, ame ne ke hwakecin bi ae kong, ke ame ne iyawo ae monu, me, e úcü kõnya he ka köp öbun : 15 ke adre ne ivinoá hofuc, me je ien, me anyibun hnanyibu, me hamöbun bi ; e ca wek bi nya he ka owisa ta je únyi e. 16 Me e ame ob' ödra únyi hnyi taben owisa. 17 Ke ödra hia adre me köt Sosehneni, a taben sunago, me kot e hnyi hnyimakan taben owisa. Ke haba Galiona ame ca öünyihnathoá ta je únyi e.

18 E se hia je bong ame tiga laba bala Paulo, me e ame úhúne me je liamekeiny, me tabá hu úheny e Suria ai, ke tha e më Perisila me Akula ; ke adre me sö leúnen ban hnyi Kenikerea, anyin a anyin khöbi. 19 Ödrin e o but hnyi Efeso, me e ame hn' ödrü biju eling : ke haba e ame didró ka hnyin sunago, me khetá ka at Juda. 20 Ke adre me hom beháná e he ka laba beú, ke e ca hmehmela bi ; 21 ke e ame úhúne mödra me ha, ka habe, E ka weny Khong, me oge me he ka hmetu thö köbun, me e ame tabá hu úheny Efeso. 22 Ke ame khöp dö hnyi Kaisaria, e ame ölö thö he ka ionny me ekalesia, me e ame he but Anetioka ai. 23 Ke a hia but laba eling hnyi ke je bong, me e ame he but, me vheno hia hnyei Galatia me Ferugia, ame sihwegiá ta je laten hia.

24 Ke ame o but ka hnyi Efeso ke at Juda, Apolo ien, adre hnokoá hnyi Alesa-

nedria, at ae khana khet ; ke e ame ti metá hnyi je hna sihnalimen. 25 Adre hia but ná at eling hnyi gethen deny Than ; ke kahwa hnyekon, ke e ame fuc me ná wia ta je únyi ga Iesu, k' ame wáhmakhmetoá thibi bapataiso anyi Ioane : 26 ke e ame hwán ka ha hwegiá hnyi sunago. Ke ame löng hwan ga Perisila me Akula, me ödrü me hawa e, me omanená wia káu bongon gethen deny Khong. 27 E ame weny he ka he Akaia ai, me ame hadruá e hnen je liamekeiny, me sihnalimen ka je taben he ka kap e : me e ame he but, me hadruá gáná tavat adre me labageju únyi hnyi ibetengiö baú : 28 anyin a e ame hwege ivinö me at Juda, k' ame kú únyi hnyi je tusi a Iesu thibi Keriso.

HNYIMAKAN 19.

KE tiga e bi Apolo hnyi Korinito, haba Paulo ame he hnyi je ke keihen hnyei ethö, me o hnyi Efeso, me wá ke je laten : 2 me e ame ha ködrin, ka habe, Hawa, öbun e hia but kap Hanu Kap hnyi hnöbun hna labageju ? Ke ödrin e ha káu, ka habe, Ohe, ke ca khan' öhmun a g' adre ham Hanu Kap. 3 Me haingen ködrin, ka habe, Adre me bapataisoi öbun hnyi ieu ? Ödrin e ha, ka habe, Hnyi bapataiso anyi Ioane. 4 Me haingö Paulo, ka habe, Ioane ame bapataiso ge hna bapataisoiny ietra, k' ame ha ka tavat, ka habe, hamödra he ka labageju ka at ame he ka o hwaban e, wale Iesu. 5 Ödrin e löng e, me adre me hnyi bapataisoi ödrin ka hnyi ien Than Iesu. 6 Ke Paulo ame ip li hnyamen budrin, me ame o but ködrin Hanu Kap ; me ödrin e fuc hnyi ta je hwen hnyei, me perofeta. 7 Haba hnyat hia me heláke úsa twelv ta hnyat.

8 Me e ame didró hnyin sunago, k' ame hwege ha hofuc hnyi kun ta tehi, ame ivinö me újengi ödra hnyi ta je únyi anyin dökhü dokhon Khong. 9 Ke e khöt hnyekon keihen, k' adre me ca úling, k' adre me haikongoá hmi eling hnyi hnyimakan tavat, me e ame he but gadra, me hom minya laten, me e ame ha hofuc hnyi je bong hnyi uma úne umö Turano. 10 Ke lo li huna e ame ányá heláe ; waleling m' adre me löng hia hnen tavat adre me laba hnyi Asia hofuc hwan Than Iesu, wale at Juda me at Heleni minya. 11 Ke haba Khong ame ányá ta je úöman ae man ge li hnyam Paulo : 12 wale m' adre me hom but únyi

hnyi unyin ka ta je komok je bageca me ecmano, me ame hia but je mok gadra, me didrut ta je hanu ae kong únyi hnyi je hnyekudra. 13 Haba keihen at Juda, hnyat adre ngenu monu, me tren unehudua, ödrin e hwân he ka ha ien Than Iesu hon tavat ae hu hanu ae kong gadra, me ödrin e ha, ka habe, Oge me hûna köbun hnyi iö Iesu waleji ame khetâ Paulo. 14 Ame ânyâ únyi eling hnen laku Sekeva a ödrin seven, a at Juda, at bihut ae nua. 15 Me ame thu ködrin hnen hanu ae kong, ka habe, E khanö nya Iesu, ke khanö nya minya Paulo; ke öbun ie je hnyat? 16 Me ame utut ködrin at ae hu hanu ae kong, me ng' ödrin, me hwege hudrin, me ödrin e ve kec thu me aat únyi hnyi uma e. 17 Ke ame manen dut únyi eling ka tavat hia a at Juda me at Heleni adre me laba hnyi Efeso; me ame o but ot ködra hia, ke adre me ogânâ ien Than Iesu. 18 Ke se hia tavat labageju adre me o, me omanenâ, me ha ta je hwakecida. 19 Ke se hia minya tavat bibihwakecin adre me úkhöünâ anyidra je tusi me thong degecâ hnyi hnyimakan tavat hia: ke adre me aú hwaban, ke adre me wâ ju a fite thauzan je sileva. 20 Wale úkúiny gan hmâ hofuc hwan Than, me hwege.

21 Hwaban ta je únyi e, Paulo ame ip hmâ hnyi hnyekon, e ka um dö vheno Makedonia me Akaiia, he ka he Jerusalema ai, haingen, ka habe, Iny ka mwi but e, me hamök he ka wâ minya Roma. 22 Me e ame kunâ Makedonia ai ke li at a li lanyin, jia Timoteo me Eraseto, ke e biju Asia hnyi ke je bong.

23 Me ame kû thö imonumonuny ae gan can hmi hnyi úen eling. 24 Anyin a ke at, Demetio ien, at ame huliwan sileva, at ame ânyâ ta je uma sileva umö Diana, ke e gan hmâ troban ka tavat adre huliwan; 25 ke e ame úkhacaköu ödrin, me tavat huliwa helâe, haingen, ka habe, Je than lö, e khan' öbun ae hu omjehetin ge huliwa eang. 26 Ke öbun e wâ me löng, a ca hake Efeso thibi, ke helâke me Asia hia minya, hnö Paulo eang hna ohmehmela, me wia tavat ae se hia, me ha, ka habe, ca je khong bi ang adre ânyâ ge je hnyam: 27 waleling me me ca hake anyitiu thibi je huliwa ame he ka únyi baú; ke adre me he minya ka öünyibâúâ uma umen khong momo a Diana, ke ame he ka hia anyin hmanenang bi, wale a hmi kâu tavat Asia hia, ke hmeledrany minya. 28 Adre me

löng e, me adre me ti hmönyin, me hongot, ka habe, E gan hmâ Diana anyin at Efeso. 29 Me ame unöngötö taun ge imonumonuny: ke adre me köt Gaio me Aritako, li at Makedonia, a li at ödre tha he me Paulo, me adre me tha wadring ka hnyi uma mat. 30 Ke behe Paulo ka he ködra, k' ame thawâ e hnen laten. 31 Ke haba ke je thaniny Asia, a je lahanen, me ödrin e úkhünöng he ka thawâ e, me me ca he ka didrö ka hnyi uma mat. 32 Ke haba ke je hnyat ödrin e ha ke hofuc, ke keihen ke hofuc bi: anyin ae monumonu thö úkhacaköu; ke haba hnyat ae se hia gadra, me ca khan' ödra önyen úkhacaköu. 33 Ke adre me hum Alesanedro but úheny unyin tavat ae se hia, k' ame otilâ e hnen at Juda. Haba Alesanedro ame hinöbeny, k' ame weny he ka owisa ka tavat. 34 Ke adre me wâhmakhmeto a e at Juda, me adre me tha hongot göranyai ame ne lo li awa, ka habe, E gan hmâ Diana anyin at Efeso. 35 Ke ame ohnyibö tavat hnen sekere-tereiny taun, me e ame ha, ka habe, At Efeso lö, ie at ae ca khana a g' ame tuö uma umö Diana khong momo ae gan hmâ hnen taun ang a Efeso, waleji a kölu únyi ga Jupita? 36 E ca khana at he ka ivinoâ ta je únyi e, anyin a wale, laba wia ju, ke ca ânyâ mono bi ke únyi. 37 Öbun e hom jem hnyat eang, k' ödrin e ca venâu je uma kap, k' ödrin e ca bi gan ka khonguten je khong. 38 Anyin a wale, a ne hu ga Demetio me tavat huliwa unyin, ke únyi he ka bifuco ke at, awe, e hu je uma uhnei, ke hu je konesula: hamödra he ka bifuc' ödra kâu ödra bi. 39 Ke öbun e ne hnö ke hofuc bi, me adre me he ka owisa e hnyi úkhacaköu adre me thu. 40 Wâ adre nye owis' öta can mede montu hnyi bong ang; anyin ae ca khan' öta omanenâ ke hofuc hnân ha bongon úkhacaköu eang a anyita. 41 Ke a hia but ha e me e ame kunâ veseâ but úkhacaköu.

HNYIMAKAN 20.

KE hwaban imediököu, Paulo ame ha wâ laten, me sihwegi ödra, me úhüne m' ödra, me e ame he but Makedonia ai. 2 Ke a hia but vheno je ke keihen hnyei eling, me sihwega gan hmâ ködra, me e ame o but hnyi Heleni. 3 Ke kun ta tehiny ka laba eling, ke haba at Juda adre me ip hnân, hnyi úen e ame he ka tabâ hu ka kec Suria ai, me e ame únykúme he ka hmetu Makedonia ai. 4 Ke ame

tha he mē ke ne o but hnyi Asia jia Sopa-
tero at Berea; me Aretako, me Sekuno
li at Thesalonika; me Gaio, at Derebe, me
Timoteo; me Tukiko me Trofimo li at
Asia. 5 A bödrin hnyat e ka halubahing
öhmun hnyi Troas. 6 Ke hwaban üen
areto adre ca levenâ, öhmun e tabâ hu
ûhehmun Filipi, me o ködrin hnyi Troas
hnyi je bong a faiv; ke seven bonguhmun
ka laba eling.

7 Ke hnyi bong a bân hnyi seven,
öhmun e úkhacaköu he ka subâ areto,
haba Paulo ame khet ködra, anyin ame he
ka he but nyi; ke beú hnen hna khet ke
ne o but hnyi wanbenset. 8 Ke se hia je
lamepa hnyi hnyeule ethö, waleji öhmun e
úkhacaköu hnyin. 9 Ke ame laba hnyi
mamalama ke hidröu, Eutiko ien, e ame
tamokut; ke beú bala hna khet hnö Paulo,
me ame musö e hnen bemokot, me e ame
kölu but ünyi hnyi hnyeule a kuniny ethö,
ke ödrin e kap e a mokue. 10 Haba Paulo
ame utut me ta ju hon e, me delüâ, me ha,
ka habe, Ca tenge bi; anyin a e bi möt eú
hnyin. 11 Ke e ame ölö hmetu thö kâ thö,
me subâ areto me han, me ûhnenamö beú
ke ne o but hnyi lany, me e ame he but.
12 Me adre me hom hidröu a mödrut, me
adre me senyin gan hmâ.

13 Ke öhmun e böhmun ka hnyi hu,
me kec Asoso ai, me öhmun e he ka haudin
Paulo eling: anyin a wale hnen hna hûna,
anyin a e ame weny he ka he hot. 14 Ke
öhmun e úkhanö mē hnyi Asoso me hauden
e, me öhmun e khöp dö Mitulene. 15 Me
öhmun e kec ûhehmun e, öhmun e o nyi
cicö Kios; ke nyi hmetu öhmun e khöp dö
hnyi Samo; ke nyi hmetu öhmun e khöp
dö hnyi Mileto. 16 Anyin a Paulo ame
únykúme he ka kec nulâ Efeso, wâ e nye
he ka bec hnyi Asia; anyin a e ame he
logot me me o hnyi Jerusalema hnyi üen
Penetekos, a ne ba vheliny.

17 Ke e ame úkhünöng Efeso ai úheny
Mileto he ka hawâ wahingatiny ekalesia.
18 Ke ödrin e o but kâu, me e ame ha
ködrin, ka habe,

E khan' öbun hwakecik hnyi ta je üen
oge me laba unyibun hwân hnyi bong a
bân waleji oge me o hnyi Asia, 19 a oge
me bi huliwa ka Than me hnyok ae hnyi-
kânâ, ke li deköiök, ke ta je vec a o könya,
waleji hnyi hna ip hnök ge at Juda: 20 ke
oge me ca ikhâlâ ke ünyi ae ünyi hnathu,
ke oge me omanenâ köbun, me n' öbun
hnyi hnyimakan tavat, me hnyi ke uma

me ke uma, 21 me ohnathöa ka at Juda
me at Heleni minya, a e so he ka ietra ka
Khong me labageju ka Tuhöta a Iesu
Keriso. 22 Ke wâ bi, walang ang oge me
he Jerusalema ai, k' ame ka musu nya
hnyekuk, ke ca khanö nya ta je ünyi ame
he ka o könya e: 23 ke so bi ame omane-
nâ könya Hanu Kap hnyi ta je taun hia, ka
habe, ame halubahing' nya je hna cö nya
me ta je vec bi. 24 Ke oge me ca öünyi-
hnathöa anyik möt, me me ünyi hnathu
könya, me inye he ka umo hnök hna
üölogot, me hanymök oge me kap ünyi ge
Than Iesu, wale he ka ohnathöa úthumetu
ae so hnyi betenge baú anyin Khong. 25
Ke wâ bi, walang ang e khanö nya a haba
öbun hia, a hnyat oge me labö senâ he ka
khetâ úthumetu, me öbun e ca he hmetu
ka wâ hnyimakök. 26 Anyin a wale, inya
oge me ohnathöa köbun hnyi bong ang, ame
ca taku nya dren tavat. 27 Anyin oge
me ca höcö omanenâ köbun únykúmânen
hia Khong. 28 Anyin a wale, o 'bun áu,
ke hnahat mamoe hia, wale hnen Hanu
Kap hna otíl' öbun he ka tuö, he ka hat
ekalesia anyin Khong, waleji e ame úco ge
dren. 29 E khanö nya a hwaban dö úhek,
ame he ka didrö köbun ta je luko úhúlú,
k' ödrin e ca he ka ihulo hnahat mamoe;
30 ke ame he ka o minya unyibun tavat
adre me he ka ha ta je ünyi ae hwali, he ka
lelö ködra ta je laten. 31 Anyin a wale
hmâkâ ju, me únykúme thö, haba hnyi je
huna a kun oge me ca menâ, waleji hnyi lit
me lany he ka n' öbun hia, ke hu deköien
li emakök. 32 Ke walang ang inya oge
me hn' öbun dut ka Khong, me hofucin
anyin ibetengiö baú, at ae khana he ka up
öbun göranyai, me ham köbun jekhöu m'
ödra hia adre okabâ. 33 E ba sileva, me gol,
me úkkaú anyin ke at oge behnyekon. 34
E khan' öbun minya a oge me huliwa ge li
hnyamök ang oúco unyik me tavat a tha
ödrin mönya. 35 Hnyi ta je ünyi hia oge
me tot hnân úcúcúbongoâ köbun, a hamö-
bun he ka huliwa helâe he ka hadruâ tavat
a ödra sēnyin, me únykúme hofuc hwan
Than Iesu, waleji e ame ha, ka habe, E
beönua hnabic hnen at ame ham, hon at
ame kap.

36 Ke a hia but ha hofuc e, me e ame
cibouca me tha hic m' ödra hia. 37 Ke
adre me tenge gan hmâ hia, me hibö nyi
Paulo me úcimhnyimak mē, 38 e beönua
anyidra hlöuhlöu hnyi ta je hofuc e ame ha,
ka habe, adre me ca he bala hmetu ka wâ

hnyimakan. Me adre me tha he mē ka hnyi hon hu.

HNYIMAKAN 21.

ÖHMUN e hia but hn' ödra, me öhmun e kec ut, me kec wisa Koso ai, ke nyi öhmun e he Rodo ai, ke úhehmun e öhmun e he Patara ai: 2 ke öhmun e wá ke hu ame he ka hnehne Foinike ai, me öhmun e tabâ e, me kec ut. 3 Ke öhmun e wâ thö Kuperö, me öhmun e hna but e hnyi ke keihen me, me öhmun e kec Suria ai, me khöp dö hnyi Turo: anyin adre me he ka thigâ e önyen hu. 4 Ke öhmun e wâ je laten, me öhmun e laba eling hnyi seven je bong: ke ödrin e ha kö Paulo únyi hnyi Hanu, ka habe, ca he Jerusalema ai. 5 Ke ame um dö ta je bong e, me öhmun e didrut me he but; ke ödrin hia adre me su öhmun tha ödrin me láiödrin me lakudrin, ke ne o but hnyi hoton taun: me öhmun e cibouca eú göny me hic, 6 me úhúne; ke öhmun e ölö thö hon hu ai, ke ödra adre me hmetu ka hnyi ta je hnya-badra.

7 Ke öhmun e o but hnyi Tolemai, úhehmun Turo; me öhmun e talofa me je liamekeiny, ke khaca bonguhmun ka tha laba m' ödra. 8 Ke nyi öhmun e he me o hnyi Kaisaria: ke öhmun e didrö ka hnyi uma umö Filipo at ame khetâ úthumetu ae so, ke at hnyi hnyat a seven, me laba unyin. 9 Ke haba at eling me vak lakon ta hlu, ke ödrin je perofeta. 10 Ke se hia je bong öhmun e laba eling, me ame o but ke perofeta úheny Juda, Agabo ien. 11 Ke e ame o but köhmun, ke e ame hom weikö Paulo, me ame ka ca bi kâu li cau me li benyin, me ha, ka habe, Haingen Hanu Kap, a g' ame he at Juda hnyi Jerusalema ka helâng hna ca at a weiken ang, me he ka hna ka hnyi hnyamen Aten ta je hnyei. 12 Öhmun e löng hofuc e, me öhmun me tavat adre me laba eling, öhmun e thawâ e, ka habe, ca he bi Jerusalema ai. 13 Haba Paulo ame thu me ha, ka habe, Ieú gabun öbun e tenge me öhluhluâ hnyekuk? anyin a oge hia but penapena, ca ka hnyi úceat thibi, ke so minya he ka mok hnyi Jerusalema can iö Iesu a Than. 14 Me e ame ca löng bala köhmun, me öhmun e laba hnyibú ju, me ha, ka habe, E so he ka mádrâ weny Than.

15 Hwaban je bong e, öhmun e kât anyihmun je thatúnyi me he but Jerusale-

ma ai. 16 Ke ame tha he möhmun ke je laten úhedrin Kaisaria, tha ödrin me ke at Nasona ien, a at Kuperö, wale aten kâu adrem, ke öhmun e he ka laba unyin.

17 Öhmun e o but hnyi Jerusalema, me haba je liamekeiny adre me kap senyini öhmun. 18 Ke nyi ame tha he möhmun Paulo kö Iakobo; ke eling wahingat hia. 19 Ke ame italofa m' ödra, me e ame omanená gaga ta je únyi ame ányâ Khong unyin Aten ta je hnyei hnen anyin huliwa. 20 Ke adre me löng ut, me adre me ogânâ Khong; me adre me ha kâu, ka habe, Liamekeiny möhmun lö, u me wâ ta je thauzan anyin at Juda adre me labageju; ke ödra hia adre me ti hnyokâ hnanyibu; 21 ke adre me löng gam a u je ná at Juda hia, a ödra unyin Aten ta je hnyei, he ka hna degeci Mose, ke u je ha ködra, ka habe, ca he bi ka peritomonâ je lakubun, ke ca he minya ka vhenö ta je bongon. 22 Anyin a wale, ama kâmâu? anyin adre me he ka löng a u je o thö. 23 Anyin a wale, mádrâ thö hnöhmun hna he ka ha köu: Habe e unyihmun hnyat a vak, ödrin e bi khöbi; 24 e so he ka tha u m' ödrin, ke tha oboso i u m' ödrin, me tha bi hwaban m' ödrin, m' adre me he bi ka subâ je leúnen bödrin: me me khana thö tavat hia ae ca hnathu bi ke únyi adre löng gam; ke so bi a u je vhenö so, me tuö hnanyibu. 25 Ke haba Aten ta je hnyei adre me labageju, me öhmun e hia but sisit ködra, me owisa a adre me he ka úsákâúö me je hna hudo ka je hnatheat, me dra, me je únyi adre noc nyin, me bi únyi monu. 26 Haba Paulo ame hawâ je hnyat, ke nyi e ame tha obosâ e bi mödrin, me didrö ka hnyi uma kap, he ka omanená, ka habe, e bekhöt ut ta je bonginy obosâ, ke ne o but adre me ve hudo ta je hut hobi ködra.

27 Ke ame he but ka um je bong a seven, me ame wâ e hnyin uma kap hnen at Juda a ödrin úheny Asia, me adre me omonumonoâ tavat ae se hia, me kât e, 28 me hongot, ka habe, At Isaraela lö, úhadruo: Wale bi ang at ame úne úö bi únyi me tavat, me hnanyibu, me dok ang: ke haba khaca, e ame hom but jem at Heleni ka hnyi uma kap, me okongoâ dok ang ae kap. 29 Anyin adre me ö Trofimo ehac, at Éfeso unyin hnyi taun, ke adre me únykúme a e ame hom e ka hnyi uma kap. 30 Ke ame bwebwet taun hia, ke ame tha wadring dö tavat me köt Paulo, me lelö e úheny hnyin uma kap: me adre me ie hlöng ut je

hwanuma. 31 Ke adre me tiga heleú deny he ka hlingâ e, me ame o but úthumetu ka taben ae nua anyin deö soja, ka habe, e monumonu thö Jerusalema hia. 32 Me e ame ie hom je soja me je keneturio, me wadring ködra : ke adre me wâ taben ae nua me je soja, me adre me hna ju kuc Paulo. 33 Ke ame hakekeny dö taben ae nua, me kât e, me húna he ka ca e ge li tö fao ; me hnei, ka habe, e ia ? ke ieú a ányâ ? 34 Ke haba keihen adre me hawâ ke únyi, ke keihen ke únyi bi unyin tavat ae se hia : ke ca khana bi he ka wâhmakhmeto wisa, anyin adre me imediököu, me e ame húna he ka hom e ka hnyi hhabâ. 35 Ke e ame o but hnyi wacuat, me ame kap tilâ e hnen je soja, anyin ae hwege tavat ; 36 ke ame úhnúhnú hotudrin tavat, me fuc hwege, ka habe, Ohia but e.

37 Ke adre me he ka hum Paulo ka hnyi hhabâ, me e ame ha ka taben ae nua, ka habe, E so la oge me he ka fuc köu ? Ke e ame ha, ka habe, Ae khanö u hwen Heleni ? 38 Hawa, u ca at Aigupito waleji ebac ame öktâ imonumonuny, me hom tavat a foa thauzan ka hnyi hnyebuba a tavat Úhlingö ? 39 Ke haba Paulo ame ha, ka habe, Iny at Juda úhek Taraso hnyi Silikia, aten taun ae lung : ke inya oge me sumatö u he ka hnö nya he ka fuc ka tavat. 40 Ke ame hna e, me ame tot Paulo hnyi wacuat me hinöbeny hon tavat ; ke adre hia but ohnyibö but, me e ame fuc hnyi hwen Heberu, ka habe,

HNYIMAKAN 22.

HNYAT me lakeiny me lakamen lö, löng ju öbun hnök hna ha wiso nya walang any köbun.

2 Adre me löng a g' ame fuc ködra hnyi hwen Heberu, me adre me tevehlöng wia ; ke e ame ha, ka habe,

3 Iny at Juda, adre hnöku nya hnyi Taraso hnyi Silikia, ke adre me hat nya hnyi taun ang, ke adre me nâ wisa könya hnan-yibu anyin lakamöta hnyi li ca Gamaliela, ke oge me hnyok hwege ka Khong, helâ me öbun hnyi bong ang : 4 ke oge me okongoâ hmi ang, me hling' ödra, me c' ödra me ip ödra obaga me omomo hnyi uma ceat. 5 Wale ae khana at bihut ae nua me wahingat hia he ka ohnathu nya ; ke oge me kap je tusi gadra hnân hobi kâu je liamekeiny, me he but Damaseko ai, he ka c' ödra me hum ödra Jerusalema ai he ka

bi hwaban ködra. 6 Ke tiga inya eú hnyi gethen hakekenyâ Damaseko, ka jebigo but, me ame ie umumelam igigili nya melam únyi hnyi drany. 7 Ke oge me ta but hnyikânâi, me löng hofuc ame ha könya, ka habe, Saulo, Saulo lö, ieú gam u me okongu nya ? 8 Me oge me thu, ka habe, Than lö, u ia ? Me e ame ha könya, ka habe, Inya Iesu at Nazareta at u me labö okongoâ. 9 Haba hnyat ödrin e tha he mönya, me adre me wâ melam, k' adre me ca löng bi ifucin at ame fuc könya. 10 Ke haingök, ka habe, Than lö, ieú oge me he ka ányâ ? Haba Than ame ha könya, ka habe, Todrö, me he thö Damaseko ai ; k' adre me he ka ha köu eling ta je únyi hia a hanymâm he ka ányâ. 11 Ke oge me ca bwele hmetu bi únyi ge úhadadakiny melam eling, k' ame lelö benyik hnen hnyat ödrin e tha he mönya, me oge me o but hnyi Damaseko. 12 Ke haba Anania, at ame outen Khong ae úcú me hnanyibu, k' ame haisoâ e hnen at Juda hia adre me laba eling, 13 e ame o but könya, me tot unyik me ha, ka habe, Saulo lö, liamekeiny mönya, bwela hmetu but. Ke oge me wâ e hnyi úen eling. 14 Ke haingen ame ha, ka habe, Haba Khongon lakamöta a úcö u me u me he ka wâhmakhmetoâ weny, me wâ At ae Wisa, me löng hofuc únyi hnyi hnyimen. 15 Anyin a u me he ka ohnathö e ka tavat hia, hnyi hnâm hna wâ me löng. 16 Ke walang ang ieú gam u me bec ? to-drö, me adre me bapataiso i, me hneú degecâ ányâm ta je hulö, me hawâ thö ien. 17 Ke oge me o hmetu but hnyi Jerusalema, me hic hnyi uma kap, me oge me wâ hna omanenâ, 18 me wâ e wale at ame ha könya, ka habe, Logotö, ie he but úhem Jerusalema : anyin adre me ca he ka kap hna ohnathu nya gam. 19 Ke haingök, ka habe, Than lö, e khan' ödra hnök hna ca, me kot hnyi ta je sunago tavat adre me labageju köu : 20 ke adre hingâlâ drö Setafano at ame ohnathu u, me oge me tot hakekenyâ, me hnyi hanen, me tuö je úkhaúödrin hnyat ödrin e hlingâ e. 21 Ke haingen ame ha könya, ka habe, He thö, anyin oge me he ka kunö u sákâú ai ka aten ta je hnyei.

22 Ke adre me löng e ke ne o but hnyi uthofuc e : me adre me ha göranyai, ka habe, Ohia but e únyi eang hmeledrany ; anyin ae ca so e ame he ka möt. 23 Ke adre me tiga fuc göranyai me uny anyidra je úkhaú, me iâ sesâiny kânâ göranyai, 24

haba taben ae nua ame hûna he ka hom e ka hnyi hñabâ, me ha he ka hnö me kot e, me me khana thö hwân hnödra hna hongot gan helâe. 25 Ke adre hia but ca e ge je tö, haba Paulo ame ha ka keneturio at ame tot eling, ka habe, Hawa, e úcû hnyi hnanyibu, öbun e he ka kot at Roma, k' ödra tiga ca úhnö? 26 Ke a löng ut keneturio, me e ame he me ha ka taben ae nua, ka habe, Ieú u me he ka ányá? anyin a at Roma at ang. 27 Me ame o but taben ae nua me ha kâu, ka habe, Bethe ha kõnya, u at Roma? E ame ha, ka habe, E. 28 Haba taben ae nua ame thu, ka habe, E gan hmâ tang mone o ge ham, m' inye he ka aten hnyei e. Ke haingö Paulo, Adre hnöku nya at Roma. 29 Anyin a wale ame ie úsákâúö but më tavat adre me he ka hnö e : ke ot minya but taben ae nua, anyin a e khana but a e at Roma, k' adre hia but minya ca e.

30 Ke nyi e ame behe ka wâ wia hnathu a g' ame bi fuco e ge at Juda, me e ame thang e, ke e ame úkhacaköüâ je taben tavat bihut me tavat úhnenamö hia, k' ame hum Paulo but, me otilà e hnyi hnyimaködra.

HNYIMAKAN 23.

HABA Paulo ame wâ hmâ úhnenamö, me ha, ka habe, Hnyat me lakeiny lö, oge hia but laba me oúnykúmik ae so hia hnyi hnyimakan Khong ke ne o but hnyi bong ang. 2 Haba at bihut ae nua ame ha ka tavat adre me tot unyin he ka khaú hnyimen. 3 Haba Paulo ame ha kâu, ka habe, Ame he Khong ka khöú u, u hak veto adre ohawâ, anyin a u me laba he ka owisö nya helâ me hnanyibu, ke u me kûna he ka khöú nya a úö bi únyi me hnanyibu? 4 Ke haingen tavat adre me útitilen eling, ka habe, U me haikongoá at bihut ae nua anyin Khong? 5 Me haingö Paulo, ka habe, Hnyat me lakeiny lö, e ca khanö nya ae at bihut ae nua : anyin adre me sihnalimen, ka habe, U me ca he ka haikongo at ame musö em hnyei. 6 Ke a wâhmakhmeto but Paulo a ta je Sadukaio keihen gadra, ke ta je Faresaio keihen, me e ame fuc hwege hnyi úhnenamö, ka habe, Hnyat me lakeiny lö, iny Faresaio, nokon Faresaio : k' adre me hnei nya ge geju ka hnyi möt hmetu únyi hnyi hna mok. 7 K' ame ha helâe, me ame kú thö iwatretra ge at Faresaio me ta je Sadukaio : ke

haba úkhacaköu, me ame khekhe lo but. 8 Anyin a haingen ta je Sadukaio, ka habe, E ba möt hmetu, ke ba angela, ke ba hanu : ke haba je Faresaio, me adre me tha kap li únyi e. 9 Me ame kú thö imediököu ae gan, me ame todrö tavat sihnalimen lahien ta je Faresaio, me ha hwegiâ, ka habe, E ba monu ge at ang öhmun e wâ : ke ame ne ha kâu la hnen angela, k' ame ne hnen angela, ieú? 10 Ke ame kú ivinö ae gan hmâ, me ame ot taben ae nua, wâ adre nye he ka ve kiö Paulo but, me e ame kunâ je soja he ka hûgúnâ but e gadra, me hom e ka hnyi hñabâ.

11 Ke eâu hnyi lit, haba Than ame tot unyin me ha, ka habe, Hwege thö : anyin a u me he ka ohnathu nya hnyi Roma helâji me hnâm hna ohnathu nya hnyi Jerusalema.

12 Ke a lany jut haba at Juda adre me úkhacaköu me bi khöbi ka habe, Adre me ca he ka han me ic ke ne o but adre me hia but hlingö Paulo. 13 Ke haba tavat adre me si hnân eling ödra se hia hon fâte. 14 Ke adre me o but ka je taben tavat bihut, me wahingat, me ha, ka habe, Öhmun e hia but bi khöbi ae gan hmâ hwaban, a öhmun e ca he ka an ke únyi, ke ne o but öhmun e hia but hlingö Paulo. 15 Anyin a wale, ha th' öbun me tavat úhnenamö ka taben ae nua, me me he ka hom but e köbun, helâke öbun e he ka hnö wia ta je únyi gan : ke öhmun e he ka penapena ka hlingâ e, ke tiga sákâú. 16 Ke a löng ut nakaúnyi Paulo, a g' adre me he ka mokut duöng gan, me e ame he but me didrö ka hnyi hñabâ, me haimemenâ kö Paulo. 17 Haba Paulo ame hawâ ke keneturio me ha, ka habe, Hom dö hidröu ang ka taben ae nua : anyin ae hu hofuc gan he ka haimemenâ kâu. 18 Me e ame hom e, me su e ka taben ae nua, me ha, ka habe, Ame hawo nya Paulo, waleji adre ca, me sumató nya he ka hom hidröu ang köu, anyin ae hu hofuc gan he ka ha köu. 19 Haba taben ae nua ame lelö hnyamen ka hnyi dok ae ba aten me hnö, ka habe, Ie únyi u me he ka ha kõnya? 20 Haingen, ka habe, A hia but at Juda tha ha he ka sumató u he ka hum Paulo nyi ka hnyi úhnenamö, helâke u me he ka hnö wia ke únyi gan. 21 E so u ma ca he ka ogâ hodra : anyin ae se hon fâte tavat gadra adre me mokut duöng, adre hia but bi khöbi a g' adre me ca he ka han me ic ke ne o but adre hia but hlingâ e : ke walang

ang adre me laba penapena me halubahingen u me he ka ogâ hodra. 22 Haba taben ae nua ame hna but hidröu me hûna, ka habe, Ca ha bi ka ke at m' u je mwi ang ka haimemenâ könya ta je únyi ang.

23 Me e ame hawâ lo li keneturio, me ha, ka habe, Penapena thö ta je soja a tu haded, ke sevente tavat tabö hors, ke tu haded tavat hok ö, he ka he Kaisaria ai eâu hnyinghet, hnyi awa a kuniny : 24 ke e ame hûna ködrin he ka penapena je meno m' adre me he ka ip Paulo hon, me hom via e kö Filiki a gavena. 25 Ke e ame set, helâng tusi, ka habe,

26 Inya Klaudio Lusía oge me italofo möu Filiki a gavena ae beönua. 27 Haba at Juda me adre me kât at ang, ke adre me he but ka hlingâ e, ke oge me he but me deö soja me omelö e, anyin a oge me löng a e at Roma. 28 Ke oge me wek he ka wâ wia can adre me bifuco e gan, me oge me hom e ka hnyi anyidra úhnenamö : 29 me ame manen könya a g' adre bi fuco e hnyi bongon anyidra hnanyibu, ke ba únyi adre me ha ae úcú kâu he ka mok hnyin, me ca bi. 30 Ke adre me omanenâ könya a g' adre me he ka mokut duöng kâu, me oge me ie kunâ but e köu, me oge me hûna ka tavat adre me he ka bifuco e he ka háia e hnyi hnyimákâm.

31 Haba ta je soja adre me hum Paulo, helâ me hna hûna ködrin, me hom e Anetipateri ai hnyi lit. 32 Ke nyi adre me hna tavat tabö hors he ka hom e, ke adre me he hmetu ka hnyi hnabâ : 33 ke adre me o but hnyi Kaisaria, me adre me ham tusi ka gavena, me hum Paulo kâu. 34 Ke a hia but aú, me e ame hnö iny hnyei ; ke e khana a at Silikia, 35 me e ame ha, ka habe, Oge me he ka ling u e ka o tavat he ka bi fuci u : me e ame hûna he ka tuö e hnyi uma umö Heroda than.

HNYIMAKAN 24.

HWABAN je bong a faiv ame o thö at bihut ae nua, jia Anania, me ke je wahingat, me at khet, Teretulo ien ; me ödrin e haiö Paulo ka gavena. 2 Ke adre me hawo Teretulo, me e ame hwân he ka bi fuco e, ame ha, ka habe,

Taböny than Filiki lö, e gan hmâ anyihmun úsoköu únyi gam, ke únyi ge ányâm metâ adre me owisa hnyei ang me me so tot, 3 ke öhmun e kap e hnyi je úen ke hnyi je dok hia, me ole gan hmâ. 4 Ke

wâ oge nye öhunyinyi u, inya oge me khöu köu he ka löng menyiki öhmun hnyi ke je hofuc ae wakhalet. 5 Anyin a öhmun e wâ but at ang ame bi jönihmun, k' ame okûâ úhügúnö dökhü unyin at Juda hia eang hmeledrany, haba e me homakan at Nazareta : 6 ke e ame heleú deny minya he ka okongoâ uma kap : m' öhmun e kât e : 8 ke u me he ka wâhmakhmeto ta je hofuc hia öhmun e háia e gan, u ka he ka hnö e. 9 Ke haba at Juda minya adre me tha hien, mē, me ogâ ta je únyi hia eling.

10 Ke haba gavena ame atmemakö Paulo he ka fuc, me e ame ha, ka habe,

E khanö nya ae se hia ta je huna u je owisa hnyin hnyei ang anyin a wale oge me senyin he ka ha wisö nya bi : 11 anyin ae khanö u he ka wâhmakhmeto, ae tiga twelw thibi je bong waleji oge me o hnyi Jerusalema he ka hmi : 12 ke adre me ca ö nya bi hnyi hnyin uma kap, me hnyin je sunago, me hnyi taun, oge me ivinö me ke at, me omonumonoâ tavat. 13 Ke ca khan' ödra minya bi he ka ohnathoâ ta je únyi adre me bi fuci nya hnyin. 14 Ke wale bi ang hnök hna he ka haimemenâ köu, a inya oge me hmi ka Khongon lakamöhmun hoton deny adre me ha heretikon, ke oge me kap ta je únyi hia adre sihnalimen hnyi hnanyibu me je perofeta : 15 ke oge me geju ka Khong wale adre me kap minya, a g' ame he ka möt hmetu tavat ae wisa me tavat ae ca wisa bi. 16 Anyin a wale inya oge me hwege me me hu bala bi oúnykúmik ae so ka Khong me at. 17 Hwaban ta je huna ae se hia, inya oge me o eang he ka hom ta je betenge ka aten ik hnyei, me ta je hut, 18 ke hnyi hnök hna ányá e, me ame ö nya hnen at Juda úheny Asia hnyi hnyin uma kap, oge hamök obosoi nya, ke ca tha inya me tavat, ke ba minya imediököu, 19 ke so ködrin bi he ka munyi o eang he ka tot hnyi hnyimákâm, me bi fuci nya a ne hu hodrin gak. 20 Ke e ka ba, hamödrin hnyat ang he ka ha, a ne hu hwakecik ae ca wisa bi adre wâ waleji hnyi hnök hna tot hnyi hnyimakan úhnenamö, 21 ke so bi hofuc ang a khaca, waleji o ge me tot me hongot hnyi wanbödra, ka habe, Öbun e hnei nya hnyi bong ang ge möt hmetu únyi hnyi hna mok.

22 Ke haba Filiki ame hn' ödra but ka hnyi ke bong, anyin a e ame wâhmakhmetoâ bongon hmi e, haingen, ka habe, E ka

o but Lusia taben ae nua, oge me he ka ha muâ únyi gabun. 23 Ke e ame húna ka keneturio he ka tuö e, me betenge gan; ke adre me ca he ka thawâ je lahanen he ka senâ e.

24 Ke hwaban ke je bong ame o but Filiki me Drusila a âîân momo Juda, me e ame hum Paulo he ka löng gan bongon labageju ka Keriso. 25 Ke e ame tiga ha bongon hwakecin ae wisa ke hnyok, ke bong owisa hnyi obiny, me haba Filiki ame öbubuny, me ha, ka habe, Me he thö walang ang; ke e ka hu úen ae úcú me oge me he ka hawo u hmetu. 26 E ame únykúme a g' ame he Paulo ka ham kâu mone: waleling me me osehia hawâ e he ka úhnenamö mē. 27 Hwaban lo li huna, k' adre me tilö hwabö Filiki, jia Pokio Feso; ke haba Filiki ame weny he ka osenyinâ at Juda, me e ame hnö Paulo bala hnyin uma ceat.

HNYIMAKAN 25.

AME o but Feso ka hnyi hanymen, ke hwaban kun ta bong e ame he but Jerusalema ai úheny Kaisaria. 2 Ke haba je taben tavat bihut, me je taben at Juda, me adre me haiö Paulo kâu; ke adre me khöu kâu, 3 me sumâtâ e he ka betenge ködra hu Paulo, me he ka kunâ e Jerusalema ai; m' adre me he ka mokut duöng eú hnyi gethen he ka hlingâ. 4 Ke haba Feso ame thu, ka habe, Adre me tuö Paulo hnyi Kaisaria, ke ca kueny bi me oge me he ka he but kâe. 5 Ke haingen, ka habe, Anyin a wale hamen tavat ae únyi hnathu unyibun he ka tha he mönya, a ne hu konginy at e he ka háiâ.

6 Ke a hia but laba unyidra ame ne eit ame ne ten ta bong, e ame he but Kaisaria ai; ke nyi e ame laba hon taben owisa, me úkhúnöng he ka hawo Paulo. 7 Ke e ame o but, k' ame tot igigilö e at Juda adre me utut úhedra Jerusalema, me bi fuci Paulo ge ta je únyi ae hmak, ke ta je únyi ae se, ke ca khan' ödra he ka ohnatho; 8 ke haba Paulo ame haiwisa e bi, ka habe, Oge me ca ányâ ke ong monu bi ka hnyi hnanyibu anyin at Juda, ka ba minya ka hnyi uma kap, ke ba minya bi kö Kaisara. 9 Ke haba Feso ame weny he ka osenyinâ at Juda, me e ame thu kö Paulo, ka habe, E wem he ka he Jerusalema ai, m' adre me he ka hnö eling ta je únyi hnyi hnyimakök! 10 Haba Paulo ame ha, ka habe,

Inya but ang oge me tot hnyi hnyimakan taben owisa anyi Kaisara, wale ae úcú he ka hnei nya hnyin: e ba monu oge me ányâ ka at Juda, e khanö u wia but e. 11 Ke a ne hu anyik monu, me ke únyi oge ányâ ae úcú kónya he ka mok hnyin, iny ca höcö bi he ka mok: ke e ka ba hna-thu hnyi ta je únyi adre me bi fuci nya hnyin, e ba minya at ae khana he ka hnö nya ködra. Inya oge me hawo Kaisara. 12 Ke a hia but Feso úsabö me hnyat úhnenamö, e ame thu, ka habe, U me hawo Kaisara; awe, u me he ka he but kö Kaisara.

13 Ke hwaban ke je bong ame o but hnyi Kaisaria Ageripa than me Berenike me iouny me Feso. 14 Ke se hia je bong ödru me laba eling, haba Feso ame haime-menâ ka than únyi ame kú kö Paulo, me ha, ka habe, E hu ke at adre ca ame hna ang bala hnö Filiki: 15 ke tiga inya bi hnyi Jerusalema, haba je taben tavat bihut me wahingatiny at Juda adre me háiâ e, me sumâtâ he ka bi hwaban kâu. 16 Me oge me thu ködra, ka habe Ca hwakecin at Roma he ka hna ke at ke tiga ca um bi úhnyimakanköu at adre bi fuco, me tavat adre me bi fuco e, me me hu úen he ka haiwisa e bi ge hna bi fuco e. 17 Anyin a wale adre me o but eang me oge me ca bec, ke haba nyi oge me laba hon taben owisa, me úkhúnöng he ka hawâ e jem. 18 Ke a hia but tot tavat bi fuco e, me ba thö monu ödrin e omanenâ helâ me hnök hna únykúme; 19 ke adre me háiâ e hnyi ke je únyi hnyi anyidra hmi, me ke at Iesu ien, waleji a mokcu, ke haingö Paulo bala bi, ka habe, a möt dö. 20 Ke inya oge me loloâ hna úhnö ta je únyi e, me oge me hnö e, a ne weny he ka he Jerusalema ai, m' adre me he ka hnö eling ge ta je únyi eling. 21 Ke Paulo ame ha weny he ka kap hna owisa únyi ga than tot, me oge me húna he ka tuö e ke ne o but oge me he ka kunâ e kö Kaisara. 22 Haba Ageripa ame ha kö Feso, ka habe, Iny behe minya ka löng at e. Haingen ame ha, ka habe, nyi u me he ka löng e.

23 Haba nyi ame o but Ageripa me Berenike me hmanenang ae gan, me didrö ka hnyi dök adre me löng hnyin, me je taben ae nua, me je at hnathuiny taun, haba Feso ame úkhúnöng he ka hawo Paulo. 24 Haba Feso ame ha, ka habe, Than Ageripa lö, me tavat hia eang a tha ödra m' öta, öbun e wâ at eang, hnen tavat Juda a

ödra se hia hna bi fuco e kõnya hnyi Jeru-
salema, me eang minya, adre me ha, ka
habe, e ca úcú hmetu bi he ka möt. 25
Ke oge me ca wá ke únyi a ányâ me me
úcú he ka mok: ke so bi e ame hia but
hongot ka than tot, weleling me me mou
thö hnyekuk he ka kunâ e. 26 Ke ba
únyi ae únyi hnathu gan oge me wá he ka
sihnalimen ka tuhök. Anyin a wale oge
me hawá e jem ka hnyi hnyimaköbun, ke
hnyi hnyimákâm taböny than Ageripa, me
inya wá thö ke únyi hnân sihnalimen,
hwaban hna hnö e. 27 Anyin oge me
únykúme ae ca so bi he ka kunâ at adre
me ca, k' adre me ca omanená bi can adre
me háiâ.

HNYIMAKAN 26.

HABA Ageripa ame ha kö Paulo, ka
habe, Hamâm he ka haiö u. Haba
Paulo ame lau but hnyamen me ka háiâ e
bi, ka habe,

2 Than Ageripa lö, inya oge me únykú-
me a iny hnahic, anyin a oge me he ka
haiwisö nya bi hnyi bong ang hnyi hnyi-
mákâm, ge ta je únyi hia ame bi fuci nya
hnyin at Juda: 3 anyin ae khanö u wia
ta je hwakecin hia me ta je iwatretra anyin
at Juda: anyin a wale inya oge me sumató
u he ka ling nya me ca hwenhöcö. 4 E
khana at Juda hia hwakecik k' iny tiga
wanakat, waleji ame hwân dö hnyi ik hnyei
me Jerusalema; 5 ke khan' ödra inya únyi
hnyi can a ne wedra he ka ohnatho, a e
úcú hwakecik hnyi ta je homhnyok ae nua
hnyi ke keihen anyitin hmi, wale at Fare-
saio. 6 Ke walang ang inya oge me tot
m' adre me he ka hnei nya ge hna gejon a
ha bánâ Khong ka lakamöta; 7 wale ame
únykúme anyita je tribu a twelv he ka o
ka hnyin, k' adre me bi athnyabainy hwege
hnyi lit me lany. Than lö, haba at Juda
adre me bi fuci nya can gejon eling! 8
Ieú gabun öbun e únykúme, ka habe, ca
hnân bi kap a g' ame he Khong ka omelö
hmetu thö tavat adre me mokcu? 9 E
hnathu, haba ehac oge me únykúme a e
úcú kõnya he ka mádrâ ta je únyi ae se
he ka úö bi únyi me iö Iesu At Nazareta.
10 Waleji oge me ányâ hnyi Jerusalema:
ke se hia tavat ae kap oge me ip hnyi je
uma ceat, ke oge me kap musi únyi ge je
taben tavat bihut, ke adre me he ka hling'
ödrin, me oge me og' ödra. 11 Ke iny
osehia oveci ödra hnyi ta je sunago, me

újengi ödra he ka fuc bi gan; ke e gan
hmâ anyik hmönyin ködra, me oge me
okongu ödra ke ne o but ka hnyi ke je
taun kanyua bi. 12 Ke than lö, inya oge
me tiga he Damaseko ai oge me hom musi
me man únyi ge je taben tavat bihut, 13
ke hnyi jebigö inya oge me wá eú hnyi
gethen melam únyi hnyi drany ae hadrö-
ngöc hon seúnö, ame umumelam igigili nya
me hnyat ödrin e tha he mönya. 14 Ke
öhmun e ta hia ju eú hnyi kânâ, me inya
oge me löng hofuc ame ha kõnya, me ha
hnyi hwen Heberu, ka habe, Saulo, Saulo
lö, ieú gam u me okongu nya? u me ka
oveci u me húke je homakan ö. 15 Me
oge me ha, ka habe, Than lö, u ia? Haba
Than ame ha, ka habe, Inya Iesu waleji u
me labö okongo. 16 Ke höhöi thö, me tot
ge li cam: anyin a walang can me inye
manen dut köu, m' adre me he ka wiö u
hnân athnyaba me at ohnatho ta je únyi u
je wá, me ta je únyi oge me he ka manen
hnyin köu; 17 me húgúnö u unyin tavat,
me Aten ta je hnyei, wale oge me kunö u
ka hnyin walang ang, 18 me u me he ka
obwela ta je emaködra m' adre me hwiö
únyi hnyi lit ka hnyi melam, me únyi hnyi
musi anyi Satana ka Khong, m' adre me
he ka hna degecâ but anyidra hulö, me tha
hu jekhóú mödra adre okabâ hnen labageju
kõnya. 19 Anyin a wale than Ageripa lö,
oge me ca oúnyibaúâ hna omanená únyi
hnyi drany: 20 ke oge me bök ka haime-
menâ ködra hnyi Damaseko me Jerusalema,
me hnyi hnyei Juda hia, me Aten minya
ta je hnyei, m' adre me he ka ietra me
hwiö ka Khong, me ányâ je hwakecin ae
úcú me ietra. 21 Wale can me me köt
nya at Juda hnyin uma kap, me heléú
deny he ka hlingö nya. 22 Ke e hu gak
úhadruo únyi ge Khong, wale me inye
tethmâ ke ne o but hnyi bong ang, oge me
ohnathoâ ka tavat ae úhnyúkong me tavat
ae gan, ke oge me ca ha ke únyi ke so bi
hnen je perofeta me Mose hna ha ame he
ka o; 23 ka habe, Ame he Keriso ka vec,
ke ame he ka bán ka möt hmetu úheny
hnyi hna mok, me omanená melam ka
tavat, me Aten ta je hnyei.

24 Ke e ame ka tiga háiâ e bi helâe,
haba Feso ame ha hwegiâ, ka habe, Paulo,
u je monu but, hnen úne ae gan hna omonu
u. 25 Ke haingö Paulo, ka habe, Than
Feso lö, iny ca monu; ke inya oge me ha
hofuc ae hnathu me metâ. 26 Anyin ame
wáhmakhmetoâ hnen than ta je únyi eang.

me oge me ca hlohlo he ka fuc hnyi hnyimakan: anyin ae khanö nya wia ae ca iyong bi kâu ke ûnyi eang; anyin adre me ca ânyâ ûnyi eang hnyi dok ae iyong. 27 Than Ageripa lö, hawa, u me kap je perofeta? e khanö nya a u me kap. 28 Haba Ageripa ame ha kö Paulo, ka habe, U me beohmehmelö nya he ka bi Kerisiano ge ong hofuc ae ûhnyûkong. 29 Me haingö Paulo, ka habe, Inya oge me khöu ka Khong, me me ca hake u thibi, ke ödra hia minya adre me ling nya hnyi bong ang, ame ne ûnyi ge hofuc ae ûhnyûkong ame ne gan, a g' adre he bi ka helá mönya, ke ca ha bi hna co nya eang.

30 Ke ame todrö than, me gavena, me Berenike me tavat adre me tha laba mödrin: 31 ke ödrin e úsákâüü but mödra, me ûhnenamö, ka kabe, A ca mádrâ at ang ke ûnyi ae úcû me mok me ca. 32 Haba Ageripa ame ha kö Feso, ka habe, a ne ca hongot at ang kö Kaisara, me ame ne khan' ödra he ka thang ut e.

HNYIMAKAN 27.

KE mou thö a öhmun e he ka kec Italia ai, me adre me hnö Paulo me keihen tavat adre me c' ödra ka keneturioiny döiny vat anyi Augusto, jia Julio. 2 Me öhmun e ölö ka hnyi hon hu Adamutiu, wale ame he ka kec ka hnyi je taun hnyi hobatköiöiny Asia, me öhmun e kec ut, tha öhmun me Aritako at Makedonia, úheny Thesalonika. 3 Ke nyi öhmun e khüö un hnyi Sidona; ke so hwakeci Julio kö Paulo, me e ame hna e he ka he but ka je lahanen he ka kap ibetengiö. 4 Ke öhmun e hia but vhiik un, me öhmun e kec hmelen Kuperö anyin ae kong ang. 5 Ke öhmun e hia but kácá köiö cicö Silikia me Pamafulia, me öhmun e khöp dö hnyi Mura hnyi Lukia. 6 Haba keneturio ame wâ eling hu Alesanedia ame he ka kec Italia ai; me e ame ip öhmun hon. 7 Ke se hia je bong öhmun e bec kec, ke gan hmâ anyihmun huliwa he ka hakekenyâ Nido, anyin ae kong ang, me öhmun e kec hmelen Kerete, cicö Salamone; 8 ke gan hmâ huliwa he ka hau but gan, me öhmun e o ka hnyi ke dok adre hwenyi ien Wasaú ae Hmanenang; ke e hakekeny eling taun Lasea.

9 Ke hwaban je bong ae se hia, ke a o thö walang úen ae kong he ka kec hnyin, anyin a um dö úen adre ânyâ ca han, haba

Paulo ame khöu ködrin, 10 haingen, ka habe, je than lö, inya oge me únykúme ame he ka gan kong hnyi kec ang me úohia, ca ka hnyi hna hauda me hu thibi, ke ka hnyi anyita minya bi möt. 11 Ke haba keneturio ame löng ka tuhan hu me at a hon hu, k' ame ca löng bi hna ha hnö Paulo. 12 Ke anyin ae kong wasaú he ka ikhölö hnyin hnyi úen weneú, me ame ha tavat ae se gadrin ae so he ka kec úhedra e, ame ne khan' ödra he ka khöp hnyi Foinike me ikhölö hnyi úen weneú; wale ke wasaú hnyi Kerete, cicö hwaiöu ke e jio, me hwadrö ke e jio. 13 Ke e so but ang a hwaiöu, me adre me únykúme he ka ohwâdá únykúmenödra, me adre me vhiik un dö, me kec cicö Kerete ke hakekeny hot. 14 Ke ca bec bi hwaban e, me ame o but ang ae hwege hmönyin Eurakudo ien: 15 me ame óuang hu, ke ca khana he ka hnyimakan ka hnyi ang, me öhmun e hna but e he ka óuang. 16 Ke öhmun e kec hmelen ke ong bomene Kalauda ien, ke gan hmâ anyihmun huliwa he ka ohmâ bot: 17 ke adre hia but lelö thö e göranyai, me adre me hom je únyi hnân úhadruo, me wâdrâ; ke adre me ot, wâ e nye sa thö hnyi Sertis, me adre me hnahna je omjehen, me óuang ut hu. 18 Ke ame kap hnahna hmönyini öhmun weneú, me nyi adre me hwân he ka degec ut hna hauda: 19 ke hnyi bong a kuniny adre me degec hia ge je hnyam je omjehen hu. 20 Ke se hia je bong ame ca manen hnyin seúnö me ta je okhú, ke gan bala weneú köhmun, me ame hia but hnöhmun hna geju ka hnyi möt. 21 Ke e beú hmâ úen adre ca han hnyin, haba Paulo ame tot hnyi wanbödra, me ha, ka habe, je than lö, öbun e ne löng kõnya ehac, me ca kec úheny Kerete, me ame ca he bi ka o kong ang me hna ohia ta je únyi. 22 Ke walang ang oge me khöu köbun, e so öbun e hwege ju, anyin ame ca he bi ka hia melen ke at gabun, ke hake hu thibi. 23 Anyin a mwi unyik eja hnyinghet angela anyin Khong wale at oge me bi athnyabainy, ke oge me huliwa kâu, 24 ame ha, ka habe, Paulo lö, ca ot bi; anyin a u me he bala ka tot hnyi hnyimakö Kaisara: ke wâ bi, a hia but Khong ham ödra hia köu, tavat adre me tha kec möu. 25 Anyin a wale, je than lö, hwege th' öbun, inya oge me gejon ka Khong, a g' ame he ka e bala hnen hna ha kõnya. 26 Ke so bi adre me he ka digic öta ka hnyi ke bomene.

27 Ke ame o but lit a fortininy, me öhmun e ouang hnyi köiö Aderia, ke hakekeny jut wanbenset haba aten hu ödrin e únykúme a ödrin hakekeny jut ka hnyi hnyei; 28 me adre me tuluto ju, me wá a twente je hna abâ: ke adre me tuluto hmetu eâu, me wá a fiftin je hna abâ. 29 Me adre me ot wá e nye hmouca thö hu hnyi ke hme, me adre me khûâ but je un a vak hnyi obiny hu, me wedra hmönyin lany. 30 Ke haba aten hu, me ödrin e hna but galu ka hnyi köiö, heláke adre me he ka khûâ ke je un hnyi homakan hu, ke adre me iyawö m' adre me he ka kec úhedra hon hu, 31 ke haba Paulo ame ha ka keneturio me ta je soja, ka habe, A ne ca laba hmâ hnyat e hon hu, me öbun e ca he ka möt. 32 Me haba je soja adre me subâ töiny galu, me ame kölu but. 33 Ke ame he but ka lany, haba Paulo ame újöngi ödra hia he ka han, haingen, ka habe, Walong bong a fortininy öbun e lubahingen me ca han, ke ba bala únyi öbun e an. 34 Anyin a wale oge me újöngi öbun he ka han: anyin a hobi kâu anyibun möt: anyin ame ca he ka hia leúnen a khaca hnyi ban ke at gabun. 35 E ame ha hofuc e, me hom areto, me oleá ka Khong hnyi hnyimaködra hia: ke e ame susubâ, me hwân he ka han. 36 Me adre me senyin hia, me adre me hnyi han minya. 37 Haba úseihmun hia hon hu, me tu haded ke sevente siks. 38 Ame sekudra thö anyin han, me adre me ohâhâ hu, me degec hwit hnyi köiö ai. 39 Ke a lany jut, me adre me ca wáhmakhmetoâ hnyei: ke adre me wá ke hwâdâ dok ae hu öny hnyin, me adre me úsabö he ka hna hu ka hnyin. 40 Me adre me subâ degecâ but je un ka hnyi köiö, me thang ut je ohmâiny hna hogwi, me lau húnyú ka hnyi ang, me kec ka hnyi öny. 41 Ke adre me o but ka hnyi hna iouny hnen li wekhet, me ame laba thö hu; me ame hmâ ju homakan, ame ca ok hmetu bi, ke ame hmouca but obiny hu ge ta je waköiö ae gan. 42 Me ame ha je soja ka haba e so he ka hlingâ tavat adre ca, wá e nye he ka hai me kec dö ke at. 43 Ke haba keneturio ame weny he ka omeli Paulo, waleling me me thaw' ödrin ju; me húna ka tavat ae khan' ödra hai, he ha utut úheny hon hu, me bödra he ka hai hot ai: 44 ke haba keihen minya, ödrin hon je esö, ke keihen hon je omjehen hu. Waleling me adre me möt hia thö hot.

HNYIMAKAN 28.

KE öhmun e mödrut me öhmun e wáh-makhmetoâ a Melita ien bomene. 2 Ke gan hmâ hnen ta je wanaitihila hna betenge gahmun: anyin adre me hú hlöghmun, me köp öhmun hia, anyin ae hu we me megic. 3 Ke haba Paulo ame thigö me ip hon meic, me ame silöu but vaipa anyin ame löng kahwa, me ame kece ka hnyi hnyamen. 4 Ke haba je wanaitihila adre me wá on ame him hnyi hnyamen, me adre me úhakouâ, ka habe, At úhlingö at eang, wale a möt ut úheny eü hnyi köiö, ke a ca hna e hnen Wisa he ka hnyi möt. 5 Ke e ame nyikâ degecâ on ka hnyi meic, ke ba bi únyi ae kong a o kâu. 6 Ke adre me halubahingen ame he ka khibi unyin, ame ne he ka ie ü but me mokcu: ke beú hnödra hna lubahingen, ke adre me wá ae ba únyi ae kong ame o kâu, me adre me wia je únykúmenödra a e ke khong.

7 Ke e hakekeny eling je hnyaban tuhan bomene, Popilio ien; e ame hum öhmun ka hnyi hnyaban, me betenge gan hmâ gahmun hnyi kun ta bong. 8 Ke haba kamö Popilio ame moko kahwa me kongo dra: ke haba Paulo ame didrö kâu, me hic, me ip li hnyamen hon e, me osoâ e. 9 Ke ame um dö e haba keihen ame takú ödra mok hnyi bomene, adre me o but, me e ame osoi ödra: 10 ke adre me ogan' öhmun ge ta je únyi ae so ae se hia; ke hnyi úen öhmun e he but ka hnehne, adre me ham köhmun ta je únyi ae úcú.

11 Ke hwaban kun ta tehi öhmun e kec hon ke hu Alesanedria, waleji a ikhölö hnyi bomene hnyi úen weneú, haba haten hu e, me Lihúnye. 12 Ke öhmun e khöp dö hnyi Surakusa, me laba eling hnyi kun ta bong. 13 Ke úhehmun e, öhmun e sisiki me khöp dö hnyi Regio: ke khaca bong eling, me ame si thö hwaiöu, ke hnyi bong a loiny öhmun e khöp dö hnyi Potioli: 14 ke öhmun e wá eling je liamekeiny, tavat adre me khöü köhmun he ka laba unyidra hnyi seven je bong: me öhmun e o but hnyi Roma. 15 Ke e khana je liamekeiny eling öhmun, me adre me he but ke ne o but hnyi hna úcú anyin Apio, me Kun ta Uma Menâ, he ka úkhanö m' öhmun: ke haba Paulo ame ö'drin me e ame ole ka Khong, me hwege hnyekon.

16 Ke öhmun e o but hnyi Roma, adre me hnö Paulo he ka hake laba, ke hu soja ame tuö.

ROMA 1.

17 Ke hwaban kun ta bong, e ame úkhacakouâ je at hnathuiny at Juda: ke adre me úkhacakou thö, me e ame ha, ka habe, je liamekeiny lö, e ba monu oge ânyâ ka tavat, me ka hnyi hwakecin lakamöta, ke adre me hnö nya me cö nya úhek Jerusalema ka hnyi hnyamen at Roma: 18 ke adre hia but hnei nya, adre me únykúme he ka hnö nya, anyin ae ba can gak he ka mok. 19 Ke adre me ha degecâ at Juda, wale me inye hongot dö kö Kaisara; ca anyin ae hu monu oge me he ka khûâ gan ik hnyi. 20 Can e oge me haw' öbun he ka iouny me úhnenamö mönya: anyin a can gejon anyin at Isaraela adre me cö nya ge tö fao eang. 21 Me adre me ha, ka habe, Öhmun e ca kap je tusi gam únyi ge at Juda, ke ba minya ke at ge je liamekeiny ame o me haimemenâ me ha ke monu gam. 22 Ke e wehmun he ka löng gam únykúmenâm: anyin ae khan' öhmun a g' adre me haikongoâ hnyi je dok hia hmi ang.

23 Ke adre me thu bong hobi kâu, me ödrin se hia adre me o kâu hnyi hnen hna laba; ke e ame khetâ hofuc, me ohnathoâ ködra dökhu dokhon Khong, me újöngi ödra ga Iesu, únyi hnyi hnanyibu anyi Mose me ta je perofeta, hwân hnyi hnyomakatu ke ne o but sahac. 24 Haba keihen adre me kap hofuc e ame ha, k' ame

ca kap bi keihen. 25 Ke adre me ca tha hnyok bi, me adre me vese thö, hwaban hna ha ga Paulo hofuc a khaca, ka habe, E so hna ha hnen Hanu Kap a deny perofeta Isaia ka lakamöbun, haingen, ka habe, 26 He thö ka hnyi hnyei ang me ha, ka habe,

Öbun e he bala ka löng, k' öbun e ca he bala ka wâhmakhmetoâ;
Ke öbun e he bala ka wâ, k' öbun e ca he bala ka wâ únykúme:

27 Anyin ae pipikhenya but hnyekon tavat ang,

Ke hmak je hnyikönyödra he ka löng,
Ke mook ji emaködra;
Wâ adre nye wâ ge je emaködra,
Me löng ge je hnyikönyödra,
Me wâ únykúme ge je hnyekudra,
Me hmetuhmetu but,

Ke wâ oge nye he ka omeli ödra.

28 Anyin a wale, wâhmakhmeto ju öbun, a g' adre hia but kunâ úhömeli eang anyin Khong ka Aten ta je hnyi: me adre me he minya ka löng.

30 Ke lo li huna ae bekhöt e ame laba hnyi umen uma a ka bi hwaban, k' ame kap tavat hia adre me didrö kâu, 31 k' ame khetâ dökhu dokhon Khong, me únö ta je únyi ga Iesu Keriso hnen tang hwege, ke ba at ame thawâ.

TUSI ANYI PAULO APOSETOLO KA

AT ROMA.

HNyimakan 1.

INYA Paulo athnyabai Iesu Keriso, adre me hawâ hnân aposetolo, k' adre úca hobi kâu úthumetu ae so anyin Khong, 2 waleji e ame ha bâná a deny anyin ta je perofeta hnyi je hna sihnalimen ae kap, 3 ge Nokon, waleji adre hnokoâ únyi hnyi mâtârâni Davita hnyi unyin, 4 ke adre me haimemenâ e thibi Nokon Khong tha e me man únyi ge hanon hwakecin ae kap, hnen möt hmetu únyi hnyi hna mok; wale Iesu Keriso a Tuhöta, 5 öhmun e kap betenge baú a deny e, me hanymen aposetolo, m' adre me he ka löng hoton hna labageju

hnyi ta je hnyi hia únyi ge ien: 6 e unyidra minya bi öbun adre haw' öbun hobi kö Iesu Keriso: 7 e so e he ka e unyibun betenge baú me hnahic únyi ge Khong a Kamöta me Than Iesu Keriso; ka tavat hia e Roma, je oúnykúmen Khong, me hna hawâ hnân tavat ae kap.

8 Inya oge me bök ka oleâ ka Khonguk, a deny Iesu Keriso, gabun hia, anyin ame lung anyibun labageju hnyi hmeledraný hia. 9 K' ame ohnathu nya Khong, at oge me athnyabainy hnyi hanuk hnyi úthumetu ae so anyin Nokon, a oge me ca menâ bi hai öbun hnyi hijik je hic hia, 10 k' oge me sumâtâ he ka ie he but köbun, a ne hu

dek, ke a ne weny Khong he ka ohnabicá úhek. 11 Anyin ae gan hmâ wek he ka iouny möbun, m' inye he ka ham köbun ke bwihlany únyi hnyi hanu, me hnân otethm' öbun; 12 wale me me tha kawkahwa hnyekuk m' öbun, hnyi anyitin tha labageju. 13 Hnyat me lakeiny lö, e wek e me hnyi khan' öbun, a iny osebia únykúme he ka he köbun, (ke hu hna ovheli nya ke ne o but walang ang), me me hu gak ke je wan únyi gabun, helâ me hnyi ke keihen Aten ta je hnyei. 14 E hu hanymök ka at Heleni, me Aten ta je hnyei, ka tavat ae metâ, me tavat ae ca metâ bi. 15 Anyin a wale, inya oge me penapena a ne kbanö nya, he ka khetâ minya köbun úthumetu ae so hnyi Roma. 16 Anyin a inya oge me ca hmehma ge úthumetu ae so: anyin a wale man maniny Khong hnân omelö tavat hia thithö adre me labageju; ka at Juda a bân, me ka at Heleni minya ju. 17 Anyin ame manen dut hnyin e hwakecin ae wisa anyin Khong únyi ge labageju, m' adre me he ka labageju: helâ me hna sihnalimen, ka habe, Ame he ka möt tavat ae wisa hwakecidra únyi ge labageju.

18 Anyin adre me omanená únyi hnyi drany hmönyin anyin Khong ka ta je hwakecin hia ae ca úcú ka Khong, me je hwakecin ae ca wisa bi anyin tavat, adre me ovhelâ hnathu ge hwakecidra ae ca wisa bi; 19 anyin ae manen dut eú hnyidra, ta je únyi ae khan' ödra he ka omanená ge Khong; anyin a Khong ame omanená ling ködra. 20 Anyin a haba anyin ta je únyi ae iyong, hwân hnyi hna op hmeledrany, me, himanen hmönyin dut, adre me wâhmakhmetoâ hnen ta je únyi a op, wale maniny man ae ca ba balua, me bongon Khong; wale me me he ka ba hmetu hnân thu gadra: 21 anyin a khan' ödra but Khong, ke adre me ca ogânâ bi, e me úcú me Khong, ke adre me ca oleâ minya bi; ke adre me omonoâ je únykúmenödra, me öli-drâ je hnyekudra ae kong. 22 Adre me ka ohobeluâ anyidra bi metâ, me adre me monu but, 23 ke adre me wia thö hmananginy Khong ae möt balua, me úcúcúbongou e me at ame he ka mok, me je meno ame gâ, me je meno a vak can, me je únyi ame iyaú.

24 Anyin a wale Khong ame hn' ödra ka hnyi je weny hnyekudra ae kong, me hwakecin ae ikiki, m' adre me he ka úokong-oâkouâ je unyidra: 25 anyin a adre me

wia thö hnathu anyin Khong me me thoi bi, me khudrung me huliwa ka ke únyi adre op, k' at hna bi At a Up ödra, wale a hnân haisoâ nyiele balua. Amen.

26 Waleling me me hn' ödra Khong ka hnyi ta je wedra ae ikiki; anyin a haba je momo gadrin adre me wia hwakecin ae úcú ka hnyi hwakecin ae ca úcú: 27 ke helâe minya obaga adre me hna degecâ hwakecin ae úcú omomo, k' ödrin e úokahwakouâ wedra ae kong, obaga unyin obaga adre me ányâ únyi ae ikiki, me ame hwâdá ködra hwaban ae úcú me anyidra monu.

28 Ke ca wedra he ka wâhmakhmetoâ Khong, me haba Khong ame hn' ödra but he ka hwali hnyi je hnyekudra, m' adre me he ka ányâ ta je únyi ae ca úcú; 29 ke ödra unöngötö ge je hwakecin ae ca wisa bi, me hulö, me béhnyekon, me beokongo; k' ödra unöngötö ge ihunyinköu, me úhlingö, me iwatretra, me iyawö, me hnyok ae ti kong; 30 ödra hnyat úhaiö, me bi fuco, me úkotiâ Khong, me hwege hnyimödra, me bi gan, me hobelöu, me bibihwakecin ae kong, me ca löng lakamödra me lahinyödra, 31 me tavat ae monu, me tavat adre me hanyâúâ hna úhinhnyköu, me tavat adre me ca hnyokâ je liamekeiny mödra, me tavat adre me ca betenge: 32 ke khan' ödra hna hûna hnen Khong, a e úcú ködra he ka mok, ödra ka ányâ ta je únyi e, ke adre me mádrâ ta je únyi eling, k' adre me og' ödra minya bi tavat adre me ányâ.

HNYIMAKAN 2.

A NYIN a wale, at ame únykúm lö, e ba hnân thu gam: anyin a haba hnâm hna únykúme ke at, me u me ka hamâm bi ohnaúhangöi u; anyin a u me ka ányâ ta je únyi e. 2 Ke e khan' öta haba Khong ame bi hwaban hoton hnathu ködra adre me ányâ ta je únyi helâe. 3 Ke tha lö, at ame únykúme tavat, a g' adre me ányâ ta je únyi helâe, ke u me ka ányâ minya bi, hawa, u je únykúme he ka ohaúâ hna bi hwaban ge Khong? 4 Hawa u je höciâ omjeú wale hwakecin ae so, me hokhnyok, me lingvec, ke u me ca wâhmakhmetoâ a g' ame lili u ka hnyi ietra, hnen hwakecin ae so anyin Khong? 5 ke can hnyekom ae nâk ke ca ietra, me u me úkhöünâ tang hmönyin hnân hobi köu bi hnyi bonginy hmönyin, ke hobi kâu ûen adre me omanená hwaban ae wisa ge Khong; 6 wale at ame he ka ve ham ka tavat helâ me hnödra hna

ROMA 3.

ányá: 7 wale, möt ame ca ba balua ka tavat adre me tethmâ hnyi huliwa ae so, me elâm hmanenang me hna ogânâ, me hna ca bobot bi: 8 ke hmönyin me wathethöt ka tavat adre me hûkötö, me tavat adre me ca löng bi hnathu, ke adre me löng hoton hwakecin ae ca wisa, 9 k' ame he ka hlöuhlöu me vec ae gan hmâ hnyekon tavat hia adre me ânyâ hwakecin ae kong, a bân at Juda, me at Heleni minya ju: 10 ke hmanenang, me hna ogânâ, me hnahic ködra hia adre me mâdrâ so, a bân ka at Juda, me ka at Heleni minya ju: 11 anyin a Khong ame ca bi haten tavat. 12 Anyin a haba tavat adre me ânyâ monu ke ba hnanyibu, me adre me he ka mok ke ba hnanyibu: ke haba tavat adre me ânyâ monu ke hu hnanyibu, me adre me he ka hnei ödra helâ me hnanyibu; 13 anyin ae ca wisa hnyi hnyimakan Khong tavat adre me löng hnanyibu ge hnyiköny, ke adre me he ka haiwisa tavat adre me löng hoton hnanyibu: 14 anyin a e ka ka ânyâ batâ bi hnen Aten ta je hnyei ta je únyi ae úcú me hnanyibu, ke ba hnanyibu gadra, awe, haba tavat eling, wale ae ba hnanyibu gadra, me ödra bi hnân ke hnanyibu hobi ködra bi; 15 anyin adre me omanená ta je huliwainy hnanyibu adre set hnyi je hnyekudra, k' ame tha ohnathoâ hnen sah oúnykümidra, ke haba je únykümenödra adre me ve haikongoâ ame ne ve haisoi ödra bi; 16 hnyi bong ame he Khong ka hnö ta je únyi ae iyong anyin tavat, ga Iesu Keriso, hoton anyik úthumetu ae so.

17 Ke a ne iâm bi ien at Juda, ke u me gejon hnanyibu, me hobeluâ Khong, 18 me wâ wia weny, me wâ soâ ta je únyi ae ti so, k' adre nö u únyi hnyi hnanyibu, 19 ke u me únyküme a u at ae úcú he ka su je wadröu, me omelami ödra adre me laba hnyi dok ae lit, 20 me at ame nâ at ae monu, me at úne ka ta je mendreng, at ae hu tulutiny metâ me hnathu hnyi hnanyibu; 21 u at ame nâ ke at, hawa u je ca nö u bi? u at ame khetâ, ka habe, ca he ke at ka venöu, hawa, u me venöu bi? 22 u at ame ha, ka habe, ca bi únyi monu, hawa, u me bi únyi monu bi? u at ame hûkötöâ je hnathat, hawa, u me venöu omjehen ta je uma kap? 23 u at ame hobeluâ hnanyibu; hawa, u me oúnyibâúâ Khong hnyi hnân hna hanyâúâ hnanyibu? 24 Anyin adre me haikongoâ ien Khong hnen Aten ke je hnyei can bi öbun, helâ me hna sihnalimen. 25 Anyin ae hu troban hna peritom, u je

ne löng hoton hnanyibu: ke so bi u je ne hanyâúâ hnanyibu, awe, ca peritom hmetu but ânyâm peritom. 26 Anyin a wale, a ne vheno wisainy hnanyibu tavat adre ca peritomonâ bi, hawa, adre me ca he ka háâ tavat adre ca peritomonâ bi, ka habe, ta je peritom? 27 Ke haba tavat adre ca peritomonâ bi, ke ka e bi, ke ame löng hoton hnanyibu, hawa, adre me ca he ka haikongu u, at ae hu tusi me hna peritom, k' u at hanyâúâ bi hnanyibu? 28 Anyin a ca at Juda bi, ame ne helâe thibi hnyi hoton; ke ca peritotom minya bi ae manen hnyi unyin: 29 ke e at Juda bi a helâe eü hnyin; ke haba peritom, e bi hnyi hnyok, me hanu, ke ca e bi hnyi tusi; wale ame ca ogânâ bi hnen at, ke so bi hnen Khong.

HNYIMAKAN 3.

KE ieu ke únyi ae nua ge at Juda? ke ieu troban peritom? 2 E gan hmâ hnyi ta je hwakecin hia: walang a bân, a g' adre hna ködra ta je hofuc hwan Khong. 3 Eja ke ne adre ne ca labageju keihen, me ieu thö? e khana anyidra ca labageju he ka oúnyibâúâ hwakecin ae hnathu anyin Khong? 4 Ohe; eja ke ne a ne thoi tavat hia, me so e me hnathu bala bi Khong; helâ me hna sihnalimen, ka habe,

M' u me he ka wisa hnyi hwâm ta je hofuc

Me tom, at ka he ka hnei u.

5 Ke a ne hnân omanená hwakecin Khong ae wisa hnen hwakecita ae ca wisa bi, ieu ate me he ka ha? Hawa, e ca wisa hwakecin Khong, at ame bi hwaban ge hmönyin? (Inya oge me fuc helâ me at.) 6 Ohe; a ne helâe ame he Khong ka kâmâu ka hnö hmeledrany? 7 Ke ame ne he anyik thoi ka ölungâ hnathuiny Khong me ogânâ e, hnân eü he ka hnei nya hmetu helâ me at ae kong? 8 ke geü, adre me ca he ka ha, ka habe, (helâ me hnödra hna haikongu öhmun, ke helâ me hna bi fuc öhmun ge keihen, ka habe, haingöhmun), Ötin e he ka ânyâ monu me me o but so? e wisa hnaúhangö a ödra.

9 Ke hawa, e kong hnöhmun ke so bi hnödra? Ohe, e ba; anyin ate hia but owisa a tha at Juda me at Heleni hia hmelan hulö; 10 helâ me hna sihnalimen, ka habe,

E ba at ae wisa, e ba hmönyin me khaca;

- 11 E ba at ame wâ únykúme,
E ba at ame elâm Khong ;
- 12 Adre me saú hia but, adre me tha monu
but ;
E ba at ame mádrá so, e ba hmönyin
me khaca :
- 13 Helá me erkemok ae memang je jekö-
widra ;
K' adre me iyawö ge je bohmödra :
Eú hnyi hnyin je esongodidra öginysin
asip ;
- 14 E unöngötö je hnyimödra ge úhangö
me hofuc ae hiny :
- 15 E logot li cadra he ka hingálá dra ;
- 16 Eú hnyi dedra je gethen úöhia, me
hnyok ae vec ;
- 17 E ca khan' ödra gethen deny hnahic :
- 18 E ba ot ka Khong hnyi hnyimaködra.
19 Ke e khan' öta a haba ta je únyi
adre ha hnyi hnanyibu, me adre me ha ka
tavat adre me laba hmelen hnanyibu ; me
me he ka ohnyibö ta je hnyem hia, m' adre
me he ka ohnaúbangöâ hmeledrany hia thi-
thö únyi ge Khong : 20 anyin ae ca khana
bi ke at he ka wisa hnyi hnyimakan ge ta
je huliwainy hnanyibu : anyin ae manen
dut hulö ge hnanyibu. 21 Ke manen dut
walang ang hwakecin ae wisa, ke ca únyi
ge hnanyibu bi, k' ame ohnathoâ hnen hna-
nyibu me ta je perofeta ; 22 wale hwakecin
ae wisa anyin Khong hnen labageju kö
Iesu Keriso hobi ködra hia tavat adre me
labageju ; anyin ae ve bongon bi ; 23 anyin
ae kong tavat hia, k' adre me ca o ka hnyi
hmanenanginy Khong. 24 ke adre me
haisoâ bâúâ bi öta hnen anyin ibetengiö
únyi ge úhömeli wale unyin Keriso Iesu :
25 a hut ame oâ hnen Khong, deny laba-
geju ka hnyi dren, m' adre me he ka oman-
enâ hwakecin ae wisa únyi hnyi hnen hna
thang ut ta je hulö adre ányá ehac, únyi
hnyi hokhnyok beú hmâ anyin Khong ;
26 m' adre me omanenâ hnyi úen ang hwa-
kecin ae wisa : me me ka wisa bi, k' ame
he minya ka haiwisa at ame labageju kö
Iesu. 27 Anyin a wale, ewa hna ohobeluâ ?
E ba hnen bi e. Hnen ie hnanyibu ? hawa,
ge huliwa ? Ohe ; ke so bi únyi ge hna-
nyibuiny labageju. 28 Anyin a wale, ate
me únykúme, ka habe, adre me haiwisa at
ge labageju, ke ca ha bi huliwainy hnanyibu.
29 Hawa, e Khongon at Juda thibi ? ke
ca Khongon Aten minya bi ta je hnyei ?
Eke, me Aten ta je hnyei minya : 30 awe,
ame ne khaca thibi Khong, k' ame he ka
haiwisa hna peritom únyi hnyi labageju, ke

tavat adre ca peritom bi hnen labageju.
31 Hawa, ate me he ka oúnyibâúâ hnanyibu
hnen labageju ? Ohe ; ke so bi ate me
otilá hmâ hnanyibu.

HNYIMAKAN 4.

A NYIN a wale, ate me he ka ha ieú
ame wâ hnö Aberahama a kamöta
hnyi unyin ? 2 Anyin adre ne haiwisai
Aberahama únyi hnyi huliwa, me hu but
káu hnân ohobeluâ ; ke ba bi ge Khong.
3 Anyin a ieú ame ha hna sihnalimen ?
Ka habe, Me Aberahama ame labageju ka
Khong, me adre me háiâ e káu hnân hwa-
kecin ae wisa. 4 Adre me ca ha a g' ame
he ka kap hwaban únyi ge ibetengiö baú
hnen at ame ányá huliwa, ke hnân bi bi
hwaban. 5 Ke haba at ame ca huliwa, k'
ame labageju thibi ka at ame haiwisa at ae
kong hwakecin ; haba anyin bi labageju,
me adre me he ka ha a hnân hwakecin ae
wisa. 6 Helá me Davita ame hahnahicâ
at hnen Khong hna haiwisa, ke ca ha biju
huliwa, ka habe,
7 Hnödra hnahic at ka ohia anyidra ta je
hulö,
K' ame tube anyidra ta je monu.
8 Hnahic hnen at ame ca ha Than a ga
monu but.
9 Haba hnahic eang, me hnân hobi káu
peritom, k' ame ne hobi káu minya ca peri-
tom ? anyin a haingöta, ka habe, Adre me
háiâ labageju anyi Aberahama me hwakecin
ae wisa bi. 10 Ke adre ma kâmâú he ka
ha e ? hawa hnyi anyin peritom, hawa hnyi
anyin ca peritom ? Ca hnyi peritom, ke so
bi hnyi ca peritom : 11 ke e ame kap haten,
wale peritom, hnân bi haten hwakecin ae
wisa, a anyin labageju k' adre tiga ca peri-
tomonâ : me me he ka kamen tavat hia
adre me labageju, k' adre ne ca peritomoni
ödra, m' adre me háiâ hwakecin ae wisa
ködra ; 12 ke e kamen peritom minya ka
tavat adre peritomoni ödra, ke hnyat minya
adre me he hnyi hwadeny hnyeúcan laba-
geju anyi Aberahama a kamöta, k' ödra
tiga ca peritomonâ bi. 13 Anyin adre ca
habânâ bi kö Aberahama me je mátrániny
a g' ame he ka hu hmeledrany me hwaje-
khon, únyi ge hnanyibu, ke so bi únyi ge
hwakecin ae wisa hnyi labageju. 14 Anyin
a ne hwöhwaban hnen tavat a ödra hnyi
hnanyibu, awe, e únyi baú bi labageju, k'
ame ca ömanâ minya hna ha bánâ : 15
anyin a haba hnanyibu ame öküâ hmönyin ;

anyin ame ne ba hnanyibu, me ba minya hna hanyâûâ. 16 Anyin a wale me ûnyi hnyi labageju, me me he ka hoton ibetengiö baû; me me tethmâ hna ha bânâ hobi kâu je mâtrân hia; ca hake ködra hnyi hnanyibu thibi, ke ködra minya hnyi labageju anyi Aberahama, waleji a kamöta hia thithö, 17 (helâ me hna sihnalimen, ka habe, Oge hia but wiö u hnân kamen ta je hnyei ae se hia) hnyi hnyimakan Khong, at ame omelö hmetu thö tavat adre mokcu, me hâîâ ta je ûnyi ae ba, helâke me e but ang. 18 Waleji ae ba hnân gejon unyin, ke e ame labageju me gejon a e ame he ka kamen ta je hnyei ae se hia, hoton hna ha, ka habe, Ame he ka helâe je mâtrânâm. 19 Ke ca sēnyin bi anyin labageju, k' ame ûnykûme bi unyin ae meleca thö walang ang (helâke me wan haded je hunainy) me tangen hnöku ga Sara ae meleca minya but: 20 eke, e ame ca loloâ me ca labageju, k' ame wâ hmâ hna ha bânâ hnen Khong, ke e hwege bi ûnyi ge labageju, k' ume ogânâ Khong, 21 ame ûnykûme hmâ a e khana he ka ohwâdâ hnen hna ha bânâ. 22 Wale me me ha e kâu hnân hwakecin ae wisa. 23 Ke adre ca sihnalimen hobi kâu e thibi, a g' adre ha ûnyi e hobi kâu e thibi; 24 ke hobi köta minya, wale adre me he ka ha ûnyi eling köta, ate ne labageju kâu, waleji at a omeli Iesu a Tuhöta hmetn thö ûheny hnyi hna mok, 25 waleji at adre hna but can anyita ta je hulö, ke adre omelö hmetu thö e hnân he ka haiwis' öta.

HNYIMAKAN 5.

ANYIN a wale, adre me haiwis' öta hnen labageju, ke so ate me úsoköu me Khong a deny Tuhöta Iesu Keriso; 2 a deny e adre hia but hn' öta ûnyi ge labageju ka hnyi ibetengiö baû eang ate me tot hnyin; ke so ate me senyin me gejon hmananginy Khong. 3 Ke ca walang thibi, ke so ate me senyin minya hnyi anyita je vec: anyin ae khan' öta a g' ame okûâ hokhnyok ûnyi ge vec; 4 ke haba hokhnyok ame ökûâ wâhmakhmetoâ; ke haba wâhmakhmeto ame ökûâ gejon: 5 ke haba gejon ame ca ohmehma bi; anyin adre hia but hingâlâ ka hnyi je hnyekuta ibetengiö anyin Khong ûnyi ge Hanu Kap waleji adre ham köta. 6 Ke hnyi ûen a öta tiga sēnyin, me ame mokcu Keriso, hnyi ûen ae ûcü, hobi kâu tavat ae kong. 7 Anyin a helâke e pason ka ke at he ka mok me

hwaban at ae wisa hwakecin: ke so bi ame ne hu la ke at ae hwege he ka mok hnân hwaban at ae so. 8 Ke Khong ame omanenâ kötä anyin ibetengiö, anyin ame mok Keriso me hnân hwab' öta ke öta tiga monu. 9 Ke walang ang adre me haiwis' öta ûnyi ge dreney, awe, adre me he ka ti omeli öta minya ûnyi gan hnyi hmönyin. 10 Anyin a ne úsoköu öta me Khong ûnyi ge mok anyin Nokon, waleji k' öta tiga iwahnai-hmiöny, me e gan hmâ hna he ka omeli öta hnen anyin möt, k' ate me úsoköu mē. 11 Ke ca hake wale thibi ang, ke ate me senyin ka Khong ûnyi ge Tuhöta Iesu Keriso, wale ate me kap úsoköu ûnyi gan.

12 Anyin a wale, ame o but hulö ka hnyi hmeledrany ûnyi ge at a khaca, k' ame o mok can hulö; ke ame o but mok ka tavat hia, anyin ae monu hia:—13 anyin e hu hulö hnyi hmeledrany ke ne o but ame o hnanyibu: ke adre me ca he ka ha hulö, e ka ba hnanyibu. 14 Ke so bi, ame dökhuk mok hwân ga Adamu ke ne o but kö Mose, hon tavat ae ca monu helâ me hna hanyâûâ ga Adamu, waleji ame ûöhüco at ame he ka o. 15 Ke ca tha ûcü bi hna hanyâûâ me hna ham bâûâ. Anyin ame ne mok ut tavat ae se hia ûnyi ge monu anyin at a khaca, awe, ame he ka ti si ibetengiö baû anyin Khong, me hna ham hnen ibetengiö baû anyin at a khaca, Iesu Keriso, ka tavat ae se hia. 16 Ke ca tha ûcü bi hna ham bâûâ me at a khaca ame ânyâ hulö: anyin ame o but hna bi hwaban ûnyi ge monu a khaca ka hnyi hnaûhangö, ðnyin ame o but hna ham bâûâ ûnyi ge je monu ae se hia ka hnyi hna haiwisa. 17 Anyin a ne ûnyi ge monu anyin at a khaca, ame dökhuk mok ûnyi ge at a khaca; awe, e nua bi hnödra hna he ka dokhu hnyi möt ûnyi ge at a khaca, a Iesu Keriso, wale tavat ae hu gan hmâ ködra ibetengiö baû, me bwihlanyiny hwakecin ae wisa. 18 Anyin adre me ohnaûhangöâ tavat ae se hia ûnyi ge monu a khaca; helâe minya ame o bwihlany ka tavat hia ame haiwis' ödra m' adre me möt ûnyi ge hwakecin ae wisa a khaca. 19 Anyin ae kong ut tavat ae se hia ûnyi ge ca úling anyin at a khaca, helâe minya adre me he ka haiwisa tavat ae se hia hnen úling anyin at a khaca. 20 Ke ame o but minya hnanyibu, me ame se hia but monu; ke haba dok ame gan monu hnyin, me wale gan hmâ but ibetengiö baû: 21 ke haba hulö ame musik ka hnyi mok, me helâe

ame he ibetengiö baú ka musi hnen hwakecin ae wisa ka hnyi möt ame ca ba balua, a deny Iesu Keriso a Tuhöta.

HNYIMAKAN 6.

A NYIN a wale ieú ate me he ka ha? Hawa, ate me he bala ka laba hnyi hulö, me me gan hmâ but ibetengiö baú? 2 Ohe. Öta tavat a mok ka hnyi hulö, k' ate me he ka kâmâu he ka möt bala hnyin? 3 Hawa, e ca khan' öbun a haba öta hia tavat adre me bapataisoâ kö Iesu Keriso, me adre me bapataiso ka hnyi anyin mök? 4 Anyin a wale adre me tha könim öta më hnen hna bapataiso ka hnyi mok: m' ate me he ka vheno möt ae teb únyi, helâ me adre me otilâ Keriso únyi hnyi hna mok hnen hmanenanginy Kamen. 5 Anyin a ne tha öta me hnyi úhóucú me anyin mok, ate me he bi ka helâe minya hnyi möt hmetu; 6 ke khan' öta a g' adre me tha osatauroâ më bonguta ehac, me me hia but unyin ae hulö, m' ate me ca he ka bâ ge hulö; 7 anyin adre me ca hâiâ at a mokcu a e at hulö. 8 Ke öta ka tha mok me Keriso, me ate me labageju a g' ate me he ka tha möt minya më; 9 e khan' öta a ga möt hmetu thö Keriso únyi hnyi hna mok, k' ame ca he hmetu ka mok; k' ame ca he hmetu mok ka ton. 10 Anyin a haba mekiny, me ame okhaca mok ka hnyi hulö: ke haba anyin möt, me ame möt bi ka Khong. 11 Helâe minya, únykúme ju öbun a öbun e mok ka hnyi hulö, k' öbun e möt bi ka Khong ga Iesu Kerisö.

12 Anyin a wale e so e ca he ka dökhu hulö hnyi je unyibun ame he ka mok, wale he ka löng hoton je weny e: 13 ke haba khaca, ca he ka hna je ong outhunyibun ka hnyi hulö hnân omjehen hwakecin ae ca wisa bi; ke ka hn' öbun dut ka Khong, helâ me tavat adre me möt hmetu thö úhedra hnyi hna mok, me je outhunyibun hnân omjehen hwakecin ae wisa ka Khong. 14 Ke ame ca he hulö ka musi öbun bi; anyin a ca öbun bi hmelen hnanyibu ke hmelen bi ibetengiö baú.

15 Ama hawa? ate me he ka ányâ hulö anyin a ca öta bi hnyi hmelen hnanyibu, ke hmelen bi ibetengiö baú? Ohe. 16 E ca khan' öbun, a haba at öbun e ka hn' öbun kâu he ka bi athnyabainy me löng hoton me je lathnyabainy jut öbun ka at öbun e löng kâu; ame ne hulö, ka hnyi mok, k' ame ne úling, ka hnyi hwakecin ae

wisa? 17 Ke oleâ ju ka Khong, anyin a öbun e bi athnyabainy hulö ehac, ke walang ang öbun e löng ge hnyekubun hoton tulutiny hofuc adre me hn' öbun ka hnyin; 18 ke adre me hna baú' öbun bi únyi hnyi hulö, m' öbun e bi athnyabainy hwakecin ae wisa. 19 Inya oge me ha helâ me bongon at, anyin ae sényin je unyibun: anyin a öbun e hna je outhunyibun he ka bi athnyabainy hwakecin ae ikiki ehac me hulö, he ka ányâ hulö; ke walang ang e so öbun e hna but helâe je outhunyibun he ka bi athnyabainy hwakecin ae wisa me hwakecin ae kap. 20 Anyin a öbun e tiga lathnyabainy hulö ehac, me adre me hna baú' öbun hnyi hwakecin ae wisa. 21 Ke ieú wan ae hu köbun ehac hnyi ta je únyi öbun e hmehman walang ang? anyin a haba obiny ta je únyi eling, me mok. 22 Ke walang ang adre me hna baú' öbun únyi hnyi hulö, k' öbun e bi athnyabainy Khong, me hu but gabun wan ka hnyi hwakecin ae kap, ke haba obiny me möt ame ca ba balua. 23 Anyin a haba hwabab hulö, me mok; ke haba bwihlany a ham bâúâ hnen Khong, me möt ame ca ba balua, únyi ga Iesu Keriso a Tuhöta.

HNYIMAKAN 7.

H NYAT me lakeiny lö, e ca khan' öbun (anyin a inya oge me ha ka tavat ae khan' ödra wia hnanyibu,) a g' ame musö at hnen hnanyibu hnyi üen anyin möt hia? 2 Anyin a haba momo ae hu áiân ame ca thö hnen hnanyibu ka áiân ke tiga möt áiân a бага; ke e ka mokcu бага, me adre me thang ut momo únyi hnyi hnanyibu ge бага. 3 Anyin a wale a ne tha e momo me ke бага bi, ke tiga möt áiân, me adre me he ka hâiâ momo eling a e at bi únyi monu: ke e ka mokcu áiân, me únyi baú but hnyi hnanyibu, waleling me me ca at bi únyi monu hmetu bi, e ka he ka ihok me ke бага. 4 Hnyat me lakeiny mönya lö, helâe minya öbun, öbun e mok ut ka hnyi hnanyibu hnen unyin Keriso; me öbun e he ka ihok me ke at, waleji adre omelö hmetu úheny hnyi hna mok, mate me he ka wa wan ka Khong. 5 Anyin a tiga öta bi hnyi unyin, haba ta je weny ae kong únyi hnyi hnanyibu ame huliwa hnyi je outhunyita he ka wa wan ka hnyi mok. 6 Ke walang ang adre hia but thöng öta únyi hnyi hnanyibu, ke ate hia but mok ka únyi waleji ame köt öta; mate me bi

athnyabainy hnen hanu a teb ûnyi, ke ca hnen bi tusi adrem.

7 Anyin a wale ieû ate me he ka ha? E monu hnanyibu? Ohe. Ke so bi a ne ba hnanyibu m' oge me ne ca he ka wâ ûnykûme hulö: a ne ca ha bi hnanyibu, ka habe, U ca behnyekon, me ca khanö nya bi behnyekon: 8 ke haba hulö ame heleû ûen, me ame okûâ eû hnyi hnyekuk ûnyi ge hnanyibu je behnyekon hia: anyin a mok ut hulö e ka ba hnanyibu. 9 Iny möt ehac ke tiga ba hnanyibu, ke ame o but hnanyibu, me ame möt dö hulö, ke oge mok ut; 10 ke haba hnanyibu a hnân omeli, oge me wâ a hnân mekiny: 11 anyin a haba hulö, ame heleû ûen, me ame iyawö nya hnyi hnanyibu, me hlingö nya ûnyi gan. 12 Awe, e kap hnanyibu, me e kap hna hûna, me wisa, me so. 13 Hawa, hnân mekiny kõnya ûnyi ae so? Ohe, ke haba hulö, me me manen dut a e hulö bi, ame okûâ mok kõnya hnen ûnyi ae so:—me me ti kong gan hmâ hulö hnen hnanyibu. 14 Anyin ae khan' öta a haba hnanyibu me hanen hanu: ke iny aten bi nya unyin, adre úcö nya ka hnyi hulö. 15 Anyin a haba hnök hna ânyâ, me ca khanö nya: anyin oge me ca ânyâ ûnyi oge me wek he ka ânyâ; ke oge me ânyâ ûnyi ogè me hûkotiâ bi. 16 Ke oge ne ânyâ ûnyi oge me ca wek, oge me ogâ hnanyibu a e so. 17 Waleling me me ca inya hmetu bi at ame ânyâ e, ke so bi hulö wale at ame laba eû hnyi hnyik. 18 Anyin ae khanö nya ae ba ke unyi ae so ame laba eû hnyi hnyik, wale hnyi unyik: anyin ae lu gak wek, ke ba manik man he ka ânyâ so. 19 Anyin oge me ca ânyâ ûnyi ae so a wek bi, ke oge me ânyâ bi hulö wale oge me ca wek. 20 Ke oge ne ânyâ ûnyi oge me ca wek, awe, ca inya hmetu bi at ame ânyâ, ke so bi hulö, at ame laba eû hnyi hnyik. 21 Waleling m' inye wâ hnanyibu ang, a e ka wek bi he ka mâdrâ so, me tha e mönya bi monu. 22 Anyin oge me senyina hnanyibu anyin Khong ûnyi ge at eû hnyi hnyik: 23 ke oge me wâ ke hnanyibu minya bi hnyi je outhunyk, k' ame vat me hnanyibu eû hnyi hnyekuk, k' ame hwenbö nya ka hnyi hnanyibuiny hulö, at ame laba hnyi je outhunyk. 24 Ekölö gak, iny at ae kong ut! ie at ame he ka hûgúnö nya ûnyi hnyi unyin eang ae mok? 25 Inya oge me ole ka Khong deny Iesu Keriso a Tuhöta. Waleling m' inye bi athnyabainy hnanyibu anyin Khong ge

hnyekuk: ke hnanyibu anyin hulö ge unyik.

HNYIMAKAN 8.

A NYIN a wale, e ba hmetu hnaûhangö ködra unyin Keriso Iesu. 2 Anyin a haba hnanyibuiny Hanu me möt unyin Keriso Iesu, me ame hnö nya ûnyi hnyi hnanyibuiny hulö me mok. 3 Anyin a haba ûnyi ae pason ka hnanyibu, can ae sényin ûnyi ge unyin, me haba Khong ame kunâ hing Nokon, helâ unyin ae kong, ke hnân hudiny hulö, me me ohnaûhangöâ hulö ûnyi hnyi unyin: 4 me me hwädâ but ûnyi gata hna hûna hnyi hnanyibu, öta tavat ate me ca hnu hoton unyin ke so bi hanu. 5 Anyin a haba tavat adre me hnu hoton unyin adre me hnyokâ ta je ûnyi hnyi unyin; ke haba tavat adre me hnu hoton hanu adre me hnyok ka ta je ûnyi anyin hanu. 6 Anyin a haba behnyok ka unyin, me, wale mok; ke haba behnyok ka hanu, me, wale möt, me hnahic: 7 anyin a iwahnaihmiöny me Khong he ka hnyok ka unyin; anyin ame ca löng bi hoton hnanyibu anyin Khong, anyin ae ca khana bi: 8 ke haba tavat hnyi unyin, me ca khan' ödra bi he ka osenyinâ Khong. 9 Ke öbun ca aten bi unyin, ke ta je aten bi hanu, a ne eû hnyi hnyibun Hanon Khong. Ke a ne ca hu bi ge ke at Hanon Keriso, ca aten bi at eling. 10 Ke a ne eû hnyi hnyibun Keriso, a mokut unyin bi can hulö; ke möt bi hanu can hwakecin ae wisa. 11 Ke a ne laba eû hnyi hnyibun Hanon at ame omeli Iesu hmetu ûnyi hnyi hna mok, ame he minya at ame omeli Keriso Iesu ûnyi hnyi hna mok, ka omelö ta je unyibun ae bobot ûnyi ge Hanon, at ame laba eû hnyi hnyibun.

12 Hnyat me lakeiny lö, anyin a wale hanymöta he ka bi hwaban, ca ka hnyi unyin bi, mate me he ka möt hoton unyin: 13 anyin a öbun e ne möt hoton unyin, hamöbun he ka mok; ke öbun e ne hlingâ ta je huliwa hnyi unyin ge hanu, öbun e he ka möt. 14 Anyin a haba tavat ame su ödra Hanon Khong, me ödra thibi e je lakon Khong. 15 Anyin a öbun e ca kap hanon hwenbâ m' öbun e he ka ot; ke so bi öbun e kap hanon hna wia me me lakon, wale m' ate me ha, ka habe, Aba, Cica. 16 Haba Hanu ame ka tha ohnathöa me je hanuta, a öta je lakon Khong: 17 ke a ne lakon, me ame he ka je mâtrân bi; wale

je mâtâniny Khong, ke tha je mâtân me Keriso : ate ne tha vec mē, mate me he ka tha hmanenang mē.

18 Anyin a inya oge me wâ, ae ca úcú ta je vec hnyi úen ang, he ka óucoá hnabic adre me he ka omanená kôta. 19 Anyin a haba hmeledrany ame halubahingen me ti weny gan hmâ hna omanená lakon Khong. 20 Anyin adre hwenbâ hmeledrany ka hnyi únyi ae ca únyi hnathu, ca únyi ge weny, ke hnen bi e at ame hom hwenbâ, 21 me gejon a g' adre me he ka hna hmeledrany únyi hnyi hwenbâ ae bobot, ka hnyi hna hna bâúâ anyin lakon Khong. 22 Anyin ae khan' óta a g' ame mâng me vec hmeledrany hia ke ne o but hnyi bong ang. 23 Ke ca hake e, ke óta minya hnyat ae hu gata wan a bân anyin Hanu, haba óta ate me mâng minya eú hnyi je hnyekuta, me halubahingen he ka wia me me lakon, wale hna omelö ta je unyita. 24 Anyin adre me omeli óta únyi ge geju : ke haba geju ae manen me ca geju bi eling : anyin a ie at ame gejon únyi e ame wâ? 25 Ke ate ne gejon hnöta hna ca wâ, ate me halubahingen e me hokhnyok.

26 Helâe minya ame hadruâ anyita sēnyin hnen Hanu : anyin ae ca khan' óta wia bongon he ka hic ; ke hnen Hanu hna sumat hobi kôta hnyi mâng ae ca hnân ha bi ; 27 ke haba at ame elâm ta je hnyok, me e ame wâ únykúmanen Hanu, anyin a e ame sumat hobi kâu tavat ae kap hoton weny Khong. 28 Ke e khan' óta a g' ame tha huliwa ta je únyi hia me me so ka tavat adre me hnyok ka Khong wale tavat ame haw' ödra helâ me hnen hna únykúme. 29 Anyin a haba tavat waleji e ame wâhmakhmetu ödra, me e ame ip ödra minya he ka tha bongudra me tulutiny Nokon, me me atö bi e unyin je liamekeiny ae se hia : 30 ke haba hnyat e ame okabâ adrem, me e ame haw' ödra bi : ke haba tavat e ame haw' ödra, me e ame haiwis' ödra bi ; ke haba tavat e ame haiwis' ödra, me e ame ohmanenangi ödra bi.

31 Ieú ate me he ka ha hnyi ta je únyi e? A ne tha hien m' óta Khong, ia úcúta? 32 Hawa, ame ca he ka ham bâúâ kôta ta je únyi hia, hnen at ame ca behánâ Nokon, k' ame hna but e hobi kôta hia? 33 Ie at ame he ka bi fuco hna úca hnen Khong? Haba Khong thibi at ame haiwisa ; 34 ke ie at ame he ka ohnâhangöâ? Hamen Keriso, at ame mok me möt hmetu úheny hnyi hna mok, e but hnyi ke keihen metân

Khong, k' ame khöú hobi kôta. 35 Ie at ame he ka óúsákâú óta me ibetengiö anyin Keriso? hawa, vec, hlöuhlöu, hna seda, hmiâ, he thu, outen mok, hele vat? 36 Helâ me hna sihnalimen, ka habe,

Adre me hling' öhmun hnyi ta je bong can u ;

Adre me öúcú öhmun me ta je mamoe hnân hlingâ.

37 Ohe, e tuta balua hon ta je únyi hia eling únyi ge at ame betenge gata. 38 Anyin ae mou thö eú hnyi hnyekuk, ae ca khana bi mok, me möt, me ta je angela. me tavat musu, me ta je únyi walang, me ta je únyi ame he ka o, me ta je man, 39 me dok ae görany, me dok ae dit, me ke únyi adre hia but op, e ca khana ta je únyi e he ka óúsákâú óta me ibetengiö anyin Khong unyi Keriso Iesu a Tuhöta.

HNYIMAKAN 9.

INYA oge me ha hnathu únyi hnyi Keriso, oge me ca thoi bi, ame ohnathu nya hnen anyik únykúme sah únyi hnyi Hanu Kap, 2 ka habe, iny vec gan hmâ, ke hlöuhlöu bala bi hnyekuk. 3 Anyin a helâke oge me wek la, a g' adre me he ka ovesei nya me Keriso can je liamekeiny mönya, wale je lahanök hoton unyin : 4 ödra at Isaraela ; wale adre me wia me me lakon, me e hu gadra hmanenang, me ta je úhinyökou, me hna hanu hnanyibu, me hmi, me je hna ha bânâ : 5 ödra je mâtâniny ta je lakamöta, helâe minya Keriso hoton unyin, e nua hon ta je únyi hia thithö, Khong adre haisöä nyiele balua. Amen. 6 Ke ca helâke ame únyi baú hofuc hwan Khong. Anyin a ca tavat Isaraela hia bi ödra hnyi Isaraela : 7 ke ca je lakon hia anyin a je mâtân Aberahama ödra : ke so bi, Adre me he ka ha je mâtânâm únyi ga Isaaka. 8 Walang bongon, a haba je lakon unyin, me ca je lakon Khong bi ödra ; ke haba je lakon hna ha bânâ, me, adre me ha wale je mâtân. 9 Anyin a walang hofuc adre ha bânâ, ka habe, Hnyi úen ang bi, oge me he ka o, ke ame he ka hu da nöku Sara. 10 Ke ca wale thibe e ; a erkin dut Rebeke hnen ke at, wale Isaaka a kamöta—11 ke tiga ca hnokoâ bi, ke ba minya so me hulö ödra me ányâ, haba me me tethmâ ju hna únykúme hnen Khong hoton hnen hna úca, e únyi ge huliwa, ke únyi bi gan at ame hawâ, 12 me adre me ha ka momo, ka

habe, Ame he atö ka bi athnyabainy wake-
iat 13 Helâ me hna sihnalimen, ka habe,
Oge me betenge ga Jekob, k' iny hukötiö
Esau.

14 Anyin a wale, ieü ate me he ka ha?
Hawa e hu unyin Khong hwakecin ae ca
wisa bi? Ohe. 15 Anyin a e ame ha kö
Mose, ka habe, Oge me he ka betenge ge
hnök hna wek he ka betenge gan, ke
oge me he ka vec betenge ge at oge me
wek he ka vec betenge gan. 16 Waleling
me me ca ûnyi gan bi at ame weny,
ke ca ûnyi minya ge at ame wadring,
ke ûnyi bi ge Khong, at ae betenge. 17
Anyin a haingen hna sihnalimen kö Farao,
ka habe, Can thibi eling oge me otölö u,
me inye he ka omanenâ manik man ûnyi
gam, me me lung iök bi hnyi hmeledrany
hia. 18 Awe, e ame betenge ge at e ame
betenge gan, ke e ame onâkâ at e ame
beonâkâ kâu.

19 Ke u me he la ka ha kõnya, ka habe,
Ieü gan a e ame û? Ke ie at ame hagutâ
weny bi? 20 Ohe, at lö, u ia u me ivinö
me Khong? Hawa, ame he ûnyi adre op
ka ha ka at ame op e, ka habe, Ieü gam u
me up nya helâng. 21 Hawa ge at ame
op kaia kânâ, e ame ca musi ka kânâ, he
ka op utkaia ae so, ame ne utkaia ae kong
bi? 22 A ne beomanenâ tang hmönyin
Khong, me ölungâ maniny man, me ame
hokhnyokâ beü hmâ ta je utkaiainy hmö-
nyin waleji adre penapena hobi kâu hnaû-
hangö: 23 me me he ka omanenâ ûnyi
hnathuiny anyin hmanenang ka ta je ut-
kainy ibetengiö, waleji e ame penapena
hnân hobi kâu hmanenang, 24 wale öta,
hnyat e ame haw' öta minya, a ca hake at
Juda thibi, ke Aten minya bi ta je hnyei?
25 Helâ me hnen hna ha hnyi Hosea, ka
habe,

Oge me he ka haw' ödra, me lakeik,
waleji a ca lakeik;

Ke oûnykûmik, waleji a ca oûnykûmik
bi.

26 Ke haba hnyi dok adre me ha ködra, ka
habe, Ca latök bi öbun,

Me adre me he ka hai ödra eling, ka
habe, Je lakon Khong ae möt balua.

27 Ke haba Isaia ame hâiâ at Isaraela, ka
habe, A ne helâ me önyin köiö úseiny at
Isaraela, me adre me he ka omelö kolon:
28 anyin a Than ame he ka ânyâ hnen
hna ha eang hmeledrany k' ame he ka
oumo me okhulitâ e. 29 Helâ me hna ha
ehac ga Isaia, ka habe,

A ne ca hna but ke kolon gata hnen
Than tuhan sabaoth,
Me ate me ne he ka helâ me Sodoma, me
wi' öta e me ûcü me Gomora.

30 Anyin a wale, ieü ate me he ka ha?
A g' ame hu hwakecin ae wisa ge Aten ta je
hnyei, waleji adre me ca hnu hoton hwake-
cin ae wisa, wale a hwakecin ae wisa hoton
labageju: 31 ke haba at Isaraela adre me
hnu hoton hnanyibuiny hwakecin ae wisa,
ke adre me ca o bi ka hnyi hnanyibu eling:
32 Anyin a ieü? Anyin adre me ca elâm
e hnyi labageju, ke helâke me hnen huliwa.
Adre me thö hnyi veto hnân othöâ; 33
helâ me hna sihnalimen, ka habe,

Wâ bi, inya oge me ip hnyi Ziona veto
hnân othöâ me kic hnân ööo:

Ke ame ca he bi ka hmehma at ame
labageju kâu.

HNyimakan 10.

HNYAT me lakeiny lö, haba weny
hnyekuk me hijik hic ka Khong
hobi ködra, m' adre me he ka möt. 2 An-
yin a oge me ohnathöâ gadra a ödra tavat
hwege huliwa ka Khong, ke ca hoton bi
metâ. 3 Anyin ae ca khan' ödra hwakecin
ae wisa anyin Khong, ke adre me elâm he
ka otethmä hwakecidra bi ae wisa, me adre
me ca löng bi hoton hwakecin ae wisa anyin
Khong. 4 Anyin a Keriso obiny hnanyibu
hobi kâu hwakecin ae wisa ködra hia adre
me labageju. 5 Anyin a Mose ame sihnal-
imen a haba at ame ânyâ hwakecin ae wisa
ûnyi hnyi hnanyibu, me ame he ka möt
hnen e. 6 Ke haba hwakecin ae wisa
ûnyi hnyi labageju ame ha helâng, ka
habe, ca ha bi eü hnyi hnyekom, ka habe,
Ie at ame he ka ölö hnyidranyai? (wale
he ka hum Keriso but:) 7 ke, Ie at ame he
ka utut ka hnyi dok ae dit? (wale he ka
hum Keriso hmetu thö úheny hnyi hna
mok.) 8 Ke ieü ame ha? walang, E
hakekeny köu hofuc, e hnyi hnyimâm me
hnyekom; wale hofuciny labageju öhmun
e khetâ: 9 anyin a u je ne he ka hâiâ
Than Iesu ge hnyimâm, me labageju eü
hnyi hnyekom a Khong ame omelö hmetu
thö e ûnyi hnyi hna mok, awe, u me he
but ka möt: 10 anyin a hnyok at ame
labageju ke ne o but hnyi hwakecin ae wisa;
ke hnyem at ame ha ke ne o but hnyi möt.
11 Anyin a haingen hna sihnalimen, ka
habe, Ame ca he ka hmehma at ame laba-
geju kâu. 12 Anyin a ca ke bongon bi at

Juda me at Heleni: anyin a khaca thibi Tuhan hia, at ae tren ta je únyi hobi káu tavat hia adre me hawá e: 13 anyin adre me ha, Ame he ka möt hia tavat adre me hawá ien Than. 14 Ke adre me he ka kâmâu ka hawá e, k' adre me ca labageju káu? ke adre me he ka kâmâu ka labageju káu, k' adre me ca löng? ke adre me he ka kâmâu ka löng, ke ba at ame khetâ? 15 ke adre me he ka kâmâu ka khet, k' adre me ca kun' ödra bi? helâ me hna sihnalimen, ka habe, Shaiba ge soiny je li cadra adre me hom je úthumetu ae so önyen!

16 Ke adre me ca löng hia hoton úthumetu ae so. Anyin a haingö Isaia, ka habe, Than lö, ia ame kap anyihmun úthumetu? 17 Awe, adre me labageju únyi hnyi hna löng, ke adre me löng únyi hnyi hofuc hwan Keriso. 18 Ke inya oge me ha, ka habe, Adre me ca löng? Eke, e hnathu,

Ame he but ifucidra ka hnyi hmele-drany hia,

Ke hodra ta je hofuc ka hnyi je can hmele-drany.

19 Ke inya oge me ha, ka habe, Hawa e ca khana at Isaraela? A bö Mose ka ha, ka habe,

Oge me he ka oihunyinköu öbun ge tavat a ca hnyi hnathu bi,

Oge me he ka ohmönyini öbun ge hnyi ae monu bi.

20 Ke hwege Isaia me haingen, ka habe, Ame ö nya hnen tavat adre me ca elöm nya;

Ke oge me manen dut ka tavat adre me ca hnei nya bi.

21 Ke e ame háia at Isaraela, ka habe, Oge me lau li hnyamök hnyi je bong ka tavat adre me ca úling, a tavat ivinoâ.

HNYIMAKAN 11.

ANYIN a wale, inya oge me ha, ka habe, Hawa, a hia but Khong degec lakeiny? Ohe. Anyin a inya at Isaraela minya, únyi hnyi mátrâni Aberahama, ke hanen tribu Beniamina. 2 A ca degec bi Khong lakeiny waleji e ame wâhmakhmeto ohac. Ke ca khan' öbun hna ha hnen tusi ga Elia? waleji e ame khöü ka Khong ge at Isaraela, ka habe, 3 Than lö, adre hia but hlingâ ânyâm je perofeta, me tho degecâ ânyâm je taben hut: ke hake inya thiju kolon, ke adre me elöm nya he ka

hlingö nya. 4 Ke ieü hna thu káu hnen Khong? walang, Oge me ip biju hobi kõnya tavat a seven thauzan, waleji adre me ca hnyi cibouca kö Baala. 5 Ke helâe minya walang ang, e hu wan hoton hna úca hnen ibetengiö baü. 6 Ke a ne hnen ibetengiö baü, awe, ca hnen bi huliwa: a ne ca helâe, me ca ibetengiö baü hmetu bi ibetengiö baü. 7 Ke ieü hmetu? E ca hu ge at Isaraela hnödra hna elâm: ke e hu bi ge tavat adre úca, ke adre onâkâ keihen: 8 helâ me hna sihnalimen, ka habe, Khong ame ham ködra hnyok ae bemokut, me je ecmak ame ca bwela bi, me je hnyiköny adre me ca löng, ke ne o but hnyi bong ang.

9 Ke haingö Davita, ka habe,

E so ame wia anyidra laulau me hnân hnewe me offic,

Me hnân othöâ me hnân bi hwaban ködra:

10 E so adre me ölidrá je emaködra, madre me ca bwela bi,

Me onomâ bala ju je judra.

11 Inya oge me ha, ka habe, Hawa, adre me thö me me ü but? Ohe: ke haba hnyi ta a ödra me ame o but úhömeli ka Aten ta je hnyi hnân oihunyinköu ödra. 12 Ke a ne tang omjehen dut hmele-drany ta a ödra, me tang omjehen dut Aten ta je hnyi hna otheduoci ödra; hawa, ame ca he ka ti gan hmâ anyidra hnahic?

13 Ke oge me ha köbun Aten ta je hnyi. Ke anyin a inya ang aposetoloiny Aten ta je hnyi, me inya oge me ogânâ hanymök: 14 me heleü deny he ka oihunyinköuâ lahanök, me omelö keihen gadra a ne khana. 15 Ke a ne hu ge hmele-drany úsoköu hnyi hna digic ödra, ame he ka hu ieü hnyi hna he ka kap hmetu? ca möt bi únyi hnyi hna mok? 16 Anyin a ne kap wan a bán, ame he ka helâe hia: ke a ne kap iwân ame he ka helâe minya je anginy. 17 Ke adre ne thu degecâ but ke je anginy, ke u elaioiny hnyot adre úhújáköuâ anyidra, ke u me tha hu mödrin iwân me dân elaio; 18 u ma ca bi gan bi ka ta je vheiny: ke u je ne bi gan, me ame ca möt iwân únyi gam, ke u bu u möt únyi ge iwân. 19 U je ne ha, ka habe, Adre me subâ degecâ je angin m' adre me úhújáköuö nya bi. 20 Eke, adre subâ degeci ödra únyi hnyi ca labageju, ke u je tethmâ únyi hnyi ânyâm labageju. Ca bi gan, ke ot ju: 21 anyin a ne ca betenge Khong ge je hing vheiny, me ame ne ca he minya ka betenge gam. 22 Anyin a wale,

wá bi betenge me hmönyin anyin Khong : hmönyin ka tavat adre me kölu ; ke betenge anyin Khong köu, u je ne tethmä hnyi anyin ibetengiö : ke e ka ba, me adre me he ka subá degeci u minya bi. 23 Ke adre me he minya bi ka úhújaköu ödra wale adre me ca tethmä hnyi ca labageju : anyin ae khana Khong he ka úhújaköu ödra hmetu. 24 Anyin adre ne subö u únyi hnyi elaiö a kú hwege hnyi hnyot, ke adre me úhújaköuö u hnyi hing elaiö ke ca bongon bi úö : hawa, adre me ca he ka úhújaköu ödra hia ta je hing vheiny hnyi anyidra bi elaiö ?

25 Hnyat me lakeiny lö, oge me wek e me khan' öbun únyi eang ae iyong, wá öbun nye bemetá hnen je únykúmenöbun, a g' adre hia but onáká keihen tavat Isaraela, ke ne o but ame o hnahic ka Aten ta je hnyei ; 26 m' adre me he ka omelö at Isaraela hia thithö ; helá me hna sihnalimen, ka habe,

Ame he ka o At úhömeli úheny Ziona ;
Ke ame he ka ohia hwakecin ae kong
unyi Jakob :

27 Ke wale hnök hna úhibinyköu mödra,
Iny ka he ka hom degecá anyidra
hulö.

28 Je iwahnaihmiöny ödra me úthumetu
ae so, can öbun : ke haba hnyi hna úca at,
me adre me betenge ködra can lakamen.
29 Anyiname ca ietra Khong ge hnen hna
ham, me hnen hna hawá. 30 Anyin a
öbun e ca löng hoton Khong ehac, ke
walang ang adre me betenge gabun únyi
hnyi hnödra hna ca löng hoton, 31 haba
ödra, me adre me ca löng hoton walang
ang, m' adre me he ka betenge gadra
minya bi, helá me hna betenge köbun. 32
Anyin a tha hna Khong tavat hia thithö
ka hnyi hna ca löng hoton, me me he bi ka
betenge ge tavat hia thithö.

33 Shaiba ge údiliny metá ae nua me wá
únykúme anyin Khong ! e iyong hmönyin
anyin owisa, ke ca hnán wá bi deny ta je
gethen ! 34 Anyin a ia ame wá únykúme
weny Than ? ke ie at ame tha úhnenamö
mē ? 35 ke ia a bán ka ham únyi káu, me
e ame he ka bi hwaban hmetu káu ? 36
Anyin a haba ta je únyi hia thithö, me
únyi gan, me hnen e, me hnán hobi káu, E
so he ka ogáná e nyiele balua. Amen.

HNYIMAKAN 12.

A NYIN a wale, hnyat me lakeiny lö,
inya oge me újengi öbun únyi hnyi
ibetengiö anyin Khong, möbun e he ka ham
je unyibun me hnán hut ae möt, me kap,
me so ka Khong, wale hanymöbun ae úcü.
2 Ke ca he ka tha hwakecibun me hmele-
drany : ke so he ka wi' öbun hnen ohátá
je hnyekubun, me me khan' öbun weny
Khong ae so, me hnán osenyiná, me wisa.

3 Anyin a inya oge me ha köbun hia
thithö, hnen betenge baú adre ham könya,
ka habe, ca he ke at ka únykúme ogáná e
bi hon únyi ae úcü he ka únykúme, ke
únykúme úhnyúkongoá thibi, hoton hna
khená ka ke at me ke at tulutiny labageju
hnen Khong. 4 Anyin ae hu gata je ou-
thunyun ae se hia hnyi unyin a khaca, ke
ca tha hanymen hia bi je ong outhunyun :
5 heláe minya öta, at se hia, khaca thibi
unyin unyi Keriso, ke je ong outhunyun
öta ke at ka ke at. 6 E hu but gata je
hna ham báúá ae ve bongon bi hoton ibe-
tengiö baú adre ham köta, a ne hnán ope-
rofeta, e so e ányá hoton kahmen labageju :
7 ame ne dikona, ányá thö hanymen di-
kona ; ame ne at úne, úne thö ; 8 ame ne
at khet, khetá thö : ke a ne at ame ham,
ham hnathoá thö ; at ame musi, musi wia
ju, at ame betenge, betenge thö me senyin.
9 E so betenge ke ba thoi hnyin. Ikikiá
thö únyi ae kong ; kece ju ka únyi ae so.
10 Ibetengiököu ju öbun ge ibetengiö anyin
liamekeiny ; bebán he ka ogáná ke at me
ke at ; 11 hnyi huliwa wia ke ca sēnyin
bi ; hwege ju hnyi oúnykúmbun ; athnya-
bainy dö Than : 12 senyin hnyi gejon ;
hokhnyoká ju vec ; labö hic bala ; 13 ha-
omjehen ju tavat ae kap hnyi hnödra hna
theduoc ; khenen ju he ka imetenyimwi
me ta je atkanyua. 14 Hahnahici ödra
ju waleji adre me oveci öbun ; hahnahicá,
ke ca hangá bi. 15 Tha senyin dö me
tavat adre me senyin ; tha tenge me tavat
adre me tenge. 16 Tha hnyökköuá ju öbun.
Ca únykúme bi ta je únyi ae görany, ke ca
höcö he ka vhenö ta je únyi ae hnyikáná.
Ca bemetá bi öbun hnyi je únykúmenöbun.
17 Ca bi hwaban bi monu anyin ke at ge
monu. Penapena thö ta je únyi ae úcü
hnyi hnyimakan tavat hia. 18 Laba úso-
köu me tavat hia a ne khan' öbun. 19 Je
oúnykúmik lö, ca he öbun ka bi hwaban
monu, ke nom ju ka at ae tren hmönyin :
anyin adre hia but sihnalimen, ka habe,

Haingen Than ame ha, Hamök he ka bi hwaban monu, oge me he bi nya ka bi hwaban. 20 Ke a ne mekihnânem iwa-hnaihmiöny möu, hân ju; ame ne beic, habelen: anyin a u je ne ânyâ e, me u me ûkhöünâ je walep ae möt hon ban bi. 21 Ca he ka ng' öbun ge monu, ke ngâ but monu ge so.

HNyimakan 13.

E SO ka tavat hia he ka löng hoton ta je musi ae gan: anyin ae ba ke musi a ca únyi ge Khong; haba Khong ame otílâ ta je musi ehele. 2 Anyin a wale haba at ame thu musi, me ame thu hna ötilâ hnen Khong: k' ame he ka kap hnaúhangö hnen hnyat adre me thu. 3 Anyin a haba tavat musi, me ca hnân ootâ bi at ame mádrâ so, ke so bi at ame mádrâ monu. Hawa, e wem u me ca he ka outen at ame musi? ânyâ thö hwakecin ae so, me wale únyi ame he ka haisoi u: 4 anyin a e athnyabainy Khong unyâm hobi kâu so. Ke u je ne mádrâ hwakecin ae kong, ot ju; anyin a e ame ca vaden bâúâ hele vat: anyin a e athnyabainy Khong, at ame bi hwaban ge hmönyin ka at ae kong hwakecin. 5 Anyin a wale e ti úcú köbun he ka löng hoton, ca can hmönyin thibi, ke únyi minya bi ge únykúm sah. 6 Anyin a wale öbun e bi fat minya; anyin a ödrin lathnyabainy Khong, k' ödrin e tuö bala hanymen eling. 7 Ham dö ka tavat hia anyidra ta je únyi: khüö ka at adre me khüö kâu; fat ka at adre me fat kâu, ot ka at adre me ot kâu; ogânâ at adre me ogânâ.

8 Ca hom bah únyi anyin ke at, ke so bi he ka ibetengiökou: anyin ame ohwâdá hnanyibu at ame betenge ka ke at. 9 Ke walang ka habe, U ca he ka bi únyi monu, U ca he ka úlingö, U me ca he ka venöu, U ca he ka behnyekom, ke a ne hu ke hnanyibu, wale thibi e hnyin hofuc ang, ka habe, U me he ka betenge ge at ame laba hakekenyi u helâ me u bi. 10 Haba ibetengiö, ca at ame okongoâ at ae hakekeny: anyin a wale haba ibetengiö wale at ame ohwâdá hnanyibu.

11 Ke walang ang, e khan' öta ûen, a ûen dut ang öbun e he ka hmak úhebun hnyi hna mokut: anyin ae hakekeny jut walang ang möt, ke sâkâú ehac waleji k' ate me labageju. 12 E beú hmâ but lit ke hakekeny jut lany: anyin a wale ate me he

ka hna degecâ but ta je huliwa anyin lit, ke so ate me he ka khavâ úkhaú hnân vat anyin lany. 13 E so ate me he fáfâ helâ me hnyi lany; ca hnyi walak me ic monu, ca bi únyi monu me wagelue, ca hnyi iwatretra me ihunyinköu. 14 Ke khavâ ju öbun Than Iesu Keriso, ke ca penapena bi hobi kâu unyin, he ka ohwâdá je weny e.

HNyimakan 14.

K AP dö at ae sényin hnyi labageju, ca hnân he ka iwatretra hna loloâ. 2 Anyin a únykúmenen ke at me so he ka an ta je únyi hia: ke haba ke at ae sényin ame an thibi ta je únyi a kú hnyi kânâ. 3 Ca he at ame han ka hmiân at ame ca han, ke ca he at ame hnyi han ka únykúme at ame ca hnyi han: anyin a hia but Khong kap e. 4 Anyin a u ia at ame únykúme athnyabainy ke at? e ka tethmâ, ke e ka ú bi, me hamen tuhan bi. Eke, adre me he ka otethmâ e, anyin ae khana Than he ka otethmâ e. 5 Ke haba únykúmenen ke at, me beönua ke bong hon ke bong: ke haba únykúmenen ke at, me úcú hia thibut je bong. E so he ka ve thamúâ wia hnyi je hnyekubun. 6 Haba at ame öünyihnthoâ bong, e ame öünyihnthoâ e ka Than: haba at ame han, ame han bi ka Than, anyin a e ame ole ka Khong; ke haba at ame ca han, e ame ca han ka Than, me oleâ ka Khong. 7 Anyin ae ba ke at gata ame ka möt bi kâu, ke ba ke at ame ka mok bi kâu. 8 Anyin ate ne möt, ate me möt ka Than: ke öta ka mokcu, ate me mok bi ka Than: anyin a wale ate ne möt, ke ate ne mok, je lakeiny Than bi öta. 9 Anyin a mokcu Keriso ke möt hmetu thö, me me he ka Tuhan tavat adre mokcu me tavat miny: ae möt. 10 Ieú gam u me únykúme liamekeiny möu? ke haba khaca, ieú gam u me hmiân liamekeiny möu? anyin ate me he hia ka tot hnyi hnyimakan taben owisa anyin Khong. 11 Anyin adre hia but sihnalimen, ke habe,

Haingen Than, ka habe, Kia inya inya, a g' adre me he hia ka ciboucâ kõnya K' ame he ta je bohmen hia ka ve ogânâ Khong.

12 Waleling mate me he hia ka ve h hwakecita ka Khong.

13 Anyin a wale ca he hmetu öta ka únykúmköu: ke so bi he ka únykúme únyi thibi ang, a ca he ke at ka ip hnân othoâ, ame ne ke únyi hnân ovhelâ liame-

ROMA 15.

keiny. 14 E khanö nya ke mou thö hnyi hnyekuk ga Iesu Keriso, ae ba ke únyi ame ka kong thiju : ke haba at ame únykúme ae kong ke únyi, me ka kong bi káu. 15 Ke a ne hmak hnyekon liamekeiny möu, can âm jeú, awe, u me ca vheno hmetu ibetengiö. Ca he ka ohia hnen âm jeú at a mok Keriso hobi káu. 16 Wâ eâu, wâ adre nye haikongoâ anyibun so : 17 anyin a haba dokhon Khong, me ca he ka hnyi han me ic, ke so bi hwakecin ae wisa, me hnahic, me senyin hnyi Hanu Kap. 18 Anyin a Khong ame senyin ka at ame bi athnyaba kö Iesu Keriso hnyi únyi eling, ke ame haisoâ minya hnen at. 19 Anyin a wale, e so ate me he ka hnu hoton ta je únyi hnân úsoköu, me ta je únyi hnân úökahwakouâ. 20 Ca hagutâ huliwa anyin Khong can ta je jeú. E kalaöt ta je únyi hia ; ke so bi e kong ka at ame han me hnân öhükötö. 21 E so he ka ca hnyi han utiö, me ijem waina, me ânyâ ke únyi hnân öthöâ liamekeiny möu. 22 Haba anyâm labageju, me so e me ka hu bi gam hnyi hnyimakan Khong. Hnahic hnen at ame ca ka hangâ e bi hnyi únyi e ame haisoâ. 23 Ke haba at ame han me loloâ, me hulö but e, anyin a e ame ca han hnyi labageju ; ka haba ta je únyi hia a ca únyi bi hnyi labageju, me wale hulö.

HNYIMAKAN 15.

HAMÖTA tavat ae hwege he ka ha-druâ hnyat ae sēnyin, ke ca he ka osenyini öta thibi. 2 E so ate me he hia ka osenyinâ at ae hakekeny köta hnyi únyi ae so, me hnân okaukahwa. 3 Anyin a haba Keriso ame ca ka osenyinâ e ; ke helâ me hna sihnalimen, ka habe, Haba hna ú hnen tavat adre me ú u, me ame ta but huk. 4 Anyin a haba ta je únyi adre sihualimen adrem, me adre me sihnalimen hnân n' öta, me me hu anyita geju hnen hokhnyok me kaukahwa únyi hnyi je hna sihnalimen. 5 E so e ham köbun hnen Khongon lingvec me kaukahwa he ka tha hnyok hoton Keriso Iesu : 6 m' öbun e he ka tha ogânâ Khong, a Kamen Tuhöta Iesu Keriso, ge hnyok a khaca me hnyem a khaca. 7 Anyin a wale úkapköuâ ju öbun helâ me hna köp öbun hnen Keriso, hnân ogânâ Khong. 8 Anyin a inya oge me ha, ka habe, haba Keriso ame bi athnyabainy peritom hobi káu hnathu anyin Khong, me me he ka ohmâ hna ha bánâ ka lakamöta,

9 me me he Aten ta je hnyei ka ogânâ Khong can anyin ibetengiö baú, helâ me hna sihnalimen, ka habe,

Wale me inye he ka oganö u hnyi wan-ben Aten ta je hnyei,
Me khumöngö iâm.

10 Ke haingen minya, ka habe,
Aten ta je hnyei lö, tha senyin dö me je lakeiny.

11 Ke wale minya eang, ka habe,
Ogânâ thö Than, öbun hia Aten ta je hnyei ;
Ke ogânâ thö e öbun ta je hnyei hia thithö.

12 Ke wale hmetu ang, haingö Isaia, ka habe,
Ame he ka hu iwân únyi ga Jese,
Ke at ame tot he ka musö Aten ta je hnyei ;
Ame he ka labageju káu hnen Aten ta je hnyei.

13 E so e he Khongon geju ka ounöngöti öbun ge senyin me hnahic hnyi labageju, me me gan anyibun geju hnen man maniny Hanu Kap.

14 Ke mou but eú hnyi hnyekuk gabun je liamekeiny mönya, a öbun e unöngötö ge hwakecin ae so, ke unöngöt ge metâ hia, ke e khaun' öbun he ka úsihwegei öbun köu.

15 Ke oge me sihnalimen hwegiâ köbun ge ta je únyi he ka öünykümi öbun, únyi hnyi ibetengiö baú a ham könya Khong, 16 me inye he ka bi athnyabai Iesu Keriso ka Aten ta je hnyei, he ka ânyâ hanymen at bihut hnyi úthumetu ae so anyin Khong, me me he ka kap soâ hut wale Aten ta je hnyei, me okabi ödra hnen Hanu Kap. 17 Anyin a wale e hu gak hnân he ka ohobeluâ ge ta je únyi anyin Khong ga Iesu Keriso. 18 Anyin oge me ca he ka hwege ka ha ke únyi, wale ame ca tha mâdrâ mönya Keriso hnân okúâ úling ka Aten ta je hnyei, hnen hofuc me huliwa, 19 hnen maniny ta je haten me úöman, me man maniny Hanu Kap ; wale a hwân hnyi Jerusalema igigilö ke ne o but hnyi Iluriko oge me khetâ úthumetu ae so anyin Keriso ; 20 eke, oge me elâm deny he ka khetâ úthumetu ae so hnyi je dok adre me tiga ca ha hnyin iö Iesu, wâ oge nye he ka op hon taben anyin ke at ; 21 ke so bi, helâ me hna sihnalimen, ka habe,

Adre me he ka bwela, wale tavat adre me ca háiâ e ködra,

Ke ame he tavat adre ca hnyi löng ka wâ únyküme.

22 Ke se hia hna ovheli nya he ka he but köbun : 23 ke walang ang, me ba hmetu hanymök hnyi je ke keihen hnyei ang, ke se hia ta je huna oge me bewek gan hmâ he ka he but köbun, 24 iny ka he Sepania ai (anyin oge me únykúme he ka iouny möbun hnyi úhek, ke öbun e he ka su nya, ama bán ka sekuk hnyi iouny a öta) 25—ke walang ang, inya oge me he Jerusalema ai, he ka bi athnyabainy wakap. 26 Anyin a weny at Makedonia me Akaia he ka úhnöhnö hnân betenge ka wakap a tavat ae theduoc hnyi Jerusalema. 27 Eke, wale wedra ae so ; ka e unyidra anyidra ta je únyi. Anyin a ne kap hnen Aten ta je hnyei ta je únyi anyin hanu únyi gadra, me e úcú minya ködra he ka kap bi ta je únyi anyin unyin. 28 Anyin a wale, iny ka hia but umo e, me ohmâ ködra wan eang, me oge me he ka he unyibun iny ka he Sepania ai. 29 Ke e khanö nya, a iny ka he ka he köbun, me oge me he ka o but hnyi unöngötiny hnahic ge Keriso.

30 Hnyat me lakeiny lö, inya oge sumat öbun únyi ge Tuhöta Iesu Keriso, me únyi ge ibetengiö anyin Hanu, möbun e he ka tha hic újông mönya ka Khong hobi könya ; 31 me me húgúnö nya but ge tavat adre me ca úling hnyi Juda, me me kap soâ hnen wakap anyik huliwa hobi ködra hnyi Jerusalema ; 32 me inye he ka o köbun hnyi senyin únyi ge weny Khong, me ötin e he ka tha kahwa. 33 E so e unyibun hia thithö Khongon hnahic. Amen.

HNYIMAKAN 16.

OGE me haisoi Febi köbun, a hanita, wale a huliwa ka ekalesia hnyi Kenikerea : 2 möbun e he ka kap momo eling hnyi Than, helâ me hwakecin wakap, me öbun e he ka hadruâ e hnyi ta je únyi e ame he ka weny úhadruo gabun hnyin : anyin a e at a hia but hadruâ tavat ae se hia, ke inya ang khaca.

3 Anyik talofa kö Perisila, me Akula li at ödre tha huliwa mönya ka Keriso Iesu, 4 waleji a li at ödre ip li nyidru me hnân hwabök ; ca hake inya thibi oge me oleâ ködru, ke so bi ta je ekalesia hia minya anyin Aten ta je hnyei : 5 anyik talofa minya ka ekalesia hnyi umödru uma. Anyik talofa kö Epaineto a oúnykúmik, waleji wan a bán ka Keriso hnyi Asia. 6 Anyik talofa kö Maria waleji at ame huliwa gan hmâ hobi köbun. 7 Anyik

talofa kö Anedroniko, me Junia, a li liamekeiny mönya, li at adre tha c' ödru mönya, li at ae lung unyin je aposetolo, a bödru unyin Keriso ka bilik bi. 8 Anyik talofa kö Amepelia a oúnykúmik unyin Than. 9 Anyik talofa kö Urbano, waleji at ame tha huliwa möhmun ka Keriso, me Sataki a oúnykúmik. 10 Anyik talofa kö Apele waleji adre haisoâ unyin Keriso. Anyik talofa ködrin hnyi lap anyi Aristobulo. 11 Anyik talofa kö Herodiona a liamekeiny mönya. Anyik talofa ködrin hnyi lap anyi Nakiso, a ödrin unyin Than. 12 Anyik talofa kö Trufaina me Trufosa, li at ödru me huliwa hnyi Than. Anyik talofa kö Peresi a oúnykúmik, waleji at ame huliwa gan hmâ ka Than. 13 Anyik talofa kö Rufo at a úca Than, e me hinyen, a hinyök minya. 14 Anyik talofa kö Asungerito, me Felegona, me Herema, me Pateroba, me Hereme, me hnyat me lakeiny unyidrin. 15 Anyik talofa kö Filologo me Julia, me Nerea me haniny, me Olumepa, me wakap hia unyidrin. 16 Úitalofaköu ju öbun ge úcimhnyimak ae kap. Adre me italofa möbun ta je ekalesia anyin Keriso hia.

17 Inya oge me sumat öbun hnyat me lakeiny, möbun e wâhmakhmetu ödra ju, waleji a tavat adre me oktâ imoukôu me hnân öthöâ, wale ta je hwakecin ae ca úcú. bi me hnöbun hna úne : ke úsákâú mödrae 18 Anyin a haba tavat helâe, me adre me ca bi athnyabainy Tuhöta Iesu Keriso, ke ka je hnyekudra bi, ke adre me omonoâ je hnyekon tavat ae ca khan' ödra ta je únyi, hnen hofuc ae menyik me útakú. 19 Anyin ame lung hnöbun hna úling unyin tavat hia thithö. Anyin a wale inya oge me senyin gabun : ke e wek bi, a e so öbun e metâ but hnyi ta je únyi ae so, me ca khan' öbun ta je únyi ae kong. 20 Ke ame ie he Khongon hnahic ka uti Satana hnyi hmelen je li cabun.

E so e unyibun ibetengiö baú anyin Tuhöta Iesu Keriso.

21 Ame italofa möbun Timoteo at ame tha huliwa mönya ; me Lukio, me Jasona, me Sosipatero je liamekeiny mönya. 22 Inya Teretio at ame sihnalimen tusi eang oge me italofa möbun hnyi Than. 23 Ame italofa möbun Gaio, wale oge me laba unyin, me ekalesia hia. Ame italofa möbun Eraseto at ame tuö omjehen taun, me Karato a ke liamekeiny.

25 Ogânâ thö at ae khana otethm' öbun hoton anyik úthumetu ae so me hna kheti

I. KORINITO 1.

Iesu Keriso, hoton hna omanená únyi ae hnen Khong a nyiele balua ka ta je hnye
iyong waleji adre me ikhâlâ adrem balua, hia, madre me he ka löng hoton labageju ;
26 ke manen dut walang ang, ke adre hia 27 e so he ka ogânâ Khong, a hake e
but omanená, únyi hnyi hna sihnalimen thibi at ae metâ, nyiele balua, a deny Iesu
hnen ta je perofeta, ke hoton hna hûna Keriso. Amen.

TUSI A BÂN ANYI PAULO APOSETOLO KA

AT KORINITO.

HNYIMAKAN 1.

INYA Paulo, at adre hawâ hnen weny Khong hnân aposetolo anyi Iesu Keriso, me Sosethene a liamekeiny möta, 2 öhmu me sihnalimen ka ekalesia anyin Khong hnyi Korinito, wale tavat adre me okabi ödra unyi Iesu Keriso, k' adre me haw' ödra me wakap, tha ödra me tavat hia thithö hnyi je dok hia adre me hawâ ien Tuhöta a Iesu Keriso, a Tuhödra ke Tuhötin : 3 e so e e unyibun ibetengiö baú me hnahic únyi ge Khong a Kamöta me Than Iesu Keriso.

4 Inya oge me ole bala ka Khonguk gabun, can ibetengiö baú adre ham köbun ga Iesu Keriso ; 5 a g' adre otrene öbun ge omjeú únyi gan hnyi ta je únyi hia, hnyi ta je hofuc hia, me ta je metâ hia : 6 helâ me hnödra hna ohmâ eú hnyibun hnathu ge Keriso : 7 wale me me ca hia gabun ke bwihlany ; k' öbun e halubahingen he ka manen Tuhöta Iesu Keriso ; 8 wale at ame he ka otethm' öbun ke ne o but obiny, me me ba hnân haikongu öbun hnyi bong bongon Tuhöta Iesu Keriso. 9 Haba Khong, me hnathu, waleji at ame hia but haw' öbun he ka tha e me Nokon a Iesu Keriso a Tuhöta.

10 Hnyat me lakeiny lö, inya oge me sumat öbun hnyi ien Tuhöta Iesu Keriso, ka habe, e so e khaca thibi ifucibun, me me ca he ka hu je imoukôu unyibun ; ke so öbun e tha hnyok hnathu hnyi oúnykúm a khaca. 11 Anyin a haba tavat hnyi hnyaba Keloe, me ödrin e hia but hai öbun könnya, a g' ame iwatretra öbun. 12 Walang hok hofuc, ka habe, ve haingöbun hia, ka

haba, iny atö Paulo inya ; ke iny atö Apolo inya ; ke iny atö Kefa inya ; ke iny atö Kerisö inya. 13 Hawa, adre susubâ Keriso ? adre osatauroi Paulo hobi köbun ? ke adre bapataisoi öbun ka hnyi iö Paulo ? 14 Inya oge me oleâ ka Khong anyin ae ba ke at gabun oge bapataisoâ, ke so thibi Kerisepo me Gaio ; 15 wâ e nye ha ke at, ka habe, oge bapataisoâ ka hnyi iök. 16 Ke oge bapataisoâ minya lap anyi Setefana : ke ca khanö nya ame ne hu ke at oge bapataisoâ minya. 17 Anyin a ca kunö nya Keriso he ka bapataiso, ke so bi, he ka khetâ úthumetu ae so : ca hnen ifucin metâ, wâ e nye gufa but satauro anyi Keriso.

18 Anyin a hwen monu úthmetu ge satauro ka tavat adre me he ka hnaúhangö ; ke man maniny Khong köta a tavat adre me he ka möt. 19 Anyin adre hia but sihnalimen, ka habe,

Oge me he ka ohia metâ anyin tavat ae metâ,

Ke oge me he ka oúnyibâúâ hna wâ únykúme hnen tavat adre me wâ únykúme.

20 Ewa at ae metâ ? Ewa at sihnalimen ? Ewa at ivinö hnyi dö eang ? Hawa, Khong ame ca omono metâ eang hmele-drany ? 21 Anyin a únyi hnyi metâ anyin Khong, e ca khana bi Khong hnen aten hmele-drany hnyi anyidra metâ, haba Khong ame weny he ka omelö tavat adre me labageju, hnen hwen monu, a wale hna khetâ. 22 Haba at Juda, me wedra ta je haten, ke haba at Heleni adre me elám metâ : 23 ke öhmun e khetâ Keriso adre osatauroâ, wale hnân thö ka at Juda, ke hwen monu bi ka at Heleni ; 24 ke Keriso

I. KORINITO 2, 3.

man maniny Khong, me metâ anyin Khong ka tavat adre úca, at Juda me at Helene minya. 25 Anyin a haba hwen monu anyin Khong me nua metâiny hon at, ke haba sēnyin anyin Khong me nua hwegien hon at.

26 Hnyat me lakeiny lö, wâ ju hna haw' öbun, anyin ae ca se hia bi tavat ae metâ hnyi unyin, ke ca se hia minya bi tavat ae lung, ke ca se hia minya bi ta je than : 27 ke haba Khong ame úca ta je únyi ae monu hnyi hmeledrany he ka ohmehma tavat ae metâ ; ke haba Khong ame úca ta je únyi ae sēnyin hnyi hmeledrany he ka ohmehma ta je únyi ae hwege ; 28 ke haba Khong ame úca ta je únyi baú hnyi hmeledrany, me ta je hna hûkötîá, me ta je únyi ae ba, he ka ohia ta je únyi ae manen : 29 me me ba at ame he ka hobelöu hnyi hnyimakan Khong. 30 Ke únyi gan öbun hnyi Keriso Iesu, at adre wia köta únyi ge Khong hnân metâ, me hwakecin ae wisa, me kap, me hnân möt : 31 helâ me hnödra hna sihnalimen, ka habe, Haba at ame hobeluâ, me so e ame hobeluâ hnyi Than.

HNyimakan 2.

HNYAT me lakeiny lö, haba ge imwik e unyibun, me oge me ca tha o me hofuc ae hmanenang me metâ, hnyi hnök hna omanená köbun únyi ae iyong anyin Khong. 2 Anyin ae mou but eú hnyi hnyekuk ehac, a g' ame ca he ka khanö nya ke únyi unyibun, ke hake Iesu thibi a g' adre osatauroá ehac. 3 Ke inya unyibun hnyi sēnyin, me ot, me öbubuny ae gan hmâ. 4 Ke haba ifucik ke hnök hna khetâ, me ca hnen bi hofuc ae senem hnyi metâ, ke ame kú hnen Hanu me man : 5 me me ca he ka e hnyi metâiny at anyibun labageju, ke so bi hnyi man maniny Khong.

6 Ke öhmun e khetâ metâ unyin tavat ae ti metâ ; ke so bi ca metâ únyi eang hmeledrany ke ca únyi ge je tuhan mele-drany, wale ame he ka hia bi : 7 ke öhmun e ha metâ anyin Khong únyi ae iyong, waleji adre me ikhâlâ, ke a ip hnen Khong adrem ke tiga hia bi hmeledrany hnân ogan' öta : 8 wale ae ca khana hnen je than eang hmelen : anyin a ne khan' ödra, me adre me ne ca he ka osatauroá Thaniny hmeledrany : 9 helâ me hna sihnalimen, ka habe,

Ame ca wâ hnen ecmak, k' ame ca löng ge hnyiköny, K' ame ca dit ka hnyi hnyin at ta je únyi

Waleji a penapena Khong hobi ködra adre me hnyok kâu.

10 Ke a hia but Khong omanená köta hnen Hanu : anyin a Hanu ame eelâm ta je únyi hia, eke, ta je únyi ae dit anyin Khong. 11 Anyin a ie ke at ae khana ta je únyi anyin ke at, ke so thibi hanon at eú hnyi hnyin ? helâe, ae ca khana at ta je únyi anyin Khong, ke so thibi Hanon Khong. 12 Ke ate me ca kap bi hanon hmeledrany, ke so bi hanu únyi ge Khong ; me me khan' öta thö ta je únyi a ham baúâ köta Khong. 13 Ke öhmun e ha ta je únyi e, ca únyi hnyi hofuc adre nâ hnen metâ anyin at, ke so bi únyi hnyi hna úne hnen Hanu ; ame omanená ta je únyi anyin hanu ka tavat aten hanu. 14 Ke haba aten unyin ame ca kap ta je únyi anyin Hanon Khong : anyin a hwen monu e kâu ; ke e ca khana he ka wâhmakhmetoâ e, anyin adre me wâ únykúme hnen hanu. 15 Ke haba aten hanu ame wâ únykúme ta je únyi hia, ke ame ca wâ únykúme e hnen ke at. 16 Anyin a ie at ae khana únykúmenen Than, me me he ka nâ e ? Ke hu but gata únykúmenen Keriso.

HNyimakan 3.

HNYAT me lakeiny lö, e ca khanö nya he ka fuc köbun helâ me tavat aten hanu, ke so bi helâ me tavat aten unyin, helâ me ta je mendreng unyi Keriso. 2 Oge abelibun ge debai, ke ca haöbun bi ge utiö : anyin ae ca khan' öbun ehac ; ke ca khan' öbun bala walang ang ; 3 anyin a öbun tiga aten unyin : anyin a e unyibun ihunyinköu me iwatretra, hawa, ca aten unyin bi öbun, k' öbun e he helâ me hwakecin at bi ? 4 Anyin a haingen ke at, ka habe, Iny atö Paulo inya ; ke haingen ke at, Iny atö Apolo inya ; hawa, öbun ca je at ? 5 Anyin a ieú Apolo ? ke ieú Paulo ? a li athnyaba a deny anyibun labageju ; helâji me hnen Than hna ve ham köhmu. 6 Inya oge tâ, k' ame hû ga Apolo ; ke haba Khong ame ökûâ. 7 Waleling me me ca únyi hnathu at ame tâ, ke ca únyi hnathu minya bi at ame hû ; ke so bi Khong at ame ökûâ. 8 Ke khaca thibi at ame tâ me at ame hû : k' ame he ka ve hu hwaban ae úcû ka hnyi anyidru huliwa. 9 Anyin

I. KORINITO 4.

a öhmun tavat tha huliwa tot me Khong : ke öbun hna belök iny Khong, ke uma a op Khong.

10 Oge hia but ip taben helâ me homakan hnyat op uma a at ae metâ, hoton ibetengiö baü anyin Khong adre me ham könya ; ke haba ke at ame op göranyai hon. 11 Anyin ae ca khana bi ke at he ka ip hmetu ke taben, ke so bi hnödra hna ip, wale Iesu Keriso. 12 Ke a ne he ke at ka op gol hon taben eling, ame ne sileva, ame ne je veto omjeü, ame ne utö, ame ne ot, ame ne je thatünyi ; 13 me ame he ka ve manen dut huliwa anyin at : anyin a hamen bong he ka omanená bi, k' adre me he ka omanená e hnen meic ; ke hamen meic he ka ve cubic huliwa anyin at me me manen dut bongon. 14 A ne tethmä huliwa anyin ke at, waleji e ame op göranyai hon, me e ame he ka kap hwaban. 15 A ne thong ut huliwa anyin ke at, me ame he ka hia but anyin ta je ünyi : ke e ame he bi ka möt, ke helâke me üheny hnyin meic.

16 Hawa, e ca khan' öbun a haba öbun me hnân uma kap a umen Khong, k' ame laba Hanon Khong eü hnyi hnyibun. 17 A ne okongoâ uma umen Khong hnen ke at, me ame he Khong ka okongoâ e ; anyin ae kap uma umen Khong, wale thibi öbun.

18 Ca he ke at ka hamen iyawâ e bi. A ne hu ke at unyibun ame ka ünykûme a e at ae metâ eang hmeledrany, me so e ame he ka monu, me me metâ but. 19 Anyin ae monu hnyi hnyimakan Khong metâiny hmeledrany. Anyin adre hia but sihnalimen, ka habe, E ame ohnokâ wametâ hnyi anyidra bibihwakecin : 20 ke wale hmetu ang, ka habe, E khana Than ae ünyi baü ta je ünykûmenen tavat ae metâ. 21 Anyin a wale ca he ke at ka hobeluâ at. Anyin a anyibun ta je ünyi hia thithö ; 22 ame ne Paulo, ame ne Apolo, ame ne Kefa, ame ne hmeledrany, ame ne möt, ame ne mok, ame ne ta je ünyi walang ang, ame ne ta je ünyi ame he ka o ; anyibun hia thibut ; 23 ke haba öbun me anyin Keriso ; ke haba Keriso me anyin Khong.

HNYIMAKAN 4.

E SO e he at ka ünykûme köhmun, a öhmun je athnyabainy Keriso, me je athnyaba adre tuö omjeü wale ta je ünyi ae iyong anyin Khong. 2 Ke haba khaca,

hamen tavat walang adre me tuö omjeü he ka ve hnathu. 3 Ke ünyi ae hâhâ hmönyin könya öbun ka he ka owisö nya bi, me hna owisa hnen at : eke, inya oge me ca ka owisö nya bi. 4 Anyin ae ca khanö nya bi monu gak ; ke so bi e ca hnân haiwisö nya ünyi e : ke Than bi at ame owisö nya. 5 Anyin a wale, ca he ka ünykûme ke ünyi ke tiga hia bi üen, e mē o but Than, at ame he ka omelamá ta je ünyi ae iyong hnyi lit, me he ka omanená ta je ünykûmenen hnyok ; wale m' adre me he ka ve haisoâ ünyi ge Khong.

6 Hnyat me lakeiny lö, oge hia but öuco ta je ünyi e könya me Apolo hobi köbun ; m' öbun e he ka nâ ünyi gahmu he ka ca onua bi ta je ünyi adre sihnalimen : me me ca he ka bi gan ke at gabun ka ke at hon ke at. 7 Anyin a ia okebongoni u ? ke ewa ke ünyi gam adre ca ham köu ? ke ödra ka hia but ham köu, ieü gam u me hobelöu helâke adre ca ham ? 8 E sekubun dut walang ang, öbun e tren omjeü walang ang, öbun e bi than ke hi' öhmun : e na hnathu ju bi than a öbun, möhmun e he minya ka hnyi than unyibun. 9 Anyin a oge me ünykûme, a biliny Khong ka otil' öhmun je aposetolo, helâke me hnân he ka mok : anyin adre wi' öhmun me hnân ünyi mat a wânen hmeledrany, me ta je angela, me tavat. 10 Öhmun tavat ae monu can Keriso, ke öbun e metâ but unyi Keriso ; öhmun e sēnyin dut, ke öbun e hwege bi öbun ; e hu hnân ogan' öbun, ke öhmun tavat baü. 11 Ke ne o but awa ang öhmun e mekihnânem, me beic, me he thu, me hna khaü, ke ba dok öhmun e laba hmâ hnyin ; 12 ke öhmun e labö huliwa, me ânyâ huliwa ge je hing hnyamöhmun : adre me ü öhmun, ke öhmun e hahnahicâ ; adre me sed' öhmun, ke öhmun e hokhnyok ; 13 adre me haikongu öhmun, ke öhmun e khöü : adre me oucü öhmun me ta je ünyi ae ikiki hnyi hmeledrany, me tiren ta je ünyi hia ke ne o but hnyi bong ang.

14 Oge me ca sit ta je ünyi e he ka ohmehm' öbun, ke so bi he ka n' öbun helâ me lakuk a öünykûmik. 15 Anyin a eja ke ne a ne ten thauzan tavat adre me n' öbun unyi Keriso, me ca se hia lakamöbun : anyin a oge me hnöku öbun hnyi Iesu Keriso deny üthumetu ae so. 16 Anyin a wale, oge me sumat öbun he ka ücübingi nya. 17 Can e oge hia but kunö Timotheo köbun, wale nökek, a öünykûmik ke at ae hnathu ka Than, ke e ame he ka

I. KORINITO 5, 6.

oûnykûmi öbun ge je hwakecik hnyi huliwa anyin Keriso, helâ me oge me nâ je ekalesia hnyi je dok hia. 18 E bi gan dut keihen gabun helâke oge me ca he ka o köbun. 19 Ke oge me he ka ie o köbun e ka weny Than; ke oge me ca he bi nya ka löng ifucin tavat adre me bi gan, ke hake thibi man. 20 Anyin a ca e bi dökhu dokhon Khong hnyi hofuc, ke so bi hnyi man. 21 Ieú webun? hawa, oge me he ka o köbun me osö, hawa, hnyi ibetengiö me hnyok ae menyik?

HNYIMAKAN 5.

AME lung a öbun e bi únyi monu, ke ba bi únyi monu ae kong helâe unyin Aten ta je hnyei, wale a g' ame he at ka hom áiân kamen. 2 Ke öbun e bi gan, k' öbun e ca hlöuhlöu bi, m' adre me he ka obâ but únyi gabun at ame ányâ únyi eling. 3 Haba inya oge me ca laba unyibun, ke e unyibun hnyekuk, me oge hia but thamûâ kâu at ame ányâ únyi e, helâke me ka inya e, 4 k' öbun ka úkhaca-köu, a tha öbun me hnyekuk, me man maniny Tuhöta Iesu, hnyi ien Tuhöta Iesu, 5 he ka hna but e kö Satana, me me ohia unyin, me me möt hanon bi hnyi bong bongon Than Iesu. 6 E ca so anyibun hobeluâ. Hawa e ca khan' öbun a g' adre olevenâ tap falawa ae gan hnen leven ae úhnyúkong? 7 Degec ut leven adrem, m' öbun e tap falawa ae teb únyi, helâke adre me ca leveni öbun. Anyin adre hia but hlingâ anyita paseka, wale Keriso: 8 anyin a wale, e so ate me he ka tuö bijeú, ca hnen leven adrem, ke ca hnen leveniny hnyok ae kong me hwakecin ae kong, ke so bi hnen areto adre ca levenâ bi wale hnyok ae wisa me hnathu.

9 Oge hia but sit köbun hnyi anyik tusi, ka habe, ca tha he öbun me tavat bi únyi monu; 10 oge me ca ha, ge tavat bi únyi monu eang hmeledrany, me tavat behnyekon, me tavat húgúnö omjeú, me tavat adre me hmi ka hnatheat; anyin a ne helâe, me hamöbun he ka he but úhebun ang hmeledrany: 11 ke walang ang inya oge me sit köbun, ka habe, öbun e ca he ka tha he me at adre háiâ, ka habe, liama-keiny, ke e at bi únyi monu bi, ame ne at behnyekon, ame ne at a hmi ka hnatheat, ame ne at ae hwege hnyimen, ame ne at ic monu, ame ne at húgúnö omjeú; ke ca tha han me at a helâe. 12 Hnân eú könya he

ka owisa tavat eú hnyöü? Hawa öbun e ca owisa tavat adre me laba eú hnyin, 13 ke Khong ame owisa tavat adre me laba eú hnyöü? Obâ but unyibun at ae kong.

HNYIMAKAN 6.

AME hwege la ke at gabun, a ne hu gan ke únyi hnân iwatetra me ke at, he ka úhnö hnyi hnyimakan tavat ae ca wisa bi, ke ca hnyi hnyimakan bi wakap? Ke ca khan' öbun a g' ame he wakap ka owisa hmeledrany? 2 ke öbun e ne owisa hmeledrany, hawa, e ca úcú köbun he ka owisa ta je únyi ae úhnyúkong? 3 Anyin ae ca khan' öbun a g' ate me he ka owisa ta je angela? awe, e ti úcú köta he ka owisa ta je únyi hnyi möt ang? 4 Waleling a ne hu gabun ta je únyi hnyi möt ang he ka owisa, hawa, öbun e kunâ waúhnyúkong hnyi ekalesia he ka owisa? 5 Ogo me ha únyi e me hnân ohmehm' öbun. Hawa, e hnathu ae ba at a khaca ae metâ gabun, wale ae khana he ka owisa je liame-keiny mē, 6 ke haba liamekeiny ödru me úhumödruköu ka hnyi owisa, ka hnyi hnyimakan hnyat ca labageju bi? 7 Ke wale anyibun monu a öbun e úhumöbunköu öbun. Ieú gabun öbun e ca hokhnyokâ úokonguny? Ieú öbun e ca hna gan anyibun ta je únyi adre húgúnâ? 8 Ke haba öbun bi, öbun e okongoâ bi, me hwenenâu ta je únyi anyin hnyat me lakeiny. 9 Ke ca khan' öbun a haba tavat ae ca wisa hwakecidra, me adre me ca he ka hnyi hanen dökhu dokhon Khong? Ca omonu öbun bi: haba tavat adre me bi únyi monu, me tavat adre me hmi ka hnatheat, me tavat adre me venöu áiân ke at, me tavat wagelue, me tavat adre me hwen sodoma, 10 me tavat venöu, me tavat behnyekon, me tavat adre me ic monu, me tavat hwege hnyimen, me tavat húgúnö omjeú, me adre me ca he bi ka hnyi hanen dökhu dokhon Khong. 11 Ame helâe keihen gabun ehac: ke adre hia but hú öbun, me okabi öbun, me haiwis' öbun hnyi ien Than Iesu Keriso, me hnyi Hanon Khonguta.

12 E úcú könya ta je únyi hia thithö; ke so bi e ca únyi hnathu ta je únyi hia thithö. E úcú könya ta je únyi hia thithö; ko so bi oge me ca he ka hna but ka ke únyi a khaca he ka musinya. 13 Haba ta je jeú, me hobi kâu hnyok, ke hnyok hobi kâu ta je jeú: ke ame he Khong ka tha ohia. Haba unyin, me ca hnân hobi

I. KORINITO 7.

kâu bi únyi monu, ke so bi hobi kâu Than, ke haba Than, me hobi kâu unyin: 14 ke haba Khong ame omelö hmetu thö Than, me e ame he ka omeli öta hmetu únyi ge maniny man. 15 Ke ca khan' öbun a haba je unyibun, me wale je outhunyn Keriso? anyin a wale, hawa oge me he ka hom je outhunyn Keriso he ka wia me hnân outhunyn momo hnyi gethen? Ohe. 16 Hawa, e ca khan' öbun a haba at ame hom momo hnyi gethen, me khaca but unyidru? anyin a haingen, ka habe, Ame he ka khaca unyidru. 17 Ke haba at ame tha he me Than, me khaca thibi hanu. 18 Kec dö únyi hnyi bi únyi monu. Ame ca he ka oaatâ ka hnyi unyin ta je monu ame ânyâ at, ke haba at ame bi únyi monu, me ame ka hamen okongoâ unyin bi. 19 Hawa, e ca khan' öbun a haba je unyibun, me uma umen Hanu Kap wale eü hnyi je hnyekubun a hu but köbun únyi ge Khong? haba öbun, me ca anyibun bi; 20 anyin adre hia but úcú öbun ge hwaban: anyin a wale ogânâ thö Khong ge ta je unyibun bi.

HNYIMAKAN 7.

KE haba ji ge ta je hofuc öbun e sihna-limen könya: me, E so ka at he ka ca kâlâ momo. 2 Ke so ka obaga he ka úsa khaca laöiödra, ke so minya ka omomo he ka úsa khaca laöiödra, wâ adre nye bi únyi monu. 3 Hamen baga he ka ham únyi ae úcú ka áiân: ke helâ minya momo ka baga. 4 Ca hamen momo ka musö unyin bi, ke so bi áiân: ke ca hamen minya baga he ka musö unyin bi, ke so bi áiân. 5 Ca behânâ ke at hnen ke at, ke so bi e tha hnyekubu hnyi ke úen, möbu me he ka hn' öbu but ka hic, me öbu me he ka tha laba hmetu bi, wâ e nye cubic öbu Satana anyin ae ca khan' öbu hokhnyok. 6 Ke oge me ka ha e únyi gak, ke ca únyi ge hna húna bi. 7 Ke e wek e me tha úcú mönya tavat hia. Ke so bi e ve hu ge tavat bwihlany únyi ge Khong, ke at ame helâng, ke ke at ame helâe.

8 Ke inya oge me ha ka tavat ae ba laöiödra, me ta je safac, ka habe, E so ködra adre me ne laba bala helâ me mak ang. 9 Ke a ne ca khan' ödra hokhnyok, e so adre me faipoipo: anyin ae so he ka faipoipo hon he ka kahwa. 10 Ke oge me húna ka tavat ae hu laöiödra, ke so bi ca inya, ke Than bi, ka habe, Ca he bi

momo ka hna degecâ áiân, 11 (ke e ka he ka hna degecâ, me so e ame hake laba ju, ame ne ca mē úsoköu hmetu me áiân a baga): ke ca he baga ka hna degecâ áiân. 12 Ke inya oge me ha ke keihen, ke ca únyi bi ge Than, ka habe, A ne hu liamekeiny ae hu áiân ame ca labageju, ke weny bi momo ke ka tha laba mē, ca he bi ka hna degecâ momo. 13 He haba momo ae hu áiân ame ca labageju, ke e weny bi áiân a baga he ka tha laba mē, ca he bi momo he ka hna degecâ e. 14 Anyin adre okabâ baga ame ca labageju únyi ge áiân a momo, ke adre okabâ minya momo ame ca labageju únyi ge áiân a baga: ame ne ca helâe me kong je lakubun; ke walang ang ödrin kap but. 15 Ke a ne hna degecâ hnen at ame ca labageju, hna but e ka he but: anyin ame ca laba hwenbâ ke liamekeiny ame ne ke haniny hnyi únyi a helâe: ke haba Khong ame haw' öta ka hnyi úsoköu. 16 Anyin a ke momo lö, ama hawa ka khanö u, ame ne he bi áiâm ka möt únyi gam? ke baga lö, ama hawa ka khanö u, ame ne he ka möt áiâm únyi gam? 17 Ke so ame ve he tavat helâ me Than ame ve khenâ öuco, ke helâ me Khong ame ve haw' ödra. Ke oge me owisa helâe hnyi je ekalesia hia thithö. 18 Adre me ne hawâ at a g' adre ca peritomonâ? awe, ca he ka wia e bi me me at adre ca peritomonâ. Adre me ne hawâ at a g' adre ca peritomonâ? awe, ca he ka peritomonâ bi? 19 E ca únyi hnathu peritom, ke ca únyi hnathu bi ca peritom: ke so bi he ka vheno je hnanyibu anyin Khong. 20 E so he ka ve laba bala tavat hia hnyi hna haw' ödra hnyin. 21 Hawa, adre hawo u, ke u athnyaba? ca únykúme ka hnyin: ke e ka khanö u ka he baú, oúnyihnatho thö e. 22 Anyin a haba at adre me hawa hnyi Than, ke tiga athnyaba, me adre me wia e me at he baú anyin Than: helâe minya haba at adre hawâ, ke at he baú, me adre me wia e me athnyabainy Keriso. 23 Adre me úcú öbun ge hwaban; ca he öbun ka athnyaba ka at. 24 Hnyat me lakeiny lö, ve laba bala bi unyin Khong hnyi hna ve haw' öbun ka hnyin.

25 E ba hnanyibu anyin Than könya ge wahlu: ke oge me omanená únykúmenök, helâ me at ame hnathu únyi ge ibetengiö anyin Than. 26 Oge me únykúme a e so ka at he ka hnathu hnyi úen ang a úen vec. 27 Hawa, adre me cö u ka momo? ca elâm he ka thang ut. Hawa, adre hia

I. KORINITO 8, 9.

but thang öbu? ca elâm ke momo bi. 28 Ke u je ne faipoipo, me ca kong ut; ke ame ne he hlu ka faipoipo, me ca kong ut. Ke ame he ka hu vecin unyin tavat eling: ke oge me ca beohmak' öbun. 29 Ke walong, hnyat me lakeiny lö, oge me ha, ka habe, e okhulit biju ün, waleling me me so ka hnyat ae hu laöiödra ka helâ me hnyat ae ba laöiödra; 30 ke haba tavat adre me tenge, me he ka helâ me tavat adre me ca tenge: ke haba tavat adre me senyin, me he ka helâ me tavat adre me ca senyin; ke haba tavat adre me úcú, me helâ me tavat ae theduoc; 31 ke haba tavat adre me huliwan ta je únyi eang hmeledrany, me ca he ka huliwa monu bi: anyin ame he ka hia bongon hmeledrany. 32 Oge me wek a g' ame ca he öbun ka únykúme loloâ. Haba at ae ba áiân, me ame únykúme loloâ ta je únyi anyin Than, ka habe, ama hawa ka osenyinâ Than: 33 ke haba at ae hu áiân ame únykúme loloâ ge ta je únyi anyin hmeledrany, ka habe, ama hawa ka osenyinâ áiân. 34 E ve bongon bi minya momo ae lu áiân, me hlu. Haba at ae hu áiân ame únykúme loloâ ge ta je únyi anyin Than, me me he ka kap hnyi unyin me hanu: ke haba at ae hu áiân бага, ame únykúme loloâ ge ta je únyi anyin hmeledrany, ka habe, ama hawa ka osenyinâ áiân a бага. 35 Ke inya oge me ha e, m' öbun e so; oge me ca benucöbun, ke so bi möbun e laba so, me me ba vhet öbun ka he ka bi athnyabainy Than. 36 Ke a ne ke at ame únykúme, ka habe, e ca so hwakecin bi ka nokon hlu, a ne hia but hlu hanyâúú ün he ka faipoipo, ke úcú he ka helâe, e so e ame he ka ânyâ weny bi; e ca monu bi; e so ödru me he ka faipoipo. 37 Ke haba at ame tot hwege hnyi hnyekon, ke ba vheliny, ke e khana he ka musö weny bi, ke a hia but thamúâ hnyi hnyekon he ka behânâ nokon hlu, e so hnen hna ânyâ. 38 Anyin a wale, haba at ame ham nokon hlu he ka faipoipo, e so hnen hna ânyâ; ke haba at ame ca ham bi, e beönua hnen hna ânyâ. 39 Adre ca momo hnen hnanyibu, e ka tiga möt áiân; ke e ka mokcu бага, me e khana he ka faipoipo me hnen hna weny kâú; ke únyi ge Than thibi. 40 Ke beönua hnahic anyin momo e, e ka laba safac bala, wale lnök hna únykúme: ke inya oge me únykúme ae hu but gak Hanon Khong.

HNYIMAKAN 8.

KE haba ta je únyi adre hudo ka ta je hnatheat: E khan' öta a öta hia ate me wâ únykúme. Haba wâ únykúme ame obigânâ, ke haba ibetengiö ame okahwâ. 2 A ne únykúme ke at a e khana but ke únyi, e tiga ca wâ únykúme hnen at e helâ me ae úcú he ka wâ únykúme; 3 a ne ke at ame hnyokâ Khong, awe, e ame wâ únykúme at eling. 4 Haba ge hna an ta je únyi adre hudo ka ta je hnatheat, e khan' öta ae únyi baú eang hmeledrany hnatheat, ke ba minya ju ke Khong, ke khaca thibi. 5 Eja ke ne a ne hu ta je únyi adre háiâ, ka habe, je khong, ame ne ethö hnyi drany, ame ne eang hmeledrany; e se hia ta je khong, ke se hia ta je than; 6 ke so bi khaca thibi Khong köta, wale Kamen, únyi gan ta je únyi hia, ke haba öta me hobi kâú e; ke Than minya a khaca, a e Iesu Keriso, únyi gan ta je únyi hia, me öta minya a únyi gan. 7 Ke so hi ame ca wâ únykúme e hnen tavat hia: ke haba keihen, me adre me kenen ka ta je hnatheat ke ne o but hnyi bong ang, k' adre me an ta je únyi adre me hudo ka ta je hnatheat; me ame kong ut únykúmenödra anyin ae sēnyin. 8 Ke ca hnân osoi öta bi hnyi hnyimakan Khong ge hna han: anyin ae ca beönua anyita monu, at ka ca han; ke ca beönua minya bi anyita so, at ka han. 9 Ke wâ wia ju, wâ e nye ohaiâ tavat ae sēnyin hnen maniny je hnyekubun. 10 Anyin ame ne ö u hnen ke at, a u at wâhmakhmeto, ke u me laba he ka han hnyi uma umen hnatheat, hawa, ca hnân ohwegiâ oúnykúminy at ae sēnyin he ka an ta je únyi adre me hudo ka je hnatheat? 11 Anyin ame he ka ohia at ae sēnyin hnen ânyâm wâhmakhmeto, wale ke liamekeiny. waleji at ame mok Iesu Keriso hnân hobi kâú. 12 Öbun e monu helâe ka je liamekeiny, k' öbun e oaatâ únykúmenödra ae sēnyin, k' öbun e monu bi ka Keriso. 13 Anyin a wale, e ka haú liamekeiny mönya ge jeú, awe, oge me ca he bi nya ka han utiö nyiele balua, wâ oge nye ohaiâ liamekeiny mönya.

HNYIMAKAN 9.

HAWA, adre ca hna báúö nya? ca aposetolo bi nya? oge me ca hnyi ö Iesu Keriso a Tuhöta? ke ca anyik hu-

I. KORINITO 10.

liwa öbun hnyi Than? 2 Eja ke ne oge ne ca aposetolo ka keihen, me iny aposetolo bi köbun : anyin a haba öbun, me haten hnân ohmâ hnyi Than a iny aposetolo. 3 Walang hnök hna thu ka tavat adre me hnei nya, 4 ka habe, Hawa, e ca úcú köhmun he ka han me ic? 5 Hawa, e ca úcú köhmun he ka tha he ehe me laöiöhmun a hnyat labageju, helâ me keihen je aposetolo, me je liamekeiny me Than, me Kefa? 6 Hawa, hake inya me Banaba ae úcú köhmu thibi he ka hamöhmu degecâ huliwa hnyi unyin? 7 Ie ke at ame he ka vat me ka hamen bi he ka bi hwaban kâu? ie at ame belökâ hnyei vine, k'ame ca he ka hnyi ijem wan? ke ie at ame hân hnahat meno, k'ame ca he ka hnyi ijem debai únyi hnyin? 8 Hawa, oge me ha ta je únyi e helâ me at? k'ame ca ha bi helâe hnen hnanyibu? 9 Anyin adre hia but set hnyi hnanyibu anyi Mose, ka habe, Ca he ka ca hnyimen bolok ame ututo hwit. Hawa, Khong ame únykúme thibi ge ta je bolok, 10 ke hawa, e ame ha e hobi köta thibi? Eke, adre sihnalimen hobi köta : anyin ae úcú ka at ame trohnen he ka trohnen gejon, ke haba at ame ututo hwit he ka ututo gejon hnen hna he ka hu? 11 Öhmun e ne hia but tâ unyibun ta je únyi anyin hanu, hawa, e gan öhmun e ne he ka meno ta je únyi hnyi unyin gabun? 12 A ne munyi ânyâ wisa eling gabun hnen keihen, hawa e ca ti úcú köhmun he ka munyi ânyâ? Ke so bi öhmun e ca vheno wisa eling; ke öhmun e hokhnyokâ ta je únyi hia thithö, wâ öhmun nye ovhelâ úthumetu ae so anyin Keriso. 13 Ke ca khan' öbun a haba tavat adre me huliwan ta je únyi ae kap, me adre me an ta je únyi hnyin uma kap, ke haba tavat adre me bi athnyabainy taben hut, me adre me ve hu hwajekhöüdra me taken hut? 14 Ke helâ minya hna owisa hnen Than, a haba tavat adre me khetâ úthumetu ae so, adre me he ka möt únyi hnyi úthumetu ae so. 15 Ke oge me ca hnyi ânyâ ke únyi hnyi ta je únyi e : ke oge me ca sihnalimen minya ta je únyi eang, m' adre me he ka ânyâ helâe könya : anyin ae so oge me he ka mok, ke kong e he ke at ka oúnyibâúâ hnök hna hobeluâ. 16 Anyin oge ne khetâ úthumetu ae so, e ba hnân ohobeluâ; anyin adre musi nya; anyin ekölö gak iny ka ca khetâ but úthumetu ae so. 17 Anyin oge ne ânyâ únyi e ge hnyekuk, e hu but könya hwaban : ke e ka ca ânyâ hnen hnyekuk, adre me hna könya

hanymök. 18 Ke ieú hwaban könya? Walang, iny ka he ka khetâ úthumetu ae so, oge me he ka ham bâúâ úthumetu ae so anyin Keriso, me oge me ca he ka musi hwege hnyi úthumetu ae so. 19 Eja ke ne oge ne he ka ba hanymök ka tavat hia thithö ehac, oge me ka hamök hnö nya bi ka athnyabaidra hia, me me se hia tavat adre me he ka hmehmelö nya. 20 Oge helâ me at Juda, ka at Juda, me me hmehmelö nya at Juda; ke oge me helâ me at hmelen hnanyibu, ka tavat hmelen hnanyibu, ke ca hmelen hnanyibu bi nya, me me hmehmelö nya tavat hmelen hnanyibu; 21 ke helâ me ba hnanyibu ka tavat ae ba hnanyibu, ke ca ba bi hnanyibu gak ge Khong, ke inya hmelen hnanyibu ge Keriso, me me hmehmelö nya tavat ae ba hnanyibu. 22 Inya helâ me at ae sényin ka tavat a ödra sényin, me me hmehmelö nya tavat a ödrin sényin : oge me hnyi hom ta je hwakecin hia ka tavat hia, me inye hwege thö he ka omelö keihen. 23 Ke oge me ânyâ ta je únyi hia can úthumetu ae so, m' ate me he ka tha hu. 24 E ca khan' öbun a haba tavat adre me wadring hnyi úölogot, me adre me tha wadring hia, ke khaca thibi at ame he ka hok hwaban? E Wadring th' öbun helâe, m' öbun e he ka hu. 25 Ame hokhnyokâ ta je únyi hia thithö hnen tavat adre me ve bi tudra hnyi je mat. Adre me ânyâ m' adre me he ka hu gadra korona ae bobot; ke haba öta me ame he ka hu gata korona ae ca bobot. 26 Ke inya oge me wadring helâe, ca hnyi loloâ bi; inya oge me vat helâe, ca helâ me at ame kot ang : 27 ke oge me hom úhnyúkongo unyik, me thaluâ e : wâ oge nye hia but khetâ ka keihen, ke hwaban e adre me digic nya but.

HNYIMAKAN 10.

HNYAT me lakeiny lö, e ca wek e me ca khan' öbun a ga mwi hia lakamöta hnyi hmelen úlá, ke adre me gethen hia hnyi köiö; 2 ke adre bapataisoï ödra hia kö Mose hnyi úlá me hnyi köiö; 3 ke ödra hia adre me tha han jeúiny hanu; 4 ke ödra hia adre me tha ijem belen hanu : anyin adre me ic únyi hnyi kiciny hanu ame úhnúhnú : haba kic eling, me Keriso. 5 Ke ame ca senyin Khong ka tavat gadra ae se hia : anyin adre me hudrin ju hnyi hnyebuba. 6 Wale ta je únyi hnân haten köta, m' ate me ca he ka be-

I. KORINITO 11.

hnyekuta ta je únyi ae kong, heláji me hnödra hna behnyekon. 7 Ke haba khaca, ca he öbun ka hmi ka je hnatheat, helá me keihen gadra; helá me hna sihnalimen, ka habe, Ame laba ju tavat he ka han me ic, me adre me tödra he ka mat. 8 Ke ca he minya öta ka bi únyi monu, helá me keihen gadra ame ányâ, me ame mokcu twente theri thauzan hnyi bong a khaca. 9 Ke ca he minya öta ka cubec Than, helá me keihen gadra adre me cubec, me adre me mokcu ge ta je on. 10 Ke ca he minya öbun ka ulit, helá me keihen gadra adre me ulit, me adre me mokcu ge at ame ohia. 11 Ke ame o but ta je únyi hia thithö e ködra me hnân haten; ke adre sihnalimen hnân n' öta, wale a o köta obiny ta je dö. 12 Anyin a wale haba at ame únykúme a e ame tethmâ, wâ eâu, e nye ü but. 13 Ame ca o bi köbun ke úcúbic, waleji ae ca úcú ka at: ke e hnathu Khong, at ame ca he ka hn' öbun ka hnyi úcúbic hon hnöbun hna khana; ke so bi e ame he ka bi deny kec úheny hnyi úcúbic, me me khan' öbun he ka hokhnyokâ.

14 Anyin a wale hnyat a oúnykúmik lö, kec ut ge hmi ka je hnatheat. 15 Inya oge me fuc ka tavat ae metâ; únykúme ju öbun hnök hna ha. 16 Haba utköiöiny ole ötin e oleâ, hawa ca e bi hnyi hnötin hna tha hu hnyi dren Keriso? Haba areto ötin e susubâ, hawa, ca e bi ate me tha hu hnyi unyin Keriso? 17 anyin a öta se hia, ke khaca thibi areto me khaca unyin: anyin a öta hia ate me ve hu únyi hnyi areto a khaca. 18 Wâ bi at Isaraela hoton unyin; hawa, haba tavat adre me han hnyi taben hut, e ca tha hu ködra me taben hut? 19 Ieú oge me he ka ha? Hawa, e únyi hnathu únyi adre bi hut ka hnatheat? ke únyi hnathu hnatheat? 20 Ke oge me ha, ka habe, haba ta je únyi ame hudo Aten ta je hnyei, adre me hudo ka ta je demoni, ke ca bi ka Khong: ke ca wek e me tha öbun me ta je demoni. 21 E ca khan' öbun he ka ijem kaia belen Than me kaia belen ta je demoni: e ca khan' öbun he ka ve hu únyi hnyi laulau anyin Than, me laulau anyin ta je demoni. 22 Hawa, ate me cubic Than he ka ciâ? hawa, öta hwege hon e?

23 E úcú ta je únyi hia thithö, ke ca únyi hnathu bi ta je únyi hia thithö. E úcú ta je únyi hia thithö; ke haba ta je únyi hia thithö, me ca hnân okahwa. 24 Ca he bi ke at ka elâm soiny bi, ke so bi

soiny ke at bi. 25 Haba ta je únyi hia adre uco hnyi hna úcú, an ju, ke ca hnei can bi únyi hnyi únykúm sah; 26 anyin a anyin Than hmeledrany me unöngötiny hia. 27 A ne haw' öbun ke at ame ca labageju bi, ke webun he ka he; an ju ta je únyi adre ip hnyi hnyimaköbun, ke ca úhnei bi, can únyi hnyi únykúm sah. 28 Ke e ka ha köbun ke at, ka habe, Adre hia but hudo únyi ang ka hnatheat, awe, ca an bi, can at a omanená, ke únyi hnyi únykúm sah: 29 oge me ha ge únykúm sah anyin ke at, ke ca ányâm bi; anyin a ieú ame he únykúm sah anyin ke at ka únykúme hnök hna he baú? 30 Ke oge ne han me ole, ieú adre me he ka haikongu nya gan hnyi únyi oge me oleâ? 31 Anyin a wale, öbun ka he ka han, me ic, me ányâ ke ta je únyi bi, ányâ hia thö hnân oganá Khong. 32 Ca he öbun ka bi jöniny ka at Juda, me at Heleni, me ekalesia anyin Khong: 33 helá me inya oge me osenyiná tavat hia hnyi ta je únyi hia, oge me ca elâm bi soik, ke so bi soiny tavat ae se hia, m' adre me möt ut.

HNYIMAKAN 11.

ÚCÚCÚBINGI nya ju öbun, helá me inya ka Keriso.

2 Ke inya oge me haisoi öbun, anyin a öbun e únykúmi nya hnyi ta je únyi hia thithö, k' öbun e kât hmâ ta je hna úne, heláji me hnök hna ham köbun. 3 Ke wek e me khan' öbun a haba Keriso, me ban obaga hia; ke haba obaga, me ban omomo; ke haba Khong, me ban Keriso. 4 Haba бага ame hic me perofeta k' ame tube ban, me e ame okongoâ ban. 5 Ke haba momo ame hic me perofeta k' ame ca binybak bi, me e ame okongoâ ban: anyin a haba e me helâke a giâ. 6 Anyin a haba momo ame ca binybak, me so e ame subâ leúnen ban; ke ame ne hnân ohmehma momo he ka subâ leúnen ban, me giâ minya, e so he ka binybak. 7 Anyin ae ca úcú бага he ka binybak, anyin a e we me hmanenanginy Khong: ke haba momo, me hmanenangin бага. 8 Anyin a haba бага me ca únyi bi ge momo, ke so bi momo únyi ge бага: 9 anyin adre me ca op бага hobi kâu momo, ke so bi momo hobi kâu бага: 10 waleling me me úcú momo he ka hu haten musi hnyi hon ban, can ta je angela. 11 Ke so bi, e ba momo unyin Than, e ka ba бага, ke ba бага, e ka ba

I. KORINITO 12.

momo. 12 Anyin a haba momo, me únyi ge baga, ke helâe baga, a únyi ge momo, ke haba ta je únyi hia thithö, me únyi ge Khong. 13 Únykúme ju öbun: hawa, e úcú momo he ka hic ka Khong k' ame ca binybak bi? 14 Hawa, adre ca n' öbun ge hwakecin hnyi unyin a hnân okongoá baga e ka beú leunen ban? 15 Ke hnân ohmanenangá momo e ka beú leunen ban: anyin adre ham kâu leunen me hnân hnabinybak. 16 Ke a ne ke at ame weny he ka ivinö, me ba hwakecin helâe gahmun, me ta je ekalesia anyin Khong.

17 Ke oge me ca haisoi öbun hnyi únyi eang oge me he ka húna, a öbun e ca úkhacaköu hobi kâu so, ke hobi kâu bi monu. 18 Anyin a walang únyi a bán, ka habe, oge löng ut, öbun ka he ka úkhacaköu hnyi ekalesia me öbun e imoukôu; ke oge me únykúme me hnathu ke je hofuc. 19 Anyin ama he ka hu je imoukôu unyibun, me me manen dut tavat ae hnathu gabun. 20 Anyin a wale hnyi únen öbun e úkhacaköu, e pason he ka han jeú hnyi sahac anyin Than: 21 anyin a ödra ka han, öbun e ve böbun ka hom an jeú bi hnyi sahac; ke mekihnânem ke at, ke a ic monu ke at. 22 Hawa? e ba umöbun je uma he ka han me ic hnyin? ke hawa, öbun e öúnyibâúú ekalesia anyin Khong, me ohmehma ta je theduoc? Ieú oge me he ka ha köbun? oge me he ka haisoi öbun hnyin e? Oge me ca haisoi öbun.

23 Anyin oge me hna köbun waleji hnök hna kap únyi ge Than, waleji hnen Than Iesu hna hom areto hnyi lit adre alecuá e hnyin; 24 ke a hia but oleá, e ame susubâ, me ha, ka habe, Hom dö, an ju, walang unyik hobi köbun: ányâ thö e hnân he ka únykúme könya. 25 Ke helâe minya me kaia, hwaban hna han, ame ha, ka habe, Haba kaia eang, me úhahinykôu a teb únyi hnyi drök: ányâ thö e he ka únykúme könya hnyi ta je únen öbun e ijem hnyin. 26 Anyin a haba ta je únen öbun e an hnyin areto eang, me ijem hnyin kaia, me öbun e omanená mok anyin Than, ke ne o but únen e ame he ka o hnyin. 27 Anyin a wale, haba at ame he ka an areto, me ijem kaia anyin Than, ke ka ca úcú bi, me ka jöniny bi unyin me dren Than. 28 E so e he at ka bán ka elâm wia e bi, ke helâe e ame he ka an areto me ijem kaia. 29 Anyin a haba at ame han me ic, ke ame ca wáhmakhmeto bi unyin Than, ame han me ijem hnaúhangö hobi kâu e bi. 30

Anyin a wale, at se hia gabun ae sényin me mok, ke at se hia minya adre me mokut. 31 Ke ate ne hamöta ka wáhmakhmetu öta, me adre me ca he ka owis' öta. 32 Ke at ka owis' öta, me ame kuc öta Than, m' ate me ca tha hnauhangö bi me hmeledrany. 33 Anyin a wale, hnyat me lakeiny mönya lö, öbun ka úkhacaköu he ka han, me úlu-bahingköu öbun. 34 A ne mekihnânem ke at, me so e ame han hnyi hnyaban; me me ca jöniny bi anyibun úkhacaköu. Ke oge me he ka owisa ke ta je únyi, iny ka o but.

HNYIMAKAN 12.

HNYAT me lakeiny lö, e ca bewek e me ca khan' öbun bongon bwihlany anyin hanu. 2 E khan' öbun, ka habe, habaji öbun tiga Aten ta je hnyei, me adre me lili öbun ka ta je hnatheat ae hum, k' adre me lili öbun monu öbun. 3 Anyin a wale, inya oge me thumetu öbun a g' ame ca fuc únyi ge Hanon Khong at ame ha, ka habe, anathema Iesu; ke ba at ae khana he ka ha, ka habe, Iesu thibi Than, ke so bi únyi ge Hanu Kap.

4 E ve bongon ta je bwihlany ke khaca thibi Hanu. 5 Ke ve bongon ta je hannyen, ke khaca thibi Than. 6 Ke ve bongon ta je huliwa, ke khaca thibi Khong, at ame huliwan ta je únyi hia unyita hia. 7 Ke adre me ve ham ka tavat hia hna omanená hnen Hanu, me me hu troban bi. 8 Anyin adre ham ka ke at hofuc ae metâ a deny Hanu; ke ka ke at hofucin wá únykúme hoton Hanu a khaca: 9 ke ka ke at labageju únyi ge Hanu a khaca; ke ka ke at man he ka omelö ta je komok únyi ge Hanu a khaca; 10 ke ka ke at he ka ányâ je úöman; ke ka ke at he ka perofeta; ke ka ke at he ka wá únykúme ta je hanu; ke ka ke at he ka ha je hwen hnyei; ke ka ke at he ka wia hwan hnyei: 11 ke adre me ányâ hia e únyi ge Hanu a khaca, k' ame ve khená ka tavat helá me weny.

12 Anyin a khaca thibi unyin, ke se hia bi ta je ong outhunyin, ke haba ta je outhunyin hia, me se hia, ke so bi khaca thibi unyin; helâe minya Keriso. 13 Anyin adre bapataisoi öta hia hnân unyin a khaca únyi ge Hanu a khaca, a ne at Juda a ne at Heleni, a ne aten hwenbâ, a ne at adre hna báúú; ke adre kun' öta hia ka ijem únyi hnyi Hanu a khaca. 14 Anyin a ca khaca thibi outhunyin hnyi

I. KORINITO 13, 14.

unyin, ke se hia bi. 15 A ne ha can, ka habe, Iny ca hanen bi nya unyin, anyin a iny ca benyin bi nya ; me ca hnathu bi ae ca hanen bi unyin. 16 Ke a ne ha hnyiköny, ka habe, Iny ca hanen bi nya unyin, anyin a ca ecmak bi nya ; me ca hnathu bi ae ca hanen unyin. 17 A ne ecmak hia unyin, ewa únyi hnân löng? Ke a ne hnân löng hia, ewa únyi hnân bubune? 18 Ke a hia but Khong ve ip ta je ong outhunyin hnyi unyin, helâ me weny. 19 A ne khaca thibi je outhunyin hia, ewa biju unyin? 20 Awe, e se hia je outhunyin ke khaca thibi bi unyin. 21 E ca khana bi ecmak he ka ha ka hnyam, ka habe, U ca únyi hnathu könya : ke haba khaca, e ca khana bi ban he ka ha ka li can, ka habe, Öbu ca únyi hnathu könya. 22 Ohe, ke so bi, haba je ong outhunyin, wale a helâke me sēnyin, me e únyi hnathu hmönyin : 23 ke haba je ong outhunyin ate me oúnyibáúâ, me wale ate me ti oúnyihnathoâ ; ke adre ohmanenangâ únyi ae ca hmanenang bi ; 24 ke haba ta je outhunyin ae hmanenang, me ba únyi ae hia hnyin : ke haba Khong ame útretraoköuâ unyin hia, ke e ame ogânâ outhunyin ae ba soiny ; 25 me me ba imoukôu hnyi unyin ; ke so bi me me útuököuâ je ong outhunyin. 26 Ke a ne vec dö ke ong outhunyin, me ame he ka tha vec hia je ong outhunyin, ke adre ne otheibâ ke outhunyin, me ame he ka tha senyin hia je outhunyin. 27 Ke haba öbun a unyin Keriso öbun, ke ve je outhunyin bi. 28 Ke haba Khong ame otílâ keihen hnyi ekalesia, a bân ta je aposetolo, ke loiny ta je perofeta, ke kuniny tavat úne, ke hwaban e, tavat huliwa ae man, me je bwihlanyiny hna omelö tavat ae hu mok, me tavat úhadruö, me tavat ae metâ hnyi úhnenamö, me ta je hwen hnyei. 29 Hawa, ta je aposetolo hia bi? ta je perofeta hia bi? tavat úne hia bi? tavat huliwa hia bi ae man? 30 hawa, e hu gadra hia bi ta je bwihlanyin hna omelö tavat ae hu mok? adre me ve ha hia ta je hwen hnyei? tavat wia hwen hnyei hia? 31 Ke weny hwegiâ th' öbun ta je bwihlany ae nua. Ke inya oge me omanená köbun gethen ae beönua.

HNYIMAKAN 13.

OGE ne fuc hnyi je ifucin tavat me ta je angela, ke ba gak ibetengiö, me iny úcú me fao ame cuha, me simebalo ame

kitenge. 2 Ke oge ne at perofeta ; ke khanö nya ta je únyi ae iyong, me je metâ hia ; ke a ne hu gak labageju hia, me me khanö nya he ka oc ta je bucen, ke ba gak ibetengiö, awe, iny ca únyi hnathu bi. 3 Ke oge ne khenâ anyik ta je únyi hnân hân tavat ae theduoc, ke oge ne ham unyik m' adre me he ka thong degecâ, ke ba gak ibetengiö, awe, e ba troban könya. 4 Haba ibetengiö, me at ae lingvec, me menyik ; e ca at ame ihunyinköu bi ibetengiö ; e ca at ame hobelöu bi ibetengiö, k' ame ca bi gan bi, 5 k' ame ca ányâ hwakecin ae ca úcú, k' ame ca hamen bi ka elâm anyin ta je únyi, k' ame ca ie hmönyin bi, k' ame ca únykúme bi hulö ; 6 ame ca senyinâ hwakecin ae ca wisa, ke ame senyinâ hnathu ; 7 e at ame hokhnyokâ ta je únyi hia, at ame kap ta je hofuc hia, at ame gejon ta je únyi hia, at ame hombeuâ ta je únyi hia. 8 Haba ibetengiö, me ame ca he ka um dö : ke ame he ka hia ta je hna perofeta ; k' ame he ka aú but ta je hwen hnyei ; k' ame he ka hia metâ. 9 Anyin ae khan' öta thibi hanen, ke ate me perofeta hanen : 10 ke e ka o but únyi ae bekhöt, me adre me he bi ka ohia únyi ae ca bekhöt. 11 Habaji k' iny tiga wanakat, me oge me fuc hwen wanakat, ke oge me löng hwen wanakat, ke oge me únykúme hwen wanakat : ke oge me gan dut, me oge me degec ut hwen wanakat. 12 Anyin a walang ang ate me bwele hnyi uselat ae húkehmen ; ke haba nyiele, me úhnyimakötaköu : walang ang e khanö nya thibi hanen ; ke nyiele oge me he ka wâhmakhmeto helâ me hnödra hna hia but wâhmakhmetu nya. 13 Ke walang ang e tethmâ kun ta únyi eang, ka habe, labageju, me geju, me ibetengiö ; ke haba at ae beönua hnyi kun ta únyi eling, me ibetengiö.

HNYIMAKAN 14.

HNU hoton ju ibetengiö ; ke weny hwegiâ th' öbun ta je únyi anyin hanu, ke e so e webun he ha perofeta. 2 Anyin a haba at ame hwen ke hnyei, e ame ca fuc ka at, ke ka Khong bi ; anyin ae ba at ame wâ únykúme ; ke e ame ha hnyi hanu ta je únyi ae iyong. 3 Ke haba at ame perofeta ame fuc ka tavat hnân okahwa, me sihwege, me ötubwelâ. 4 Haba at ame hwen ke hnyei me ame okahwa e bi ; ke haba at ame perofeta ame okahwa ekalesia. 5 E wek öbun e he hia ka ha ta

I. KORINITO 14.

je hwen hnyei, ke nua bi wek a öbun e he ka perofeta : anyin ae nua at ame perofeta hon at ame hwen ke hnyei, at ka ca wia bi, m' adre me he ka okahwa ekalesia. 6 Ke walang ang, hnyat me lakeiny lö, iny ka he ka o köbun, me fuc hnyi je hwen hnyei, ieü soik köbun, iny ka ca fuc köbun hnyi hna omanená, ame ne metá ame ne hna perofeta, ame ne hna únö? 7 Helâe minya ta je únyi ae ba möt gadra ame mea hwan, a ne köwi, a ne kitara e ka ca ve hwan bi, ame he ka hawa ka khan' öta hwan köwi me kitara? 8 Ke a ne hnân loloâ hwan khoto, ie at ame he ka pena-pena ka hnyi vat? 9 Ke helâe minya öbun, öbun ka ca ha ta je hofuc ae manen hnen bohmen, me ame he ka hawa ka manen hna ha? anyin a öbun e he ka fuc ka hnyi ang. 10 E se hia ta je ifucin eang hmeledrany, ke ba la khaca ame ca öüco bi ke bongon. 11 Anyin a wale, a ne ca khanö nya bongon ifucin, oge me he ka helâ me Aten ta je hnyei ka at ame fuc, ke haba at ame fuc, me helâ me Aten ta hnyei könya. 12 Helâe minya öbun, öbun ka weny hmönyiná ta je bwihlanyin hanu, elâm d' öbun me me beönua he ka okahwa ekalesia. 13 Anyin a wale haba at ame ha hwen ke hnyei, sumâtâ thö me me he ka wia. 14 Anyin oge ne he ka hic hnyi hwen ke hnyei bi, ame hic hanuk, ke ba troban ge oúnykúmik. 15 Ke ame he ka hawa? Oge me he ka hic ge hanu, ke oge me he ka hic ge hna únykúme minya : oge me he ka khumöng ge hanu, ke oge me he ka khumöng ge hna únykúme minya. 16 Ke u je ne he ka ole ge hanu, ame he ka kâmâu ka ha Amen ka ányâm ole, hnen at adre ca ná, anyin e ca khana hnâm hna ha? 17 Ke so hnâm hna ole, ke ame ca okahwa bi ke at. 18 Inya oge me ole ka Khong, anyin ae gan hnök hna fuc hnyi je hwen hnyei hubun hia : 19 ke so bi, e wek oge me he ka ha ka ekalesia ta je hofuc a thabúng hnen únykúmenök m' oge me he ka ná keihen, hon ta je hofuc a ten thauzan hnyi hwen ke hnyei.

20 Hnyat me lakeiny lö, ca hnyok wainkong bi öbun hnyi únykúme : ke so bi hnyok mendreng hnyi úokonguny, ke hnyok at hnathu but hnyi únykúme. 21 Adre sihnalimen hnyi hnanyibu, ka habe, Oge me he ka fuc ka hnyei ang deny tavat a hwen ke hnyei bi, me hnen esongodiny je atkanyua ; ke so bi, adre me ca he ka ling nya bi, haingen Than. 22 Anyin a

wale hnân haten ködra adre me ca labageju bi hwen ke je hnyei, ke ca ka tavat bi adre me labageju : ke haba hna perofeta, me hobi kâu tavat adre me ca labageju ke ca hobi kâu tavat adre me labageju. 23 Anyin a wale, a ne úkhacaköu thö ekalesia hia, ke ödra hia adre me ve ha je hwen hnyei, ke ame didrö tavat adre ca ná, me tavat adre ca labageju, hawa, adre me ca he ka ha, ka habe, öbun e monu but? 24 Ke so bi adre ne perofeta hia ; ke ame didrö ke at ame ca labageju, ame ne ke at adre ca ná, me ödra hia adre me ná e, me ödra hia adre me owisa e : 25 adre omanená ta je únyi ae iyong hnyi hnyekon ; me e ame he ka ta ju hnyimanan hnyikânâi me khudrung ka Khong me ha, ka habe, e hnathu e unyibun Khong.

26 Hnyat me lakeiny lö, ame he ka hawa? Öbun ka úkhacaköu, öbun e ve hom ke khumöng, me hna sihwege, me hna omanená, me hwen ke hnyei, me hna wia. E so he ka ányâ ta je únyi hia hnân okahwa. 27 A ne ke at ame fuc hnyi hwen ke hnyei, e so ödru me lo, ame ne kun, he ka ha gaga ; ke hamen ke at he ka wia : 28 ke a ne ba at ame he ka wia, awe, laba hnyibú ju e hnyin ekalesia ; me ka fuc bi kâu, me ka Khong. 29 E so ame he je perofeta ka fuc, ame ne úsa lo, ame ne kun, ke ame he keihen ka löngmakhmeto. 30 Ke adre ne omanená ke únyi ka ke at ame laba eling, hamen at a bán he ka laba hnyibú. 31 Anyin ae khan' öbun hia he ka ve perofeta, me me khan' ödra hia, me kahwa hia : 32 haba ta je hanon je perofeta, me adre me löng hoton ta je perofeta ; 33 anyin a ca únyi ge Khong imonumonu, ke so bi hnabic ; helâe hnyi ta je ekalesia hia anyin wapak.

34 Hamen omomo he ka laba hnyibú hnyi ekalesia : anyin adre me ca hn' ödra he ka fuc ; ke so bi he ka löng hoton helâ me hna ha hnyi hnanyibu. 35 Ke a ne wedra he ka khan' ödra ke únyi, me so adre me hnö laöiödra hnyi hnyabadra : anyin a hnân ohmehma, e ka he momo ka fuc hnyi ekalesia. 36 Hawa, a o but hofuc hwan Khong unyibun? hawa, ame o thibi köbun?

37 A ne ke at ame únykúme a e perofeta, ke aten hanu, me so e ame wâhma-khmetoâ ta je únyi oge me sihnalimen köbun, a wale hnanyibu anyin Than. 38 Ke a ne ca khana bi ke at, me so e ka ca khana bala ju.

I. KORINITO 15.

39 Anyin a wale, hnyat me lakeiny lö, e so e webun hwegiâ he ka perefota, ke ca thawâ bi he ka ha hwen ta je hnyei. 40 Ke so bi, ânyâ ta je únyi hia hnyi wisa, me hna penapena wia.

HNYIMAKAN 15.

HNYAT me lakeiny lö, inya oge me omanená köbun úthumetu ae so, waleji oge me omanená köbun, k' öbun e kap, me tethmâ hnyin, 2 k' adre me omeli öbun kâu; oge me omanená ta je hofuc, waleji oge me khetâ köbun hnyin, ke öbun e ne kât hmâ, me ca labageju baú bi öbun. 3 Anyin oge me bök ka ham köbun únyi oge me kap, a g' ame mok Keriso can anyita ta je hulö helâ me hna sihnalimen; 4 ke adre me konâm e, k' adre me omelö hmetu thö hnyi bong a kuniny, helâ me je hna sihnalimen; 5 ke e ame manen kö Kefa; ke hwaban e ka hnyat a twelv; 6 k' ame manen hwaban e ka je liamekeiny ae se hia hon faiv haded, ke möt tavat ae se hia gadrin ke ne o but hnyi bong ang, ke a mokut keihen; 7 hwaban e ame manen kö Iakobo, ke hwaban e ka je aposetolo hia; 8 ke hwaban e, e ame manen minya könya, helâke me ke at a köluhabú. 9 Anyin a inya ang at ae ti úhnyúkong hnyi ta je aposetolo, ke ca úcú he ka hawo nya me aposetolo, anyin a oge me ovecá ekalesia anyin Khong. 10 Ke haba inye helâng, me únyi ge ibetengiö baú anyin Khong: ke ca únyi baú bi anyin ibetengiö baú e ame omanená könya: ke nua anyik huliwa hon hnyat hia: ke ca ka únyi gak, ke so bi únyi ge ibetengiö baú anyin Khong wale a ham könya. 11 Ke ame ne inya, k' ame ne ödrin, öhmun e khetâ helâe, ke öbun e kap minya helâe.

12 Ke adre ne khetâ, ka habe, Adre me omeli Keriso hmetu únyi hnyi hna mok, ama hawa ka ha keihen gabun a e ba möt hmetu únyi hnyi hna mok? 13 Ke a ne ba möt hmetu únyi hnyi hna mok, awe, adre ca hia but omeli Keriso hmetu bi: 14 ke adre ne ca hia but omeli Keriso hmetu bi, me únyi baú hnöhmun hna khetâ, ke únyi baú minya bi anyihmun labageju. 15 Eke, ke adre me wâ a öhmun ang hnyat öhmun e ohnathoâ thoiâ Khong; anyin a öhmun e ohnathoâ Khong a g' ame omeli Keriso hmetu; waleji e ame ca omeli hmetu, e ka hnathu a g' adre me ca omelö hmetu tavat adre mokcu. 16 Anyin adre

ne ca omelö hmetu tavat adre mokcu, awe, adre ca hia but omeli Keriso hmetu bi: 17 ke adre ne ca omeli Keriso hmetu bi, me únyi bâu anyibun labageju; ke öbun bala hnyi anyibun ta je hulö. 18 Ke hi' ödra but minya tavat adre me mokut unyi Keriso. 19 Ate ne geju Keriso hnyi möt thibi ang, awe, öta tavat ae hmak hnyok hon tavat hia thithö.

20 Ke so bi adre hia but omeli Keriso hmetu thö úheny hnyi hua mok, ke e at a bân ka möt ge tavat adre me mokut. 21 Anyin ame o but mok únyi ge at, k' ame o but möt hmetu únyi hnyi hna mok únyi ge at. 22 Anyin adre mok hia ga Adamu, helâe adre me ke ha omelö hia hmetu ge Keriso. 23 Adre me he ka ve tot gaga, a ban Keriso, hwaban e je laten Keriso, e ka o but. 24 Me ame he ka o obiny, me e ame he ka hna dokhon dökhü ka Khong, wale Kamen: e ka hia but ohia ta je dokhu hia, ke ta je musi hia, ke ta je man hia. 25 Anyin ae úcú kâu he ka musi ke ne o but a hia but ip hmelen li can ta je iwahnaihmiöny mē hia. 26 Haba iwahnaihmiöny a biliny e ame he ka ohia, me mok. 27 Anyin, E ame ip hnyi hmelen li can ta je únyi hia thithö. Ke hnyi hnen hna ha, ka habe, Adre ip ta je únyi hia thithö hnyi hmelen, me e manen a ca háiâ e minya bi, waleji at ame ip ta je únyi hia thithö hnyi hmelen e. 28 Ke a hia but öhnyikánâ ta je únyi hia thithö hnyi hmelen e, me adre me he ka öhnyikánâ minya bi Nokon hmelen at ame öhnyikánâ ta je únyi hia thithö hmelen e. me me Khong thibi ae ti beönua hon hia.

29 Ke hawa gadra adre bapataisoí ödra hnân hwaban tavat adre mokcu? ödra ka ca omelö hmetu thö tavat adre mokcu. hnân eú adre bapataisoí ödra me hwaban tavat adre mokcu? 30 ke hnân eú öhmun e laba hnyi je hwakecin hna ootâ hnyi je awa hia? 31 Hnyat me lakeiny lö, inya oge me ha hwegiâ hnyi hnök hna hobelua gabun únyi ge Keriso Iesu a Tuhöta, a oge me mokcu hnyi je bong hia thibut. 32 Oge ne hia but vat me ta je meno úküe hnyi Efeso hoton hwakecin at, ieú troban könya? At ka ca omelö hmetu bi tavat adre mokcu, awe, e so ate me han me ic. anyin ate me he nyi ka mok. 33 Ca iyau öbun bi: úhnenamö ae monu, wale at ame okongoâ hwakecin ae so. 34 Hmak dö k hwakecin ae wisa, ke ca mádrâ bi hulö.

I. KORINITO 16.

anyin ae ca khana bi keihen Khong : inya oge me ha hnân ohmehm' öbun.

35 Ke ame he ke at ka ha, ka habe, ame he ka hawa ka möt hmetu tavat adre mokcu? ke ie unyin adre me he ka o mē?

36 At monu, ame ca he ka möt hnâm hna tâ, e ka ca bobot bi : 37 ke haba hnâm hna tâ, me u me ca tâ bi unyin ame he ka manen, ke so bi wan thibi, ame ne hwit, ame ne ke wan bi ; 38 ke haba Khong ame ham unyin, helâ me hnen hna weny, ke ve unyin bi ka ta je wan. 39 Haba ta je utiö me ca khaca bi bongon, e ke viny bi at, ke ke viny bi meno, ke ke viny bi je meno adre me gâ, ke ke viny bi wâ. 40 E hu ta je unyin drany, me ta je unyin hmeledrany : ke ke hmanenanginy bi aten drany, ke ke hmanenanginy bi aten hmeledrany. 41 E ke hmanenanginy bi seünö, ke ke hmanenanginy bi tehi, ke ke hmanenanginy bi ta je okhû ; anyin ae ve bongon hmanenanginy ke okhû me ke okhû. 42 Helâe ge möt hmetu anyin tavat adre mokcu. Adre me tâ hnyi bobot ; ke adre me ötilâ hmetu hnyi ca bobot bi ; 43 adre me tâ hnyi ca so ; adre otilâ hmetu hnyi hmanenang : adre tâ e hnyi sēnyin ; adre otilâ hmetu e hnyi man : 44 adre me tâ e hnyi unyin hmeledrany ; adre me otilâ hmetu e hnyi unyin hanu. A ne hu unyin hmeledrany, awe e hu minya unyin hanu. 45 Ke helâ me hna sihnalimen, ka habe, Adre up Adamu at a bân hanu ae möt. Ke Adamu a biliny hanu at a ham möt. 46 Ke a ca bân bi únyi a hanu, ke so bi únyi a unyin ; ke hwaban e únyi a hanu. 47 Únyi eang hmeledrany at a bân, aten kânâ : ke úheny hnyi drany at a loiny. 48 E úcú tavat únyi hnyi kânâ, me at únyi hnyi kânâ ; ke úcú at únyi hnyi drany, me at únyi hnyi drany. 49 Ate me hia but we aten kânâ, helâe ate me he ka we aten drany.

50 Hnyat me lakeiny, oge me ha, ka habe, e ca khana viny me dren he ka hu dökhu dokhon Khong ; ke ca khana minya bobot he ka hu hna ca bobot bi. 51 Wâ bi, inya oge me ha köbun únyi ae iyong, ka habe, ate me ca he hia ka mokut, ke adre me he ka wi' öta, 52 e ti logot, helâ me thuthubademak, hnyi hna túâ khoto a biliny : anyin ame he ka fuc khoto, ke adre me he ka omelö hmetu thö tavat adre mokcu ka hnyi ca bobot bi ; ke adre me he ka wi' öta. 53 Anyin ae úcú bi he ka khavâ hna bobot eang ge hna ca bobot

bi, me hna mok eang ge hna ca mok bala bi. 54 Ke at ka hia but khavâ hna bobot eang ge hna ca bobot bi, me hna mok eang ge hna ca mok bi, awe, ame he ka hwädâ thö hna sihnalimen, ka habe, Ame utâ but mok hnen dökhu. 55 Mok lö, ewa dokhom dökhu? Mok lö, ewa údö gam? 56 Haba údöiny mok, me wale hulö ; ke haba maniny hulö, me wale hnanyibu : 57 Ke oleâ ka Khong at ame ham köta dökhu únyi ge Tuhöta Iesu Keriso. 58 Anyin a wale, hnyat a oúnykúmik lö, tethmâ ju öbun, ca bwebwet, ke hwege bala thö hnyi huliwa anyin Than, anyin ae khan' öbun a g' ame ca únyi baú anyibun huliwa ka Than.

HNYIMAKAN 16.

KE haba ge úhnöhnö hobi kâu wakap, e so öbun e ânyâ helâ me hnök hna hûna ka ta je ekalesia hnyi Galatia. 2 Hnyi bong a bâniny seven e so öbun e ve ip unyibun bi helâ me hna ve hu, me me ba úhnöhnö iny ka o thö. 3 Ke iny ka o thö, oge me he ka kunâ tavat, waleji öbun e úca ge je tusi, he ka hom anyibun je bwihlany Jerusalema ai : 4 ke ame ne úcú könya he ka hnyi he, m' ödrin e he ka tha he mönya. 5 Ke iny ka he ka vheno Makedonia, me oge me he ka o köbun ; anyin oge me he ka gethen hnyi Makedonia ; 6 ke oge ne he la ka tha laba möbun, me tuö úen ae megic, me öbun e he ka su nya ka hnyi getheniny dok oge me he ka hnyin. 7 Anyin e ca wek he ka saú me ö 'bun walang ang ; anyin e wek bi he ka laba beú unyibun, e ka weny Than. 8 Ke oge me he ka laba hnyi Efeso ke ne o but hnyi Penetekos ; 9 anyin adre hia but khöng könya hwanuma ae lau, ke hu huliwa hnyin, ke se hia ta je iwahnaihmiöny.

10 A ne o köbân Timoteo, wâ eâu öbun me me ca he ka laba unyibun me ot ; anyin a e ame ânyâ huliwa anyin Than helâ me inya : 11 anyin a wale, ca he ke at ka oúnyibâúâ e. Ke su thö jem öbun hnyi hnahic, me me he ka o könya : anyin oge me halubahingen tha e me hnyat me lakeiny. 12 Ke gan hmâ hnök hna újöngi Apolo ke liamekeiny, me me he ka tha o köbun me je liamekeiny : k' ame ca weny he ka o hnyi úen ang ; ke e ame he ka o, e ka hu úen ae úcú.

13 Hmâkâ th' öbun, tethmâ ju hnyi labageju, hnyok baga thö, hwege thö. 14

II. KORINITO 1.

Anyâ thö hnöbun hna anyâ hia hnyi ibetengio.

15 Hnyat me lakeiny lö, (e khan' öbun lap anyi Setefana, a waleji wan a bân hnyi Akaia, ke ödrin e ka ham ödrin bi he ka bi athnyabainy wakap), inya oge me sumat öbun, ka habe, 16 e so öbun e he ka löng hoton tavat helâe, me ödra hia minya adre me ûhadruö me huliwa. 17 Ke inya oge me senyin waleji ge ioi Setefana, me Fotunato, me Akaiko : anyin ödrin e ham ta je ûnyi ae hia gabun. 18 Anyin ödrin e okahwa hanuk, ke je hanubun minya : anyin a wale, kap soi ödra ju tavat helâe.

19 Ame italofa m' öbun ta je ekalesia hnyi Asia. Ame italofa gan hmâ m' öbun hnyi Than Akula me Perisila me ekalesia hnyi hnyabadru. 20 Ame italofa m' öbun je liamekeiny hia thithö. Úitalofaköu ju öbun ge úcimhnyimak ae kap.

21 Inya Paulo oge me italofa m' öbun ge hnyamök. 22 A ne ca hnyok bi ke at ka Than Iesu Keriso, e so he ka anathema e. Maranatha. 23 E so e unyibun ibetengio baú anyin Than Iesu Keriso. 24 E so e unyibun hia anyik ibetengio hnyi Keriso Iesu. Amen.

TUSI A LOINY ANYI PAULO APOSETOLO KA

AT KORINITO.

HNyIMAKAN 1.

INYA Paulo aposetolo anyin Keriso Iesu ûnyi ge weny Khong, ke Timoteo a liamekeiny m' öta, öhmü set ka ekalesia anyin Khong hnyi Korinito, tha ödrin me wakap hia thithö hnyi Akaia hia : 2 E so e unyibun ibetengio baú, me hnahic ûnyi ge Khong a Kamöta me Than Iesu Keriso.

3 E so he ka ogânâ Khong a Kamen Tuhöta Iesu Keriso, me Kamen ta je ibetengio, me Khongon hna okahwa hia ; 4 at ame okahw' öhmün hnyi anyihmun je vec hia, me me khan' öhmün dut he ka okahw' ödra adre me vec, ge kahwa ame okahw' öhmün kâu hnen Khong. 5 E gan hmâ vec ame o köhmün ûnyi ge Keriso, anyin a wale e gan hmâ minya hna okahw' öhmün ûnyi ge Keriso. 6 Ke adre me ne oveci öhmün, me wale hnân hobi kâu anyibun kaukaha me möt ; ke adre me ne okahw' öhmün, me hnân he ka okahw' öbun, wale ame huliwa hnyi anyibun hokhnyok hnyi je vec a tha úcü me anyihmun je vec : 7 ke e tethmâ anyihmun geju gabun ; anyin ae khan' öhmün a öbun e he ka hnyi kahwa helâ me hnöbun hna hnyi vec. 8 Hnyat

me lakein lö, e ca wehmün e me ca khan öbun ge vec a o köhmün hnyi Asia, waleji adre me ti ohmak' öhmün ae gan hmâ hon tang hwegiöhmün, waleling me öhmün e ca únykúme hmetu bi he ka möt : 9 eke e hu gahmun hna únykúme he ka mok, m' öhmün e ca he ka geju köhmün bi, ke so bi ka Khong at ame omelö hmetu tavat adre me mokcu : 10 wale at ame omeli öhmün ûnyi hnyi mok ae gan helâe, k' ame he bi ka omeli öhmün : ke öhmün e geju kâu a g' ame he bala ka omeli öhmün ; 11 k' öbun e hnyi hadruâ únyi ge hic hobi köhmün ; me me ole minya tavat ae se hia hobi köhmün, hnyi ibetengio köhmün a deny tavat ae se hia.

12 Anyin a walang anyihmun senyin, a g' ame ohnathoâ hnen únykúmenöhmün ae hnyi hwakecin ae wisa me hnathu ûnyi ge Khong, ke ca ûnyi bi hnyi metâiny unyin. ke únyi hnyi ibetengio baú anyin Khong. öhmün e anyâ hwakecilmun eang hmele-drany, ke ti gan hmâ bi köbun. 13 Anyin a öhmün e ca set köbun ke ta je ûnyi, ke so bi únyi öbun e aú me ogâ, ke inya oge me únykúme a öbun e he ka ogâ ke ne o but obiny : 14 helâ me keihen gabun adre

II. KORINITO 2, 3.

me og' öhmun ehac, ka habe, a öbun e hobeluâ gahmun, helâ me hnöhmun hna hobeluâ gabun, hnyi bong bongon Tuhöta a Iesu.

15 Ke hnyi labageju eling, oge me únykúme he ka o köbun ehac, me me lo anyibun li so ; 16 me he ka gethen unyibun Makedonia ai, me he ka o hmetu köbun úhek Makedonia, me öbun e he ka su nya hnyi gethen iny ka he Juda ai. 17 Anyin a wale, hawa, oge me ha monoâ hnyi únykúmenök eling ? ke haba ta je únyi oge me únykúme, hawa, oge me únykúme hoton unyin, me me ka hamök bi he ka ha, ka habe, eke, eke, e ba, e ba? 18 Ke hnathu bi Khong, me haba hohmun hofuc köbun me ca eke, me e ba. 19 Anyin a haba Nokon Khong, a Iesu Keriso, waleji öhmun e khetâ köbun, a inya me Silevana, me Timoteo, me ca eke, me e ba, ke únyi gan bi, ka habe, eke. 20 Anyin a eja ke ne a ne habânâ ta je únyi ae ti se hia Khong, me únyi thibi gån bi, ka habe, eke : waleling me me únyi thibi minya gån Amen, m' adre me he ka ogânâ Khong únyi gahmun. 21 Ke haba Khong at ame otethm' öhmun, me öbun minya unyi Keriso, ke e at a hú öhmun ; 22 waleji at ame okeceâ hmâ hatöta, me ham köta haten Hanu eú hnyi je hnyekuta.

23 Ke inya oge me hawâ Khong he ka ohnathoâ hon hanuk, a habaji k' iny tiga ca mwi bi Korinito, me, inya oge me betenge gabun. 24 Ca ha bi a öhmun e musö anyibun labageju, ke so bi öhmun je hnyat úhadruö bi anyibun senyin, anyin a öbun e tethmâ hnen anyibun labageju.

HNYIMAKAN 2.

KE oge me ohmâ eú hnyi hnyekuk, ka habe, oge me ca he hmetu ka o köbun me hnyok ae hmak. 2 Anyin a oge ne he bi ka ohmakâ je hnyekubun, me ewa at ame he ka osenyini nya, ke so bi at thibi oge me ohmakâ? 3 Ke oge me sihnalimen únyi eling, wâ e nye hmak hnyekuk únyi ge tawat ae úcú he ka osenyini nya, iny ka o ; ke oge me geju köbun hia thithö, a haba anyik senyin, me anyibun minya senyin hia. 4 Anyin oge me set köbun hnyi vec ae gan hmâ, ke hmak hnyekuk, ke gan hmâ deköien li emakök ; ca hnân oveci öbun, ke so bi me me he ka manen köbun anyik betenge ae gan hmâ köbun.

5 A ne ohmakö nya hnen at, me e ame

ca ohmakö nya a hake inya ke (wâ oge nye ti ohmak' öbun), ke so bi öbun hia thithö minya. 6 E úcú ka at e hna bi hwaban helâe hnen tawat ae se ; 7 waleling me me so köbun he ka nuâ anyin monu me okahwâ e, wâ e nye utâ but at helâe hnen anyin hlöuhlöu ae ti gan hmâ. 8 Anyin a wale, inya oge me sumat öbun, he ka ohmâ anyibun betenge kâu. 9 Anyin oge me sihnalimen minya can e, me me khanö nya thö haten gabun, hawa la, öbun e ne úling hnyi ta je únyi hia. 10 Anyin a haba at öbun e önuâ anyin monu, me oge me he bi nya ka önuâ : anyin a haba únyi oge hia but önuâ, a ne hu hnök hna önuâ, me oge me ânyâ únyi gabun hnyi hnyimakan Keriso ; 11 wâ e nye iyau' öta Satana, anyin ae ca iyong köta anyin ta je bibihwakecin.

12 Haba hnyi úen eji oge me o hnyi Troas me úthumetu ae so anyin Keriso, ke adre khöng hwanuma könya únyi hnyi Than, 13 me ame ca menâ bi hanuk, anyin oge me ca iouny me Tito liamekeiny mönya : ke oge me úhüne m' ödra, me he but Makedonia ai. 14 Ke ole ka Khong at ame odökhu öhmun bala únyi ge Keriso, k' ame omanenâ únyi gahmun bunen metâ gan hnyi ta je hnye hia. 15 Anyin a öhmun ang bunen ae hnebwia anyin Keriso ka Khong can tawat adre omelö, ke tawat adre me hnaúhangö ; 16 haba öhmun me bunen mok ka keihen tawat adre me he ka hnyi mok ; ke öhmun bunen möt ka keihen tawat adre me he ka hnyi möt. Ke ie at ae úcú ka hnyi ta je únyi eang? 17 Anyin a öhmun ca tha úcú me tawat ae se hia adre omono hofuc hwan Khong : ke so bi hoton hnathu, me únyi ge Khong, me hnyi hnyimakan Khong, öhmun e fuc anyin Keriso.

HNYIMAKAN 3.

HAWA, öhmun e hwân hmetu he ka haisoi öhmun bi? ke hawa, e únyi hnathu köhmun je tusi helâ me keihen hnân haisoâköbun, ame ne únyi gabun bi? 2 Öbun ang anyihmun tusi, adre set hnyi je hnyekuhmun, adre wâhmakhmetoâ me aú hnen tawat hia ; 3 anyin ae manen a öbun ang tusi anyin Keriso, öhmun e huliwan, adre ca set ge köiö sisit, ke hnen bi Hanon Khong ae möt ; ke adre ca set hnyi je veto, ke so bi hnyi je viny hnyok. 4 Ke e hu gahmun únykúme a helâe ka Khong a deny Keriso : 5 ca ha bi a öhmun hake úcú he

II. KORINITO 4.

ka únykúme ke únyi, me ka únyi gahmun bi ; ke öhmun úcú a únyi ge Khong ; 6 waleji at ame öücú öhmun he ka bi athnyabainy úhinhinköu a teb únyi ; ca ge tusi, ke hanu bi : anyin a haba tusi, me at úhlingö, ke at úhömeli hanu. 7 Ke a ne hmanenang he ka bi athnyabainy únyi adre me mekiny hnyin, waleji adre sihnalimen me kave hnyi veto, me me ca khana bi lakon Isaraela he ka wá hmá hnyimakö Mose anyin ae hmanenang hnyimakan ; waleji a hmanenang ame he ka hia : 8 hawa, ame ca he ka beönuá hmanenanginy bi athnyabainy hanu ? 9 Anyin a ne hmanenang bi athnyabainy hnaúhangö, awe, e ti hmanenang gan hmá he ka bi athnyabainy ka hwakecin ae wisa. 10 Anyin a haba únyi waleji adre ohmanenangá me heláke e ca hmaneng bi ge hmanenang ae beönuá. 11 Anyin a ne hmanenang únyi ame he ka hia, awe, e ti hmanenang gan hmá únyi ame he ka tethmá.

12 Anyin a wale, öhmun e ha hwegia, anyin ae hu gahmun gejon a helång, 13 ke ca helá me Mose, at ame tube hnyimakan, me me ca khana bi lakon Isaraela he ka wá hmá ka hnyi obiny únyi ame he ka hia : 14 ke adre onáká je öúnykúmenödra : anyin a e bala bi ke ne o but hnyi bong ang adre ca hota but hna tube eling, hnyi úen adre me aú úhinhinköu adrem ; waleji hna tube adre me ohia únyi hnyi Keriso. 15 Ke so bi ae hu hna tube je hnyekudra ke ne o but hnyi bong ang, at ka aú Mose. 16 Ke adre me hnyimaködra ka Than, me ame he ka hia but hna tube. 17 Ke haba Than, me wale Hanu : ke haba dok ame laba hnyin Hanon Than, me adre me hna báúá at eling. 18 Ke haba öta hia adre ca tubi hnyimaköta, k' ate me wá hmanenanginy Than, heláke me hnyi uselat, me adre me wi' öta m' ate me we at a khaca únyi hnyi ke hmanenang ka hnyi ke hmanenang, heláke me únyi ge Than a Hanu.

HNYIMAKAN 4.

E HU but gahmun huliwa eang, ke adre me betenge gahmun, me waling öhmun e ca sényin : 2 ke öhmun e hia but degec ta je únyi ae iyawö, ke öhme-hma, k' öhmun e ca he me iyawö, ke öhmun e ca othoiá hofuc hwan Khong ; ke öhmun e omanená hnathu, me haisoi öhmun hnyi ta je únykúmenen tavat hia hnyi hnyimakan Khong. 3 Ke adre me ne tubi

anyihmun úthumetu ae so, me adre me tube ka tavat adre me he bi ka mok : 4 wale tavat ame öwadruá je öúnykúmenödra bi, ke adre me ca labageju bi, únyi ge khongon hmeledrany eang, wá e nye melam ködra melaminy úthumetu ae so ae hmanenang anyin Keriso, wale ae we Khong. 5 Anyin a öhmun e ca kheti öhmun, ke Keriso Iesu a Than, ke öhmun je lathnyabaibun ga Iesu. 6 Anyin a Khong, waleji at ame ha, ka habe, Ame he ka umumelam but melam únyi hnyi lit, waleji ame öumumelamá je hnyekuta, me me melam but he ka wáhmakhmetoá hmanenang anyin Khong hnyi hnyimakö Iesu Keriso.

7 Ke hu but gahmun tang omjeú eang hnyi je utkaia káná, me me únyi ge Khong úganiny man ae nua, ke ca ka únyi bi gahmun ; 8 adre uhneki igigili öhmun, k' öhmun ca gum bi ; öhmun e hlohlo, ke ca gá bi úhmun ; 9 adre me hnu öhmun, k' adre ca digic öhmun bi ; adre me öü öhmun, ke ca hia öhmun dut ; 10 öhmun e hom tilá hnyi je unyihmun mok anyin Than Iesu, me me manen minya but möt anyi Iesu hnyi je unyihmun. 11 Anyin a haba öhmun hnyat ae möt, adre me hn' öhmun bala ka hnyi mok ga Iesu, me me manen minya but hnyi je unyihmun ame he ka bobot möt anyi Iesu. 12 Wale me me huliwa mok eú hnyi je hnyekuhmun, ke ame huliwa bi möt eú hnyi je hnyekubun. 13 Ke e hu gahmun hanuiny labageju a khaca, helá me hna sihnalimen, ka habe. Oge me labageju me oge me fuc dö ; ke öhmun e labageju minya, me öhmun e fuc minya thö ; 14 ke e khan' öhmun a haba at ame omelö hmetu Than Iesu, ame he ka omeli öhmun hmetu minya me Iesu, me tba omanen' öhmun m' öbun. 15 Anyin a hobi köbun ta je únyi hia, me me se hia but ole hnán ogáná Khong, hnen ibetengiö hna osehia hnen tavat ae se hia.

16 Wale me öhmun e ca sényin bi ; eja ke ne a ne bobot tot je unyihmun hnyi hoton, adre me ohátá hnyi je bong hia at eú hnyin. 17 Anyin a haba anyihmun vec ae háhá, wale ame ie hia, ame huliwan gan hmá tot hobi köhmun hmanenang ae hmak ke nyiele balua ; 18 ke öhmun e ca wá hmá ta je únyi ae manen, ke so bi ta je únyi ae ca manen bi : anyin a haba ta je únyi ae manen me e hu obiny ; ke haba ta je únyi a ca manen bi, me nyiele balua.

II. KORINITO 5, 6.

HNYIMAKAN 5.

A NYIN ae khan' öhmun a ga ne kia but umöhmun uma menâ eang hmeledrany, me hu bi gahmun uma únyi ge Khong, wale uma adre ca mádrâ bi ge hnyam, ame ca ba balua, ke ethö hnyi drany. 2 Anyin a öhmun e mâng hnyi uma eang, ke ti wehmun he ka khaú öhmun ge umöhmun uma ethö hnyi drany: 3 öhmun e ne khaú, m' adre me ca ö 'hmun bi öhmun e he thu. 4 Anyin a haba öhmun hnyi uma menâ eang, öhmun e mâng, ke hmak; ca anyin ae wehmun he ka uny jut, e so bi m' adre me khaú' öhmun, me me utâ but mok hnen möt. 5 Ke Khong at ame up öhmun hobi kâu e, waleji at ame ham köhmun haten Hanu. 6 Anyin a wale e hwege bala hnyekuhmun, ke khan' öhmun, ka habe, e ka tiga öhmun hnyi unyin, e hi' öhmun unyin Than 7 (anyin a öhmun e he hnen labageju, ke ca hnen bi hna wâ); 8 öhmun e hwege hnyok, me wehmun he ka hia but hnyi unyin, me tha öhmun unyin Than. 9 Anyin a wale öhmun e hwege ná he ka osenyinâ e bi, a ne öhmun dut eang, ame ne hi' öhmun. 10 Anyin adre me he ka omanen' öta hia hnyi hnyimakan taben owisa anyi Keriso; m' ate me he ka ve kap ta je únyi ate ányâ hnyi unyin, hoton hna ve ányâ, ame ne so, ame ne kong.

11 Anyin ae khan' öhmun únyi hnân ootâ unyin Than, wale me öhmun e újengö tavat, ke öhmun e manen dut ka Khong; ke oge me únykúme a öhmun manen dut minya hnyi je únykúmenöbun. 12 Öhmun e ca haisoi öhmun hmetu bi köbun, ke so bi, helâke öhmun e ham köbun únyi hnân hobeluâ gahmun, me me hu gabun hnân thu ködra adre me hobeluâ hnyi hnyimak, ke ca bi eú hnyi hnyok. 13 Anyin a öhmun e ne monu, me hobi kâu Khong; ke öhmun e ne metâ, me hobi köbun. 14 Anyin ame musi öhmun ibetengiö anyi Keriso; anyin a walang ang únykúmenöhmun, a g' ame mok ke at hobi kâu tavat hia, awe, a mok hia; 15 ke e ame mok hobi kâu tavat hia, m' adre me ca he hmetu ka möt ködra bi tavat ae möt, ke so bi kâu at a mok me möt hmetu thö hobi ködra. 16 Wale me öhmun e hwân walang ang a öhmun e ca he ka wâhmakhmeto ke at hoton unyin: eja ke ne öhmun e hia but wâhmakhmeto Keriso hoton unyin, ke

so bi walang ang öhmun e ca he ka wâhmakhmeto hmetu bi e helâe. 17 Anyin a wale a ne e but ke at unyin Keriso, e at adre teb op; e hia but ta je únyi adrem; ke wâ bi, adre ohâtâ ta je únyi. 18 Ke únyi ge Khong ta je únyi hia thithö, at ame öúsoköu öta mē a deny Iesu Keriso, ke ame ham köhmun huliwainy úsoköu; 19 waleji, a e unyin Keriso bi Khong, ame öúsoköuâ hmeledrany mē, k' ame ca ip hnödra je hna hanyâúâ ködra bi, ke ame ham köhmun hofucin úsoköu.

20 Anyin a wale, öhmun je metâ anyin Keriso, helâke Khong ame khöü únyi gahmun: ke öhmun e sumat' öbun, hobi kâu Keriso, ka habe, úsoköu öbun ju me Khong. 21 E, at eji ae ca khana bi monu, e ame wia e me me monu hobi köta, m' adre me he ka wi' öta hnân hwakecin ae wisa anyin Khong únyi gan.

HNYIMAKAN 6.

KE öhmun ang hnyat öhmun e tha huliwa mē, me öhmun e újengi öbun, wâ öbun nye kap bâúâ ibetengiö anyin Khong, 2 (anyin a haingen, ka habe,

Oge me ling u hnyi úen eji ae so,

Ke oge me hadruö u hnyi bonginy möt: ke wâ bi, walang úen ae so; wâ bi walang ang bonginy möt): 3 ke öhmun e ca othoâ at hnyi ke únyi bi, m' adre me ca he ka haikongoâ hnöhmun hna huliwa; 4 ke hnyi ta je únyi hia öhmun e omanen' öhmun a lathnyabainy Khong öhmun, hnyi hokhnyok ae gan hmâ, me je vec, me theduoc, me hlöuhlöu, 5 me hna osöâ, me hnyi uma ceat, me hnyi je imonumonu, me ta je huliwa, me hmâkâ me mekihnânem; 6 hnyi hwakecin ae so, me wâ únykúme, me lingvec ae beú hmâ, me hwakecin betenge, me Hanu Kap, me ibetengiö ae ba thoi hnyin, 7 me hnyi hofuc ae hnathu, me hnyi man maniny Khong; hnen omjehen vatiny hwakecin ae wisa hnyi ke keihen metâ me me, 8 hnen ogânâ, me öühnyükongoâ, hnen haikongoâ, me haisoâ; helâke me hnyat iyawâ, k' öhmun hnathu bi; 9 helâke hnyat ae ca khan' ödra öhmun, ke khan' ödra öhmun bi; helâke hnyat adre me he ka mokcu, ke wâ bi öhmun e möt; helâke hnyat adre osöâ, k' adre ca hling' öhmun bi; 10 helâke hnyat ae hmak hnyok, k' öhmun e senyin bala; helâ me theduoc, k' öhmun e otrenâ tavat ae se; helâke me ba ta únyi, ke hu but ta je únyi hia thithö.

II. KORINITO 7, 8.

11 At Korinito lö, öhmun e khöng köbun je hnyimöhmun, ke adre me ogânâ je hnyekuhmun. 12 Öbun ca ûhnyûkong eû hnyi je hnyekuhmun, ke öbun ka ûhnyûkong eû hnyi je hnyekubun. 13 Ogânâ but öbun, me hnân hwaban bi (inya oge me ha helâ me ka lakuk).

14 Ca ûhûkölöbun monu köu me tavat adre me ca labageju bi: anyin ame he ka hawa hwakecin ae wisa he ka tha e me hwakecin ae ca wisa bi? ke ame he ka hawa ka tha e melam me menekholom? 15 Ke ame he ka hawa ka tha hnyok Keriso me Belial? ke ame he ka kâmâu ka tha jekhon at labageju me at ame ca labageju bi? 16 Ke ame he ka kâmâu ka tha bongon uma umen Khong me ta je hnatheat? anyin a öta ang uma umen Khong ae möt; helâ me hna ha hnen Khong, ka habe, Oge me he ka laba eû hnyidra, me tha he mödra; ke oge me he bi nya ka Khongudrin, ke adre me he bi ka lakeik. 17 Anyin a wale, haingen Than, ka habe,

Didrut öbun gadra, ke ve laba but,

Ke ca kâlâ bi ûnyi ae ikiki;

Ke oge me he ka köp öbun,

18 Ke oge me he ka Kamöbun,

K' öbun e he ka lakuk obaga me wahu, haingen Than ae khana hia.

HNIMAKAN 7.

HNYAT a oûnykûmik lö, e hu but unyita ta je hna ha bânâ eling, anyin a wale, e so ate me he ka anyawi' öta bi ûnyi hnyi ta je ûnyi ae ikiki hia hnyi unyin me hanu, he ka obekhötâ hwakecin ae kap hnyi ot ka Khong.

2 Köp öhmun d' öbun: e ba at öhmun e hwali kâu, e ba at öhmun e okongoâ, e ba at öhmun e iyawöâ. 3 Oge me ca ha e hnân hang' öbun: anyin oge hia but ha köbun ehac, ka habe, öbun eû hnyi je hnyekuhmun he ka tha mok me tha möt. 4 E gan hmâ hnök hna fuc hwege köbun, ke gan hmâ hnök hna hobeluâ gabun: inya at ae unöngöt ge kahwa, oge me ti senyin gan hmâ hnyi anyihmun ta je vec hia.

5 Anyin a waleji hnyi hnöhmun hna o but hnyi Makedonia, ame ca menâ bi je unyihmun, ke öhmun e vec hnyi ta je ke keihen hia; e hu vat hnyi hoton, ke ot eû hnyin. 6 Ke haba Khong, at ame okahwa tavat adre me ohnyikön' ödra bi, me e ame okahw' öhmun ge ioi Tito; 7 ke ca ûnyi thibi ge ioiny, ke so bi hnen kahwa öbun e

okahwa e kâu, ke a thumetu öhmun ge webun ae tethmâ, me anyibun tenge, me hnyekubun ae kahwa könya; wale me me ti gan anyik senyin. 8 Anyin a eja ke ne oge ne oveci öbun ge anyik tusi, oge me ca ietra bi, ke so bi oge me ietra ehac; anyin oge me wâ, a g' ame oveci öbun tusi e, ke hnyi ûen thibi a khaca. 9 Ke walang ang inya oge me senyin, ca anyin adre ohmakâ hnyekubun, ke anyin adre ohmakâ je hnyekubun ke ne o but ka hnyi ietra: anyin adre ohmakâ je hnyekubun helâ me úcú ka Khong, m' öbun e ca kong bi ûnyi gahmun hnyi ke ûnyi. 10 Anyin a haba hmak hnyok ae úcú ka Khong, me wale at ame ökûâ ietra ke ne o but ka hnyi möt, haba ietra eling, me ca hnân ietra hmetu: ke haba hmak hnyok ûnyi eang hmeledraný ame ökûâ mok. 11 Anyin a wâ ju öbun ûnyi eang waleji e hmak hnyekubun hoton ae úcú ka Khong e ame ökûâ hna wâ wia unyibun, me ivinö, eke, me haiwisai öbun. eke, me kong hnyekunâ, eke, me ot, eke, me weny ae gan hmâ, eke, me hnyok ae kahwa, eke, me bi hwaban! Haba hnyi ta je ûnyi hia öbun e hia but omanen' öbun bi ae ba anyibun hulö hnyi ûnyi eang. 12 Ke haba hnyi hnök hna sihna-limen köbun, me ca hake hobi kâu bi at ame mádrâ monu, ke ca hobi kâu minya bi at adre me monu kâu, ke so bi me me manen dut köbun hnyi hnyimakan Khong a öbun e kong hnyekuni öhmun. 13 Anyin a wale adre ti okhaw' öhmun: ke haba hnyi kahwa a öhmun, öhmun e senyin gan hmâ hnyi senyin anyi Tito, anyin ame okahwa hnyekon ûnyi gabun hia. 14 Anyin a ne hu hnök hna ohobeluâ kâu ûnyi gabun, iny ca hmehmâ bi; ke öhmun e ha ta je ûnyi hia köbun hnyi hnathu, helâe minya adre wâ ae hnathu hnöhmun hna ohobeluâ, waleji oge ânyâ hnyi hnyimakö Tito. 15 Ke e ame ti hnyok gan hmâ köbun, me ûnykûme anyibun úling hia, me hnöbun hna ot, me öbubuny hnyi hna kap e. 16 Inya oge me senyin anyin adre sihwegiâ hnyekuk gabun hnyi ta je ûnyi hia thithö.

HNIMAKAN 8.

KE haba khaca, hnyat me lakeiny lö, öhmun e thumetu öbun ge ibetengio baú anyin Khong hnyi ta je ekalesia hnyi Makedonia; 2 ka habe, adre cubic ödra hnyi vec ae gan hmâ, ke ame kû gan hmâ

II. KORINITO 9.

but anyidra senyin me hna ham bâûâ únyi hnyi anyidra theduoc. 3 Ke inya oge me ohnatho, a g'adre me ham bâûâ hoton hnödra hna khana, eke, me hanyâûâ but hnödra hna khana, 4 ke adre kun' öhmun újöngi öhmun hnyi betenge eling me munyi hadruâ wakap: 5 ke ca helâji me hnöhmun hna únykúme, ke adre me mē ham ödra bi ka Than, me köhmun minya hoton weny Khong. 6 Wale me öhmun e sumatö Tito thö, anyin a e ame ibi hwân, ke helâe minya e ame he ka umo unyibun ibetengiö eang. 7 Ke öbun e tren gâná ta je únyi hia, wale labageju, me ha hofuc, me metâ, me kong hnyekunâ gan hmâ, me anyibun ibetengiö köhmun, awe, e so ame he ka si minya unyibun ibetengiö ang. 8 Oge me ca ha me hnân hnanyibu, ke ame cubec anyibun ibetengiö únyi ge hna kong hnyekunâ anyin keihen. 9 Anyin ae khan' öbun ibetengiö baú anyin Tuhöta Iesu Keriso, a e at ae tren ta únyi, ke e ame otheduocâ e hobi köbun, m' öbun e he ka tren ta únyi únyi hnyi anyin theduoc. 10 Ke inya oge me omanenâ únykúmenök hnyi únyi eang: anyin ae úcú köbun tavat öbun e hwân ehac, a khaca but hunaibun, he ka ca mâdrâ thibi, ke so minya bi he ka weny. 11 Ke walang ang, öumo ju hna ânyâ minya; me me um minya ju únyi hnyi hna hu, helâji me hnöbun hna ie weny. 12 Anyin a ne hu hnyok ae weny, adre me he ka kap e hoton hna hu hnen at, ke ca hoton bi hna ca hu gan bi. 13 Anyin oge me ca ha únyi e me me hâhâ keihen, k' öbun hmak bi öbun: 14 ke so bi me me tha úcú; haba hnöbun hna tren gâná hnyi úen eang, me hobi kâu anyidra theduoc, me me hobi kâu anyibun theduoc hnödra hna tren gâná; me me tha úcú thibi: 15 helâ me hna sihnalimen, ka habe, Haba at ame thithigâ gâná me ba kolon kâu; ke haba at ame thithigâ úhnyúkongo me ba únyi ae hia gan.

16 Ke ole ka Khong at ame ip hnyi hnyeku Tito ibetengiö köbun helâe. 17 Anyin a e ame kap hnöhmun hna úne kâu; ke únyi hnyi hnen hna hnyok gan hmâ ka hnyin, me e ame ka hamen he but köbun. 18 Ke öhmun e hia but kunâ e tha e me ke liamekeiny, waleji adre ogânâ hnyi ta je ekalesia hia hnyi úthumetu ae so; 19 ke ca eang thibi, ke adre úca minya e hnen ta je ekalesia he ka tha he m' öhmun he ka hom ibetengiö eang, wale öhmun e huliwan hnân ogânâ Than, me hnân bi haten

hyekuhmun ae weny: 20 ke öhmun e outen ang, wâ e nye haikongu öhmun ke at hnyi tang omjeú eang ae gan öhmun e huliwan: 21 anyin a öhmun e únykúme he ka ânyâ ta je únyi hnyi wisa, ca hnyi hnyimakan Than thibi, ke hnyi hnyimakan minya bi tavat. 22 Ke öhmun e hia but kunâ he ka tha he m' ödru liamekeiny m' öhmun, waleji öhmun e wâhmakhmetoâ hnyekon ae kahwa hnyi ta je únyi ae se hia, ke walang ang ae nua kahwainy hnykon, únyi hnyi anyin labageju köbun. 23 A ne ke at ame hnei ga Tito, awe, e at ame tha e mönya, me at ame tha huliwa mönya köbun; ke adre ne hnei minya ge liamekeiny mötu, awe, ödru li úthumetu anyin ekalesia ke hmanenanginy Keriso. 24 Anyin a wale omanenâ thö ködrin hnyi hnyimakan ta je ekalesia haten anyibun betenge, ke hnöhmun hna ohobeluâ únyi gabun.

HNYIMAKAN 9.

E CA únyi hnathu kõnya he ka sihna-limen köbun hwakecin huliwa ka wakap: 2 anyin ae khanö nya hnyekubun ae beweny, wale oge me hobeluâ gabun hnyin ka at Makedonia, ka habe, adre hia but penapena hnyi Akaia ehac a khaca but huna; ke ame huliwan hnyekon tavat ae se hia hnen hnyekubun ae kahwa. 3 Ke oge hia but kunâ je liamekeiny, wâ e nye únyi baú hnöhmun hna hobelu' öbun hnyi únyi eang; m' obun e he ka penapena helâ me hnök hna ha: 4 wâ oge nye o me keihen at Makedonia, me wâ a ga ca penapena ju öbun, me öhmun e he bi ka hmehma (ke ti e bi gabun) hnyi hna hobeluâ eling. 5 Anyin a wale oge me únykúme ae únyi hnathu he ka khöú ka ta je liamekeiny he ka bödrin köbun me penapena ta je únyi hnyi anyibun ibetengiö, waleji öbun e ha bânâ ehac, m' öbun e he ka penapena e, helâ me únyi hnyi ibetengiö, ke ca helâ bi me hna behânâ.

6 Ke wale minya eang, haba at ame tâ úhnyúkongoâ, me úhnyúkong minya hnen hna meno; ke haba at ame tâ gâná, me gan minya hnen hna he ka meno. 7 E so he ka ve ham hoton hna thamuâ eú hnyi hnyok; ca hnyi hnyok ae hmak, me hna musö minya: anyin a Khong ame hnyokâ at ame ham senyinâ. 8 Ke e khana Khong he ka ogânâ thö köbun ibetengiö baú hia; m' öbun e he ka widrany gan hmâ bala hnyi ta je únyi hia, m' öbun e he ka si

II. KORINITO 10, 11.

hnyi ta je huliwa hia ae so : 9 helâ me hna sihnalimen, ka habe,

E ame ham bâûâ, me ham ka je theduoc ;
Ke tethmâ nyiele balua hwakecin ae wisa gan.

10 Ke haba at ame ham hatong ka at ame tâ, me jeû hnân han, me e ame he ka ham me osehia wan hnöbun hna tâ, me ogânâ minya wan hwakecibun ae wisa : 11 ame otreñi öbun ge omjeû hnyi ta je ûnyi hia, m' öbun e hnyi ham gânâ but, wale hnân okûâ ole ka Khong ûnyi gahmun. 12 Anyin a haba hna huliwan huliwa eang, me ca walang he ka ûcû ka wakap thibi, k' ame bi hanen minya ole ae gan hmâ ka Khong ; 13 anyin adre me ogânâ Khong hnyi haten huliwa eang, me hnyi hnöbun hna löng hoton uthumetu ae so anyin Keriso, wale öbun e hom, me hnyi ibetengiö ae gan hmâ ködra me tavat hia ; 14 ke adre me hnyok gan hmâ köbun ûnyi hnyi ibetengiö baû anyin Khong ae ti gan hmâ unyibun, ke adre me hic hobi köbun. 15 Ole ka Khong ge anyin bwihlany ae ca khan' öta ha hia.

HNYIMAKAN 10.

HABA inya Paulo, at ae hnyikânâ e tha inya m' öbun, ke kwege e ka hiö nya m' öbun, me oge me khöû köbun ûnyi hnyi hwakecin ae menyik me ilemuk anyin Keriso : 2 inya oge me sumat, m' inye ka o, m' oge me ca he ka bi hwege köbun, ge hwege waleji oge me ûnykûme he ka hwege ka keihen, hnyat adre me ûnykûmi öhmun helâke öhmun e he hoton hwakecin unyin. 3 Ke öhmun e he hnyi unyin, ke öhmun e ca vat helâ me unyin 4 (Anyin a haba omjehen anyihmun vat me ca hwen unyin bi, ke hwege maniny hnyi hnyimakan Khong hnân hagutâ je hnabâ ae hwege) ; 5 ame hagutâ ta je ûnykûme me ta je ûnyi hia ae görany ame üö bi ûnyi ûcön wâhmakhmetoâ anyin Khong, me hom hwenbâ ta je ûnykûme hia, me me löng hoton Keriso ; 6 me laba penapena he ka bi hwaban ka tavat adre me ca úling, e ka bekhöt dö anyibun úling. 7 Öbun e wâ ta je ûnyi hnyi hnyimaköbun. A ne ke at ame ûnykûme a e aten Keriso, e so e ame ûnykûme hmetu a e ka aten Keriso, awe, öhmun je aten Keriso. 8 Eja ke ne a ne ka gan dut hnök hna hobeluâ anyihmun musi, (waleji a ham köhmun Than hnân otill' öbun, ke ca hnân bi hagut'

öbun), oge me ca he ka hmehma : 9 anyin ae ca wek he ka ooti öbun ge anyik ta je tusi. 10 Anyin a haingödra, ka habe, E hmak, ke man bi anyin je tusi ; ke sênyin bi unyin, ke ca ûnyi hnathu bi hwan hofuc. 11 E so at helâe he ka ûnykûme ang, ka habe, haba hohmun hofuc hnyi je tusi ke tiga hi' öhmun, me helâe hnyi huliwa e ka öhmun dut e. 12 Anyin a öhmun ca hwege bi he ka hnyi hanen me oucû öhmun me keihen, tavat adre me haisoi ödra bi : ke adre me útuluti ödra köu bi, me oucû ödra m' ödra bi, ke ba wâ ûnykûme gadra bi. 13 Ke öhmun e ca he ka hobeluâ hoton tulut ae ca so, ke so bi hoton tulut a tuluto köhmun Khong, hnân tulut he ka o but köbun. 14 Anyin a öhmun e ca tuluto beönua, helâke a ca o köbun : anyin a öhmun e o but köbun tha öhmun me úthumetu ae so anyin Keriso : 15 öhmun e ca hobeluâ ta je ûnyi adre ca tuluto bi. hnyi huliwa anyin keihen ; ke öhmun e labageju öbun ka he ka kû tot hnyi labageju, a öbun e he ka ogan' öhmun hoton anyihmun tulut, 16 he ka khetâ úthumetu ae so ka hnyi ta je hnyei ae úsákâüö m' öbun, me ca he ka hobeluâ ta je ûnyi adre penapena hnen tulut anyin ke at. 17 Ke haba at ame hobeluâ, e so e ame hobeluâ Than. 18 Anyin adre me ca he ka kap at ame ka haisoâ e, ke so bi hnen Than hna haisoâ.

HNYIMAKAN 11.

EWEK öbun e ha ka hokhnyoki nya okhulit thibi hnyi anyik monu : eke, hokhnyoki nya ju. 2 Anyin a inya oge me ci' öbun ge hwakecin ciâ anyin Khong : anyin a oge me koc' öbun ka бага a khaca, m' inye he ka hum öbun ka Keriso helâ me hlu cici. 3 Ke inya oge me ot, wâ e nye okongoâ je hnyekubun ûnyi hnyi hwakecin ae wisa me kalaöt anyi Keriso, helâ me hna iyawö Eva ge on hnen anyin tang iyawö. 4 Anyin a ne o ke at me khetâ ke Iesu bi, waleji öhmun e ca khetâ, ke öbun e ne kap ke hanu, waleji öbun e ca kap, me ke úthumetu ae so, waleji öbun e ca kap, awe, e ûcû hnöbun hna hokhnyok kâu. 5 Anyin a inya oge me ûnykûme a ca ûnyükong bi nya hnyi melen je aposetolo ae nua hnyi ke ûnyi a khaca. 6 Eja ke ne oge ne hwen monu hnyi hofuc, me oge me ca helâe hnyi metâ ; ke öhmun e hia but omanenâ e köbun hnyi ta je ûnyi hia,

II. KORINITO 12.

unyin tavat hia. 7 Hawa, iny monu anyin oge me ka ohnyikönö nya m' öbun e görany dut, ke únyi hnyi hnök hna khetâ köbun úthumetu ae so anyin Khong köbun ke ba hwaban? 8 Oge me söh ke je ekalesia, k' oge me kap hwaban únyi gadra me hnân bi hadru' öbun; 9 ke habaji ke tiga inya unyibun, ke ba ta únyi gak, me oge me ca ohmákâ ke at; anyin ame o je liamekeiny úhedrin Makedonia me ham könya hnyi tulut ae úcú; ke oge me ka hokhnyoki nya hnyi ta je únyi hia, m' oge me ca hmak köbun, ke oge me he bala bi ka hokhnyoki nya helâe. 10 Hoton hnathu anyin Keriso unyik, me ba at ame he ka thawö nya hnyi hobeluâ eang hnyi je ke keihen Akaia. 11 Anyin a ieu? hawa, anyin oge me ca betenge gabun? E khana Khong. 12 Ke haba hnök hna ányâ, me oge me he bala ka ányâ e, m' oge me thelöng deny tavat waleji adre me heleú can; me me manen dut a ödra úcú m' öhmun hnyi hnödra hna hobeluâ. 13 Haba hnyat eling, me je aposetolo thoi, a hnyat huliwa iyawö, a ka hamödrin wi' ödrin me hnân ta je aposetolo anyin Keriso. 14 Ke ca hnân bi láia e, anyin a Satana ame ka hamen wia e me hnân angela ae melam. 15 Anyin a wale, e ca hnân láia únyi ang, a g' ame he lathnyabainy ka hamödra bi wi' ödra me hnân lathnyabainy hwakecin ae wisa; ke haba obiny ködra me ame he ka helâ me anyidra huliwa.

16 Inya oge me ha hmetu, ka habe, Ca he bi ke at ka únykúme a iny monu but; ke a ne únykúme helâe, awe, köp nya thö helâ me monu, me inye na hnyi ohobeluö nya thö. 17 Haba hnök hna ha, me oge me ca ha bi helâ me Than, ke so bi helâ me monu, hnyi hobelöu hwege ang. 18 Anyin ae se hia tavat adre me hobeluâ hoton unyin, me oge me he bi nya ka hobelöu. 19 Öbun tavat ae metâ, me waleling öbun e hokhnyokâ tavat ae monu. 20 Öbun e hokhnyokâ at, ame ne thalú' öbun, ame ne ön öbun, ame ne hom hwenb' öbun, ame ne bi gan, ame ne khaú hnyimaköbun. 21 Inya oge me haikongo, helâke öhmun je hnyat ae sényin. E ka hu únyi ame hwege hnyin ke at (inya oge me hwen monu) inya minya oge me hwege hnyin. 22 Hawa, ödra at Heberu? helâ minya inya. Hawa, ödra at Isaraela? helâ minya inya. Hawa je mátrâni Aberahama ödra? helâ minya inya. 23 Hawa, ödra tavat huliwa ka Keriso? (inya oge me hwen monu) iny beönua bi nya; beönua

hnyi huliwa; ke se hia hmönyin hna labö cö nya, e se hia hmönyin hna labö osöi nya, ke iny osehia he ka mokcu. 24 E otha-búng osöi nya hnen at Juda, a úsa thöte nain hna hna. 25 At okun kuc nya ge je osö, ke at okhaca lüö nya ge veto, a ibi okun hmouca but hu oge me kec hnyin, khaca lidrik ke khaca lang eú hnyi köiö; 26 iny osehia he, oge ne kong ut hnyi je wagewe, oge ne kong ut hnen tavat venöu, oge ne kong ut hnen aten ik hnyeí, oge ne kong ut hnen Aten ke je hnyeí, oge ne khong ut hnyi taun, oge ne kong ut hnyi hnyot, oge ne kong ut eú hnyi köiö, oge ne kong ut ge hnyat me lakeiny ae thoi; 27 inya hnyi huliwa ae hmak, me vec, me osehia hmákâ, me mekihnânem, me beic, me ibiose hokhnyok, me hnyi megic, me he thu. 28 Ke ca ta je únyi únyi hnyi hoton thibi, ke ka e bala bi anyik hmak hnyi je bong hia, wale oge me kong hnye-kunâ ge ta je ekalesia hia. 29 Ewa at ae sényin, ke ca sényin bi nya? ewa at adre othöâ, ke ca vec bi nya? 30 A ne úcú könya he ka hobeluâ, me oge me he ka hobeluâ ta je únyi oge me sényinâ. 31 E khana but Khong a Kamen Tuhöta Iesu Keriso, wale a hnân he ka haisoâ nyiele balua, a oge me ca thoi. 32 Hnen gavena hnyi Damaseko a e hnyi hmeli Areta than hna tuö taun anyin at Damaseko, me me köt nya: 33 ke adre me öü nya but únyi hnyi mamalama hnyi hak veto hnyi hnyin tang, me oge me kec únyi hnyi li hnyamen.

HNYIMAKAN 12.

E ÚCÚ könya he ka hobelöu, ke ca so bi; awe, oge me he ka ha ta je hna omenená me ta je hna úthumetu únyi ge Than. 2 E khanö nya ke aten Keriso waleji fotin je huna ehac, adre kât gör-anyai ka hnyi drany a kuniny, (e ca khanö nya, ame ne únyi hnyi unyin; ke ca khanö nya minya ame ne ca e bi hnyi unyin; e khana thibi Khong). 3 E khanö nya at helâe (ame ne e hnyi unyin, ame ne ca e bi hnyi unyin, e ca khanö nya; e khana thibi Khong), 4 ke adre hom dö e ethö ka hnyi Paradaiso, k' ame löng ta je hofuc a ca hnân ha, wale ae ca úcú ka at he ka ha: 5 Oge me he ka hobeluâ at a helâe: ke oge me ca he ka hobeluö nya bi, ke so bi hnyi anyik ta je sényin. 6 Anyin a ne wek he ka hobeluâ, me iny ca monu bi; anyin oge me he ka ha hnathu: ke inya oge me hok-

II. KORINITO 13.

hnyok, wâ e nye he ke at ka únykúmi nya hon hnen hna ò nya, me ling nya. 7 Ke wâ adre nye ogöranyi nya bi hnen nuainy ta je úthumetu, me adre ham kõnya údöiny unyin, wale hna úkhünöng hnö Satana he ka kulup nya, me inye ca ti görany bi. 8 Ke iny okun khöü ka Than ge únyi eling, me me he ka ohia but gak. 9 Ke e ame ha kõnya, ka habe, E úcú köu anyik ibetengiö baú: anyin adre obekhötâ manik man hnyi sēnyin. Anyin a wale oge me senyin gan hmâ he ka hobeluâ hnyi anyik je sēnyin, me me tubi nya hnen man manin Keriso. 10 Wale me inye senyinâ ta je sēnyin, me ta je hna okongo, me ta je hna theduoc, me ta je hna seda, me ta je vec can Keriso: anyin a iny ka sēnyin, wale úen a iny hwege hnyin.

11 Iny monu but: öbun e kunö nya; anyin ae úcú köbun he ka haisoi nya: ke eja ke ne oge ne ca únyi hnathu bi, ke so bi ca inya bi hmelen ta je hing aposetolo. 12 E hnathu adre ányâ unibun ta je haten aposetolo hnyi hokhnyok hia, hnyi je haten, me úöman, me huliwa ae man. 13 Anyin a ieu a öbun hnyi hmelen keihen je ekalesia, a ca únyi ang a oge me ca ohmak' öbun? betenge ju öbun gak hnyi hwali eang.

14 Wâ bi, okuniny ju ang penapena a inya he ka he but köbun; ke oge me ca he ka ohmak' öbun: anyin oge me ca elâm anyibun ta je únyi, ke öbun bi: anyin a ca hanyen bi je lakon he ka úkhöünâ hobi kâu je kamen me hinyen, ke so bi je kamen me hinyen hobi kâu je lakon. 15 Ke oge me he ka senyin he ka ohia om-jehek, me ohio nya minya hobi kâu je hanubun. Ke oge ne hnyok gâná köbun, hawa, ame he ka úhnyükong hnöbun hna hnyok kõnya? 16 Ke so minya ju, oge me ca ohmak' öbun bi; ke so bi oge bibi-hwakecik me oge me köt öbun ge iyawö. 17 Hawa, oge me hwen iyawöâ anyibun ta je únyi hnen tavat waleji oge kunâ köbun? 18 Oge sihwegiö Tito, me kunâ e me ke liamekeiny. Hawa, ame hwenenâu Tito anyibun ta je únyi? hawa öhmu me ca he hnen Hanu a khaca? ke hnyeüca a khaca?

19 Öbun e únykúme ang a öhmun e ka owis' öhmun bi köbun. Öhmun e ha unyin Keriso hnyi hnyimakan Khong. Hnyat a oúnykúmik lö, hnân okahw' öbun ta je únyi hia. 20 Anyin a oge me ot, wâ oge nye o but köbun me ò 'bun a ca helâ me hnök hna wek, ke wâ öbun nye ò nya a ca

helâ me webun; wâ e nye hu ihunyinköu, me wathethöt, me iwatretra, me bi fuco, me úhaiö, me imediököu; 21 wâ e nye he Khonguk ka ohnyikönö nya unyibun, iny ka o hmetu, me oge me he ka tengiâ tavat ae se hia, a tavat adre me mádrâ hulö, k' adre ca ietra hwakecidrin ae ikiki, ke bi únyi monu, ke wagelue adre me ányâ.

HNYIMAKAN 13.

WALANG okuniny he a inya köbun. Adre me he ka ohmâ ta je hofuc hia hnen li at a lo ame ne kun a hnyat ohnatho. 2 Oge me bök ka ha, ke oge me ha hmetu, helâji me imwik a loiny unyibun, helâe walang ang ke hiö nya, oge me ha ködra adre me ányâ hulö, me ödra hia thithö, ka habe, oge ne he hmetu, me oge me ca he bi ka ohâhâ; 3 anyin a öbun e elâm haten Keriso eü hnyi hnyik; at a ca sēnyin unyibun, ke hu man bi: 4 anyin adre me osatauroâ e hnyi sēnyin, k' ame möt hmetu thö ge man maniny Khong. K' öhmun e sēnyin minya unyin, k' öhmun e he ka tha möt mē ge man maniny Khong köbun. 5 Elâm dö eü hnyibun, a ne hu labageju gabun; cubic öbun. Hawa, e ca khan' öbun a Iesu Keriso eü hnyibun? öbun e ne ca monu bi. 6 Ke oge me wek ame he ka khan' öbun a ca monu but öhmun. 7 Ke öhmun e hic ka Khong, m' öhmun e he ka ányâ hulö; ke ca hnân bi omanenâ öhmun hnyat ae so, ke so bi m' öbun e he ka ányâ so, ke monu bi öhmun. 8 Anyin ae ca khan' öhmun he ka ányâ ke úny úcon hnathu, ke so bi hobi kâu hnathu. 9 Anyin öhmun e senyin; a ne hwege öbun k' öhmun sēnyin bi: öhmun e hic minya m' öbun e he ka bekhöt. 10 Wale m' inye set ta je únyi ang ke tiga hiö nya, w' oge nye fuc hwege iny ka o kobun, he me musî ame ham kõnya Than hnân ote- thmâ, ke ca hnân bi hagutâ.

11 Hnyat me lakeiny lö, obiny ju ang ka habe, e so öbun e hnahic. Wisa ju öbun, ke kahwa ju; tha hnyok ju: úsoköu ju: me me e unyibun Khongon ibetengiö me hnahic. 12 Úitalofakâu ju öbun ge úcimhnyimak ae kap.

13 Ame italofa m' öbun wakap hia thithö. 14 E so e unyibun hia thithö ibetengiö baú anyin Than Iesu Keriso, me ibetengiö anyin Khong, me tha e m' öbun Hanu Kap.

TUSI ANYI PAULO KA
AT GALATIA.

HNYIMAKAN 1.

I NYA Paulo aposetolo (ca ûnyi ge at, ke ca hnen minya bi at, ke hnö Iesu Keriso bi, me Khong a Kamen, waleji a omelö hmetu thö ûheny hnyi hna mok), 2 me hnyat me lakeiny hia eang unyik, öhmun e sihnalimen ka ekalesia hnyi Galatia : 3 E so e unyibun hia thithö ibetengiö bau me hnahic ûnyi ge Khong a Kamen, me Tuhöta Iesu Keriso, 4 waleji at ame ka hamen ham e hobi kâu anyita ta je hulö, me me omeli öta ûnyi hnyi ang hmelen ae kong, hoton weny Khong a Kamöta : 5 e so he ka ogânâ bala e nyiele nyiele balua. Amen.

6 Oge me lâiâ anyin a öbun logot úsákâú öbun me at a haw' öbun ka hnyi ibetengiö baú anyin Keriso ka hnyi ke evangelia ; 7 ke ca ke evangelia bi : ke haba keihen adre me ohluhu öbun, me bewia evangelia anyin Keriso. 8 Ke öhmun e ne he, ke ame ne ke angela bi ûheny hnyi drany ka khetâ ke evangelia köbun bi, waleji öhmun e ca khetâ köbun, me so he ka anathema e. 9 Inya oge me ha hmetu walang ang, helâji me hnöhmun hna labö ha, ka habe, A ne he ke at ka khetâ köbun ke evangelia bi, wale öbun e ca kap, me so he ka anathema e. 10 Anyin a walang ang, hawa, oge me huliwan at, hawa, Khong? ke hawa, inya oge me elâm he ka osenyinâ at? anyin oge ne labö osenyinâ at, m' iny ca athnyabai Keriso bi.

11 Hnyat me lakeiny lö, inya oge me omanenâ köbun, ka habe, haba evangelia oge me khetâ me ca ûnyi bi ge at. 12 Anyin oge ca kap e ûnyi ge at, ke adre me ca nö nya minya bi, ke so bi ûnyi ge hna omanenâ anyi Iesu Keriso. 13 Anyin öbun e hia but löng ge hwakecik ehac hnyi hmi anyin at Juda, ae gan hmâ hmönyin hnök hna okongöa ekalesia anyin Khong,

me hna oaúâ e : 14 ke oge me nua tot ehac hnyi hmi anyin at Juda hon tawat ae se hnyi anyik dö unyin aten ik hnyei, anyin e gan hmâ hnök hna kong hnyekunâ ta je hwakecin lakamök. 15 Ke a manen dut weny Khong, waleji at ame úcö nya ûnyi hnyi hnyekon hinyök, me hawö nya ûnyi ge anyin ibetengiö baú, 16 he ka omanenâ Nokon eú hnyik m' inye he ka khetâ e ka Aten ke je hnyei ; oge ca ie ûhnenamö me at : 17 ke oge ca he minya Jerusalema ai ka je aposetolo a bödrin, ka bilik bi nya : ke oge me he Arabia ai ; ke oge me hmetu minya Damaseko ai.

18 Hwaban kun ta huna, oge me he Jerusalema ai he ka iouny me Kefa, me tha laba mē ffitin je bong. 19 Ke oge me ca iouny bi me ke aposetolo, ke hake Iakobo thibi liamekeiny me Than. 20 Ke haba ta je ûnyi oge sihnalimen köbun, wâ bi, oge me ca thoi hnyi hnyimakan Khong. 21 Hwaban e oge me o but ka hnyi je ke keihen hnyei Suria me Silikia. 22 Ame tiga ca wâ hnyimakök ta je ekalesia hnyi Juda unyi Keriso : 23 Ke so bi adre me löng thibi, ka habe, at eji ame okongu öta ehac, ame khetâ walang ang labageju waleji e ame oaúâ ehac ; 24 ke adre me ogânâ Khong ûnyi gak.

HNYIMAKAN 2.

KE hwaban ta je huna a fotin oge me he hmetu Jerusalema ai tha inya me Banaba, ke oge hum Tito minya. 2 Ke oge me he hoton hna omanenâ ; me thumetu ödrin ge evangelia, oge khetâ ka Aten ke je hnyei ; ke oge me ha duöngâ ka hnyat ae lung, wâ e nye ûnyi baú but wadring a inya, me hnök hna wadring ehac. 3 Ke haba Tito at ame tha e mönya, adre me ca újengö e bi he ka peritom, wale ae at Heleni : 4 ke wale thibi e can je liame-

GALATIA 3.

keiny thoi ödrin e odilâ duöngâ, ödrin e dit duöng he ka tuö hna hn' öta, waleji ate me hu ge Keriso Iesu, m' ödrin e he ka thalu öta : 5 ke öhmun e ca mita bi ködrin hnyi awa a khaca ; me me tethmä unyibun hnathuiny evangelia. 6 Ke haba hnyat eji ae lung (me ca khanö nya ödrin, ke ca únyi hnathu e könya : haba Khong ame ca wâhmakhmetoâ bi at)—haba hnyat eji ae lung, me ödrin e ca bi hanen bi könya : 7 ke so bi, e khan' ödrin a g' adre me ham könya evangelia hobi kâu tavat adre ca peritomonâ, helâe kö Peteru hobi kâu tavat adre peritomonâ, 8 (anyin a haba at a huliwan hnyeku Peteru ka hnyi hanymen aposetolo hobi kâu tavat adre peritomonâ, e minya bi at ame huliwan hnyekuk hobi kâu Aten ke je hnyei) ; 9 ke haba Iakobo, me Kefa, me Ioane, je hnyat adre ha gadrin ka habe, je hmolom, ödrin e wâ ibetengiö baú adre ham könya, me adre me ham könya me Banaba je hnyam a metâiny tha hnyok, m' öhmu me he ka he ka Aten ke je hnyei, ke haba ödrin bi ka tavat adre peritomonâ ; 10 ke ame wedrin thibi m' öhmu me he ka únykúme tavat ae theduoc ; wale thibi únyi ae hmehmelâ hnyekuk he ka ânyâ.

11 Ke ame o but Kefa hnyi Anetioka, me oge me hwege ivinö mē, anyin ae monu. 12 Anyin a e ame tha han me Aten ke je hnyei ke tiga hia bi keihen úhedra unyi Iakobo : ke ödrin e o but, me e ame todrö, me öúsákâúöâ e bi, anyin ame outen tavat adre peritomonâ. 13 Ke haba keihen at Juda adre me tha iyawö mē ; me ödrin e omonu Banaba minya hnen anyidra iyawö. 14 Ke oge me wâ a ödrin e ca he wisa hoton hnathuiny evangelia, inya oge me ha kö Kefa hnyi hnyimaködrin hia, ka habe, U at Juda, ke u je ne tha hwakecâm me Aten ke je hnyei, ke ca tha hwakecâm bi me at Juda, me ieú gam u me újengö Aten ke je hnyei he ka tha hwakecidra me at Juda ? 15 Ötin at Juda únyi hnyi unyin, ke ca Aten ke je hnyei bi ae monu, 16 e khan' öta a g' adre me ca haiwisa at ge ta je huliwainy hnanyibu, ke so bi hnen labageju kö Iesu Keriso, öta minya ang tavat ötin e labageju kö Keriso Iesu, m' adre me he ka haiwis' öta hnen labageju ka Keriso, ke ca hnen bi ta je huliwa hnyi hnanyibu : anyin ae ba at me khaca adre me he ka haiwisa hnen ta je huliwa hnyi hnanyibu. 17 Ke ate ne elâm, e me he Keriso ka haiwis' öta, ke ame ö 'ta bi a öta tavat ae kong, hawa,

haba Keriso me at huliwan hulö ? Ohe. 18 Anyin oge ne op hmetu ta je únyi oge hia but ohia, inya oge me ka omanenö nya bi, a iny at hanyâúâ. 19 Anyin oge mok ut ka hnyi hnanyibu únyi ge hnanyibu, m' inye he ka möt bi ka Khong. 20 Adre hia but tha osatauroi nya me Keriso ; ke iny möt bi ; ke ca inya hmetu bi, ke Keriso bi at ae möt eú hnyik : ke haba möt oge me melö hnyi unyin, inya oge me melö e hnen labageju ka Nokon Khong, waleji at ame betenge gak, me ka ham e hnân hobi könya. 21 Oge me ca oúnyibâúâ ibetengiö baú anyin Khong : anyin a ne hu hwakecin ae wisa únyi ge hnanyibu, awe, e únyi baú bi mok anyin Keriso.

HNYIMAKAN 3.

AT Galatia ae monu lö, adre me sihna-limen hnyi je hnyimaköbun Iesu Keriso at adre osatauroa, ke ie at ame iyaw' öbun ? 2 Wale thibi ang únyi ame bekhanö nya gabun, ka habe, Hawa, öbun e kap ju Hanu únyi hnyi ta je huliwa hnyi hnanyibu, k' ame ne hnen löng únyi hnyi labageju ? 3 Hawa, öbun e monu helâe ? öbun e hwân hnyi Hanu, ke walang ang öbun e he bi ka oumo hnyi unyin ? 4 Hawa, öbun e hia but vec baú hnyi ta je únyi ae se hia ? ame ne he ka únyi baú bi. 5 Anyin a wale, haba at ame ham köbun Hanu, me ânyâ ta je huliwa ae man unyibun, hawa, ame ânyâ e hnyi je huliwa hnyi hnanyibu, ke ame ne ânyâ hnen löng hnyi labageju ? 6 Helâ me Aberahama ame labageju ka Khong, me adre me haiâ e kâu me hwakecin ae wisa. 7 Anyin a wale, khan' öbun ju, a haba tavat adre me labageju, me ödra je mâtrâni Aberahama. 8 Ke manen dut ehac hnyi hna sihnalimen a g' ame he Khong ka haiwisa Aten je hnyei únyi hnyi labageju, ke a khetâ evangelia kö Aberahama, ka habe, Ame he ka hnahic ta je hnyei hia únyi gam. 9 Wale me me tha hnahic tavat adre me labageju me Aberahama at ame labageju. 10 Anyin a haba tavat adre me laba hnyi ta je huliwainy hnanyibu, me ödra but hnyi hmelen hnaúhangö : anyin adre hia but sihnalimen. ka habe, E ve hnauhangö but ödra hia adre me ca tethmä hnyi ta je únyi hia thithö adre me sihnalimen hnyi tusiny hnanyibu he ka ânyâ. 11 Ke e manen ae ba at adre me haiwisa hnyi hnyimakan Khong únyi ge hnanyibu : anyin, Ame he ka möt at ae

GALATIA 4.

wisa hwakecin únyi hnyi labageju ; 12 ke haba hnanyibu me ca hanen bi labageju ; ke, Haba at ame he ka vheno e, me e ame he ka möt káu. 13 Haba Keriso ame úcú öta únyi hnyi hnaúhangöiny hnanyibu, anyin a e ame wia me hnaúhangö hobi köta : anyin adre hia but sihnalimen, ka habe, E hnaúhangö but tavat hia adre me uhni ödra hnyi útö : 14 me me o but hnahic anyi Aberahama ka Aten je hnyei ga Keriso Iesu ; me me hu thö köta hnen labageju Hanu adre ha báná.

15 Hnyat me lakeiny lö, oge me ha helá me hwan at : ka habe, Eja ke ne a ne úhinykôu anyin at, k' adre hia but ohmá, me ba at ame he ka thang, me bi hanen hmetu. 16 Ke adre ha ta je hna ha báná kö Aberahama me mátrániny. E ame ca ha, ka habe, Ka ta je mátrán, heláke me se hia ; ke heláke me khaca thibi, ka habe, Ka mátránám, wale Keriso. 17 Ke inya oge me ha, ka habe, haba úhinykôu hnen Khong hna ohmá káu adrem, ae ca khana hnanyibu he ka thang hmetu, waleji a foa haded me thöte je huna hwaban úhinykôu, me me öúnyibáúá hna ha báná. 18 Anyin a ne únyi hnyi hnanyibu hwajekhon me ca únyi bi hnyi hna ha báná : ke Khong ame ham e kö Aberahama hnyi hna ha báná. 19 Ke hnán eú hnanyibu ? Adre bi hanen e can ta je hna hanyáúá, ke ne o but ame o thö mátrán, wale adre ha báná káu ; ke hnen ta je angela hna otílá e hnyi hnyamen at ame óúsokóuá. 20 Ke haba at ame óúsokóuá me ca hnán hobi káu at a khaca ; ke haba Khong me khaca thibi. 21 Ke hawa, haba hnanyibu me úcon ta je hna ha báná ge Khong ? Ohe : anyin a ne hu hnanyibu adre ham ae khana he ka omelö, awe, adre me ne he ka haiwisa únyi hnyi hnanyibu. 22 Ke haba hnyi hna sihnalimen adre hia but thelöng ta je únyi hia hnyi hmelen hulö, m' adre me he ka ham ka tavat labageju hna ha báná únyi hnyi labageju kö Iesu Keriso.

23 Ke adre tu' öta ehac hnyi hmelen hnanyibu, waleji ke tiga ca o bi labageju, ke adre theling öta ke ne o but ame manen dut labageju ame he ka o. 24 Wale me haba hnanyibu, me hnán at úne köta he ka lili öta ka Keriso, m' adre me he ka haiwis' öta únyi hnyi labageju. 25 Ke walang ang ame o but labageju, me ame ca musi öta hmetu bi hnen at úne. 26 Anyin a je lakon Khong öbun hia a deny labageju kö Keriso Iesu. 27 Anyin a haba öbun hia

adre bapataisoá ka Keriso, me öbun e khaú öbun ge Keriso. 28 Ke ba hmetu at Juda, ke ba at Helene, ke ba at hwenbá, ke ba at he baú, ke ba бага, ke ba momo ; anyin a khaca thibi öbun hia unyin Keriso Iesu. 29 Ke öbun e ne laten Keriso, awe, öbun je mátráni Aberahama, a tavat tren hwajekhóú helá me hna ha báná.

HNYIMAKAN 4.

KE inya oge me ha, ka habe, E ka tiga wanakat bi atö, me ca ve bongon bi e me athnyabainy, ke so bi e tuhan hia ; 2 ke ame musö e hnen tavat úne, me tavat tue, ke ne o but hnyi úen a thu hnen kamen. 3 Heláe minya öta, waleji k' öta tiga je wanakat, me adre me musi öta hnyi je hna úne a bán anyin hmeledrany : 4 ke ame o but úen adre thu, me haba Khong ame kuná Nokon, adre hnokoá hnen momo, a hnokoá hmelen hnanyibu, 5 me me he ka úco tavat adre me laba hmelen hnanyibu, m' adre me he ka köp öta helá me je hing lakon. 6 Ke can öbun je hing lakon, me Khong ame kuná Hanon Nokon ka hnyi je hnyekubun, k' ame hongot, ka habe, Aba, Cica. 7 Anyin a wale, u ca athnyaba hmetu bi, k' u nokon ; ke u nokon, awe ame he ka hu hwajekhom únyi ge Khong.

8 Ke haba ehac, waleji ae tiga ca khan' öbun Khong, me adre me hwen' öbun hnen ta je únyi a ca je hing khong : 9 ke e khan' öbun Khong walang ang, ke khana Khong öbun, me ietú gabun öbun e hwiö hmetu ka hnyi ta je únyi á bán, ke sényin, ke ca únyi hnathu, wale ame webun hmetu he ka hwenbá káu ? 10 Öbun e tuö je bong, me je tehi, me je úen, me je huna. 11 Inya oge me ot gabun, wá e nye únyi baú anyik huliwa köbun.

12 Hnyat me lakeiny lö, inya oge me khóú köbun he ka helá mönya, anyin a haba inya, me helá möbun. Öbun e ca hia but okongu nya : 13 ke e khan' öbun a oge bök ka khetá evangelia köbun, k' ame sényin unyik : 14 ke haba úcubic köbun waleji hnyi unyik, me öbun e ca húkötíá, me degec ut ; ke öbun e köp nya heláke me angela anyin Khong, heláke me Keriso Iesu. 15 Ke ewa hnöbun hna baisóá ? anyin oge me ohnathu öbun, ka habe, a ne khan' öbun, me öbun e hia but úá je li emaköbun me ham bi könnya. 16 Hawa, iny iwahnaihmiöny m' öbun, anyin oge me ha hnathu köbun ? 17 E hwege wedra

GALATIA 5.

öbun, ke ca so bi ; eke, e wedra he ka ovesei öbun, m' öbun e he ka ti webun ödra. 18 Ke so öbun e he bala ka weny hwegia so, ke ca heläe thibi hnyi ün a tha inya möbun. 19 Je lakuk lö, inya hmetu oge me vec hnyekon helä me at erkini öbun, ke ne o but a e but Keriso eü hnyibun, 20 eke, e wek he ka tha inya m' öbun walang ang, me okebongonä ifucik ; anyin oge me loloä gabun.

21 Ha th' öbun könya, öbun hnyat a webun he ka laba hmelen hnanyibu, hawa, öbun e ca löng hnanyibu ? 22 Anyin adre sihnalimen, ka habe, lo li laku Aberahama, haba khaca me nokon momo adre üco, ke nokon momo ame he baü khaca. 23 Haba nokon momo adre üco, me adre hnokoä hoton unyin ; ke haba nokon momo ame he baü, me adre me hnokoä hoton hna ha bänä. 24 Haba ta je ünyi e me hnän ühöücü : anyin a haba li momo e, me li ühinyökou ; khaca ünyi hnyi bucen Sinai, k' ame hnokoä ka hnyi hwenbä, waleji Hagara. 25 Haba Hagara eling me wale bucen Sinai hnyi Arabia, e ücü me Jerusalema walang ang : anyin a e ame tha hwenbä me lakon. 26 Ke haba Jerusalema ethö me ame he baü, wale hinyöta. 27 Anyin adre sihnalimen, ka habe,

Senyin dö, u toünyi ame ca hnokoä ;
Kuku thö me tenge, u at ame ca vec
hnyäm :

Anyin ae se hia lakon momo ame laba
baü hon at ae hu äiän.

28 Hnyat me lakeiny lö, öta ang lakon hna ha bänä, heläji me Isaaka. 29 Ke haba ehac me ame okongoä at adre me hnokoä ünyi hnyi Hanu hnen at adre me hnokoä ünyi hnyi unyin, ke heläe minya walang ang. 30 Ke ieü hna ha hnyi hna sihnalimen ? Tha obä but momo a athnyaba me nokon da : anyin ame ca he da nokon momo a athnyaba ka tha hwajekhon me da nokon momo ame he baü. 31 Anyin a wale, hnyat me lakeiny lö, ca lakon momo a athnyaba öta, ke lakon momo ame he baü bi öta.

HNHYIMAKAN 5.

AME hia but hn' öta Keriso ka hnyi hna hna bäüä : anyin a wale, tethmä ju, ke ca ovheli öbun hmetu bi ge wen hwenbä.

2 Wä bi, inya Paulo oge me ha köbun, ka habe, öbun e ne kap hna peritom, me ba

troban köbun ünyi ge Keriso. 3 Eke, inya hmetu oge me thumeto tavat hia adre kap hna peritom a g' ame hu hanyen ködra he ka löng hoton hnanyibu hia thithö. 4 Adre hia but ösäkäü' öbun me Keriso, öbun tavat öbun e behaiwis' öbun hnyi hnanyibu ; ke öbun e ü but ünyi hnyi ibetengiö baü. 5 Anyin ate me halubahingen gejon hnyi hwakecin ae wisa hnen labageju ünyi hnyi Hanu. 6 Anyin ae ca ünyi hnathu bi ka Keriso peritom, me ca peritom ; ke so bi labageju, at ame huliwa hnyi ibetengiö. 7 Öbun e hia but wadring so ; ia ovheli öbun m' öbun e ca he bi ka löng hoton hnathu ? 8 Haba ünyi eang ame övheli, me ca ünyi bi ge at ame haw' öbun. 9 Haba leven ae ühnyükong ame ölevenä bwiny falawa hia. 10 Inya oge me labageju öbun hnyi Than, a öbun e ca he ka webun ke ünyi : ke haba at ame ovheli öbun, me ame he ka o käu hwaban, k' adre me ca he ka wämhakmetoä at. 11 Ke haba inya, hnyat me lakeiny lö, oge ne khetä bala peritom, ieü adre me okongu nya bala bi gan ? a ne heläe, me ba but hnän othöä hnyi satauro. 12 Haba wek, me me he tavat adre me ovheli öbun ka hamödra subä degeci ödra bi.

13 Hnyat me lakeiny lö, adre hia but haw' öbun ka hnyi hna hna bäüä ; ke so bi ca he öbun ka wia hna hna bäü' öbun, me hnän hobi käu unyin, ke ibiathnyabakou ju hnyi ibetengiö. 14 Anyin adre ohwädä hnanyibu hia hnyi hofuc a khaca, ka habe ; U me he ka betenge ge at ame laba hakenyi u helä me u bi. 15 Ke öbun e ne ühülü, me üönöbunkou, ö' bun äü, wä öbun nye he ka üohiöbunkou.

16 Ke inya oge me ha, ka habe, E so öbun e he bala hnyi Hanu, me öbun e ca he ka änyä weny unyin. 17 Anyin a haba anyin ame üö bi ünyi me Hanu, ke haba Hanu ame üö bi ünyi me unyin ; anyin a ödru li at üö bi ünyi köu ödru ; waleling me öbun e ca änyä bi ünyi ame webun. 18 Ke so bi a ne lili öbun Hanu, me ca öbun bi hnyi hmelen hnanyibu. 19 Ke e manen dut ta je huliwa anyin unyin, wale, bi ünyi monu, me hwakecin ae ikiki, me hnyok waelue, 20 me hmi ka je hnatheat, me bi khong, me bi iwahnaihmiöny, me iwatretra, me ihunyinkou, me wathethöt, me imoukou, me khekhe lo, me vese, 21 me behnyok, me ic monu, me imediakou, me ta je ünyi heläe : inya oge me haimemenä köbun ge ta je ünyi e, heläji me hnök hna haimeme-

EFESO 1.

nâ ehac, ka habe, haba tavat adre me ânyâ helâe me adre me ca he ka bi hwajekôûdra hnyi dôkhu dokhon Khong. 22 Ke haba je wan Hanu, me, ibetengiö, me senyin, me hnahic, me hokhnyok beû hmâ, me menyik, me hwakecin ae so, me hnathu, 23 me hwakecin ae ilemuk, me weny ae ûcû : adre ca nyibo bi ta je ûnyi helâe. 24 Ke haba ta je laten Keriso, me adre me osatauroâ unyin, me ta je weny e, me ta je weny ae ûjông.

25 Ate ne möt hnyi Hanu, awe, e so ate me vheno hnyi Hanu. 26 Ca he öta ka weta lung baû, me ûhmönyinköu, me ihunyinköu.

HNHYIMAKAN 6.

HNYAT me lakeiny lö, eja ke ne a ne hom uthmâhmâ ke at hnyi hna hanyâûâ, hamöbun tavat hnyi hanu he ka kap hmetu at a helâe hnyi hnyok ae menyik ; ke wâ wiö u bi, wâ e nye cubic u minya bi. 2 Ûkhûkhûö th ö honöbun je hok, me ohwâdâ helâe hnanyibu anyin Keriso. 3 Ke a ne ûnykûme ke at a ka e at ae ûnyi hnathu, ke ca e bi, e ame ka iyawâ e bi. 4 Ke so ka tavat he ka ve cubec anyidra ta je huliwa bi, me adre me he ka hu hnân hobelöu a ûnyi gadra bi, ke ca ûnyi bi ge ke at. 5 Anyin ame he tavat hia ka ve hijen honödra ta je hok.

6 Ke hamen at adre nâ hnyi hofuc he ka ham ta je ûnyi ae so ka at ame nâ. 7 Ca omonu öbun bi ; e pason he ka iyawâ Khong : anyin a haba hna tâ hnen ke at, me e ame he bi ka meno minya helâe. 8 Ke haba at

ame tâ ka hnyi hing unyin bi, me e ame he ka meno hna bobot ûnyi hnyi unyin ; ke haba at ame tâ ka hnyi Hanu, me e ame he ka meno möt ame ca ba balua ûnyi hnyi Hanu. 9 E so ate me ca sēnyin hnyi huliwa ae so : anyin ate me he ka meno hnyi ûen cici, at ka ca sēnyin bi. 10 Anyin a wale, e ka hu ûen köta, e so ate me he ka mâdrâ huliwa ae so ka tavat hia thithö, ke ti ânyâ bi ka tavat a ödra hnyi lap anyin tavat labageju.

11 Wâ ju ûganiny je mataitusi oge hia but sihnalimen köbun ge hing hnyamök. 12 Haba tavat adre me wedra he ka haiso, ödra hnen at, me adre me ûjôngi öbun he ka peritom ; ke adre me ânyâ helâe wâ adre nye okongu ödra can satauro anyin Keriso. 13 Anyin a haba tavat adre hia but peritomona, me adre me ca löng bi hoton hnanyibu ; ke wedra bi he ka operitomoni öbun, m' adre me he ka hobeluâ je unyibun. 14 Ke haba inya, me oge me ca he bala ka hobelöu ke so thibi hnyi satauro anyin Tuhöta Iesu Keriso, k' adre me osatauroâ hmeledrany könya a deny e, ke ka inya minya ka hmeledrany. 15 Anyin ae ca ûnyi hnathu peritom me ca peritom, ke so bi at ae teb ûnyi. 16 Ke haba ödra hia adre me he hoton tulut eang, me so e unyidra me Isaraela anyin Khong hnahic me ibetengiö.

17 Ke hwân dö walang ang, ca he hmetu bi ke at ka ovheli nya : anyin ae hu bi hnyi unyik je hwadeny a je haten Iesu.

18 Hnyat me lakeiny lö, e na e ju hnyi je hanubun ibetengiö bau anyin Tuhöta Iesu Keriso. Amen.

TUSI ANYI PAULO APOSETOLO KA

AT EFESO.

HNHYIMAKAN 1.

INYA Paulo, aposetolo anyin Keriso Iesu ûnyi ge weny Khong, oge me sihnalimen ka wakap hnyi Efeso, me tavat adre me labageju ka Keriso Iesu : 2 E so e unyibun ibetengiö baû me hnahic ûnyi ge Khong a Kamöta, me Than Iesu Keriso.

3 Haisoâ Khong me Kamen Tuhöta Iesu Keriso, at ame hia but ohnahici öta ge ta je hnahicin hanu hia hnyi ta je dok hnyi drany ûnyi ge Keriso : 4 helâ me hnen hna ûc' öta kâu, k' adre me tiga ca bi taben hmeledrany, m' ate me he bi ka kap me ba hnyikonguta hnyi hnyimakan hnyi ibetengiö : 5 ke e ame ip öta adrem hnân

wi' öta me lakon a deny Iesu Keriso, hoton weny ae so, 6 hnân ogânâ hmanenginy anyin ibetengiö baú, waleji a betenge baú köta únyi ge Oúnykúminy: 7 ke hu but gata deny e, hna úco möt únyi ge dren, wale he ka thang ta je hulö, helâ me úganiny anyin ibetengiö baú, 8 waleji e ame ham gâná köta hnyi metâ hia, me wâ wia hia, 9 ke e ame omanená köta únyi ae iyong hnyi weny, hoton weny ae so, waleji e ame bân ka únykúme únyi gan 10 hnyi hna penapena bekhötâ ta je úen, me me khaca thibi ta je únyi hia ka Keriso, wale ta je únyi ethö hnyi drany, me ta je únyi eang hmeledrany; hnân hobi kâu, 11 ke hu minya jekhötâ unyin, ke adre ip öta adrem helâ me weny, wale at ame huliwan ta je únyi hia hoton únykúmenen weny; 12 m' adre me he ka wi' öta hnân ogânâ anyin hmanenang, a öta hnyat a böta ka gejon ka Keriso: 13 waleji öbun minya, öbun e löng hofuc ae hnathu, wale úthu-metu ae so hnân hobi kâu anyibun möt,— waleji öbun e labageju kâu, k' adre me otethm' öbun hnen Hanu Kap waleji adre me ha bânâ, 14 waleji haten hnân ohnathoâ jekhötâ, ke ne o but adre me he ka omelö tavat adre úco, hnân ogânâ anyin hmanenang.

15 Waleling, inya oge me löng anyibun labageju ka Than Iesu, ke manen e ka wakap hia, 16 me oge me ca menâ ole gabun, oge me hai öbun hnyi hijik je hic: 17 me me he Khongon Tuhöta Iesu Keriso, Kamen ae hmanenang, ka ham köbun hanuiny metâ me hna omanená, m' öbun e he ka wâhmakhmeto e: 18 me obwela li emakan je hnyekubun, me me khan' öbun dö gejon hnyi hnen hna hawâ, me únyi hnathuiny hmanenginy jekhon unyin wakap, 19 me maniny man ae ti gan hmâ hobi köta tavat adre me labageju, hoton ihuliwainy maniny man ae gan hmâ, 20 waleji a huliwa hnyi Keriso, hnyi hnen hna omelö hmetu thö únyi hnyi hna mok, me olaba e hnyi ke keihen a metân ethö hnyi drany, 21 e beönua bala hon je than hia thithö, me musu, me man, me dökhü, me je ien hia adre me ha, ca hake thibi eang hmeledrany, ke minya bi hnyi úen ame he ka o: 22 ke e ame ip ta je únyi hia hnyi hmelen li can, me hna but kâu he ka bi ban ta je únyi hia thithö hobi kâu ekalesia, 23 wale unyin, a anyin unöngöt, at ame öunöngötâ hia ge ta je únyi hia.

HNYIMAKAN 2.

KE e ame omeli öbun, hnyi úen öbun e mok can hnöbun hna hanyâúâ me hulö, 2 waleji öbun e vheno adrem hoton hwakecin eang hmeledrany, hoton taben at ame musö hnyi dok ae bwang, wale hanu at ame huliwa hnyi hnyekon tavat adre me ca úling; 3 ke öta hia thithö minya ate tha hwakecita m' ödra ehac hnyi ta je weny unyita, me ányâ ta je weny unyin me hnyok, ke öta ta je aten hmönyin, wale adre hnöku öta hnyin, e úcú me keihen:— 4 ke haba Khong at ae tren ibetengiö ae gan hmâ, ke únyi hnyi úganiny anyin ibetengiö köta, 5 waleji öta tiga mok can hnöta hna hanyâúâ, me e ame tha omeli öta me Keriso (adre omeli öbun únyi ge ibetengiö), 6 ke ame tha otil' öta hmetu thö mē, me tha olab' öta hnyi ta je dok ethö hnyi drany únyi ge Keriso Iesu: 7 me me he ka omanená hnyi ta je dö ame he ka o únyi hnathuiny anyin ibetengiö baú hnyi hwakecin ae so köta, únyi ge Keriso Iesu: 8 anyin adre hia but omeli öbun hnen ibetengiö baú a deny labageju; ke habe e, me ca únyi gabun: ke bwihlany anyin Khong: 9 ca únyi ge huliwa, wâ e nye he ke at ka hobelöú. 10 Anyin a haba öta, me anyin huliwa, k' adre up öta unyin Keriso Iesu he ka ányâ ta je huliwa ae so, waleji a penapena Khong adrem m' ate me he ka vheno.

11 Anyin a wale únykúme ju a öbun Aten ke je hnyei adrem únyi hnyi unyin, k' adre wenyi öbun, ka habe, Wacaperitom, hnen tavat adre me wenyö, ka habe, Waperitomonâ hnyi unyin, k' adre ányâ ge bnyam; 12 ke ca e unyibun Keriso hnyi ta je bong eling, ke ta je atkanyua öbun hnyi bongon at Isaraela, ke ta je atkanyua öbun hnyi je úhinyköu waleji adre me ha bânâ, ke ba geju unyibun ke ba minya Khong eang hmeledrany. 13 Ke walang ang, haba öbun hnyat ae sâkâú ehac, me unyi Keriso Iesu adre me ouhakekenyi öbun únyi ge dren Keriso. 14 Anyin a e thibi anyita úsoköu, waleji at ame khacâ li at a lo, k' ame kia hak hnyi wanben, wale singiny uma, 15 k' ame ohia hnen hing unyin iwahnaihmöny, wale hnanyibu adre me hûna, a ta je hwakecin adre otilâ; me me he ka op únyi ge li at a lo ke at a teb únyi, me me hu úsoköu bi; 16 me me he ka ousoökou ödrü me Khong únyi ge

unyin a khaca, deny satauro, k' ame ohia iwahnaihmiöny nhen e: 17 waleling me me o me khetâ úsoköu köbun a öbun sâkâû, ke úsoköu ka tavat minya a ödra hakekeny: 18 ke hu but gata hia únyi gan gethen ka Kamen únyi ge Hanu a khaca. 19 Anyin a wale ca je atkanyua hmetu bi öbun, ke aten ke ta je hnyei bi, ke so bi ta je aten hnyei tha öbun me wakap, ke aten lap bi anyin Khong, 20 ke adre me up öbun hon taben ta je aposetolo me ta je perofeta, ke haba vetoiny ban kopiny, me Iesu Keriso; 21 k' adre me ve thaúhújaköuâ ta je uma hia únyi gan, me ogöranyâ hnân uma kap unyin Than; 22 ke adre tha up öbun minya më hnân umen Khong únyi ge Hanu.

HNYIMAKAN 3.

A NYIN a wale inya Paulo, a cö nya Keriso Iesu hobi köbun Aten ta je hnyei,—2 öbun e ne hia but löng hanymök, wale ibetengiö baú anyin Khong adre ham könya hobi köbun: 3 waleji ge hnödra hna omanená könya únyi ae iyong nhen hna omanená, helâ me hnök hna bök ka set okhulitâ, 4 ke öbun e ne aú, öbun e he ka wâ anyik metâ hnyi únyi ae iyong anyin Keriso; 5 waleji adre ca omanená ka tavat hnyi ta je dö adrem, helâ me hnödra hna omanená köhmun walang ang a je aposetolo ae kap, me ta je perofeta únyi ge Hanu; 6 a g' ame he Aten ke je hnyei ka hnyi hu minya, me hnyi hanen unyin, me hnyi kap ta je únyi adre ha bânâ ge Keriso únyi ge úthumetu ae so, 7 waleji adre wiö nya hnân athnyabainy hoton bwihlany wale ibetengiö baú anyin Khong a ham könya hoton huliwainy maniny man. 8 Ke haba ibetengiö baú eang adre ham könya, wale at ae úhnyúkong hmönyin hmelen tavat ae úhnyúkong hnyi wakap hia, me inye he ka khetâ ka Aten ta je hnyei tang omjehen Keriso, ae ca hnân ha bi úganiny; 9 me he ka omelamá tavat hia, m' adre me he ka wâ hna penapena ae iyong adre ikhâlâ adrem unyin Khong wale at ame op ta je únyi hia thithö; 10 m' adre me he ka omanená walang ang ka ta je than me ta je musi hnyi je dok ethö hnyi drany, metâiny Khong ae ve bongon, a deny ekalesia, 11 hoton nhen hna únykúme bânâ, kâû adrem balua, he ka ányâ únyi ge Keriso Iesu a Tuhöta: 12 e hu but gata únyi gan tang hwege me gethen he ka didrö, me gejon únyi ge labageju kâu. 13 Anyin a

wale inya oge me sumat m' öbun e ca he ka sényin hnyi anyik ta je vec hobi köbun, wale hnân hobelöü köbun.

14 Anyin a wale inya oge me cibouca ka Kamen, 15 ke únyi gan adre wenyö ien ta je lap hia ethö hnyi drany, me eang hmele-drany, 16 me me he ka ham köbun, hoton úganiny anyin hmanenang, he ka ohwegi öbun ge man únyi hnyi Hanu hnyin at eú hnyi hnyibun; 17 me me he Keriso ka laba eú hnyi je hnyekubun nhen labageju; me me he ka hu iwánibun me taben hnyi ibetengiö, 18 me me khan' öbun he ka tha wâ wia me wakap hia bongon úlaueu, ke ibeúen, ke úgöraniny, ke údiliny, 19 me he ka khan' öbun ibetengiö anyin Keriso ae beönua eling hon metâ, me me he ka ounöngöti öbun nhen Khong.

20 Haba at ae khana ányâ ta je únyi hia ae beönua hon hnöta hna sumâtâ me únykúme ka hnyin, hoton man at ame huliwa eú hnyi je hnyekuta, 21 me so adre oganá e hnyi ekalesia me hnyi Keriso Iesu hnyi ta je dö hia nyiele nyiele balua. Amen.

HNYIMAKAN 4.

A NYIN a wale inya at adre cö nya can Than, inya oge me khöu köbun he ka he hoton hna haw' öbun ka hnyin, 2 me hnyok ae hnyikánâ ke menyik, me hokhnyok ae beú hmâ, me ve hokhnyok bi hnyi ibetengiö; 3 ke hwege ju öbun he ka tha hnyok tot hnyi Hanu hnyi wen úsoköu. 4 Khaca thibi unyin, ke khaca thibi Hanu, helâ me hnödra hna haw' öbun hnyi geju a khaca waleji adre haw' öbun ka hnyin; 5 khaca thibi Than, ke khaca thibi labageju, ke khaca thibi bapataiso, 6 khaca thibi Khong, ke e Kamen hia, ke hon hia, ke unyin hia, ke eú hnyin hia. 7 Ke adre me ve ham köta ibetengiö baú hoton tulutiny bwihlany anyin Keriso. 8 Anyin a wale, e ame ha, ka habe,

Hnyi úen e ame ölö thö göranyai, me e ame lelö aten hwenbâ ka hnyi bâ,

K' ame ham ta je bwihlany ka tavat.

9 (Ke ieu bongon ang, ka habe, E ame ölö thö? ca walang ang a ga utut minya ka hnyi ta je dok ae hnyikánâ eang hmele-drany? 10 Ke haba at ame utut, me wale thibi e at ame ölö ethö hon ta je drany hia, me me he ka ounöngötâ hia.) 11 Ke e ame wia keihen he ka bi hanymen aposetolo; keihen he ka perofeta; keihen he ka omanená úthumetu ae so; keihen hnân je

pasteur me at úne; 12 hnân he ka owisa wakap, me he ka hom hadruâ huliwa, me he ka op tavat göranyai unyin Keriso: 13 ke ne o but ate me o hia ka hnyi tha hnyok hnyi labageju, me wâhmakhmetoâ Nokon Khong, ka hnyi at hnathu but, ka hnyi tulutiny úganiny unöngötiny Keriso: 14 m' ate me ca ta je wanakat hmetu bi, adre me ouang dö me hom monoâ hnen je ang hia, wale je hna úne, me bibihwakecin anyin tavat, me iyawö, hoton je hna únykúme he ka omono; 15 ke so bi köta he ka ha hofuc ae hnathu hnyi ibetengiö, me me he ka kú thö kâu hnyi ta je únyi hia, wale thibi ban, a Keriso; 16 únyi gan unyin hia adre tretrao wia, me úhújâkôuâ wia, hnen önyen ta je hna hújö hia, hoton huliwa hnyi tulutiny je ke keihen unyin, me ame gan tot unyin, m' adre me op e göranyai hnyi ibetengiö.

17 Anyin a wale inya oge me ha me ohnatho ge Than, a öbun e ca he hmetu ka he helâ me Aten ke je hnyei, tavat adre me he hoton je hnyekudra ae ba önyen, 18 adre me olidrá je únykúmenödra, me atkanyua but ge úhömeli anyin Khong anyin ae ca khan' ödra, anyin adre ohnâkâ je hnyekudra; 19 ke adre me ca hmehma hmetu bi, me adre me hn' ödra but ka hnyi weny ae monu, he ka ányâ ta je únyi hia ae ikiki me hwen hmiâ. 20 Ke öbun e ca úne unyi Keriso he ka helâe; 21 öbun e ne löng kâu, me úne unyin helâ me hnathu unyi Iesu: 22 m' öbun e he ka úny dö at ehac ae kong tot, hoton ta je weny ae iyawö, waleji hwakecibun ehac; 23 me ohât' öbun hmetu hnyi únykúmenen je hnyekubun, 24 me khaú' öbun ge úkhaú wale at ae teb únyi, waleji adre op helâ me Khong hnyi hwakecin ae wisa, me kwakecin ae kap me hnathu.

25 Anyin a wale, degec ut öbun thoi, ke ve ha ju öbun hnathu ka at ae hakekeny köbun: anyin a öta ang je ong outhunyin ke at me ke at. 26 Hmönyin dö, ke ca monu bi: ke so e ca he bi seúnö ka dit, k' öbun tiga hmönyin: 27 ke ca bi hnen minya ka diabolö. 28 Haba at ame venöu, ca he hmetu bi ka venöu: ke so bi e ame he ka huliwa, me ányâ ge li hnyamen únyi ae so, me me hu kâu hnân he ka ham ka at ae theduoc. 29 Ca he bi ka o únyi hnyi je hnyimöbun hofuc ae ikiki, ke so bi hofuc ae so hobi kâu úen ae úcú, me me okúâ so ka tavat adre me löng. 30 Ke ca he öbun ka ovecâ Hanon Khong ae Kap,

wale at a bi hatöbun ke ne o but hnyi bonginy úhömeli. 31 Úsâkâúö but öbun me hofuc hia ae hiny, me ú, me hmönyin, me hwan ae hwege, me haikongoâ, me hnyok ae kong hia: 32 ke so öbun e ibetengiököu, ke úhnyökköu, ke úhnasoâköu, helâ me hnen Khong hna hna soi öbun ge Keriso.

HNHYIMAKAN 5.

A NYIN a wale hnu ju öbun hoton Khong, helâ me je wanakat a oúnykúminy; 2 ke he bala hnyi ibetengiö, helâ me Keriso ame betenge köbun, ame ka ham e hobi köta, hnân hut, ke hut adre hlingâ, wale únyi ae bo so ka Khong. 3 Ke haba bi únyi monu, ke ta je hwakecin hia ae ikiki, ke behnyekon, me ca he hmetu bi ka ha unyibun, anyin ae ca úcú ka wakap; 4 helâe minya újao, ke úhnenamöiny monu, ke úhiö, wale ke ta je únyi ae ca úcú, ke so bi ole. 5 Anyin ae ti khan' öbun ang, a haba at ame bi únyi monu, ke ikiki hwakecin, ke behnyekon, a at khudrung ka je hnatheat, me ame ca he ka hu hwajekhon hnyi dökhü dokhon Keriso me Khong. 6 Ca he ke at ka omonu öbun ge ta je hofuc adre hlo: anyin a únyi hnyi ta je únyi helâe ame o but tang hmönyin anyin Khong ka tavat adre me ca úling. 7 Anyin a wale ca he öbun ka hanen hwakecindra; 8 anyin a öbun menekholom ehac, ke walang ang öbun e melam but hnyi Than: vheno bala ju helâ me ta je lakon melam, 9 (anyin a haba wan melam, hwakecin ae so hia, ke hwakecin ae wisa me hnathu), 10 ke elâm d' öbun únyi hnân osenyinâ Than; 11 ke ca hnyi hanen öbun ta je huliwa hnyi menekholom ae ba wan, ke so bi he ka thawâ; 12 anyin a haba ta je únyi adre me ányâ duöngâ, me hnân ohmehma he ka úsabö. 13 Ke haba melam, me wale at ame omanená ta je únyi hia adre thawâ: anyin ae manen hia hnen e. 14 Anyin a wale, e ame ha, ka habe, Hmak dö, u at ame mokut, ke tot hmetu thö úhem hnyi hna mok, me ame he Keriso ka omelami u.

15 Anyin a wale, wâ wia úhebun, ca he bi ka helâ me tavat ae monu, ke so bi helâ me tavat ae metâ; 16 ke oúnyihnathoâ ta je úen, anyin ae kong ta je bong. 17 Anyin a wale, ca hwen monu bi öbun, ke wâ únykúme weny Than. 18 Ke ca monu bi öbun ge waina wale ame okúâ hulö, ke so he ka ounöngöti öbun ge Hanu; 19 ke

ûhnenamö th' öbun hnyin ta je salamo, me ta je khumöng, me ta je fehuainy hanu, ke khumöng dö me senyin hnyi je hnyekubun ka Than; 20 ke ole bala ju ta je únyi hia ka Khong hnyi ien Tuhöta Iesu Keriso; 21 ke úlingköu öbun ju hnyi ot ka Keriso.

22 Omomo lö, löng ju hoton laöiöbun, helâ me ka Than. 23 Anyin a ban momo бага, helâ me Keriso a ban ekalesia, ke e thibi omelen unyin. 24 Ke haba hwakecin hna löng hoton Keriso hnen ekalesia, me so e helâe minya omomo ka laöiödra hnyi ta je únyi hia. 25 Obaga lö, betenge ju ka laöiöbun, helâ me hnen Keriso hna betenge ge ekalesia, ame ka bam e bi hobi kâu e; 26 me me he ka okâbâ, me ânyâwia ge hna hneû hnyi köiö hnen hofuc, 27 me me he ka hom kâu bi ekalesia ae hmanenang, ae ba hnyikongon me ca hweheweti me ke únyi helâe: ke ame he ka kap me ba hnyikongon. 28 Helâe hamen obaga he ka betenge ge laöiödra helâ me ka je unyidra bi. Haba бага at ame betenge ge âiân, e ame ka betenge bi kâu; 29 anyin ae ba bala bi at ame hociâ unyin bi; ke ame hân me tuö e, ke helâe Keriso ka ekalesia; 30 anyin a öta ang je ong outhunyin Keriso. 31 Anyin a wale, ame he бага ka hna but kamen me hinyen, me kece ka âiân, me me khaca thibi unyidru. 32 Únyi e ae iyong hmönyin: ke oge me ha ge Keriso me ekalesia. 33 Ke so bi e so öbun e ve betenge ge laöiöbun helâ me öbun bi; ke haba momo e so e ame he minya ka ogânâ бага.

HNYIMAKAN 6.

JE wanakat lö, löng ju hoton lakamöbun me lahinyöbun hnyi Than: anyin a wale wisa. 2 Ogânâ kâmâm me hinyâm (wale hnanyibu a bán ae hu hna ha bánâ hnyin), 3 me u me hnahic, me laba beûhmâ eang hmeledrany. 4 Ke haba öbun je kamen, ca öküâ bi hmönyin ka je lakubun: ke so bi he ka hat ödra hnyi hna n' ödra, me hna úne ködra hnen Than.

5 Haba öbun je athnyaba, löng ju hoton tavat adre me musi öbun hnyi unyin, ge ot me öbubuny hnyi hnyekubun ae hnathu, helâ me ka Keriso; 6 ca huliwa bi hnyi hwenenöu, helâ me tavat adre me osenyinâ at; ke so bi helâ me je athnyabainy Keriso, tavat adre me ânyâ weny Khong únyi eû hnyi hnyok; 7 me bi athnyaba me hnyok

ae weny helâ me ka Than, ke ca ka at bi: 8 ke e khan' öta a haba únyi ae so ame ânyâ ke at, wale e ame he ka hu únyi ge Than, a ne athnyaba ke a ne at he baú. 9 Ke haba öbun je than, ânyâ helâe minya ju öbun ködra, ca ooti ödra: anyin ae khan' öbun a ethö hnyi drany tha Tuhöbun m' ödra, ke e ame ca wâhmakhmetoâ bi tavat.

10 Ke walang obiny, hwege th' öbun hnyi Than, ge tang hwegien maniny man. 11 Khavâ ju öbun úkhaüen vat anyin Khong, me me khan' öbun he ka tot metâ ka ta je bibihwakecin anyin diabolo. 12 Anyin ate me ca úsöu bi me at, ke ta je musi bi, me ta je man, me ta je tuhan hmeledrany eang ae menekholom, me ta je hanu ae kong hnyi ta je dok ethö hnyi drany. 13 Anyin a wale hom d' öbun je omjehen hia vat únyi ge Khong me me khan' öbun he ka tethmâ hnyi bonginy monu, ke at ka ânyâ ta je únyi hia thithö, tethmâ ju öbun. 14 Awe, tethmâ ju öbun, k' adre oweik' öbun ge hnathu, me tube úlaibun ge úkhaüen vat, wale hwakecin ae wisa, 15 ke adre bi taben tangen je hnyeûcabun ge hna penapena úthumetu ae so hnyi úsoköu; 16 ke tha e me ta je únyi hia e, hom minya th' öbun singiny labageju, m' öbun e hwege he ka omoko ta je údöiny meic anyin hulö. 17 Ke hom minya th' öbun hnabicen vat anyin úhömeli, me hele vat anyin Hanu, wale hofuc hwan Khong: 18 ke labö hic bala ju öbun ge hic me sumat hia hnyi Hanu hnyi ta je úen hia, me hmâkâ kâe hnen újông hia, me sumat hnân hobi kâu wakap hia, 19 me hobi könya minya, m' adre me he ka ham könya he ka fuc, m' inye hwege thö he ka omanenâ únyi ae iyong hnyi úthumetu ae so, 20 inya metâ k' adre cö nya can e; me inye hwege thö he ka ha e, wale ae úcú könya he ka ha.

21 Ame he Tukiko, ke liamekeiny a oûnykûmik me at huliwa ae hnathu unyin Than ka thumetu öbun ge ta je únyi hia, me me khan' öbun dö bonguk me anyik huliwa: 22 wale at oge me kunâ köbun hnân hobi kâu e, m' öbun e he ka wâhmakhmetoâ bonguhmun, me me he ka okahwa je hnyekubun.

23 E so e unyin je liamekeiny úsoköu me ibetengiö, me labageju, únyi ge Khong a Kamen me Than Iesu Keriso. 24 E so e unyibun hia ibetengiö baú, wale a tavat a wedra hnathoâ ka Tuhöta Iesu Keriso.

TUSI ANYI PAULO APOSETOLO KA

AT FILIPI.

HNYIMAKAN 1.

INYA Paulo me Timoteo a li athnya-
bainy Keriso Iesu, öhmu me set ka
wakap hia unyin Keriso Iesu hnyi Filipi,
me ta je pisop, me je dikona: 2 E so e
unyibun ibetengiö baú, me hnahic únyi ge
Khong a Kamöta, me Than Iesu Keriso.

3 Inya oge me ole ka Khonguk hnyi
hnök ta je hna únykúmi öbun hia, 4 k' oge
me labö sumat me senyin hnyi hijik je hic
hia hobi köbun hia, 5 anyin a öbun e tha
hnyok hnyi úthumetu ae so, hwân hnyi
bong a bân ke ne o but walang ang; 6 ke
oge me wâ cicöâ únyi eang, a haba at ame
ibi hwân huliwa eú hnyi je hnyekubun, me
ame he at eling ka obekhötâ e ke ne o but
hnyi bong bongi Iesu Keriso: 7 ke e wisa
könya he ka únykúme köbun hia, anyin a
öbun dut eú hnyi hnyik, ke öbun hia öbun
e tha hu mönya ibetengiö baú, hnyi hna cö
nya, me hnyi hna otílâ me ohmâ úthumetu
ae so. 8 Anyin a Khong ame ohnathu
nya ae gan hmâ hnök hna hnyok köbun hia
únyi hnyi ibetengiö ae gan anyin Keriso
Iesu. 9 Ke walang hijic hic, a g' ame he
ka kú gan hmâ bala anyibun ibetengiö hnyi
metâ me wâhmakhmeto hia; 10 m' öbun
e he ka haisöâ ta je únyi ae so; m' öbun e
he ka hnyok hnathu, ke ba hnyikongon
gabun ke ne o but hnyi bong bongon
Keriso; 11 m' öbun e unöngöt ge je wan
hwakecin ae wisa únyi ga Iesu Keriso, hnân
ogânâ me haisöâ Khong.

12 Hnyat me lakeiny lö, e wek öbun e
he ka khana, a haba ta je únyi a o könya
me adre hia but wia me hnân okúâ úthu-
metu ae so; 13 me me manen dut a g'
adre cö nya can Keriso, ka tavat tue hia
unyin than tot, me kolon tavat hia; 14 ke
haba hna cö nya, me ame ha hwegiâ je
hnyat me lakeiny ae se hia unyin Than, m'
adre me hwege hmönyin he ka ha hofuc

hwan Khong me ca ot. 15 Ke haba keihen
me adre me khetâ Keriso únyi hnyi ihunyi
nköu me iwatretra; ke haba keihen, me
únyi hnyi hnyok ae so: 16 haba ke keihen,
me adre me ányâ e hnyi ibetengiö, anyin
ae khan' ödra a g' adre ip nya hnân otílâ
úthumetu ae so: 17 ke haba keihen, me
adre me khetâ Keriso únyi hnyi iwatretra,
ke ca únyi hnyi hnyok ae hnathu, k' adre
me únykúme bi he ka bi hanen könya vec
hnyi hna cö nya. 18 Ke ieú? adre me
khetâ Keriso hnyi ta je deny hia, ame ne
únyi hnyi bibihwakecin, k' ame ne únyi
hnyi hnathu; waleling m' oge me senyin,
eke, me oge me he ka senyin bala. 19
Anyin ae khanö nya, a haba únyi eang, me
ame he ka obiny ka hnyi anyik möt, hnen
hijibun hic, me hna ham Hanu Iesu Keriso,
20 hoton hnök hna wek gan hmâ, me gejon,
a oge ca he ka hmehma bi hnyi ke únyi,
ke so bi m' adre me he ka ogânâ Keriso
walang ang hnen unyin, helâ me ehac, me
ti hwege, a ne únyi ge möt, a ne únyi ge
mok. 21 Anyin haba anyik möt me hobi
kö Keriso; ke haba iny ka mok, me wale
hnahicik. 22 Ke ame ne wan thibi anyik
huliwa, ka habe, he ka möt hnyi unyin—
awe, e ca khanö nya hnök hna he ka úca.
23 Anyin oge me loloâ hnyi li únyi eang,
ke haba wek bi, me he ka he but, e me tha
inya me Keriso; wale so ae nua: 24 ke so
bi e únyi hnathu köbun m' oge me he ka
laba hnyi unyin. 25 Wale hnök hna laba-
geju kâu, me khanö nya a oge me he ka
laba, eke, me tha laba m' öbun hia, he ka
bihanen úne köbun me osenyini öbun hnyi
labageju; 26 me me gan hmâ but hnöbun
hna hobelöü hnyi Keriso Iesu únyi gak,
iny ka o but hmetu köbun. 27 E so e he
ka úcú hwakecibun me úthumetu ae so
anyin Keriso: me iny ka o he ka iony me
öbun, ke a ne hiö nya minya bi, oge me he
ka löng gabun, ka habe, öbun e tethmä

FILIPI 2, 3.

hnyi hanu a khaca, me ûnykûme a khaca, me tha hwege ka hnyi labageju, wale úthumetu ae so; 28 ke ca outen bi ta je iwahnaihmiöny: wale a ke ûnyi hnân haten hnaúhangö, ke haten bi möt köbun, a ûnyi ge Khong e; 29 anyin adre hia but ham köbun ge Keriso, ca he ka hake labageju thibi káu, ke so minya he ka vec can e: 30 ke hu gabun vat waleji öbun e wâ gak, ke öbun e löng walang ang a e unyik.

HNYIMAKAN 2.

A NYIN a wale a ne e unyin Keriso úökahwa, me otubwelâ hnyi betenge, me tha hnyok unyin Hanu, ame ne ta je ibetengiö ae menyik, me vec betenge, 2 awe, öunöngötâ th' öbun anyik senyin, me me khaca ju ûnykûmenöbun, me me tha hu ibetengiö, me hnyok a khaca, me ûnykûme a khaca deny; 3 ca ânyâ ke ûnyi hoton ihunyinköu, me bi gan, ke so he ka ve hu hnyok ae hnyikânâ, me ve ogânâ ke at me ke at; 4 ca he ka ve wâ anyibun ta je ûnyi, ke so he ka ve wâ minya bi ta je ûnyi anyin keihen. 5 E so eû hnyi je hnyekubun ûnykûme eang, wale ame ûnykûme Keriso Iesu: 6 ka habe, khaca thibi bongon me Khong, ke ame ca ûnykûme a g' ame venöu, wale he ka öuco me Khong, 7 ke e ame ka obnyikânâ e bi, me hom bongon athnyaba; ke e ame wia me me at; 8 ke adre wâ e helâ me bongon at, ke e ame ka obnyikânâ e bi, me löng hoton ke ne o but ka hnyi mok, eke, wale mok hon satauro. 9 Anyin a wale Khong ame ti ogânâ e göranyai, me ham káu ien ae beönua hon ta je ien hia thithö; 10 m' adre me he ka cibouca hia thithö ka hnyi iö Iesu, ödra ethö hnyi drany, me hmeledrany, me hmelen hmeledrany, 11 me me he ka ha manenâ ta je bohmen hia thithö a Iesu Keriso thibi Than, hnân ogânâ Khong a Kamen.

12 Anyin a wale, je oûnykûmik lö, helâji me hnöbun hna labö löng gak, ca hake e thibi waleji ke inya unyibun, ke ti gan hmâ walang ang ke hiö nya, awe, huliwan dö hna omeli öbun ke ot me öbubuny; 13 anyin a Khong ame huliwan je hnyekubun he ka weny me ânyâ, hoton weny ae so. 14 Änyâ th' öbun ta je ûnyi hia ke ca ulit me ca iwatretra; 15 me me ba hnyikongubun me hna okongoâ, m' öbun lakon Khong bi, ke ba kongon hnyi hnyimakan dö ae hwali ke úkhin fuc, ke so öbun e umumelam ködra hwakecibun, helâ me je

melaminy hmeledrany, 16 me ogöranyâ hofucin möt; me me hu gak hnân hobelöu hnyi bong bongon Keriso, waleji ge hnök hna ca wadring baú, me huliwa baú. 17 Eke, ke adre me ne hudi nya hnyi hut a huliwainy anyibun labageju, me oge me hobâ, me tha senyin m' öbun hia thithö: 18 helâe minya, e so öbun e hobâ minya, me tha senyin mönya.

19 Ke oge me geju ka Than Iesu, a oge me he ka ie kunö Timoteo köbun, me me kahwa thö hnyekuk e ka manen könya bongubun. 20 Anyin ae ba ke at unyik ae tha hwakecin mē, a at ame he ka kic hnathoâ bongubun. 21 Anyin a ödra hia adre me ka elâm anyidra bi ta je ûnyi, ke ca ta je ûnyi anyi Iesu Keriso. 22 Ke e khan' öbun hnathuiny, a e ame tha huliwa mönya hnyi úthumetu ae so, helâ me nokon ka kamen. 23 Anyin a wale oge me gejon he ka ie kunâ e köbun, e ka khanö nya thö obiny könya: 24 ke inya oge me labageju ka Than a oge me he ka ie o minya 25 Ke inya oge me ûnykûme me ûnyi hnathu he ka kunö Epaferodito köbun, ke liamekeiny mönya, at ame tha huliwa me tha vat mönya, ke anyibun bi metâ, k' ame hadruo nya hnyi anyik theduoc; 26 ke e ame ti weny köbun hia, k' ame hmak ge hnöbun hna löng a ga hu mok gan: 27 e hnathu a ga mok ke ne a ne mokcu: ke Khong ame betenge gan; ke ca hake e thibi, ke inya minya bi, wâ oge nye he ka bi hanen hlöuhlöu ka hnyi anyik hlöuhlöu. 28 Anyin a wale oge me hia but ie kunâ e m' öbun e senyin dö, öbun ka iouny hmetu mē, me me úhnyükong thibi anyik hlöuhlöu. 29 Anyin a wale, kap dö e hnyi Than me senyin hia; ke oûnyihnathoâ ju tavat a helâ mē: 30 anyin a ne moko ju huliwa anyin Keriso, ke e ame ca oûnyihnathoâ anyin möt, me me he ka hwaböbun hnyi úen ae hi' öbun he ka hadruo nya.

HNYIMAKAN 3.

H NYAT me lakeiny lö, walang obiny, ka habe, senyin dö hnyi Than. E ca gan huliwa könya he ka sihnalimen köbun ta je ûnyi a khaca bongon, ke so bi hnân otethm' öbun. 2 Wâ eâu ta je kuli, wâ eâu tavat adre me ânyâ monu, wâ eâu katatom: 3 anyin a öta ang waperitom, tavat adre me khudrung ûnyi ge Hanon Khong, me hobelû Keriso Iesu, me ca labageju bi ka hnyi unyin: 4 ke so bi e hu

but gak hnân labageju ka hnyi unyin : ame ne he ke at ka únykúme a g' ame hu but gan hnân labageju ka hnyi unyin, me hu gan hmâ bi kõnya : 5 adre peritomoni nya hnyi bong a eitiny, mátrân Isaraela, ke hanen tribu Beniamina, ke hing at Heberu ; ke Faresaio hoton hnanyibu ; 6 ke at ovecâ ekalesia hoton wek ae hwege ; ke ba kongik hoton hwakecin ae wisa hnyi hnanyibu. 7 Ke haba ta je únyi ae únyi hnathu kõnya, wale oge me öúnyibâúú can Keriso. 8 Eke, e hnathu, inya oge me öúnyibâúú ta je únyi hia thithö únyi hnyi únuainy hna wâhmakhmetoâ Keriso Iesu a Tuhök : ke can thibi e oge me hna degecâ ta je únyi hia thithö, ke oge me únykúme me tiren bi ta je únyi eling, me inye he ka hu Keriso, 9 m' adre me he ka ö nya unyin, ke ca ka únyi gak bi hwakecik ae wisa, waleji únyi hnyi hnanyibu, ke so bi a deny labageju ka Keriso, wale hwakecin ae wisa únyi ge Khong hnen labageju : 10 m' oge me he ka wâhmakhmetoâ e, me maniny möt hmetu a e, me he ka tha hnyok mē hnyi vec, me tha úcú mē hnyi imekiny ; 11 ame ne khanö nya he ka o ka hnyi möt hmetu únyi hnyi hna mok. 12 Ca únyi bi hnyi hnök hna hu walang ang, ke ca únyi minya bi hnyi bekhöt a soik walang ang : ke so bi inya bala oge me hnu hoton, me inye he ka kât únyi ame köt nya ka hnyin Keriso. 13 Hnyat me lakeiny lö, oge me ca únykúme bi a oge hia but kât : ke khaca thibi únyi oge me ányâ, wale oge me hnying ta je únyi waleji eú hnyi hotuk, me hnyimakök hwege ka hnyi ta je únyi hnyi hnyimakök, 14 me wadring hwege ka hnyi haten he ka hu hwaban hna hawo nya únyi ethö ge Khong, únyi ge Keriso Iesu. 15 Anyin a wale hamöta hia tavat ae wisa he ka únykúme helâe : ke a ne hu ke je únykúmenöbun hnyi ke únyi, me ame he Khong ka omanená únyi eling köbun : 16 ke haba hnöta hna o ka hnyin, me so ate me he bala bi hnyi únyi eling.

17 Hnyat me lakeiny lö, e so öbun e tha hnu hotuk, ke wâhmakhmetu ödra adre me he helâe, ke öhmun ang hnân tulut köbun. 18 Anyin ae se hia tavat adre me he, k' oge me ibi ose hai odra köbun, k' oge me ha tengiâ walang ang, a ödra je iwahnai-hmiöny me satauro anyin Keriso : 19 haba obiny ködra, me hnaúhangö, haba khongu-drin me hnyekudra, k' adre me hobeluâ únyi hnân hmehma ködra, k' adre me hnyok ka ta je únyi hnyi hmeledrany ang. 20

Ke öta aten drany ethö ; k' ate me halubahingen At úhomeli úbeny thö, wale Than Iesu Keriso ; 21 at ame he ka ohâtâ hmetoâ ta je unyita ae kong, m' adre me úcú me unyin ae hmanenang, hoton man at ae khana he ka hom úhnyúkongoâ ta je únyi hia thithö kâu bi.

HNYIMAKAN 4.

A NYIN a wale hnyat me lakeiny mönya lö, laoúnykúmik me wek, hnök hna senyiná, ke anyik minya korona, tethmä ju öbun helâe hnyi Than, laoúnykúmik.

2 Inya oge me khöü kö Euodia, ke oge me khöü kö Sunetuke minya, m' ödru me he ka tha hnyok hnyi Than. 3 Eke, oge me sumatö u minya at ame hadruo nya hnathu nya, ka habe, hom hadruâ thö omomo tavat adre me tha huliwa mönya hnyi úthumetu ae so, me jia Kelemene minya, me keihen tavat adre me tha huliwa mönya, a eú hnyi tusiny möt je iödra.

4 Senyin bala thö ka Than : ke inya hmetu oge me ha, ka habe, Senyin dö. 5 E so e he tavat hia thithö ka wâ anyibun menyik. Wale but ang Than. 6 Ca kong hnyekunâ ge ta je únyi ; ke so bi hnyi ta je únyi hia thithö, omanená je webun ka Khong hnyi hic me sumat me ole. 7 Ke haba úsoköu únyi ge Khong únyi ae nua hon ta je únykúme hia, ame he ka tuö je hnyekubun me je únykúmenöbun hnyi Keriso Iesu.

8 Hnyat me lakeiny lö, walang obiny, ka habe, haba ta je únyi ae hnathu, me ta je únyi adre me haisoâ, me ta je únyi ae wisa, me ta je únyi ae kalaöt, me ta je únyi ae hmanenang, me ta je únyi ae lung so ; ke a ne ke hwakecin ae so, me ke únyi hnân oganá, únykúme ju öbun ta je únyi e. 9 Ke ányâ th' öbun ta je únyi adre n' öbun kâu, wale öbun e kap, me löng, me wâ únyi gak : ke ame he ka e unyibun Khongon úsoköu.

10 Ke inya oge me senyin gan hmâ ka Than, anyin ame kú hmetu thö únykúmenöbun walang ang kõnya ; waleji öbun e únykúme minya, ke ba bi úen köbun. 11 Ke oge me ca ha ge anyik theduoc : anyin adre hia but nö nya he ka sekuk hnyi ta je hwakecin hia. 12 E khanö nya he ka theduoc, ke khanö nya he ka tren ta je únyi : haba hnyi ve je únyi, me hnyi ta je únyi hia adre hia but nö nya he ka sekuk. me mekihnânem, me he ka tren ta únyi.

KOLOSE 1.

me theduoc minya. 13 E khanö nya he ka ânyâ ta je ûnyi hia thithö hnen at ame ohwegiö nya. 14 Ke e so but hwakecibun, waleji öbun e betenge gak hnyi anyik vec. 15 At Filipi lö, e khan' öbun a hnyi hna hwân dö úthumetu ae so, waleji oge he ûhek Makedonia, me ba ekalesia ame betenge gak, wale he ka ham me kap ta je ûnyi, ke hake öbun thibi; 16 ke tiga inya bi hnyi Thesalonika, öbun e okhaca me olo kunâ kõnya hnyi anyik theduoc. 17 Ke oge me ca elâm bwihlany; ke oge me heleú wan bi, me me se hia but troban köbun. 18 Ke hu but gak ta je ûnyi hia ke se hia: ke iny unöngöt dö, anyin oge hia but

kap ûnyi ga Epaferodito ta je ûnyi ûnyi gabun, wale bunen ae bo so, wale hut hnân kap, ame osenyinâ Khong. 19 Ke ame he Khonguk he ka ham ta je ûnyi ae úcú köbun, hoton hna úkhöünâ anyin hmanenang unyin Keriso Iesu. 20 E so e unyin Khonguta me Kamöta hna ogânâ nyiele nyiele balua. Amen.

21 Oge me italofa me wakap hia thithö unyin Keriso Iesu. Ke ame italofa möbun hnyat me lakeiny eang unyik. 22 Ame italofa möbun wakap hia thithö, ae nua bi ödrin hnyi hnyaba Kaisara.

23 E so e eú hnyi hanubun ibetengiö baú anyin Than Iesu Keriso.

TUSI ANYI PAULO APOSETOLO KA

AT KOLOSE.

HNYIMAKAN 1.

INYA Paulo aposetolo anyin Keriso Iesu ûnyi ge weny Khong, me Timoteo ke liamekeiny m' öta, 2 öhmu me set ka wakap me je hnyat me lakeiny adre me labageju unyin Keriso hnyi Kolose: E so e unyibun ibetengiö baú, me úsoköu ûnyi ge Khong a Kamöta.

3 Öhmu me ole ka Khong a Kamen Tuhöta Iesu Keriso, me labö hic bala hobi köbun, 4 anyin a öhmu me löng anyibun labageju ka Keriso Iesu, me anyibun ibetengiö ka wakap hia, 5 ûnyi hnyi gejon adre ip ethö hnyi drany hobi köbun, waleji öbun e löng ehac hnyi hofuc ae hnathu hnyi úthumetu ae so, 6 wale a o köbun; helâ minya ka hmeledrany hia thithö, k' ame wa wan me kú tot, helâe minya unyibun, hwân hnyi bong öbun e löng me wâhmakhmeto ibetengiö baú anyin Khong hnyi hnathu; 7 helâ minya me hna n' öbun hnö Epafera at ame tha bi athnyaba m' öhmun a oúnykúmihamu, at ame huliwa hnathu ka Keriso hobi köhmu, 8 ke e ame omanená köhmu anyibun ibetengiö hnyi Hanu.

9 Anyin a wale öhmu me ca menâ hic, me sumat hobi köbun hwân hnyi bong öhme

löng hnyin, m' adre me he ka unöngöt ge hna wâhmakhmetoâ weny, hnyi metâ me wâ únykúme hia hnyi Hanu, 10 m' öbun e he bala ka úcú ka Than, he ka osenyinâ bala e, me wa hnyi ta je huliwa ae so hia, me kú tot hnyi metâ anyin Khong; 11 k' adre me ohwegi öbun ge hwege hia, hoton mau maniny anyin hmanenang, he ka tha hnyok me hokhnyok beú hmâ, me senyin; 12 ate me ole ka Kamen, waleji at a öúcú öta he ka hnyi hu jekhöu unyin wakap hnyi melam: 13 waleji at ame hügún' öta ûnyi hnyi maniny menekholom, me wi' öta ka hnyi dökhü dokhon Nokon a oúnykúminy; 14 ûnyi gan bi e hu hwaban anyita möt, wale he ka hna degecâ ta je hulö: 15 e thibi a we Khong ae ca manen bi, atöiny ta je ûnyi hia adre op; 16 anyin adre op ta je ûnyi hia thithö ûnyi gan, ta je ûnyi ethö hnyi drany me eang hmeledrany, ta je ûnyi ae manen, me ta je ûnyi ae ca manen, me ta je theron, me ta je dökhü, me ta je musu, me ta je man; adre hia but op ta je ûnyi hia thithö ûnyi gan, me hobi kâu; 17 ke e a bân ke biliny bi ta je ûnyi hia thithö, ke ame tethmâ ta je ûnyi hia thithö ûnyi gan. 18 Ke e thibi ban unyin, wale ekalesia: e thibi can, atöiny tavat úhedra hnyi hna mok;

KOLOSE 2.

me me he ka beönua hon ta je únyi hia thithö. 19 Anyin ae weny Kamen he ka hnen eú hnyi hnyin unöngöt hia thithö; 20 me he ka öúsoköuá ta je únyi hia thithö a deny e, e ka hia but öúsoköuá ge dren anyin satauro; wale a deny thibi e, ame ne ta je únyi eang hmeledrany me ethö hnyi drany. 21 Ke öbun ta je atkanyua ehac me iwahnaihmiöny hnyi hnyekubun hnyi anyibun ta je huliwa ae kong, ke e ame hia but öúsoköuá walang ang 22 hnyi unyin wale viny únyi ge mok, me me he ka omanen' öbun hnyi hnyimakan, a tavat ae kap, me ba okongon, me ba hnân haikongoá: 23 öbun e ne tethmä hnyi labageju, adre bi taben, me ohm' öbun, ke ca webwet únyi hnyi gejon úthumetu ae so öbun e löng. waleji adre khetá ka tavat hia thithö eang hmeledrany; ke inya Paulo adre wiö nya me me at huliwan.

24 Ke walang ang inya oge me senyiná anyik je vec hobi köbun, ke oge me obekhötá hnyi unyik hounyin je vec anyin Keriso hobi káu unyin e, wale a ekalesia; 25 ke adre wiö nya he ka huliwan ka hnyi hoton hna penapena hnen Khong, wale adre ham nya hobi köbun, he ka ohwädá hofuc hwan Khong, 26 wale únyi ae iyong adre ikhálá ehac hnyi ta je únen adrem, me ta je dö hia thithö; ke walang ang, adre hia but omanená e ka anyin wakap, 27 ke e weny Khong he ka omanená ködra úganiny hmanenanginy únyi eling ae iyong unyin Aten ke je hnyei, wale Keriso eú hnyi je hnyekubun, a gejuiny hnahic: 28 wale at öhmun e khetá, me sihwegiá ka tavat hia thithö, me n' odra hia hnyi metá hia, m' öhmun e he ka omanená tavat hia thithö ae bekhöt soidra unyin Keriso; 29 ke wale hnök minya hna huliwa ka hnyin, k' oge me újöng hmönyin hoton anyin huliwa, wale ame hwege huliwa eú hnyi hnyik.

HNyimakan 2.

A NYIN ae wek e me khan' öbun úganiny hnök hna újöng hwege hobi köbun, m' ödra minya hnyi Laodikea, m' ödra hia adre me ca hnyi wá hnyimakök hnyi unyin; 2 m' adre me he ka okahwa je hnyekudra, k' adre úhújáköuá hnyi betenge, ke hnyi tang omjeú hia wale hna tha kap me wá únyküme, m' adre me he ka wáhmakhmeto únyi ae iyong anyin Khong, wale Keriso, 3 at adre ikhálá unyin ta je omjeúiny hia metá me wá

únyküme. 4 Wale thibi hnök hna ha, wá e nye he ke at ka iyau' öbun ge je hofuc úhahnyok. 5 Eja ke ne a ne hiö nya hnyi unyin, inya unyibun hnyi hanu, k' oge me senyiná me wá hna laba wia a öbun, me ihwegien anyibun labageju ka Keriso.

6 Anyin a wale, he bala ju öbun unyin Keriso Iesu a Than, helá me hnöbun hna kap e, 7 ke bi wân dut me up öbun göranyai unyin, ke ohmä ju anyibun labageju, helá me hna n' öbun, ke ti ole gan hmá.

8 Wá eáú, wá e nye he ke at ka sei öbun hnen anyin bemetá, me tang iyawö hnân omono, hoton hofuc vejec anyin at, me je hna úne anyin hmeledrany a bán, ke ca hoton bi Keriso: 9 k' ame laba eú hnyin at eling önyen Khong hia thithö hnyi unyin, 10 k' adre me ounöngöti öbun únyi gan, k' ame ban at eling hon ta je musi me ta je man hia thithö; 11 wale at adre me peritomoni öbun unyin, hnen peritom adre me ca ányá ge hnyam, wale he ka uny degecá önyen unyin, hnen peritom únyi ge Keriso; 12 ke adre me tha konám më hnyi hna bapataiso, wale adre tha omeli öbun hmetu më ge labageju ka hnyi huliwa anyin Khong, waleji at ame omelö hmetu e únyi hnyi hna mok. 13 Ke haba öbun waleji öbun e mok hnyi hwakecin ae kong, me ca peritomoná je unyibun, e ame omeli öbun tha öbun më, ke e ame ohia anyita ta je hulö hia; 14 ke e ame kot degecá hna sihnalimen ta je hna húna ae iwahnaihmiöny m' öta, me úcú öta, ke e ame hia but hom degecá e únyi hnyi wanben, k' ame thu faöiny hnyi anyin satauro; 15 ke e ame ka uny degecá ta je musi me ta je man, e ame omanen' ödra bi hnyi dok ae manen, ke ame dökhü hudrin hnyin e.

16 Anyin a wale, ca he ke at ka únykümi öbun can ta je jeú, me hnân ic, me bonginy bijeú, me tehi ae teb únyi, me bong sabath: 17 wale hmenon ta je únyi ame he ka o; ke haba önyen, me, wale Keriso. 18 Ca he ke at ka ovhelá hwaböbun hnen beöúhnyükongi öbun, me hic ka ta je angela, ame ná ta je hna omanená káu bi, ame ohobá báúá hnen únykümenen unyin, 19 k' ame ca kát hmá bi Ban, wale at a únyi gan unyin hia thithö, adre úhújáköuá hnen ta je outhunyin me töiny, ame húhúö, a öhúhúö hnen Khong.

20 Öbun e ne tha mokcu me Keriso únyi hnyi hna úne a bán anyin hmeledrany, anyin a ieú, öbun e löng hmetu hoton je

KOLOSE 3, 4.

hna hûna, helâke öbun e möt ka hnyi hmeledrany, ka habe, 21 Ca mádrâ bi, ca drem bi, ca kâlâ bi, 22 (ame he ka hia ta je únyi e, at ka mádrâ), helâ me je hna hûna me je hna únö hnen at? 23 Haba ta je únyi e, ame beometâ thoiâ hnyi hmi baú, me he ka hnyikânâ, me ovecâ unyin bi; ke ca únyi hnathu bi hnân hom úhnyúkongoâ unyin.

HNIMAKAN 3.

A NYIN a wale, adre ne hia but tha omeli öbun hmetu me Keriso, elâm d' öbun ta je únyi ethö, wale dok ame laba hnyin Keriso hnyi ke keihen a metân Khong. 2 Hnyok d' öbun ka ta je únyi ethö, ke ca ka ta je únyi eang hmeledrany. 3 Anyin a öbun e mokcu, ke adre tha ikhâlâ anyibun möt me Keriso unyin Khong. 4 E ka he ka manen dut Keriso a melita, m' ate me he ka tha manan mē hnyi hmanenang.

5 Anyin a wale hlingâ ju öbun je ong outhunyibun eang hmeledrany; wale a bi únyi monu, me hwakecin ae ikiki, me hnyok wagelue, me weny ae kong, me behnyekon, a wale hmi ka hnatheat; 6 can ta je únyi e ame o but tang hmönyin anyin Khong ka tavat adre me ca úling; 7 k' öbun minya öbun e vheno ehac, waleji k' öbun e tiga laba hnyin. 8 Ke walang ang degec ut gabun ta je únyi eang, wale hmönyin, me wathethöt, me hnyok ae kong, me ú, me hofuc újao únyi hnyi je hnyimöbun; 9 ca uthoiköu bi, anyin a öbun e hia but uny degecâ at adrem me ta je hwakecin, 10 me khaú öbun ge at ae teb únyi, adre me labö ohâtâ hnyi metâ hoton we at a op e: 11 ke ba bi unyin at Heleni me at Juda, me tavat adre me peritomonâ me ca peritomonâ, me aten je hnyei, me at Sekuthia, me athnyaba, me at he baú: ke haba Keriso, me ta je únyi hia, ke unyin hia.

12 Anyin a wale, haba öbun je hna úca hnen Khong, a wakap me laounykúminy, me so öbun e khavâ ibetengiö vec, me hwakecin ae so, me hnyok ae hnyikânâ, me hwakecin ae menyik, me hokhnyok beú hmâ; 13 úhokhnyokákouâ, me úhnakouâ a ne hu veciny ke at ge ke at; haba Keriso ame hn' öbun, me so öbun ányâ helâe: 14 ke haba únyi ae nua hon ta je únyi e, me ibetengiö, wale weny ae ti so. 15 Ke so ame he úsoköu anyin Keriso ka

musö je hnyekubun, waleji adre haw' öbun ka hnyin hnyi unyin a khaca: ke oleâ bala ju öbun. 16 E so e he hofuc hwan Keriso ka laba hmâ hnyi je hnyekubun me metâ hia; únöbunköu öbun ju ge ta je salamo, me ta je khumöng, me ta je fehuâ únyi hnyi hanu, khumöng dö ka Than me ibetengiö eú hnyi je hnyekubun. 17 Ke haba ta je únyi hia öbun e ányâ hnyi hofuc me huliwa, me ányâ hia thö hnyi ien Than Iesu, ke oleâ ka Khong a Kamen deny e.

18 Omomo lö, ve löng ju hoton laoiöbun, helâ me úcú ka Than. 19 Obaga lö, ve betenge ju ge laoiöbun, ke ca oveci ödra. 20 Je wanakat lö, ve löng ju hoton je lakamöbun me lahinyöbun hnyi ta je únyi hia, anyin a wale hnân osenyinâ Than. 21 Lakamen lö, ca ohmönyinâ je lakubun, wâ adre nye hmak. 22 Lathnyaba lö, löng ju hoton tavat a je latuhöbun hnyi unyin; ca huliwa bi wânen at, helâ me tavat adre me osenyinâ at, ke so bi hnyi hnyok ae hnathu, me outhen Than: 23 ke haba ta je únyi öbun e ányâ, mádrâ hnyokâ ju helâ me ka Than, ke ca ka at bi: 24 anyin ae khan' öbun a öbun e he ka hu hwaban únyi ge Than, wale jekhöú: ke öbun e bi athnyabainy Than Keriso. 25 Anyin a haba at ae ca wisa, ame he ka hu hwaban hwakecin ae ca wisa: ke ba hna wâhmakhmetoâ bi tavat.

HNIMAKAN 4.

JE than lö, ham dö ka je athnyabaibun únyi ae wisa me úcú; anyin ae khan' öbun ae hu Tuhöbun ethö hnyi drany.

2 E so öbun e hic újöng, me hmâká e, me ole; 3 ke hic minya hobi köhmun me me he Khong ka khöng köhmun deny hwan hofuc, he ka ha únyi ae iyong anyin Keriso, wale adre cö nya can; 4 m' oge me he ka omanenâ e, hnyi deny' ae úcú. 5 E so öbun e he hnyi metâ unyidra eú hnyöu, me öúnyihnathoâ ta je úen, 6 E so öbun e he bala ka fuc me ibetengiö, ame osoâ ge sâlt, me me khan' öbun dö hwakecin he ka thu ka tavat.

7 Ame he Tukiko ka omanenâ köbun ta je bonguk hia, e liamekeiny a ounykúmik, me at huliwa hnathu, a tha huliwa mönya ka Than: 8 oge hia but kunâ e köbun hobi kâu únyi eang, me me khan' öbun dö bonguhmun, me me he ka okahwa je

I. THESALONIKA 1, 2.

hnyekubun; 9 tha e me Onesimo, ke liamekeiny ae hnathu a oúnykúmik, a hanöbun. Ödru me he ka omanená köbun ta je únyi hia thithö adre ányá eang.

10 Ame italofa m' öbun Aritako at adre tha ca mönya, me Mareko liamekeiny me Banaba (oge me húna köbun gan, e ka o köbun m' öbun kap ju), 11 me Jesu, ke ien minya Jusetu, únyi hnyi peritom: hake ödrin thibi ödrin e tha huliwa mönya hnyi dökhu dokhon Khong, hnyat ödrin e hia but okahwö nya. 12 Ame italofa m' öbun Epafera a hanöbun athnyabainy Keriso Iesu, at ae hwege hic hobi köbun, m' öbun e he ka tot wisa, me kap wia hia weny Khong. 13 Anyin a inya oge ohnathoa e

ae gan anyin huliwa köbun, m' ödra minya hnyi Laodikea, me tavat hnyi Hierapoli. 14 Ame italofa m' öbun Luka, at tren bubuny a oúnykúmik, me Dema minya. 15 Italofa me hnyat me lakeiny hnyi Laodikea, me Numefa, me ekalesia hnyi je hnyabadrin. 16 Ke öbun ka hia but aú tusi ang, me úkhünöng dö he ka aú ka ekalesia anyin at Laodikea; ke he th' öbun minya ka aú tusi úheny Laodikea. 17 Ke ha thö kö Arekipa, ka habe, Wá eáu hanymâm u je kap únyi ge Than, m' u me he ka umo thö.

18 Anyik italofa hnen hing hnyamök. Únykúme ju hnödra hna cö nya. E so e unyibun ibetengiö baú.

TUSI A BÂN ANYI PAULO APOSETOLO KA AT THESALONIKA.

HNYIMAKAN 1.

INYA Paulo, me Silevana, me Timoteo, öhmun e sihnalimen ka ekalesia anyin at Thesalonika unyin Khong a Kamen me Than Iesu Keriso: E so e unyibun ibetengiö baú me úsoköü.

2 Öhmun e labö oleá ka Khong gabun hia, ke ökmun e hai öbun hnyi hijihmun ta je hic; 3 me ca mená únykúme anyibun huliwa hnyi labageju, me huliwa hnyi ibetengiö, me hokhnyok hnyi gejon ka Tuhöta Iesu Keriso hnyi hnyimakan Khong a Kamöta; 4 ke khan' öhmun hnyat me lakeiny a oúnykúminy Khong, hna úc' öbun, 5 a ga ca o köbun anyihmun úthumetu hnyi hofuc thibi, ke so bi hnyi man minya, me Hanu Kap, me ti kap wia; anyin ae khan' öbun hwakecihmun unyibun hobi köbun. 6 Ke öbun e úcúcúbingi öhmun, me Than minya, me kap hwan hofuc hnyi vec ae gan hmá, me senyin únyi ge Hanu Kap; 7 wale, m' adre me wi' öbun hnân tulut ka tavat labageju hnyi Makedonia hia me Akaia. 8 Anyin ame hia but lung únyi gabun hofuc hwan Than,

ca ka at Makedonia me Akaia thibi, ke so bi hnyi ta je dok hia ame lung minya bi anyibun labageju ka Khong; wale me me ca únyi hnathu bi öhmun e he ka ha ke hofuc. 9 Anyin a ödra bi adre me haimemen' öhmun je bongon ioihmun köbun; me hnöbun hna hwiö ka Khong únyi ge ta je hnatheat, he ka bi athnyaba ka Khong ae möt me hnathu, 10 me he ka halubahingen Nokon úheny hnyi drany, waleji e ame omelö hmetu thö úheny hnyi hna mok, a Iesu at ame omeli öta únyi hnyi hmönyin ame he ka o.

HNYIMAKAN 2.

ANYIN ae khan' öbun hnyat me lakeiny ioihmun köbun, ae ca únyi baú bi: 2 ke adre bödra ka oveci öhmun me okongu öhmun hnyi Filipi, wale ae khan' öbun, ke öhmun e hnyok hwege únyi ge Khong he ka ha köbun úthumetu ae so anyin Khong me vec ae gan hmá. 3 Anyin a haba hnöhmun hna n' öbun, me ca únyi hnyi monu bi, ke ca únyi hnyi hwakecin ae ikiki, ke ca únyi hnyi iyáwo:

I. THESALONIKA 3.

4 ke so bi öhmun e fuc helâ me hnen Khong hna ûc' öhmun me hna but köhmun úthumetu ae so; ca hnân bi osenyinâ at, ke so bi Khong at ame cnbec je hnyekuhmun. 5 Ke adre me ca õ 'hmun bala a öhmun e ha hofuc ûtakû, e khan' öbun e, ke öhmun e ca huliwa hnyi behu, Khong ame ohnathoâ; 6 ke öhmun e ca elâm hnân ogânâ únyi ge at, ke ca únyi gabun, ke ca únyi ge keihen, ke so bi e khan' öhmun he ka ohmaki öbun, anyin a öhmun je aposetolo anyin Keriso. 7 Ke öhmun e menyik hnyi wanböbun, helâ me at ame úasin ame hat lakon: 8 helâe minya öhmun e betenge gan hmâ gabun, me me so köhmun he ka ham köbun ca úthumetu ae so thibi anyin Khong, ke anyihmun minya bi möt, anyin a öhmun e ti hnyoki öbun. 9 Ke öbun hnyat me lakeiny öbun e únykúme anyihmun huliwa ae mak me vec; öhmun e huliwa hnyi lany me lit, m' öhmun e ca he ka ohmâkâ ke at gabun, öhmun e khetâ úthumetu ae so anyin Khong köbun. 10 Öbun hnyat ohnatho, me Khong minya, a öhmun e ânyâ hwakecin ae kap, me wisa, me ba hnyikongon köbun tavat labageju: 11 e khan' öbun hnöhmun hna ve n' öbun, me sihwegi öbun, me unö, helâ me kamen ka lakon, 12 m' öbun e he bala ka úcû ka Khong, at a haw' öbun ka hnyi dokhon dökhu me anyin hmanenang.

13 Waleling m' öhmun e ca menâ ole ka Khong, anyin a öbun e kap hofuc hwan úthumetu únyi gahmun, waleji hofuc hwan Khong, me öbun e ca kap helâ me hofuc hwan at, ke hofuc hwan Khong wale ae hnathu, k' ame huliwan minya je hnyekubun tavat labageju. 14 Anyin a öbun hnyat me lakeiny, öbun e úcûcûbongoâ ta je ekalesia anyin Khong hnyi Juda unyin Keriso Iesu: anyin a öbun e hnyi vec minya hnyi ta je únyi e únyi ge je lahanöbun, helâ me tavat únyi ge at Juda; 15 waleji a tavat adre me hlingâ Than Iesu, me ta je perofeta, me ob' öhmun, k' adre me ca osenyinâ Khong, ke ödra je iwahnaihmiöny me tavat hia thithö; 16 k' adre me thaw' öhmun he ka fuc ka Aten ta je hnyei, wale me me ca he ka hu möt gadra; k' adre me obekhötâ bala anyidra hulö: ke ame o but ködra hmönyin he ka oumo.

17 Hnyat me lakeiny lö, a hi' öhmun unyibun hnyi úen ae okhulit, hnyi unyin, ke ca hnyi hnyok, öhmun e ti weny gan hmâ he ka iouny m' öbun: 18 anyin

öhmun e behe köbun, inya Paulo, a okhaca me olo; ke ame ovheli öhmun Satana. 19 Anyin a ieú anyihmun geju, me senyin, me koronainy hobelöü? Ca öbun bi hnyi hnyimakan Tuhöta Iesu hnyi úen e ame he ka manen hmetu? 20 Anyin a öbun ang hnöhmun hna hobelöü, me hnöhmun hna senyin.

HNYIMAKAN 3.

A NYIN a wale, öhmun e únykúme, me so adre me hn' öhmun hnyi Athenai, waleji ke ca khan' öhmun hmetu he ka hok hnyok; 2 me öhmun e kunö Timoteo liamekeiny m' öhmun, a athnyabainy Khong hnyi úthumetu ae so anyin Keriso, me me he ka ohmâ me okahw' öbun hnyi anyibun labageju; 3 me me ca he ka bwebwelâ ke at hnen je vec eling; anyin ae khan' öbun a g' adre kun' öhmun hobi kâu e. 4 Anyin a tiga öhmun unyibun, öhmun e böhmun ka ha, ka habe, ate me he ka hu vec; ke a hwâdâ but e, ae khan' öbun e. 5 Can thibi e, ke ca khanö nya hmetu bi he ka hok hnyok, me oge úkhúnöng he ka wâ anyibun labageju, wâ e nye cubic öbun hnen at úcûbic, me ame he ka únyi baú but anyihmun huliwa. 6 Ke walang ang ame o but köhmun Timoteo úheny unyibun, me thumetu öhmun ge hofuc ae so ge anyibun labageju me anyibun ibetengiö, me hnöbun hna únykúmi öhmun bala, me webun gan hmâ he ka õ 'hmun, ke helâ öhmun köbun; 7 anyin a wale, hnyat me lakeiny lö, öhmun e kahwa gabun hnyi anyihmun theduoc me vec hia, hnen anyibun labageju: 8 anyin a öhmun e möt ut walang ang, öbun e ne tethmâ unyin Than. 9 Ke ieú ole e khan' öhmun he ka ham ka Khong gabun, únyi hnyi ta je senyin hia thithö öhmun e senyin gabun hnyi hnyimakan Khong; 10 öhmun e hic hwege hnyi lit me lany, m' öhmun e he ka wâ je hnyimaköbun, he ka obekhötâ únyi ae ca bekhöt bi hnyi anyibun labageju?

11 E so ame he Khong a Kamöta me Tuhöta Iesu he ka kû dehmun gethen köbun: 12 ke so Than ame he ka wi' öbun, m' öbun e he ka húhüö me si but ibetengiö ke at ka ke at, me ka tavat hia thithö, ke helâe minya öhmun köbun; 13 me me he ka otethmâ je hnyekubun ae ba hnyikongon hnyi hwakecin ae kap hnyi hnyimakan Khong a Kamöta, e ka o hmetu but Tuhöta Iesu, tha e me anyin wakap hia thithö.

I. THESALONIKA 4, 5.

HNYIMAKAN 4.

KE walang obiny, hnyat me lakeiny lö, öhmun e sumat me újengi öbun ge Than Iesu, ka habe, haba hnöbun hna kap gahmun ge bongon he a öbun, me me osenyinâ Khong, ke öbun e he helâe,—m' öbun e he ka hwege tot hnyin bala. 2 Anyin ae khan' öbun dut je hna hûna, öhmun e ha köbun únyi ge Than Iesu. 3 Ke walang weny Khong, a öbun e he ka kap, ka habe, e so öbun e ka úsâkâüü but me bi únyi monu; 4 me me ve khan' öbun dö hwakecin hna tuö anyibun je kaia me me kap me so, 5 ke ca únyi bi hnyi hnyok ae ikiki, helâ me Aten ta je hnyei ae ca khan' ödra Khong; 6 me me ca he ke at ka hanyâúú, me okongoâ liamekeiny mē hnyi ke únyi: anyin a Than at ame bi hwaban hnyi ta je únyi eling, helâji me hnöhmun hna ha ehac, me hna sihwegi öbun wia. 7 Anyin a ca haw' öta Khong ka hnyi hwakecin ae ikiki, ke hnyi hwakecin bi ae kap. 8 Anyin a wale, haba at ame hota degecâ, me e ame ca hota degecâ at, ke Khong bi, wale at ame ham köbun Hanon ae Kap.

9 Ke ca únyi hnathu bi a oge me he ka sihnalimen köbun ge bongon ibetengiö anyin hnyat me lakeiny: anyin a n' öbun Khong he ka ibetengiököu; 10 e hnathu öbun e ányâ e ka hnyat me lakeiny hia hnyi Makedonia hia. Ke öhmun e khöü köbun, hnyat me lakeiny he ka osehia bala; 11 k' so öbun e elâm he ka laba wia, me ve bi hanymen, me huliwa ge je hnyamöbun, helâ me hnöhmun hna hûna köbun; 12 m' öbun e he ka vheno soâ ködra eü hnyöu, m' öbun e ca he ka theduoc.

13 Hnyat me lakeiny lö, e bewehmun e me khan' öbun bongon tavat adre me mokut ut; m' öbun e ca he ka tenge helâ me keihen ae ba geju gadra. 14 Anyin ate ne únykúme a ga mokcu Iesu k' ame möt hmetu thö, awe, helâe minya ame he Khong ka tha hom mē tavat adre me mokut ut unyi Iesu. 15 Ke öhmun e ha únyi ang köbun ge hofuc hwan Than, ka habe, haba öta a öta möt a je kolon e ka o Than, me ate me ca he ka khaletâ tavat adre me mokut. 16 Anyin ame he ka utut Than úheny hnyi drany, me hwakuku, me ifucin angela ae beönuu, me hwan trutru anyin Khong: ke ame he ka bân tavat adre mok unyin Keriso ka höhöi: 17 ke

haba öta tavat a öta möt, a je kolon, me adre me he ka tha köp öta thö m' ödra ka hnyi je úlá, he ka úkhanö me Than ethö hnyi wanben: me ame he ka tha öta me Than nyiele balua. 18 Anyin a wale úsihwegiöbunköu thö ge ta je hofuc ang.

HNYIMAKAN 5.

HNYAT me lakeiny lö, e ca únyi hnathu he ka sihnalimen köbun bongon ta je úen me ta je huna. 2 Anyin ae khan' öbun wia a g' ame he ka o bong bonginy Than helâ me at venöu hnyi lit. 3 Ödra ka ha, ka habe, Hnahic ut me laba khötkic, me ame he ka ie o but ködra úohiö, helâ me momo ae erkin ame vec hnyin; ke ca khan' ödra he ka kec ut. 4 Ke haba öbun, hnyat me lakeiny, ca öbun bi hnyi menekholom, me me he ka o köbun bong eling helâ me at venöu: 5 anyin a öbun hia thithö je lakon melam, me lakon lany: ca öta bi hanen lit me menekholom; 6 anyin a wale, ca he öta ka mokut helâ me keihen, ke ate me he ka hmâkâ me metâ but. 7 Anyin a haba tavat adre me mokut, me adre me mokut hnyi lit; ke haba tavat adre me ic monu, me adre me ic monu hnyi lit. 8 Ke haba öta aten melam, me so ate me metâ, me khavâ úkhaüen úlainy labageju me ibetengiö; me gejon möt hnân hnabicen vat. 9 Anyin a haba Khong ame ca ip öta hobi kâu hmönyin, ke so bi he ka hu möt köta únyi ge Tuhöta Iesu Keriso, 10 waleji a mok hobi köta, m' ate me he ka tha möt mē, at ka hmak, ke at ka mokut bi. 11 Anyin a wale úsihwegiöbunköu thö, me útilöbunköu, helâ minya me hnöbun hna ányâ.

12 Hnyat me lakeiny lö, öhmun e khöü köbun he ka ö' drin ju tavat ödrin e huliwa unyibun, me musi öbun hnyi Than, me sihwegi öbun; 13 me oúnyihnathu ödrin hmönyin hnyi ibetengiö can anyidrin huliwa. E so öbun e laba úsoköu. 14 Ke öhmun e újöngi öbun hnyat me lakeiny, he ka sihwegi ödra adre me ca he wisa, n' ödra ju ae mat hnyekudra, hadruâ thö tavat ae sényin, hokhnyokâ beúâ ju tavat hia thithö. 15 Ca he ke at ka bi hwaban monu ge monu ka ke at; ke hnu bala hoton so unyibun bi, me tavat hia. 16 Senyin bala thö; 17 hic dö me ca menâ bi; 18 oleâ ju ta je únyi hia thithö, anyin a wale weny Khong köbun ge Keriso Iesu. 19 Ca ume ju Hanu; 20 ca oúnyibâúâ bi je hna pero-

II. THESALONIKA 1, 2.

feta; 21 cubec ju ta je únyi hia thithö; kât hmâ ju únyi ae so; 22 úsákâüö but me je únyi hia a helâ me monu.

23 Ke so ame he Khongon hnahic ka tha okabi öbun; e na tuö ju je hanubun hia thithö, me je hnyekubun, me je unyibun, me me ba hnyikongon, e ka o hmetu Tuhöta Iesu Keriso. 24 E hnathu e at ame haw' öbun, wale at ame he ka ányâ.

25 Hnyat me lakeiny lö, hic d' öbun hobi köhmun.

26 Italofa me je liamekeiny hia ge úcim-hnyimak ae kap. 27 Inya oge me húna wia köbun hnyi Than, a g' adre me he ka aú tusi ang ka je liamekeiny hia fhithö.

28 E so e unyibun ibetengiö baú anyin Tuhöta Iesu Keriso.

TUSI A LOINY ANYI PAULO APOSETOLO KA

AT THESALONIKA.

HNYIMAKAN 1.

INYA Paulo, me Silevana, me Timoteo, öhmun e set ka ekalesia anyin at Thesalonika unyin Khong a Kamöta, me Than Iesu Keriso; 2 E so e unyibun ibetengiö baú me hnahic únyi ge Khong a Kamen me Than Iesu Keriso.

3 Hamöhmun he ka ole bala ka Khong gabun, hnyat me lakeiny, anyin ae úcü e, anyin ame ti kú hmönyin anyibun labageju, k' ame si but anyibun ibetengiököu hia thithö; 4 wale me öhmun e hobelu' öbun hnyi ta je ekalesia anyin Khong únyi hnyi hnöbun hna hokhnyok me labageju hnyi hnödra hna sed' öbun, ke hnyi ta je vec öbun e vheno; 5 wale haten úhnei ae wisa anyin Khong; m' adre me haöücü öbun ka hnyi dökhü dokhon Khong, wale öbun e vec minya can: 6 ame ne únyi ae wisa ka Khong he ka bi hwaban vec ka tavat adre me ovecâ öbun, 7 ke öbun tavat adre ovecâ, öbun e he ka tha menâ möhmun, e ka manen dut Than Iesu úheny hnyi drany tha e me ta je angelainy maniny man 8 hnyi meic ame ubâhlâ, he ka bi hwaban ka tavat ae ca khan' ödra Khong, me ka tavat adre me ca long hoton úthumetu ae so anyin Tuhöta Iesu Keriso: 9 tavat adre me he ka kap hwaban, wale hnaúhangö ame ca ba balua únyi hnyi hnyimakan Than me hmanenanginy maniny man, 10 e ka o me me ogânâ e hnen anyin wapak, me he ka láiâ gan hnyi bong eling

hnen tavat hia adre me labageju (anyin a öbun e kap hnöhmun hna thumetu öbun). 11 Waleling m' öhmun e hic bala hobi köbun, me me he Khonguta ka haöücü öbun ka hnyi hna haw' öbun kâu, me obekhötâ hnen man ta je weny ae so, me ta je huliwainy labageju; 12 m' adre me he ka ogânâ unyibun ien Tuhöta Iesu, ke öbun minya unyin, hoton ibetengiö baú anyin Khonguta me Than Iesu Keriso.

HNYIMAKAN 2.

ÖHMUN e újöngi öbun hnyat me lakeiny, wale ge ioiny hmetu Tuhöta Iesu Keriso, me hna úkhacaköu öta kâu; 2 ka habe, ca ie bwebwet bi je hnyekubun, ke ca loloâ minya bi, wale hnen hanu, me hofuc, ke ca hnen minya bi tusi, helâke únyi gahmun, ke helâke me hakekeny jut bong bonginy Than; 3 ca he ke at ka iyaw' öbun bi ge ke únyi: anyin ame ca he ka o bong eling, e ka ca bán ka o kolu but a tavat, me adre me he ka omanená but aten hulö, wale aten hnaúhangö, 4 wale at ame bi iwahnaihmiöny, me ka hamen ogö-ranyâ e hon ta je únyi hia thithö adre me ha me Khong, me hna khudrung kâu; waleling me me laba hnyi uma umen Khong, me ka omanená e bi, ka habe, e Khong. 5 Hawa öbun e ca únykúme, a oge hia but ha ta je únyi eang köbun, waleji ke tiga inya bi unyibun? 6 Ke walang ange khan' öbun únyi at ame ovhelâ, me me he ka

II. THESALONIKA 3.

manen dut e hnyi anyin bi ùen. 7 Anyin ame huliwa walang ang ùnyi ae iyong hnyi hulö: ke e hu at ame ovhelâ walang ang, ke ne o but adre me hom e. 8 Ke hnyi ùen eling ame he ka manen dut at ame ânyâ hulö, wale hnen Than Iesu hna he ka hlingâ ge homenâiny hnyimen, me he ka ohia ge unyin ae manen dut e ka o but; 9 haba ioiny me hoton huliwa anyi Satana, me man hia thithö, me ta je haten, me ta je ùöman ae thoi, 10 me tang iyawö hia thithö hnyi hwakecin ae ca wisa bi unyin tavat adre me he ka hnaûhangö; anyin adre me ca kap hnyok ka hnyi hnathu, m' adre me he ka möt. 11 Ke can thibi e, Khong ame kunâ ködra he ka huliwan monu, m' adre me he ka kap thoi: 12 m' adre me he ka bi hwaban ködra hia thithö, tavat adre me ca hnyi kap hnathu, ke adre me senyin bala bi ka hnyi hwakecin ae ca wisa.

13 Ke hamöhmun he ka oleâ bala bi gabun, hnyat me lakeiny a laounykuminy Than, anyin a Khong ame ùc' öbun ùnyi hnyi can he ka möt, hnyi hna okabâ hnen Hanu, me he ka kap hnathu. 14 Waleji e ame haw' öbun ka hnyin hnen anyihmun ùthumetu ae so, me öbun e he ka hu hmananginy Tuhöta Iesu Keriso.

15 Anyin a wale, hnyat me lakeiny lö, tethmä ju, ke kât hmâ ju hna hûna waleji adre n' öbun kâu, ame ne hofuc, ame ne anyihmun tusi.

16 Ke hanyemen Tuhöta Iesu Keriso, me Khong a Kamöta at ame betenge gata me ham köta hnahic ame ca ba balua me geju ae so hnyi ibetengiö baû, 17 hamen he ka okahwa je hnyekubun me otethmä hnyi ta je huliwa ae so me hofuc ae so hia thithö.

HNYIMAKAN 3.

KE walang obiny hnyat me lakeiny lö, hic d' öbun hobi köhmun, e me mweimwei thö hofuc hwan Than, m' adre me ogânâ e, helâ minya e unyibun; 2 me me he ka hûgûn' öhmun ge tavat ae ba hnyekudra, me monu: anyin ae ba labageju ge keihen. 3 Ke e hnathu Than, at ame

otethm' öbun, me tu' öbun ge hulö. 4 Ke öhmun e labageju ka Than gabun, a öbun e ânyâ walang, ke öbun e he bala bi ka ânyâ ta je ùnyi öhmun e hûna köbun. 5 Ke so ame he Than ka owisa je hnyekubun ka hnyi ibetengiö anyin Khong, me hokhnyok ùnyi ge Keriso.

6 Ke öhmun e hûna köbun hnyat me lakeiny, hnyi ien Tuhöta Iesu Keriso, ka habe, ùsâkâû' öbun dut me je hnyat me lakeiny hia thithö ae hwali hwakecidra, ke adre me ca hnu hoton hna ùne waleji adre me kap ùnyi gahmun. 7 Anyin ae khan' öbun hwakecin ae ùcû wale he ka ùcûcûbingi öhmun: anyin ame ca hwali hwakecihmun unyibun; 8 ke haba khaca, öhmun e ca an bâûâ jeû an ke at, ke öhmun e ânyâ huliwa ae hmak me vec hnyi lit me lany, m' öhmun e ca he ka ohmâkâ ke at bi gabun: 9 ca anyin bi ae ba anyihmun musi, ke so bi m' öhmun e he ka wi öhmun hnân tulut köbun, m' öbun e he ka ùcûcûbingi öhmun. 10 Anyin a tiga öhmun bi unyibun, walang hnöhmun hna ha, ka habe, A ne hücö ke at he ka hnyi huliwa, awe, e ame ca he ka hnyi han. 11 Anyin a öhmun e löng e hwakecin keihen unyibun adre me he monoâ, k' adre me ca hnyi ânyâ je ve hanymödra, ke adre me huliwa monu thibut. 12 Ke öhmun e hûna ka tavat a helâe, me ùnö ge Tuhöta Iesu Keriso, ka habe, hamödra he ka huliwa hnyibû, me ve an ö'dra bi jeû. 13 Ke haba öbun, hnyat me lakeiny, ca senyin bi he ka mâdrâ hwakecin ae so. 14 Ke a ne ke at ame ca löng bi hoton hohmun hofuc hnyi tusi ang, me so öbun e bi haten at eling, ke ca tha öbun më, me me he ka hmehma but. 15 Ke so bi, ca ùnykûme bi kâu helâ me iwahnaihmöny, ke nâ ju helâ me ke liamekeiny.

16 Ke so ame he Than, a at ame tren ùsoköu ka ham köbun ùsoköu a e bala bi hnyi ta je hwakecin hia thithö. E so e unyibun hia thithö Than.

17 Anyik italofa, inya Paulo, oge me set ge hnyamök, wale haten hnyi ta je tusi hia thithö: inya oge me sihnalimen helâe. 18 E so e unyibun hia thithö ibetengiö baû anyin Tuhöta Iesu Keriso.

TIMOTEO.

HNYIMAKAN 1.

INYA Paulo aposetolo anyi Iesu Keriso, hoton musi anyin Khong, At a omeli öta, me Keriso Iesu, hnöta hna geju kâu; 2 oge me sihnalimen kö Timoteo, a hing nökkuk hnyi labageju: E so e unyâm ibetengiö baú, me tang ibetengiö, me hnahic, únyi ge Khong a Kamen, me Keriso Iesu a Tuhöta.

3 Oge me sumató u he ka laba hnyi Efeso ehac, ke helæ minya walang ang, waleji m' iny he Makedonia ai, m' u me he ka húna ka keihen, a g' adre me ca he bi ka únö hofuc ae ke bongon, 4 me ca he ka oúnyihnathoâ bi ta je vekhet, k' adre me ca aú bi ta je döiny tavat, wale ae ba obiny, k' ame okúâ iwatretra, k' ame ca okúâ huliwa ka Khong hnyi labageju. 5 Ke haba obiny hna húna, me ibetengiö, únyi hnyi hnyok ae kalaöt, me oúnykúm ae so, me labageju ae ba thoi hnyin: 6 ke a hia but keihen haúhaú hnyi ta je únyi e, k' adre saú ka hnyi hofuc ae ba önyen; 7 ke wedra he ka únö hnanyibu, k' adre me ca wá únykúme hnödra hna ha, me bongon ta je únyi adre me ha hwegiâ. 8 Ke e khan' öta ae so hnanyibu, at ka huliwan hnyi wisa, 9 wale he ka wâhmakhmeto a g' adre ca otílâ hnanyibu hobi kâu at ae wisa, ke hobi ködra bi adre me hanyâúâ hnanyibu me ca úling, me ca ot, k' adre ányâ monu, ke kong hwakecidra, ke thothom бага, ödra tavat hlingâ lakamödra, ke tavat adre me hlingâ lahinyödra, ke tavat úhlingö, 10 ke tavat bi únyi monu, ke tavat adre me hwen Sodoma, ke tavat venöu at, ke tavat thoi, ke tavat khemanyin thoi, ke ame ne hu ke hwakecin ae ca úcú me hna úne ae wisa; 11 hoton evangelia ae hmanenang anyin Khong ae tren hnahic, waleji adre me hna kõnya.

12 Ke inya oge me ole ka Keriso Iesu a Tuhöta, at ame ömani nya, anyin a e ame únykúme a iny hnathu, me ame ham kõnya anyin huliwa; 13 ke haba bi ehac, me, iny

at bi gan, me úöveci, me at ame okongoâ: ke e ame betenge gak, anyin a oge me ányâ hnyi ca khanö nya, me hnyi hnök hna ca labageju; 14 ke ame ti si but ibetengiö baú anyin Tuhöta, me labageju, me ibetengiö wale ae unyin Keriso Iesu. 15 Walang uthofuc ae hnathu, me ti úcú he ka kap, ka habe, A o Keriso Iesu eang hmeledrany he ka omelö tavat ae monu; ke iny beönua bi hudrin: 16 ke wale thibi e can adre betenge baú kõnya, me me he Iesu Keriso ka omanená a únyi gak, wale at ae nuâ monuiny, anyin hokhnyok ae beú hmâ hia thithö hnân tulut ködra adre me he ka labageju kâu nyiele, m' adre me hu gadra möt ame ca ba balua. 17 E so e unyin Than a e balua bi, me möt balua bi, me iyong bi, Khong a khaca thibi, e so e anyin bi, hna ogânâ me hna ölungâ nyiele nyiele balua. Amen.

18 Nökuk lö, Timoteo, inya oge me ham köu hna húna eang, hoton hna perofetö u a bân, me u me he ka vatâ vat ae so hnyin e; 19 he ka kât labageju me oúnykúm ae so; waleji ame hna degecâ keihen adre öüâ but anyidra labageju: 20 jia Humenaio, me Alesanedro a li lahanödra; waleji oge me hn' ödru kö Satana, m' adre me he ka n' ödru he ka ca fuc bi gan.

HNYIMAKAN 2.

ANYIN a wale, inya oge me n' öbun a bân, ka habe, adre me he ka sumâtâ, me hijö, me khöú, me ole, hobi kâu tavat hia thithö; 2 hobi kâu je than, me tavat musi hia; m' ate me he ka laba wia me úsoköu hnyi ta je hwakecin hia thithö ae úcú ka Khong, me hwakecin ae wisa. 3 Wale únyi ae so me hnân osenyinâ hnyi hnyimakan Khong At a omeli öta; 4 wale at ame weny tavat hia thithö he ka möt, me he ka o ka hnyi hna wâhmakhmetoâ hnathu. 5 Anyin a khaca thibi Khong, ke khaca thibi at ame khöúâ tavat ka Khong, a ka at bi, wale Keriso Iesu, ö

I. TIMOTEO 3, 4.

waleji at ame ka hamen ham e bi hnân úcú melen tavat hia thithö ; m' adre me he ka ohnathoâ hnyi je úen ae úcú ; 7 k' adre me úcö nya he ka khetâ e, ke hnân aposetolo (inya oge me ha hnathu oge me ca thoi), ke inya at úne ka Aten ta je hnyei ka hnyi labageju me hnathu.

8 Anyin a wale inya oge me wek e me he obaga ka hic hnyi ta je dok hia, me ogö-ranyâ je hnyam ae ba hnyikongon, me ca ú, me ca iwatretra. 9 Ke helâe minya ju omomo, e so adre me khavâ úkhaú ae úcú, tha e me bongon ot, me hnyok ae wisa ; ca he ka úla hobâ leúnen bödra, me gol, me penina, me úkhaú ae gan hwaban ; 10 ke so bi hnyi ta je huliwa ae so (wale ae úcú ka omomo adre me haimemenâ a ödra tavat outen Khong. 11 Hamen momo he ka tevehlöng wia, me löng hoton. 12 Ke oge me ca hna bi momo he ka únö, me musö бага, ke so bi he ka laba hnyibú. 13 Anyin adre bödra ka up Adamu ke bili Eva bi ; 14 ke adre me ca iyawö Adamu, k' adre iyawâ momo, ke momo at eji ame hanyâúâ : 15 ke ame he ka möt momo hnyi hna hno-koâ, ödra ka tethmâ hnyi labageju me ibetengü, me hwakecin ae kap me hnyok ae wisa.

HNyimakan 3.

WALANG uthofuc ae hnathu, ka habe : A ne weny ke at hanymen pisop e ame weny huliwa ae so. 2 E úcú ka pisop he ka ba hnyikongon, me khaca âiân, me at hokhnyok, me at hnyokâ wisa, me at ame ânyâ hwakecin ae so, me at ame betenge ge atkanyua, me at ae khana úne ; 3 ca at ame beijem gâná waina, ke at ame ca úkúc ; e so e menyik, me ca at bi ame iwatretra, ke ca at hnyokâ mone : 4 at ame musö soâ anyin lap, ke haba lakon, me ödrin e löng hoton me hnyokâ wisa hia ; 5 (anyin a ne ca khana at he ka musö anyin lap, me ame he ka hawa ka tuö ekalesia anyin Khong?) 6 ca at ame ibi hni, wâ e nye began me ame kölu but ka hnyi hnaúhangö anyin diabolö. 7 E so minya e lung so ködra eú hnyöu ; wâ adre nye haikongoâ e, me e ame ta but ka hnyi hnewe anyin diabolö. 8 Ke helâe minya ta je dikona, hamödra he ka hnyokâ wisa, ca tavat lo ifucidra, ca tavat ijem gâná waina, ca tavat behu omjeú ; 9 k' adre me kât hmâ únyi ae iyong hnyi labageju, me önykúm ae kalaöt. 10 Ke so ka mē cubic

ödra ; ke e ka ba hnyikongudrin, awe, adre me he ka ânyâ hanymen dikona. 11 Helâe minya omomo he ka hnyokâ wisa, ca tavat úhaiö, ke so he ka hok hnyok, me hnathu hnyi ta je únyi hia thithö. 12 E so ka ta je dikona he ka úsa khaca laöiödra, me musö soâ lakudra, me anyidra je lap. 13 Anyin a haba tavat adre me hia but ânyâ soâ hanymen dikona, ame he ka hu ködra lung so, me hwege ae gan hnyi labageju unyin Keriso Iesu.

14 Inya oge me sihnalimen ta je únyi e köu, ke inya oge me önykúme he ka ie o köu ; 15 ke iny ka bec, m' u me he ka wâhmakhmetoâ hwakecin ae úcú ka tavat hnyi uma umen Khong, wale ekalesia anyin Khong ae möt, me hmolom me taben hnathu. 16 Ke ca hnân ivinoâ, ka habe, e gan hmâ úiyonginy hwakecin ae úcú me Khong, ka habe, E ame manen dut hnyi unyin, ame haiwisa hnyi hanu, ame wâ hnen ta je angela, adre me khetâ hnyi ta je hnyei, adre me labageju kâu hnyi hmeledrany, adre me kap göranyai ka hnyi hmanenang.

HNyimakan 4.

KE ame ha manenâ hnen Hanu, ka habe, ame he keihen ka hna degecâ labageju, hnyi je úen a biliny, adre me he ka löng ta je hanu adre me omono me ta je hna únö anyin je demoni, 2 hnen iyawö anyin tavat thoi, tavat ame le önykúmidra ge fao ae öú ; 3 adre me thawâ he ka faipoipo, me ca han ke je jeú, wale a op Khong, he ka kap oleâ hnen tavat adre me labageju me wâhmakhmetoâ hnathu. 4 Anyin a haba ta je únyi hia thithö a op Khong, me ba ke únyi hnân degec, adre me ne kap e me ole : 5 anyin ame osoâ hnen hofuc hwan Khong, me hic.

6 U je ne he ka önykúmeâ je liamekeiny ge ta je hofuc, me u me he ka at huliwa ae so anyin Keriso Iesu, adre hat hnyi hofucin labageju, me úne ae so, waleji u je hia but hnu hoton ; 7 e so u ma ca kap ta je vekhet ae monu anyin wasomaca. Ke u ma khenen he ka helâ me hwakecin Khong : 8 anyin ae úhnyúkong troban huliwa hnyi unyin ; ke so bi, haba hwakecin helâ me Khong, me hu troban hnyi ta je únyi hia thithö, e hu hna ha bánâ hobi kâu möt walang ang, me möt minya bi nyiele. 9 Wale hofuc ae hnathu, ke úcú he ka ti kap. 10 Anyin a wale ate me huliwa me hwege, anyin ate me geju ka

I. TIMOTEO 5, 6.

Khong ae möt, wale At ame omelö tavat hia thithö, ke beönua ka tavat labageju. 11 E so u me he ka hûna me únö ta je únyi e. 12 E so ame ca he ke at ka hmián ányám hidróu; ke u me he ka bi tulut ka tavat labageju, ge hwam hofuc, me hwakecâm, me ibetengiö, me labageju, me hwakecin ae kalaöt. 13 E so u ma hwege aú tusi, me khetâ hofuc, me úne, ke ne o but oge me o. 14 Ca he ka öúnyibâtâ hnödra hna ham köu, waleji adre ham köu ge hna perofeta me hna ip hnyam hnen wahingat. 15 Únykúme wia ta je únyi eang; khenen dö ka hnyin; me me manen dut troban ányám huliwa ka tavat hia. 16 Ö u eâu bi, me hnâm hna úne. Tethmâ ju hnyi ta je únyi e; anyin a u je ne ányâ e, me u me he ka omeli u bi, m' ödra minya adre me ling u.

HNYIMAKAN 5.

CA he ka ou je hingat, ke so bi ná e helâ me kamen; me ta je hidróu helâ me je liamekeiny: 2 ke haba wasohmaca helâ me je hinyen, me wahlu helâ me je lahaniny, hnyi hwakecin ae kalaöt hia. 3 Ogânâ ju wasafac a ta je hing wasafac. 4 Ke a ne ke safac ae hu lakon, ke ame ne laöbiny, me so ödrin e mö ná he ka ányâ hwakecin ae so hnyi hnyabadrin bi, me bi troban ka lakamödrin me lahinyödra: anyin a wale únyi ae so hnyi hnyimakan Khong. 5 Ke haba momo a hing safac k' ame hake laba, me ame geju ka Khong, me tethmâ hnyi hic me khôu hnyi lit me lany. 6 Ke haba momo ame elâm senyin hnyi unyin, me a mokcu bi, ke tiga möt unyin. 7 U ma hûna ta je únyi e minya, m' adre me ca he ka haikongu ödra. 8 Ke a ne ke at ame ca tuö wia lahanen, k' ame ne ti helâe ka anyin lap, me e ame ivinöâ labageju, ke gan anyin hulö hon at ame ca labageju. 9 Ca he ka sihnalimen ien safac e ka tiga ca sikste bi je hunainy, ke khaca thibi áian ehac, 10 ke momo adre me hai-soâ hnyi ta je huliwa ae so; ka habe, ame hia but hat lakon, me betenge ge ta je atkanyua, me ösûâ je li can wakap, me hadruâ tavat adre me vec, me ányâ bala ta je huliwa hia ae so. 11 Ke ca kap bi wasafac hmai, anyin a ödrin e ka hwân bekec ge Keriso adre me befaipoipo; 12 me adre me hnaúhangö but, únyi hnyi hnödra hna hna degecâ anyidra labageju a bân. 13 Ke haba khaca adre me ná he ka hócö huliwa,

me he monu ka hnyi ta je uma, he ca hake hócö thibi huliwa, ke adre me úsabú baú minya, me hngele ka wâ huliwa anyin keihen, me ba ta je hofuc ae ca úcú ködra. 14 Anyin a wale inya oge me wek e me he wasafac hmai ka faipaipo, me hnokoâ laku-drin, me tuö hnyabadrin, me me ba can he ka haikongoâ hnen iwahnaihmiony: 15 anyin a hia but keihen saú ka he hotu Satana. 16 A ne ke momo ame labageju k' ame hu je safac unyin, me so e me he ka hadru' ödra, ke ca he ka ohmâkâ ekalesia; me me he ka hadruâ ta je hing safac.

17 E so he ka ti ogânâ wahingat tavat adre me musi so, ke e nua ka tavat adre me huliwa hnyi hofuc me úne. 18 Anyin a haingen hna sihnalimen, ka habe, Ca he ka ca hnyimen bolok ame ututo hwit. Ke, E úcú hwaban ka at ame huliwa. 19 Ca kap bi hna háâ ke hingat e ka ba li at a lo, ame ne kun he ka ohnatho. 20 E so he ka ná hnyi hnyimakan tavat hia thithö adre me ányâ hulö, me me ot ju keihen. 21 Inya oge me hûna wia köu hnyi hnyimakan Khong, me Keriso Iesu, me ta je angela adre úca, ka habe, u me he ka tuö ta je únyi eang, ke ca he ka wâhmakhmeto, me bi hien ke at bi. 22 Ca he ka ie ip li hnyamâm hnyi hon ke at, ke ca hnyi hanen monu anyin keihen: tuö wia hwakecâm me me alai. 23 Ca he hmetu ka ijem köiö ke bi waina thibi ae úhnyúkong hobi kâu hnyekom, me ányám ta je mok waleji ame ibi ose o but köu. 24 Ame manen dut hulö anyin keihen, me ame bödra ka hnyi hna owisa; ke ame hnu hotudrin ta je hulö anyin keihen. 25 Ke helâe minya e hu ke ta je huliwa ae so ke manen dut; ke haba keihen ta je huliwa ae ke bongon bi, e pason he ka ikhâlâ.

HNYIMAKAN 6.

E ÚCÛ ka ta je athnyaba hia, tavat adre me hije hok he ka ve ogânâ latuhödra, m' adre me ca he ka haikongoâ ien Khong me hnen hna úne. 2 Ke haba tavat ae hu latuhödra adre me labageju, ca he ödra ka öúnyibâú' ödra, anyin a ödra je liamekeiny; ke so bi he ka ti bi athnyaba so ködra, anyin a tavat labageju me tavat ibetengiö adre me kap huliwa ae so. Hamâm he ka ná me únö ta je únyi e.

3 A ne ke at ame únö ke únyi bi, me ca hmehmela hofucin möt wale hofuc hwan Tuhöta Iesu Keriso, me hna úne ae úcú

II. TIMOTEO 1.

hoton hwakecin ot ka Khong; 4 awe, e ame bi gan, ke ca khana bi ke únyi, ke e ame moko hna ivinö me iwatretra ge ta je hofuc, wale at ame öküâ ihunyinköu, me iwatretra, me újao, me únyküme monoâ, 5 me ta je úö hwege anyin tavat adre me hnyokâ hulö ke ca hu bi hnathu gadra, ke adre me únyküme, ka habe, haba hwakecin outen Khong me wale deny he ka hu ködra tang omjeú. 6 Ke haba hwakecin outen Khong tha e me hnahic, me wale thibi e omjeú ae gan hwaban: 7 anyin ate ca hom ke únyi ka hnyi hmeledrany, ke ca khan' öta bi he ka hom ke únyi únyi hnyin; 8 ke e ka hu köta jeú me úkhaú, me ate me he ka osekuni öta ju e. 9 Ke haba tavat adre me wedra he ka tren omjeú adre me ta but ka hnyi úcúbic me hnewe me ta je weny ae monu me hnân okongo, wale hnân ödilâ tavat hnyi úöhia me hnaúhangö. 10 Haba hnyok ka mone, me wale iwân ta je monu hia thithö ae ve bongon: waleji ame hnu hoton hnen keihen m' adre me osaú' ödra but únyi hnyi labageju, ke adre me ka hamödra bi dá fineci ödra bi hnen ta je vec ae se hia.

11 Ke haba u, aten Khong lö, kec dö ge ta je únyi e; me hnu hoton hwakecin ae wisa, me hwakecin ae úcü me Khong, me labageju, me ibetengiö, me hok hnyok, me hwakecin ae menyik. 12 Vátâ thö vat ae so anyin labageju, kât hmâ ju möt ame ca ba balua, waleji adre me haw' u kâu, me hnâm hna haimemenâ so hnyi hnyimakan tavat ohna-

tho ae se. 13 Inya oge me hûna köu hnyi hnyimakan Khong at ame tuö möt anyin ta je únyi hia thithö, me Keriso Iesu, at ame haimemenâ so hnyi hnyimakö Ponetio Pilato; 14 ka habe, u me he ka tuö hnanyibu, me me ba hnyikongon, me ba hnân haikongoâ, ke ne o but ame manen dut Tuhöta Iesu Keriso: 15 ke e ame he ka omanenâ e hnyi anyin bi ta je úen, a e thibi Than a klaca ae tren hnahic, a Tuhan ta je than, ke Taben ta je taben; 16 e thibi ame tren möt balua, at ame laba hnyi melam ae ca hnân úhakekeny kâu; waleji ame ca wâ hnen at, ke ca khana minya wâ: e so he ka e unyin bi hna ogânâ me man nyiele balua. Amen.

17 Hûna thö ka tavat tren omjeú eang hmeledrany ka habe, Ca he ödra bi ka bi gan, me ca he ka gejon ta je omjeú wale ame ca tethmâ, ke so bi ka Khong ae möt. at ame ham köta hia ta je únyi hnân osenyini öta; 18 m' adre me he ka ânyâ so, me tren omjeúiny ta je huliwa ae so, me kenen he ka kuia, me weny he ka betenge: 19 me he ka ip hobi ködra bi tang omjeú ae so hnân hobi kâu nyiele, m' adre me he ka kât möt wale möt ae hnathu.

20 Timoteo lö, tuö wia ju ta je únyi adre me hna but köu, me úsákâúö me ta je hofuc ae bi gan, me ta je ivinö, wale adre me ha thoiâ, ka habe, bemetâ; 21 waleji ame kap keihen, m' adre me monu but únyi hnyi labageju.

E so e unyibun ibetengiö baú.

TUSI A LOINY ANYI PAULO APOSETOLO KÖ

TIMOTEO.

HNHYIMAKAN 1.

INYA Paulo, aposetolo anyi Iesu Keriso únyi ge weny Khong, hoton hna ha bánâ möt unyin Keriso Iesu, 2 oge me sibnalimen kö Timoteo, nöku a oúnykü-mik: E so e unyâm ibetengiö baú, me betenge me hnahic únyi ge Khong a Kamen me Keriso Iesu a Tuhöta.

3 Inya oge me ole ka Khong, waleji oge me huliwa kâu hwân ge je lakibik hnyi oúnykü m sâ ae wisa, a oge me ca menâ únykümi u hnyi hijik je hic hnyi lit me lany 4 ke bewek hmönyin he ka iouny möu. m' inye unöngötö ge senyin, anyin oge me únyküme li deköiâm; 5 ke inya oge me únyküme minya labageju unyâm ae ba thoi hnyin; waleji a bán unyin kibâm somaca

II. TIMOTEO 2.

Lois, ke hinyâm a Eunike; ke oge me wâ únykúme a e minya bi unyâm. 6 Anyin a wale inya oge me oúnykúmi u he ka öubâhlâ bwihlany anyin Khong a e hnyi hnyekom, ge hna ip li hnyamök. 7 Anyin a Khong ame ca ham köta hanon ot; ke so bi ae man, me betenge, me metâ. 8 Anyin a wale u me ca he ka hmehma he ka ohnatho Tuhöta, ke gak bi inya at adre cö nya: ke so bi, u me he ka hnyi hanen ta je vecin úthumetu ae so hoton man maniny Khong; 9 at ame omeli öta, me haw' öta ge hwahongot ae kap, ca hoton bi anyita ta je huliwa, ke so bi hoton weny me anyin ibetengiö baú, waleji adre ham köta unyin Keriso Iesu adrem balua, 10 ke manen walang ang ge ioiny At omeli öta a Keriso Iesu, waleji at a ohia mok, me omanenâ möt, me ca mok hmetu bi hnen úthumetu ae so, 11 ke adre me úcö nya hnân at khetâ e, me hnân aposetolo me at úne. 12 Can e oge me vecâ ta je únyi e; ke inya oge me ca hmehma bi; anyin oge me wâhmakhmeto but e, waleji at oge me labageju kâu, ke mou thö hnyi hnyekuk a e khana he ka tuö hnök hna hna kâu, ke ne o but hnyi bong e. 13 Kât hmâ ju tulutiny hofucin möt u je löng únyi gak, hnyi labageju me ibetengiö wale unyin Keriso Iesu. 14 Haba únyi ae so adre hna but köu, tuö ju hnen Hanu Kap at ame laba hnyi je hnyekuta.

15 E khanö u a g' adre kec khotö nya ödra hia hnyi Asia; haba Fugelo me Hume-naio unyidra. 16 E so ame he Than ka betenge ka lap anyi Onesiforo: anyin a e osehia okahwö nya, ke e ame ca hmehma gak me tö fao adre cö nya kâu; 17 ke tiga e Roma, me e ame hwege elöm nya, me ö nya 18 (e na he ju ka wâ ibetengiö baú unyin Than hnyi bong eling); ke e khanö u wia ae se hia ta je únyi e ame hadruo hnyi hnyi Efeso.

HNYIMAKAN 2.

A NYIN a wale, nökek lö, hwege thö hnyi ibetengiö baú a e unyin Keriso Iesu. 2 Ke haba ta je únyi u je hia but löng únyi gak unyin tavat ohnatho ae se hia, ham but ka tavat ae hnathu, ae khan' ödra he ka úne ka keihen minya. 3 Munyi hokhnyokâ ju vec mönya, helâ me at vat ae so anyin Keriso Iesu. 4 E ba at vat ame bi ovheliny ge ta je únyi anyin möt eang; me me he ka osenyinâ e waleji at ame úca me hnân at vat. 5 Ke a ne ke at ame bi

bi ton hnyi ta je mat, adre me ca obicâ e, e ka ca mat hoton hnanyibu. 6 Haba at ame belök me hamen he ka bán ka hom je wan. 7 Únykúme ju hnök hna ha; anyin ame he Than ka ham köu wâ únykúme ta je únyi hia. 8 Únykúmi Iesu Keriso, únyi hnyi mâtrâni Davita, a omelö únyi hnyi hna mok, hoton anyik úthumetu ae so: 9 can e oge me hom vec ke ne o but adre me cö nya, helâ me at ae kong; ke adre ca ca bi hofuc hwan Khong. 10 Anyin a wale, inya oge me hokhnyokâ ta je únyi hia hobi kâu tavat adre úca, me me hu minya thö ködra möt a e unyin Keriso Iesu, tha e me hmanenang ame ca ba balua. 11 Walang uthofuc ae hnathu, ka habe, Öta ka tha mok mē, ate me he ka tha möt minya mē: 12 ke ate ne hok hnyok, me ate me he ka tha than mē: ke ate ne ivinöâ, me e ame he bi ka ivin' öta: 13 ke ate ne ca hnathu. me hnathu bala bi e; anyin e ca khana he ka hamen ivinoâ e bi.

14 Oúnykúmi ödra ju ge ta je únyi eang, me huna ködra hnyi hnyimakan Than he ka ca ivinöâ ge ta je hofuc, ae ba troban, ke hnân omonoâ tavat adre me löng. 15 Hwege thö, me u me ka omanenö u bi a g' ame kap soi u Khong, m' u at huliwa ae ba hnân ohmehma, at ame huliwa wia hofuc ae hnathu. 16 Ke úsâkâüö u but me ta je hofuc ae monu me ca únyi hnathu: anyin adre me he ka bi hanen gâná hwakecin ae úcú me Khong, 17 ke ame he hodra hofuc ka han helâ me anyú: e unyidrin Hume-naio me Fileto; 18 tavat ödrin e he monu úhedra hnyi hnathu, haingödrin, ka habe, a um dö möt hmetu, m' ödrin e hagutâ degecâ labageju anyin keihen. 19 Ke ame tethmâ taben ae hwege anyin Khong, ae hu hna ohmâ haten eang, ka habe, A wâhmakhmetoâ but Than ta je aten: ke, Hamödra hia adre me hawâ ien Than he ka úsâkâüö me hwakecin ae kong. 20 Ca je gol me sileva thibi eiö hnyin uma ae gan, ke je kaia utö minya me je kaia kânâ; haba keihen me hnân haisoâ, ke haba keihen me hnân hainkongoâ. 21 Anyin a wale, a ne ke at ame ka ânyâwia e bi únyi hnyi ta je únyi eang, me e ame he ka kaia hnân haisoâ adre okabâ, me úcú he ka huliwan hnen at ae tren uma, me hna penapena ka hnyi ta je huliwa ae so. 22 Kec dö ge ta je weny wahidröu, ke hnu hoton hwakecin ae wisa, me labageju, me ibetengiö, me úsoköu, tha e m' ödra hia adre me hawâ ien Than, únyi hnyi hnyok ae kalaöt. 23 Ke hota ju ta

II. TIMOTEO 3, 4.

je ivinö ae monu me ca metâ, anyin ae khan' öbun a wale at ame okûâ iwatretra. 24 Ke ca úcú bi athnyabainy Than he ka iwatretra, ke so e menyik hwakecin ka tavat hia thithö, me at ae khana úne, me hokhnyok, 25 me ná menyikâ ta je iwahnai-hmiöny; ame ne he Khong ka ham ködra ietra he ka wâhmakhmetoâ hnathu, 26 m' adre me he ka möt únyi hnyi hnewe anyin diabolö, me omelö ge at huliwa ka Than ka hnyi weny Khong.

HNYIMAKAN 3.

KE wâhmakhmetoâ ju ang, ka habe, ame he ka o ta je úen ae kong hnyi je bong nyiele. 2 Anyin ame he tavat ka hamödra hnyok ködra bi, me behnyekudra mone, me hobelöu, me bi gan, me fuc monu, me ca löng kamen me hinyen, me ca ole bi, me ca okabâ bi, 3 adre me ca betenge ge lahanödra, adre me höcö úsoköu, tavat úhaiö, me ca khan' ödra kât weny unyidra, me hwege hnyimaködra, me ca hnyok únyi ae so, 4 tavat úalecuo, me huliwa wathethöt, me bemusö, adre me weny únyi hnân ose-nyiná, ke ca wedra bi ka Khong; 5 tavat a helâke me úcú hwakecidra ka Khong, k' ödra ivinöâ bi maniny: úsákâúö u but me tavat a helâe. 6 Anyin a keihen tavat helâe, adre me dit ka hnyi ta je uma, me hom hwenbâ omomo ae monu me hmak ge hulö, adre lili ödra hnen ta je wedra bi ae ke bongon bi, 7 adre me labö úne, ke ca khan' ödra bala bi wâ únykúme hnathu. 8 Ke helâ me Jane me Jamebere ödru me tot úcú Mose, helâe minya tavat e adre me tot úcon hnathu; tavat ae kong hnyekudra, kadre me ca hnathu ka hnyi labageju. 9 Ke so bi, adre me ca he ka vhenö bala hwakecin e, anyin ame he ka manen dut hwakecidra ae monu ka tavat hia thithö, helâ me imaneniny hwakecidru könya. 10 Ke u je hia but hnu hoton hnök hna úne, me hwakecik, me únykúmenök, me hnök hna labageju, me hokhnyok beú hmâ, me betenge, me hokhnyok, 11 me hna seda, me ta je vec; ta je únyi ame o könya hnyi Anetioka me Ikonio, me Lusetara; me ta je vec adre oveci nya kâu: ke haba Than ame hügúnö nya únyi hnyi ta je vec hia. 12 Eke, ke adre me he ka oveci ödra hia tavat adre me weny he ka laba me hwakecin ae úcú me Khong unyin Keriso Iesu. 13 Ke haba tavat adre me ányâ hwakecin ae kong, me tavat iyawö, adre me he ka kong

tot bala, adre me omonoâ, me adre me ka omonu ödra bi. 14 Ke u ma tethmä ju hnyi ta je únyi adre hia but nö u kâu me hnâm hna hia but kap wia, anyin ae khanö u hnyat ödrin e nö u; 15 ke e khanö u ta je hna sihnalimen ae kap, k' u tiga mendreng, wale ae khana he ka ometö u ka hnyi möt a deny labageju ka Keriso Iesu. 16 Haba ta je hna sihnalimen hia únyi ge hanon Khong, me úcú minya hnân he ka úne, me hnân owisa, me hnân ná, me hnân sihwege hnyi hwakecin ae wisa: 17 me me bekhöt ut soiny aten Khong, wale at adre hia but penapena hobi kâu ta je huliwa hia thithö ae so.

HNYIMAKAN 4.

INYA oge me húna wia köu hnyi hnyimakan Khong, me Keriso Iesu, at ame he ka owisa wamöt me wamok, me he ka manen dut e, me dokhon dökhü; 2 ka habe, Khetâ thö hofuc; ke hwege thö hnyi úen ae úcú, me úen ae ca úcú; owisa thö, ná thö, sihwege thö me hokhnyok beú hmâ me úne. 3 Anyin ame he ka o but úen adre me ca he ka kap hna úne hnân melen; ke so bi, adre me he ka úkhöúnâ tavat he ka úne ködra hoton ta je wedra ae monu, anyin ae hölök ta je hnyikönyödra; 4 ke adre me he ka wia ta je hnyikönyödra únyi hnyi hnathu, me saú but ka hnyi ta je vekhet. 5 Ke u me he ka hnyokâ wisa hnyi ta je únyi hia, hokhnyok ju hnyi ta je vec, ányâ thö hanymen at ame huliwan úthumetu ae so, obekhötâ hanymâm hia thithö. 6 Anyin adre me hwân walang ang he ka hudí nya, ke ame o thö ang úen oge me he ka he but hnyin. 7 Oge hia but vatâ vat ae so, oge hia but umo hna úö logot, oge hia but kât hmâ bala labageju: 8 ke wale bi ang adre ip hobi könya kor-nainy hwakecin ae wisa, wale ame he ka ham könya hnyi bong eling Than ae wisa, at ame owisa: ke ca hake könya thibi, ke ködra hia thithö minya adre me senyin hnyi hna omanená e.

9 Hwege thö he ka ie o könya: 10 anyin a hia but Dema hna degeci nya, k' ame hnyokâ hmeledrany, ke ame he but Thesalonika ai; ke Kerese ame he but Galatia ai, k' ame he but Tito Dalamatia ai. 11 Ke hake Luka thiju ang unyik. Hum Mareko thö, me tha he thö jem öbu könya: anyin ae únyi hnathu e könya hobi kâu huliwa. 12 Ke haba Tukiko, me oge hia

TITO 1.

but kunâ e Efeso ai. 13 U ka he jem m' u hom minya thö anyik ûkhaû ae beû waleji oge me ip Troas, ûnyi Karepo, me ta je tusi minya, ke ca hnying bi je unen hnân sihnalimen hon. 14 E gan monu ame ânyâ kõnya Alesanedro, at ame leû faö kapa : k' ame he Than ka bi hwaban kâu e ûcû me anyin huliwa : 15 ð u eâu gan ; anyin a e ame hwege ka tot, me úcon hohmun hofuc. 16 Haba hnyi hnök hna ivinö a bân, me ba at ame bi hiök, k' ame digic nya tavat hia thithö : e na ca ip ködra hwaban. 17 Ke so bi ame tha tot mönya Than, me ham kõnya man ; me me he ka ti manen dut gak hna khetâ hofuc, me me löng hia Aten ta je hnyei : ke iny möt bi

ûnyi hnyi hnyimen liona. 18 Ke ame he Than ka omeli nya ûnyi hnyi ta je huliwa hia thithö ae kong, ke e ame he ka omeli nya ke ne o but ka hnyi dokhon dökhu ethö hnyi drany : e so adre me ogânâ e nyiele nyiele balua. Amen.

19 Anyik talofa kö Perisila me Akula, me lap anyi Onesiforo. 20 A laba biju Erato hnyi Korinito ; ke oge me hnö Trofimo e Mileto, ke a mok. 21 Hwege thö he ka o kõnya e me tiga ca o hunâ ae megic. Ame itolafa möu Eubulo, me Pudens, me Lino, me Kelaudia me je liamekeiny hia thithö.

22 E so e unyin hanom Than. E so e unyibun ibetengiö baû.

TUSI ANYI PAULO KÖ

TITO.

HNYIMAKAN 1.

INYA Paulo athnyabainy Khong, me aposetolo anyi Iesu Keriso, hoton labageju anyin tavat a úc' ödra Khong, me hna wâhmakhmetoâ hnathu hoton hwakecin ae úcû me Khong, 2 hnyi hna gejon möt ame ca ba balua, waleji hna ha bâná adrem balua hnen Khong at ae ca khana he ka thoi ; 3 ke ame omanená hwan hofuc hnyi anyin je úen, ge hna khetâ, waleji adre me hna kõnya hoton hna húna ge Khong At a omeli ötä ; 4 oge me sihnalimen kö Tito, a hing nökek hnyi labageju a khaca bongon : E so e unyâm ibetengiö baû me hnabic ûnyi ge Khong a Kamen, me Keriso Iesu At omeli öta.

5 Oge me hnö u hnyi Kerete can ang, a u me he bi ha oumo ta je huliwa adre me tiga ca ânyâ, me otilâ wahingat hnyi ta je taun, helâ me hnök hna húna köu ; 6 e ka hu ke at ae ba hnyikongon, a khaca thibi âiân, ke hu lakon ödrin e labageju, k' ödrin e ca lung kong hnyi hwakecin khâlândén me ca úling. 7 Anyin ae úcû ka pisop he ka ba hnyikongon, helâ me at huliwa ka Khong ; at ame ca újöng, k' ame ca ie hmönyin, k' ame ca ijem gâná waina, k'

ame ca úkúc, k' ame ca hwenhmiâ mone ; 8 ke so bi at ame betenge ka ta je atkanyua, at ame hnyokâ ûnyi ae so, at ame hnyokâ wisa, k' ame owisa wisa, at ae kap, k' ame ka hom úhnyúkongo e bi ; 9 at ame kât hmâ hofuc ae hnathu, helâ me hna ná, me me khana he ka únö hna úne hnân melen, me ohmehmelâ tavat adre me ivinö.

10 Anyin e hu tavat ae se hia adre me ca úling, tavat fuc baû me iyawö, ke ti nua bi ge tavat adre peritomonâ, 11 e úcû he ka hlöng je hnyimödra ; tavat adre me wia monoâ ta je hnyaba hia, me únö ta je ûnyi ae ca úcû bi, me me hu gadra ta ûnyi. 12 Haba ke at gadra, a anyidra ke perofeta, ame ha ka habe, Haba at Kerete, me ödra tavat thoi bala, me ta je meno úkúc ae kong, me tavat hwenhmiâ ae höcö huliwa. 13 E hnathu hna ha e. Anyin a wale u ma hwege n' ödra, m' adre me he ka so but hnyi labageju, 14 me ca he bi ka kap ta je vekhet anyin at Juda, me ta je hna húna hnen tavat adre hia but saú ûnyi hnyi hnathu. 15 E kalaöt ta je ûnyi hia ka tavat ae kalaöt hnyok : ke haba tavat ae ikiki je hnyekudra me ca labageju, me ba ke ûnyi ae kalaöt ködra ; anyin ae ikiki but je oúnykúmidra me anyidra minya

únykúm sa. 16 Adre me labö ha, ka habe, e khan' ödra but Khong; ke adre me ivinöâ e bi ge anyidra ta je huliwa, ke ödra tavat ikiki, me ca úling, ke ba ke huliwa a khaca ae so a ödra úcu ka hnyin.

HNYIMAKAN 2.

KE hamâm he ka ha ta je únyi ae úcú me hna úne hnân melen: 2 ka habe, hamen wahingat he ka hmákâ, me hnyokâ wisa, me wâ wia, me hwege hnyi labageju, me ibetengiö, me hokhnyok. 3 Ke helâe minya wasohmeca, he ka hwakecin ae úcú me Khong, ca tavat úhaiö, ca tavat adre hom hwenbâ ge waina ae gan, ke so bi tavat únö ta je únyi ae so; 4 m' adre me he ka ná wia omomo hmai he ka ve hnyokâ laöiödra, me hnyokâ lakudra, 5 me hnyokâ wisa, me kalaöt hnyekudra, me tavat huliwa hnyi hnyaba, me hwakecin ae betenge, me löng hoton laöiödra, e me ca he ke at ka haikongo bi hofuc hwan Khong: 6 helâe minya ge wahidróu sihwegi ödra he ka únykúme wia: 7 omanenö u thö hnân tulutiny ta je huliwa ae so, hnyi ta je únyi hia; e so e manen bi hwakecin ae fâfâ hnyi hnâm hna úne, me únykúme wia, 8 me hofuc ae metâ, ke ca khan' ödra he ka haikongu ödra; me me hmehma but at ame úö bi únyi, anyin ae ba ke únyi ae monu hnân he ka haiöta. 9 Sihwegiâ thö ta je athnyaba he ka löng hoton latuhödra, me he ka osenyini ödra hnyi ta je únyi hia thithö; me ca thu hwan bi; 10 ke ca hwenenöu bi, ke so adre me omanenâ but hwakecin ae hnathu me so; m' adre me he ka ohmanenangâ hnyi ta je únyi hia thithö hna úne anyin Khong At omeli öta. 11 Anyin a manen dut ibetengiö baú anyin Khong, wale ame hom möt ka tavat hia thithö, 12 ame n' öta, m' ate me he ha höciâ hwakecin ae ca úcú me Khong, me ta je weny hmeledrany ae monu, ke ate me he bi ka labö únykúme wia, me ányâ hwakecin ae wisa, me hwakecin ae úcú me Khong hnyi möt ang; 13 me halubahingen geju ae hnahic, me he ka manen dut hmanenanginy Khonguta ae beönua me At omeli öta Iesu Keriso; 14 waleji at a hamen ham e hnân hobi köta, me me he ka úcú öta únyi hnyi ta je hulö hia thithö, me ányâwia hnân hobi kâu tavat hnân athnyabainy bi, hnyat ae hwege ka hnyi ta je huliwa ae so.

15 Ha thö ta je únyi eang me sihwege

me ná hnyi musu hia thithö. E so ame ca he ke at ka hûkoti u.

HNYIMAKAN 3.

OÚNYKÚMI ödra a g' adre me he ka löng hoton ta je than, me tavat musu, me he ka úling, me laba penapena ka hnyi ta je huliwa hia ae so, 2 me ca he ka haikongoâ bi ke at, ke ca iwatretra bi, ke so bi he ka ilimuk, me omanenâ hia hwakecin ae menyik ka tavat hia. 3 Anyin a öta ta je monu ehac, me tavat ca úling, me tavat adre iyawâ, me bi athnyabainy ta je weny ae kong, me ta je únyi hnân osenyinâ unyin a ve bongon bi, ate me laba hnyi hnyok ae kong me ihunyinköu, tavat hnân ikikiâ, me tavat adre me úkikiköu. 4 Ke ame manen dut hwakecin ae betenge anyin Khong At ame omeli öta, me anyin ibetengiö ka tavat, 5 e ame omeli öta ca únyi hnyi ta je huliwa hnyi hwakecin ae wisa ate me ka ányâ, ke únyi bi hnyi anyin ibetengiö baú, únyi ge hna hneú wale he ka hnokoâ hmetu me hna ohâtâ ge Hanu Kap, 6 waleji e ame hingâlâ gâná köta ga Iesu Keriso At a omeli öta; 7 me me hwajekhöuta hoton gejon ka hnyi möt ame ca ba balua, anyin adre me haiwis' öta únyi ge anyin ibetengiö baú. 8 E hnathu hofuc e, ke e bewek u me he ka ha hwegiâ bala hofuc e, m' adre me hwege thö he ka ányâ ta je huliwa ae so hnen tavat adre me labageju ka Khong. Wale ta je únyi ae so me hu troban ka tavat: 9 ke úsákáúö u but me ta je ivinö ae monu, me hna aú ta je dö, me iwatretra, me ivinö ge hnanyibu; anyin ae ba troban, me únyi baú bi e. 10 Obâ but at ame imouköu, hwaban hna okaca me olo ná e; 11 anyin ae khanö u a ga saú but at helâe, me ányâ hulö, ke e ame ka hangâ e bi.

12 Iny ka he ka kunö Aretama köu, ame ne Tukiko, hwege thö he ka ie o könya hnyi Nikopoli: anyin ae mou but hnyi hnyekuk a oge me he ka laba e hnyi huna ae megic. 13 E so u me he ka hadruâ he anyi Zena at ame únö hnanyibu, me Apolo, me me ca he ka hia gadru ke únyi. 14 E so e he minya tavat unyita he ka ná ka ányâ ta je huliwa ae so, me me hu ta je únyi ae únyi hnathu, wâ adre nye ca wa but.

15 Adre me italofa möu ödra hia a tha ödra mönya. Anyik talofa ködra adre me betenge gahmun hnyi labageju.

E so e unyibun hia thithö ibetengiö baú.

TUSI ANYI PAULO KÖ
FILEMONA.

INYA Paulo adre me cö nya can Keriso Iesu, me Timoteo ke liamekeiny möta, öhmü me sit kö Filemona a öünykumihmu, ke at ame tha huliwa möhmü, 2 me kö Afia a ke hanihmu, me kö Arekipo at a tha hien möhmü, me ka ekalesia hnyi hnyabam: 3 E so e unyibun ibetengiö baü, me hnahic ünyi ge Khong a Kamöta me Than Iesu Keriso.

4 Inya oge me ole bala ka Khonguk, me haiö u hnyi hijik ta je hic, 5 anyin oge me löng ut änyâm ibetengiö, me änyâm labageju ka Than Iesu, me ka wakap hia thithö; 6 me me hu troban ge tha hnyok hnyi änyâm labageju, hnyi hna wâhmakhmeto ta je ünyi hia ae so eü hnyi hnyibun ka hnyi Keriso Iesu. 7 Anyin ae hu gak senyin me kaukaha ae gan hmâ ünyi ge änyâm ibetengiö, anyin a ünyi gam liamekeiny mönya, a g' adre hia but okahwa je hnyekon wakap.

8 Anyin a wale, eja ke ne a ne hu gak hwege hnyi Keriso he ka hûna köu ta je ünyi ae ücü, 9 oge me he ka sumató u hnyi ibetengiö, inya Paulo a hingat, adre cö nya walang ang can Keriso Iesu: 10 inya oge me khöüö Onesimo köu a nökek, waleji oge hnokoâ ke inya hnyi uma ce at, 11 waleji ae ca ünyi hnathu köu ehac, ke walang ang e ünyi hnathu but köu mönya minya: 12 ke oge me kunâ hmetu e köu, ke wale bi e, a hing hnyekuk bi: 13 waleji oge me bewek he ka hom behânâ me me tha e mönya, hnân hwabâm he ka bi athnyabaik hnyi hna cö

nya can üthumetu ae so; 14 ke oge me ca bemâdrâ ke ünyi, e ka tiga ca khatö nya hnyekom; me me ka hamen bi kü änyâm so, ke ca hnyi musî bi. 15 Anyin adre ohia e unyâm la, hnyi ke ong üen, me me he e unyâm bi nyiele balua; 16 ca helâ hmetu me athnyaba, ke beönua hon athnyaba, ke liamekeiny bi a öünykümita, ae ünyi hnathu könya, ke ti ünyi hnathu köu, hnyi unyin me Than minya. 17 Anyin a wale u ka ünyküme me ihumâm inya, më kap ju e helâ me inya. 18 Ke ame ne hia but okongu u hnyi ke ünyi, ke hu änyâm ünyi gan, hna but ünyi e könya; 19 inya Paulo oge me sihnalimen e ge hnyamök, a oge me he ka bi hwaban: ke oge me ca he bi ka ha köu, ka habe, e ücü köu he ka hnö u bi könya. 20 Eke, liamekeiny lö, osenyini nya thö ge Than: okahwa thö hnyekuk unyin Keriso. 21 Oge me set köu, anyin oge me labageju u me he ka ling nya, ke e khanö nya a u me he ka änyâ nua hon hnök hna ha. 22 Ke wale minya eang penapena thö ke dok m' oge me he ka laba hnyin: anyin a inya oge me gejon adre me he ka hnö nya köbun ünyi ge maniny hijibun hic.

23 Ame italofa möu Epafera, wale adre tha cö nya më, can Keriso Iesu; 24 ke ame italofa möu Mareko, me Aretako, me Dema, me Luka, hnyat ödrin e tha huliwa mönya.

25 E so e hnyi hanubun ibetengiö baü anyin Tuhöta Iesu Keriso. Amen.

TUSI ANYI PAULO APOSETOLO KA
AT HEBERU.

HNYIMAKAN 1.

HABA Khong, at ame ha adrem ka lakamöta a deny ta je perofeta hnyi je hofuc ae ve bongon, ke je deny ae ve

bongon, 2 me ame ha köta hnyi je bongang a biliny a deny Nokon, at e ame wia me atö, me me he ka hu gan ta je unyi hia thithö, k' ame op ta je dö hia ünyi gan; 3 ke e thibi hadröngöcin anyin hmanenang

ke at a ti we e, k' ame otilâ hmâ ta je ûnyi hia thithö ge hwan hofuc ae man, ke a hia but hneú degecâ ta je hulö, me e ame laba ju hnyi ke keihen a metân Beönua ethö; 4 ke adre me önua e hon ta je angela, anyin ae hu gan ien ae nua hudrin. 5 Anyin a ie ke angela e ame ha kâu, ka habe,

U thibi Nökuk

Oge me hnöku u hnyi bong ang?

Wale hmetu ang, ka habe,

Oge me he bi ka Kamen,

Ke e ame he bi ka Nökuk?

6 Ke wale hmetu ang hnyi ûen e ame oâ nokon a bân ka hnyi hmeledrany, me e ame ha, ka habe, E so ame he ka khudrung kâu ta je angela hia anyin Khong. 7 Ke e ame ha ge ta je angela, ka habe,

E ame wia anyin ta je angela helâ me ta je hanu,

Ke lathnyabainy helâ me bâhlân meic :

8 ke e ame hâiâ Nokon, ka habe,

Haba ânyâm theron, Khong lö, me nyiele nyiele balua ;

Ke haba uciny hwakecin ae hnathu, me wale thibi e uciny dokhom dökhu.

9 U je hia but hnyokâ hwakecin ae wisa, me höciâ hwakecin ae kong ;

Anyin a wale a hia but hû u hnen Khong, a Khongom,

Ge wakacoiny senyin hon ta je lahanâm.

10 Ke haba khaca,

Than lö, u je hia but bi taben hmeledrany hnyi can,

Ke haba je drany, me huliwa ling anyin li hnyamâm :

11 Ame he ka hia bi ; ke u me he bala bi u ka tethmâ :

K' ame he ta je ûnyi hia e ka bobot helâ me ûkhaú ;

12 Ke u me he ka vhec ta je ûnyi e helâ me ûkhaú beú,

Ke helâ me ûkhaú, me me ke bongon bi :

Ke ka u bala bi u,

Ke ba obiny ta je hunaiâm.

13 Ke ie angela e ame ha gan hnyi je ûen hia, ka habe,

Laba ju hnyi ke keihen a metök,

Ke ne o but oge me he ka wia ta je iwahnaihmöny möu me hnân taben li cam ?

14 Hawa, ca je hanu adre bi athnyaba ödra hia, k' adre kun' ödra he ka bi athnyaba hobi ködra adre me he ka hu möt bi ?

HNYIMAKAN 2.

A NYIN a wale, e úcú köta he ka öünyi-hnatho hmönyiná ta je ûnyi waleji adre löng, wá e nye haúhaú but gata. 2 Anyin a ne hmâ but hofuc adre ha a deny ta je angela, ke adre bi hwaban, e me úcú ka tayat adre me hanyáúú hnanyibu, me ca úling; 3 ate me he ka kâmâu ka kec möt ut, öta ka ca öünyihnatho möt ae nua helâe? waleji a bân Than ka ha, me ame ohnatho köta hnen tavat adre hnyi löng; 4 ke ame munyi ohnatho m' ödra Khong ge ta je haten, me ta je úöman, me ta je huliwa ae man ae ve bongon, me ta je bwihlany anyin Hanu Kap, helâ me weny.

5 Anyin a e ame ca ham ka ta je angela he ka musö hmeledrany ame he ka o nyiele, wale öhmun e ha gan. 6 Ke ame hia but ohnatho hnyi ke hofuc hnen ke at, ka habe,

Ehö at, me u me he ka únykúme kâu ?

Ke nokon at, m' u me he ka senâ e ?

7 U je wia e me omi úhnyúkong hmelen ta je angela ;

U je obicâ e ge hmanenang me hna ogânâ,

Ke u je otilâ e hon ta je huliwa anyin li hnyamâm :

8 U je ip ta je ûnyi hia thithö hnyi hmelen li can.

Anyin a haba hnyi hnen hna ip eú hnyi hmelen ta je ûnyi hia, me ba biju ke ûnyi adre me ca ip hnyi hmelen. Ke walang ang, öta tiga ca wá ta je ûnyi hia eú hnyi hmelen. 9 Ke ate me ö Iesu, at adre hia but wia e me omi úhnyúkong hmelen ta je angela, k' adre me obicâ ge hmanenang me hna ogânâ, anyin a e ame hom vecin mok, me me vheno mok hobi kâu tavat hia thithö hnen ibetengiö bâu anyin Khong. 10 Anyin ae úcú kâu, wale at a hobi kâu ta je ûnyi hia, ke ûnyi gan ta je ûnyi hia, hnyi hnen hna hom lakon a ödra se hia ka hnyi hmanenang, e úcú kâu he ka obekhotâ tuhan anyidra möt hnen ta je vec. 11 Anyin a haba at ame okabâ, m' ödra hia minya adre okabi ödra, me ûnyi ge at a khaca, anyin a wale, e ca hmehma he ka hai ödra, me liamekein, 12 ame ha, ka, habe,

Oge me he ka omanená iâm ka je liamekeiny mönya,

Oge me he ka khumöng olungi u hnyi wanben ekalesia.

13 Wale hmetu ang, ka habe, Oge me he

HEBERU 3, 4.

ka labageju kâu. Ke walang khaca, ka habe, Ó nya bi ang me lakon a ham kõnya Khong. 14 Ke haba lakon, me adre me khau' ödra ge viny me dren, awe, helâe minya e ame munyi helâe; me me he ka ohia hnen mok at ae tren maniny mok, wale diabolö; 15 me thong ödra but a tavat adre me hom úhnyúkongu ödra hnen outen mok hnyi bongudra ta je bong hia thithö. 16 Anyin ae hnathu e ame ca hadruâ ta je angela, k' ame hadruâ ta je mátrâni Aberahama. 17 Wale me ka hamen e he ka wia e hélâ me je liamekeiny mē hnyi ta je únyi hia thithö, me me he ka at bihut ae nua ae betenge me hnathu hnyi ta je únyi anyin Khong, me me he ka hut bi, hnân ohia ta je hulö anyin tavat. 18 E úcú kâu he ka hadru ödra adre cubic ödra, anyin a e ame hom vec hnyi hna cubec.

HNyimakan 3.

A NYIN a wale hnyat me lakeiny ae kap lö, hauen tavat adre me hawâ únyi hnyi drany, únykúme ju Aposetolo me At bihut ae nua hnyi anyita hmi, a Iesu; 2 waleji ame hnathu ka at a otilâ e, helâ me Mose minya hnyi hnyaban hia thithö. 3 Anyin adre haiâ e, a e úcú he ka ogânâ e hu Mose, helâ me at ame otilâ uma, ae hu hna haisoâ at e, hon uma. 4 Anyin ae hu tavat adre me otilâ ta je uma nia; ke Khong at ame op ta je únyi hia thithö. 5 Ke e hnathu hmönyin Mose hnyi hnyaban hia, helâ me athnyaba, hnân ohnathoâ ta je únyi adre me he ka ha nyiele; 6 ke so bi Keriso ame musi hnyi hnyaban, helâ me nokon; ke haba öta bi hnyaban eling, öta ka he ka kât hmâ ke ne o but obiny tang hwege me senyin hnyi geju. 7 Anyin a wale helâ me hna ha hnen Hanu Kap, ka habe,

Hnyi bong ang, öbun ka he ka löng ifucin,

8 Ca onâkâ bi je hnyekubun, helâji me hnyi hna ohmönyinâ,

Waleji hnyi bonginy úcúbic hnyi hnyebuba,

9 Adre cubic nya lakamöbun hnyin, me elâm bonguk,

Me wâ anyik ta je huliwa hnyi ta je huna a fâte.

10 Anyin a wale e hmak hnyekuk ge dö eling,

Haingök, ka habe, Ödra monu bala eú hnyi hnyok :

Ke ca khan' ödra dek ta je gethen ;
11 Me oge me khemanyik waleji hnyi anyik hmönyin, ka habe,
Adre me ca he ka dit ka hnyi hnök hna menâ.

12 Öbun âu hnyat me lakeiny lö, wâ e nye hu eú hnyin ke at gabun hnyok ae kong me ca labageju, ame oúsakâú' öbun me Khong ae möt: 13 ke úsihwegi öbun kôu ju hnyi ke bong me ke bong, k' adre tiga ha bi, ka habe, Hnyi bong ang; wâ e nye okhötâ hnyekon keihen gabun ge tang iya-wöiny hulö: 14 anyin adre me wi' öta m' ate me lahanen Keriso, öta ka he ka kât hmâ hwakecin anyita labageju hnyi can ke ne o but hnyi obiny: 15 k' adre tiga ha, ka habe,

Hnyi bong ang, öbun ka he ka löng ifucin,

Me ca onâkâ je hnyekubun, helâji me hnyi hna ohmönyinâ.

16 Anyin a ia ödra, waleji adre me hnyi löng, me ohmönyinâ e? hawa, ca ödra hia waleji Mose ame hom úhedra Aigupito?

17 Ke ie tavat ame hmak hnyekon ködra hnyi je huna a fâte? hawa, ca ödra tavat adre me ânyâ hulö, waleji a kölu but je unyidra eú hnyi hnyebuba? 18 K' ame khemanyin kö ia, a g' adre me ca he ka dit ka hnyi hnen hna menâ, hawa, ca ködra a hnyat adre me ca úling? 19 Me ate me wâ but a ga ca khan' ödra he ka dit ka hnyin, anyin adre me ca labageju.

HNyimakan 4.

A NYIN a wale e hu but gata hna ha bâná he ka dit ka hnyi hnen hna menâ, me so ate me he ka ot, wâ e nye ca úcú bi keihen gabun. 2 Anyin adre hia but khetâ köta je úthumetu ae so helâ m' ödra: ke ba troban ködra hofuc adre me löng, anyin adre me ca úhújâkôu ödra hnen labageju me tavat adre me löng. 3 Ke haba öta tavat ate me labageju, me ate me dit ka hnyi hna menâ; helâ me hnen hna ha, ka habe,

Helâji me hnök hna khemanyik hnyi anyik hmönyin,

Me adre me ca he ka dit ka hnyi hnök hna menâ :

ke so bi a um dö ta je huliwa hwân hnyi hna bi taben hmeledrany. 4 Anyin a e ame ha hnyi ke hofuc, ame ha ge bong a seveniny, ka habe, Ame menâ Khong hnyi

HEBERU 5, 6.

bong a seveniny hwaban anyin ta je huliwa; 5 ke wale hmetu ang, ka habe,

Adre me ca he ka dit ka hnyi hnök hna menâ.

6 Anyin a wale, adre ip bala bi a g' ame he keihen ka dit ka hnyin, ke haba hnyat adre bödra ka khetâ úthumetu ae so ködra adre me ca dit can anyidra ca labageju, 7 me e ame thu ke bong, k' ame ha a deny Davita, hwaban ta je huna ae se, ka habe, Hnyi bong ang, helâ me hna ha ehac, ka habe,

Hnyi bong ang, öbun ka he ka löng ifucin,

Ca onâkâ bi je hnyekubun.

8 Anyin a ne hia but omen' ödra Josua, me, ame ne ca he hmetu bi Khong ka ha ke bong. 9 Anyin a wale adre ip bala bi hna menâ helâ me sabath hobi kâu laten Khong. 10 Anyin a haba at ame hia but dit ka hnyi anyin hna menâ, me e ame hia but menâ minya hwaban anyin ta je huliwa, helâ me Khong hwaban anyin ta je huliwa. 11 Anyin a wale e so ate me hwege he ka dit ka hnyi hna menâ eling, wâ e nye ü but ke at e ka he ka úcúcubongo ca úling eling. 12 Anyin ae möt hofuc hwan Khong, me hwege huliwa, me so hwan hon hele vat a lo homakan, ame dá me subâ luâ but hnyok me hanu, me hna hújö je jeien unyin me önyen jeien, ke ame ie wâ cicöâ ta je únykúme me ta je weny hnyok. 13 Ke ca iyong bi ke únyi adre op hnyi hnyimakan: ke ame ve he thu me manen wia but ta je únyi hia thithö ka hnyi li emakan at, wale ate me he ka ve omanená kâu hwakecita.

14 Ke hu but gata hing at bihut ae nua, at ame hia but vheno drany ethö, wale Iesu a Nokon Khong, anyin a wale e so ate me kât hmâ anyita hmi. 15 Anyin ae ca hu bi gata at bihut ae nua at ame ca hnyi vec hnyi anyita ta je sēnyin; ke so bi at adre hia but cubec ge ta je únyi hia thithö helâ möta, ke ba bi anyin hulö. 16 Anyin a wale e so ate me he ka hwege úhakekenyâ theroniny ibetengiö baú, m' ate me he ka kap ibetengiö, me wâ ibetengiö baú hnân he ka hadru' öta hnyi úen ae úcú.

HNYIMAKAN 5.

A NYIN a haba tavat bihut hia ae nua adre úca unyin tavat, me adre otilâ hobi kâu tavat hnyi ta je únyi anyin Khong, me me he ka hudo ta je bwihlany

me ta je hut can ta je hulö: 2 at ae khana he ka huliwa menyik ka tavat ae ba metâ gadra, me tavat ae monu, anyin ame igi-giloâ e minya hnen ta je sēnyin; 3 ke can e, me úcú kâu he ka hudo can ta je hulö anyin tavat, mē minya bi. 4 Ke ba at ame hom bâúâ hanymen eling ae meic, ke so thibi at ame hawâ hnen Khong helâ me hna hawo Arona. 5 Waleling me ca hamen Keriso he ka ogânâ e me ka wia e me me at bihut ae nua, ke so bi hnen at eji ame ha kâu, ka habe,

U thibi Nökuk

Oge me hnöku u hnyi bong ang:

6 helâ me hnen hna ha hnyi ke hofuc, ka habe,

U thibi at bihut nyiele balua,

Helâ me bongu Melekisedek.

7 Ke haba hnyi ta je bong a e tiga at hnyin, me e ame hic me khöú me tenge hwege, ke hu deköien, ka at ae khana he ka omelö e únyi hnyi mok, me adre me löng kâu, anyin a e outen Khong, 8 eja ke ne a ne Nokon e, me adre me ná e he ka úling hnyi ta je únyi e ame hokhnyokâ; 9 ke adre me obekhötâ e, me adre me wia e hnân hwecin möt ame ca ba balua ködra hia adre me löng kâu; 10 a otilâ e hnen Khong me me at bihut ae nua helâ me bongu Melekisedek.

11 E hu but gahmun ta je hofuc ae se hia he ka haiâ e, ke hmak bi he ka ha bongon, anyin a öbun bec ka löng. 12 E úcú köbun he ka úne ka tavat anyin ae kuebun dut, ke so bi e únyi hnathu a g' ame he hmetu ke at ka n' öbun ge ta je taben hna úne a bân hnyi hofuc hwan Khong; k' öbun úcú hmetu he ka ic debai, ke ca he ka han jeú bi. 13 Anyin a haba at ame ic debai, me ca metâ bi hnyi hofucin hwakecin ae wisa; anyin a e mendreng. 14 Haba jeú, me hobi kâu tavat ae gan, wale tavat a ödra, khenen huliwan hnyok he ka wâ cicöâ so me kong.

HNYIMAKAN 6.

A NYIN a wale, e so ate me umo háia hna úne a bân ge bongon Keriso, m' ate me he bi ka hnyi bongon ae bekhöt; ke ca he hmetu bi ka ip taben ietra hnyi ta je huliwa ae mok, ke labageju ka Khong, 2 ke bongon bapataiso, ke hna ip hnyam, me möt hmetu únyi hnyi hna mok, me hna owisa nyiele balua. 3 Ke ate me he ka ânâ e, e ka weny Khong. 4 Ke haba

tavat adre bân ka omelamá, waleji adre me drem cubecâ bwihlany únyi hnyi drany, me hnyi kap Hanu Kap, 5 me drem cubecâ hofuc ae so anyin Khong, me je maniny dö ame he ka o, 6 ke adre me kölu hmetu, me pason hmetu he ka ohâti ödra ka hnyi ietra; anyin adre me osatauroá hmetu bi ködra Nokon Khong, me ohmehma manená e. 7 Anyin a haba kânâ, me ame ijem we ame laba ta ka hnyin, k' ame öküâ jeú ae úcú ködra adre me belökâ e, me hu but gan hnahic únyi ge Khong: 8 ke ame ne öküâ úö ae údedö, me watetaföcö, me adre me degec; ke hakekeny jut ka hnyi hnaúhangö; ke haba hnyi obiny, adre me he ka thong degecâ e.

9 Ke hnyat a oúnykúmik lö, öhmun e únykúme gabun ta je únyi ae so hon e, me ta je únyi ae hu möt hnyin, ke so bi öhmun e fuc helâe: 10 anyin a ca hwakecin ae ca wisa Khong, me me he ka hnying anyibun huliwa, me ibetengiö öbun e omanená ka hnyi ien, wale hnyi hnöbun hna bi athnyabainy wakap, me labö bi athnyabaidra. 11 Ke e wehmun m' öbun e he ka ve omanená tang hwege eling ka hnyi gejon ae gan hmâ ke ne o but obiny: 12 m' öbun e ca he ka tavat laba baú, ke so bi he ka huu hotudra ae hu gadra ta je hna ha bânâ.

13 Ke hnyi úen Khong ame ha bânâ kö Aberahama, me e ame ka khemanyin gan bi, anyin ae ca khana he ka khemanyin ge ke at ae nua hon e bi, 14 haingen, ka habe, E hnathu oge me he ka ti ohnahici u, me ti osehia je mátránâm. 15 Ke hwaban hnen hna hok hnyok me ame hu gan hna ha bânâ. 16 Anyin a hwakecin tavat he ka khemanyin ge at ae gan: ke haba úhihi-nyköu me wale obiny hnân ohnatho hnyi anyidra ta je iwatretra hia thithö. 17 Waleling me me weny Khong he ka ti omanená ka ta je mátrániny hna ha bânâ, anyin musi a g' ame ca wia, me e ame bi hanen ju ge khemanyin: 18 m' ate me he ka hu hnân sihwegi öta, ge lo li únyi ae ca khana he ka wia, ke ca khana Khong he ka thoi hnyin, wale öta ate me kec ut he ka kât hmâ gejon adre ip hnyi hnyimaköta; 19 wale gejon ate me hu, helâ me iuniny hanu, ame hnathu me hmâ ke ame dit eiö hnyin hnyeule adre bi singiny; 20 waleji ame didrö kâu Iesu at a bân hobi köta, anyin adre me wia e me me at bihut ae nua nyiele balua helâ me bongu Melekisedek.

HNYIMAKAN 7.

A NYIN a haba Melekisedek eang, tuhan Salema, at bihut ka Khong ae Beö-nua, at ame úkhanö me Aberahama úheny hnyi hna kot je than, me ame ha hnahicâ e, 2 ke haba Aberahama ame ham kâu ke keihen a libenyitainy hia (haba bongon ien a bân adre wia, me, Thaniny hwakecin ae wisa, ke hwaban dö e, Thaniny Salema, walang bongon, Tuhan úsoköu; 3 ae ba kamen me hinyen, ke ba minya deö lakiben, ke ba minya hwân ta je bonginy, ke ba minya obiny möt, ke adre oúco me Nokon Khong), me, e at bihut bala bi.

4 Ke únykúme ju öbun úganiny at e, waleji a ham kâu Aberahama, a pateriaka, ke keihen a libenyitainy hna söh. 5 Ke haba je mátráni Levi, tavat adre me kap hanymen at bihut, me e hu hnanyibu ködra he ka kap je ke keihen a libenyitainy únyi ge tavat hoton hnanyibu, wale únyi ge je liamekeiny m' ödra, ke úhedra únyi hnyin unyi Aberahama: 6 ke haba at a ca tha deö lakiben m' ödra, me e ame kap únyi ga Aberahama ke keihen a libenyitainy ta je únyi, ke e ame hahnahicâ e at ae hu ta je hna ha bânâ. 7 Ke ca hnân ivinöâ bi a g' ame hahnahicâ at ae úhnyú-kong hnen at ae beönuâ. 8 Ke haba walang, ame kap je ke keihen a libenyitainy hnen tavat adre me he ka mok; ke waleji ke at adre ohnathoâ a e möt bi. 9 K' ame ne úcú la ka ha, ka habe, Haba Levi, at ame kap je ke keihen a libenyitainy, me wale at ame ham ke keihen a libenyitainy a deny Aberahama; 10 anyin a tiga e hnyin unyin kamen, hnyi úen eji e ame úkhanö me Melekisedek.

11 Anyin a wale a ne bekhöt so bongon at bihut a at Levi (anyin a hia but kap hnanyibu hnen tavat hmelen e), me hnân eú he ka o ke at bihut helâ me bongu Melekisedek, k' adre me ca háiiâ e hoton bongu Arona? 12 Adre me wia hanymen at bihut, anyin a wale e ti úcú minya he ka wia hnanyibu. 13 Anyin a haba at adre me ha gan ta je únyi eang, me hanen ke tribu, ke ba at únyi hnyin ehac ame tot hnyi taben hut. 14 Anyin ae manen a ga o but Tuhöta únyi hnyi Juda; ke ba hofuc a ha Mose ge hanymen at bihut hnyi tribu eling. 15 Ke ti manen gan hmâ but, anyin ame o ke at bihut helâ me bongu Melekisedek, 16 wale at adre me wia hoton

HEBERU 8.

maniny möt ame ca ba balua, ke ca hoton hwakecin hnanyibuiny unyin: 17 anyin adre me ohnathôa gan, ka habe,

U thibi at bihut nyiele balua

Helâ me bongu Melekisedek.

18 Ke adre me ohia hnanyibu a bân anyin a e sēnyin ke ca ûnyi hnathu, 19 (anyin ae ba ke ûnyi ame obekhotâ hnen hnanyibu), m' adre me oâ gejon ae beönua, wale deny m' ate me hakekeny ka Khong. 20 Ke adre me ânyâ e ke adre me khemanyinâ, 21 (anyin adre hia but wi' ödra hnân at bihut, ke ba khemanyinâ; ke adre me wia e ge hna khemanyin hnen at ame ha gan, ka habe,

Haba Than ame khemanyin k' aine ca he bi ka ietra,

A u thibi at bihut nyiele balua):

22 ke helâe minya adre me wiö Iesu hnân haten hnathuiny ûhahinykôu ae beönua. 23 Ke adre me osehia tavat bihut, anyin adre me ca tethmâ bi can mok a ödra: 24 ke hu gan hanymen at bihut ame ca he ka wia, anyin a e at ae tethmâ nyiele balua. 25 Anyin a wale e khana balua he ka omeli ödra tavat adre me he but ka Khong a deny e, anyin a e at ae möt balua he ka khôu hobi ködra.

26 Anyin ae ûcü köta at bihut eling ae nua, ae kap, ae ba hulö gan, me ba hnyikongon, me úsâkâûö me tavat adre me anyâ hulö, ke adre öbeönua hon drany; 27 ke ca ûnyi hnathu bi kâu hnyi je bong he ka helâ me tavat bihut eling ae nua he ka bân ka hudo can anyidra ta je hulö bi, ke biliny bi hobi kâu hulö anyin tavat; anyin e ame okhaca ânyâ eling, hnyi hnen hna hudo e bi. 28 Anyin a hnanyibu ame otilâ tavat ae sēnyin hnân tavat bihut ae nua; ke haba hofucin hna khemanyin, waleji hwaban hnanyibu, me ame otilâ Nokon adre obekhöta nyiele balua.

HNYIMAKAN 8.

KE walang hing önyen ta je hofuc öhmun e ha, ka habe, E hu but gata at bihut ae nua helâe, waleji at ame laba hnyi ke keihen metân theron anyin Beönua hnyi drany, at huliwa hnyi dok ae kap, 2 me hnyi hing uma menâ a otilâ hnen Than, ke ca hnen bi at. 3 Anyin adre otilâ tavat bihut hia ae nua, m' adre me he ka hudo ta je bwihlany me ta je hut: anyin a wale, e ûcü kâu he ka hu ke ûnyi minya hnân he ka hudo. 4 Ke ame ne laba eang

hmeledrany, ame ne ca he ka at bihut, anyin ae hu tavat he ka hudo ta je bwihlany hoton hnanyibu; 5 tavat adre me bi athnyabainy haten me hmenon ta je ûnyi ethö, helâji me hna nö Mose ge Khong hnyi ûen e ame he ka oumo but uma menâ: anyin a haingen, ka habe, O u âu me ânyâ ta je ûnyi hia thithö hoton tulut adre omanenâ köu hon bucen. 6 Ke walang ang e hu but gan ke huliwa ae nua, helâe minya e at ame öusoköu hnyi ke ûhahinykôu ae ûnyi hnathu, waleji adre hia but bi taben hon ta je hna ha bânâ ae nua. 7 Anyin a ne ba kongon ûhahinykôu a bân, me adre me ca he ka heleú hnen loiny. 8 Anyin a e ame haikongu ödra me ha, ka habe

Haingen Than, ka habe, Wâ bi ame he ka o ta je bong,

Me oge me he ka ânyâ ûhahinykôu ae teb ûnyi me lap anyin Isaraela me lap anyin Juda;

9 Ca helâ me ûhahinykôu oge hia but ânyâ me je lakamödra

Hnyi bong oge me kât hnyamödra me lili ödra ûnyi hnyi hnye Aigupito;

Anyin adre me ca tethmâ hnyi anyik ûhahinykôu,

Me oge me hna degeci ödra, haingen Than.

10 Anyin a walang ûhahinykôu oge me he ka ânyâ me lap anyin Isaraela

Hwaban je bong eling, haingen Than;

Oge me he ka ip anyik je hnanyibu hnyi ûnykúmenödra,

Ke sihnalimen minya hnyi je hnye-kudra:

Ke oge me he ka Khong bi ködra,

Ke adre me he bi ka lakeik:

11 K' adre me ca he bi ka ve nâ tavat ae hakekeny ködra,

Ke je liamekeiny m' ödra, me ha, ka habe, Khanö u thö Than:

Anyin ame he bi tavat hia thithö ka .khan' ödra inya,

Hwân ge tavat ae ûhnyükong ke ne o but ge tavat ae gan gadra.

12 Anyin oge me he ka betenge baú ge hwakecidra ae kong,

Ke oge me ca he hmetu bi nya ka ûnykúme anyidra ta je hulö.

13 Ke haba hnyi hnen hna ha, ka habe, Ûhahinykôu ae teb ûnyi, me waleling e ame wia at a bân me me at adrem. Ke

haba ûnyi ame hwân ka kueny me bobot ut, me wale ame logot he ka hia but.

HNYIMAKAN 9.

EHNATHU, haba úhinhinköu a bán, me e hu hnyin ta je hanyemen hmi, me dok ae kap, a wale hnyi hmeledrany. 2 Anyin adre me penapena ke uma mená, wale at a bán, ke e hu eiö hnyin, taben lamepa, me laulau, me areto hnân omanená; adre hwenyi ien a, ka habe, Dok ae Kap. 3 Ke hnyi hqton singiny a loiny hnyeule adre hwenyi ien, ka habe, E ti Kap; 4 ke eling taben meic gol, me tangen úhinhinköu adre tube ge gol, ke eú hnyin e kaia gol ae hu mana hnyin, me uci anyi Arona ame vñong, me li taben úhinhinköu; 5 ke e hon e li kerubi ae hmanenang ödru me tot ethö cicö taben ibetengiö; e ca khan' öhmun he ka ha wia ta je únyi e walang ang. 6 Ke a hia but penapena helâe ta je únyi e, me ame dit bala thö tavat bihut ka hnyi uma mená a bán, he ka mádrá je huliwa; 7 ke haba hnyi uma mená a loiny, ame hake dit at bihut ae beönuu, a okhaca hnyi huna, ame ca he baú bi ke ame hom dra minya, wale e ame hudo hobi káu bi, me ta je monu minya anyin tavat: 8 ke haba Hanu Kap ame omanená únyi eang a ödra tiga ca omanená gethen ka hnyi dok ae kap waleji k' ame tiga tot uma mená a bán; 9 wale úhöücú hnyi úen eang; waleji hnyi hnödra hna labö hudo ta je bwihlany me ta je hut, ae ca khana he ka obekhötá at ame hmi, ge anyin únykúm sa, 10 anyin a hake e thibi (ta je jeú me hnân ic me hna ösúa ae ve bongon), ta je hwakecin unyin, adre otílâ ke ne o but hnyi úen he ka ohátâ hmetoá. 11 Ke ame o but Keriso hnân at bihut ae nua hnyi ta je únyi ae so ame he ka o, únyi hnyi uma mano ae beönuu me bekhöt, adre ca mádrá ge je hnyam, wale, a ca únyi bi eang hmeledrany, 12 ke ca únyi minya bi ge dren ta je got, me nokon kau, ke únyi ge hing dren bi, e ame okhaca dit ka hnyi dok ae kap, anyin a hia but úce möt ame ca ba balua. 13 Anyin a ne khana dren ta je got me ta je bolok, me dren nokon káu a momo adre jijingâ hon tavat ae kong, a ne khana únyi eling he ka okabá ke ne o but ame obosoá unyin, 14 awe, e ca beönuu bi dren Keriso, waleji a hamen hudo e bi, ae ba hnyikongon, ka Khong, únyi ge Hanu a e balua bi, he ka obosoá anyibun únykúm sa hnyi ta je huliwa ae mekinny m' öbun e he ka huliwa ka Khong ae möt? 15 Ke anyin a wale, e thibi at

úsoköu hnyi úhinhinköu ae teb únyi me me he tavat adre hawá ka kap hna ha báná wale jekhöú ame ca ba balua, anyin ae hu mok hnân bi hwaban ta je hna hanyátâ hmelen úhinhinköu a bán. 16 Anyin a ne hu úhinhinköu, me ame he ka hu minya mok at ame ha úhinhinköu, me me hwádâ bi. 17 Anyin ame he ka hwádâ úhinhinköu hwaban mok: hawa, e únyi hnathu e ka tiga möt at ame ányá? 18 Anyin a wale adre me ca ohmâ úhinhinköu a bán, e ka ba dra hnyin. 19 Anyin a hia but Mose ha ka tavat hia ta je únyi hia adre me húna hoton hnanyibu, me e ame hom dren je nokon kau, me got, tha e me köiö, me leúnen mamoe ae dra, me hisop, me e ame dukáíâ tusi me tavat hia thithö, 20 me ha, ka habe, Walang dren úhinhinköu, waleji a húna köbun hnen Khong. 21 Ke e ame dukáíâ ge dra uma mená me ta je omjehen huliwa hia. 22 Ke wakhalet thiju ta je únyi adre me ca obosoá ge dra hnyi hnanyibu, ke ba minya hna thang ut hulö e ka ca hingölö dra.

23 Anyin a wale e úcú he ka obosoá je tulutiny ta je únyi hnyi drany hnen ta je únyi e; ke úcú he ka obosoá ta je únyi hnyi drany hnen ta je hut ae beönuu hon e. 24 Anyin ame ca dit Keriso ka hnyi dok ae kap adre me ányá ge je hnyam, wale tulutiny únyi ae hnathu; ke so bi ka hnyi hing drany he ka manen walang ang hnyi hnyimakan Khong hnân hobi köta: 25 ke ca hamen he ka osehia hudo e; helâ me at bihut ae nua ame dit ka hnyi dok ae kap hnyi ke huna me ke huna, me ke dra a ca dren; 26 anyin a ne helâe me úcú káu he ka osehia vec hwân hnyi hna bi taben hmeledrany: ke walang ang hnyi obiny ta je dö adre hia but omanená e me me he ka ohia hulö ge hnen hna hamen hudo e bi. 27 Adre me ip ka tavat he ka okhaca mok, ke hwaban e úhnei; 28 helâe minya Keriso, adre me okhaca hudo e he ka vaden ta je hulö anyin tavat ae se hia, me e ame he ka olo manen ka tavat adre me halubahingen e, ke ca ha bi ge hulö, ke hnân omelö.

HNYIMAKAN 10.

ANYIN a haba hnanyibu, a hmenon ta je únyi ae so ame he ka o, ke ca tha úcú me ta je únyi eling, me pason bala he ka obekhötá tavat adre me úhakekenyi hnen ta je hut adre me hudo huyi je huna,

HEBERU 10.

wale adre me labö hudo. 2 Anyin a ne helâe, hawa, adre me ca he bi ka oumo ka hudo, anyin a adre ne okhaca obosoâ tavat adre me hmi, me adre me ca he hmetu bi ka hmak hnyok can hulö? 3 Ke haba hnyi je hut eling me adre me labö ha hmetoâ ta je hulö hnyi ke huna me ke huna. 4 Anyin e pason he ka ohia ta je hulö ge dren ta je bolok me got. 5 Anyin a wale, e ame ha hnyi ûen e ame o eang hmeledrany, ka habe,

E ca wem bi hut adre me hlingâ me hut, Ke u je penapena anyin hobi könya ;

6 U me ca senyina je hut adre le ae bekhöt me ta je hut can hulö :

7 Me oge me ha, ka habe, Khong lö, wâ bi oge o but (adre me sihnalimi' nya hnyi tusi adre vhec)

He ka ânyâ wem.

8 Haingen ethö, ka habe, Ta je hut adre hlingâ, me ta je hut, me ta je hut adre me le ae bekhöt, me ta je hut can hulö, u me ca wem, ke u me ca senyin ka hnyin (wale adre me hudo hoton hnanyibu), 9 k' ame ha minya, ka habe, Wâ ju, inya oge me o but he ka ânyâ wem. E ame ohia at a bân, me me he ka otethmâ at a loiny. 10 Ke adre me okabi öta hnen weny eling, hnyi hna okhaca hudo unyi Iesu Keriso. 11 Ke haba tavat bihut hia, me adre me tot hnyi je bong balua me bi athnyaba, me hudo bala je hut a khaca ien, wale a ca khana he ka ohia hulö : 12 ke haba e, hwaban hnen hna hudo hut a khaca can ta je hulö nyiele balua, me e ame laba ju hnyi ke keihen metân Khong ; 13 ke hwân eling e ame lubahingen bala ke ne o but adre me wia ta je iwahnaihmiöny mē me taben li hnyeücan. 14 Anyin a hnen hut a khaca e ame hia but obekhöta nyiele balua tavat adre okabi ödra. 15 Ke ame ohnathoâ minya köta Hanu Kap : anyin a hwaban hnen hna ha, ka habe,

16 Walang ühinhinykôn oge me he ka ânyâ m' ödra

Hwaban ta je bong e, haingen Than ;

Ka habe, Oge me he ka ip anyik ta je hnanyibu hnyi je hnyekudra,

Ke oge me he ka sihnalimen e minya hnyi je ûnykûmenödra ;

waleling me me ha, ka habe

17 Ke haba anyidra je hulö me hnödra hna hanyâüâ, me oge me ca he hmetu ka ûnykûme.

18 Ke a ne ohia e, me ba hmetu but hut can hulö.

19 Anyin a wale, hnyat me lakeiny lö, e hu but gata hnyok ae hwege he ka dit ka hnyi dok ae kap ûnyi ge drö Iesu, 20 hnyi gethen e ame okabâ hobi köta, a gethen ae teb ûnyi me möt, a deny singiny, a wale unyin ; 21 ke hu at bihut ae beönua ame musö hnyaban Khong ; 22 e so ate me hakekenyâ ge hnyok ae hnathu ame kât hmâ labageju, ke je hnyekuta adre dukâia ûnyi hnyi ûnykûm sa ae kong, ke adre hneu je unyita hnyi köiö ae alai : 23 e so ate me kât hmâ hmi ate me gejon me ca loloâ bi ; anyin ae hnathu bi at ame ha bânâ : 24 ke so ate me ûnykûmekouâ, me me he ka kû ibetengiö me ta je huliwa ae so ; 25 me ca he ka degec anyita úkhacakou, helâ me hwakecin keihen, ke so he ka úshwegekou ; ke hwege ju helâe, öbun ka wâ bong ae hakekeny jut.

26 Anyin ate ne ânyâ hulö ge weta, öta ka hia but wâ ûnykûme hnathu. me ba hmetu bihut can ta je hulö. 27 ke so bi he ka halubahingen me ot ae gan hmâ, ge hna he ka ûhnö, me wathethot ame ubâhlâ, wale ame he ka an ohia je iwahnaihmiöny. 28 Haba at ame hûkötia hnanyibu anyi Mose, me a mok ut hnyi hna ohnathoâ hnen li at a lo ame ne kun, k' adre ca betenge gan : 29 hawa, öbun e ûnykûme ae ca ücü bi hwaban ae gan hmâ hon e ka at ame uto hnyikânai Nokon Khong, me ûnykûme a ûnyi ae ca kap dren ühinhinykou hnân okabâ e, me okongoâ Hanon ibetengiö baü? 30 Anyin ae khan' öta but at ame ha, ka habe, Hamök he ka bi hwaban, ke oge me he ka öuco. Ke wale hmetu ang, Ame he Than ka hnö lakeiny. 31 Hnân outen hmönyin he ka ta ka hnyi li hnyamen Khong ae möt.

32 Ke ûnykûme th' öbun je bong eji a bân, wale hwaban hna omelami öbun, m' öbun e hokhnyokâ ju vat ae gan hmâ a ta je vec ; 33 walang khaca, ka habe, Adre me wi' öbun m' öbun e hnân hamâ, can je haikongoâ me ta je vec ; ke walang khaca, a öbun e tha e m' ödra waleji adre me okongoâ helâe. 34 Anyin a öbun e vec betenge ka tavat adre me ca, ke öbun e hokhnyok senyina hnödra hna söh anyibun ta je ûnyi, ke khan' öbun a g' ame hu gabun tang omjeü ae ûnyi hnathu, k' ame tethmâ bi. 35 Anyin a wale, ca degec bi tang hwegi öbun, wale ae hu hwaban ae gan hmâ hnyin. 36 Anyin ae ûnyi hnathu köbun he ka hokhnyok, me me hu gabun

HEBERU 11.

hna ha bânâ, öbun ka hia but ânyâ weny Khong.

37 Anyin ae okhulit biju ûen

Me ame he ka o but at, wale at ame he ka o, k' ame ca he ka bec.

38 Ke ame he ka möt atök ae wisa hnen labageju :

Ke ame ne hmetuhmetu but, me ame ca he bi hnyekuk ka senyin kâu.

39 Ke haba öta, me ca lahanödra hnyat adre me hmetuhmetu ka hnyi hnaûhangö ; ke lahanödra bi hnyat adre me labageju ke ne o but hnyi melen hanu.

HNYIMAKAN 11.

HABA labageju, me wale ciny ta je ûnyi adre me gejon, me hnân ohwâdâ ta je ûnyi adre me ca wâ bi. 2 Ke ame lung so wahingat ehac can e. 3 Ate me wâ hnen labageju a g' adre me ânyâ ta je ûnyi hia thithö hnen hofuc hwan Khong, me adre me ca op ta je ûnyi adre me wâ ûnyi hnyi ta je ûnyi ae manen. 4 Hnen labageju Abela ame hudo ka Khong hut ae nua hon hut anyi Kaina, me adre me ohnathoâ e hnen e a e wisa, ke Khong ame ohnathoâ ge anyin je bwihlany : a mok ut e, k' ame fuc bala bi hnen e. 5 Hnen labageju adre me hum Enoka thö me me ca he ka wâ mok ; me adre me ca wâ e, anyin a Khong ame hom e : anyin adre ohnathoâ e waleji k' ödra tiga ca hom e, a e at ame osenyinâ Khong : 6 ke a ne ba labageju, me pason he ka osenyinâ e : anyin a haba at ame hakekenyâ Khong, me hamen he ka labageju, ka habe, ka e bi, ke e ame he ka bi hwaban ka tavat adre me elâm hwegiâ e. 7 Hnen labageju Noa ame tibet hu, me omelö anyin lap ; anyin a Khong ame kou kâu ge ta je ûnyi adre tiga ca wâ hnyi ûen eling, ke e ame ot ; e ame ohnaûhangöâ hmeledrany hnen e, me adre me wia e me atö hnyi hwakecin ae wisa hoton labageju. 8 Hnen labageju Aberahama ame löng hoton, waleji adre hawâ he ka he ka hnyi ke hnyei e ame he ka hu me hnân hwajekhon ; me e ame he thö ke ca khana dok e ame he ka hnyin. 9 Hnen labageju e ame laba kanyua hnyi hnyei adre ha bânâ, waleji a ca iny bi, me laba hnyi je uma mano, tha e me Isaaka me Jakob, ae tha hu hwajekhödru mē hnyi hna ha bânâ : 10 anyin a e ame halubahingen taun ae hu taben, ke haba at a otillâ me huliwan, me,

Khong. 11 Hnen labageju adre ham mar kö Sara he ka erkin me ame hnokoâ wanakat ka someca but, anyin a e ame ûnykûme ae hnathu e at a ha bânâ : 12 anyin a wale ame o but ûnyi ge at a khaca, ke helâke me e at ae mok, ödra se hia helâ me ta je okhûiny drany, ke helâ me önyin köiö, a ca hnân aú.

13 Adre mok hia ju tavat e hnyi labageju, ke tiga ca hwâdâ je hna ha bânâ, ke adre me wâ me senyinâ ta je ûnyi e ke tiga sâkâu bi, ke adre haimemenâ, ka habe, ödra ta je atkanyaua me tavat vhevhe eang hmelen. 14 Anyin a haba tavat adre me ha helâe adre me omanenâ a g' adre me heleû idra. 15 Ke adre ne ûnykûme hnyei adre he ûhedra hnyin, me ame ne khan' ödra la he ka hmetu ka hnyin. 16 Ke walang ang adre me weny ke hnyei ae beönua hnyin so, a wale thö drany : waleling me me ca hmehma bi Khong, e ka he ka hâiâ e, ka habe, e Khongudrin ; anyin a e ame penapena taun hobi ködra.

17 Hnen labageju Aberahama ame hudi Isaaka, hnyi hna cubec e : eke, waleji at ame hia but kap senyinâ ta je hna ha bânâ, e ame hudo nokon a khaca ; 18 waleji adre ha kâu, ka habe, Adre me he ka hâiâ ta je mâtranâm ûnyi ge Isaaka : 19 ke e ame ûnykûme, ka habe, e khana Khong he ka omelö hmetu, ame ne mok ut at ; ke e ame kap hmetu e ûheny e hnyi ûhöücü. 20 Hnen labageju Isaaka ame hahnahici Jakob me Esau, hnyi ta je ûnyi ame he ka o. 21 Hnen abageju Jeko ame ve hahnahicâ li laku Josefa, hnyi ûen e ame he ka mok ; ke e ame khudrung hon ban ciny uci. 22 Hnen labageju Josefa ame ha ge ûheny lakon Isaraela hnyi ûen e ame he but ka mok ; me hûna ge jeien bi. 23 Hnen labageju haba kamö Mose me hinyen, ödru me ikhâlâ e hnyi kun ta tehi hwaban hna hnokoâ e, anyin a ödru me wâ a e wanakat ae so ; ke ödru me ca outen hnanyibu anyin than. 24 Hnen labageju Mose ame gan dut me höcö m' adre me hâiâ hmetu e, ka habe, nokon nöku Farao a hlu ; 25 ke ame weny he ka tha hom okongon me lakeiny Khong, hon he ka senyinâ monu ame he ka ie hia ; 26 ke e ame ûnykûme a hing omjeû hnödra hna haikongoâ e can Keriso, hon ta je omjeûiny Aigupito : anyin a e ame wâ hmâ hing hwaban. 27 Hnen labageju e ame hna but Aigupito, e ame ca outen hmönyin anyin than : anyin a e ame hokhnyok, helâke at ka wâ at ae ca

HEBERU 12.

manen bi. 28 Hnen labageju e ame ânyâ paseka me hna jijingâ dra, wâ e nye kâl' ödra hnen at ame ohia je atö. 29 Hnen labageju adre me hanyâûâ Wagewe ae dra helâ me kânâ ae mada : ke haba at Aigupito adre me nâ cubecâ me adre me û but. 30 Hnen labageju ame û but hak veto hnyi Jeriko, hwaban hna he igigilö hnyi je bong a seven. 31 Hnen labageju ame ca tha mok Rahaba, a momo hnyi gethen, me tavat adre me ca úling, anyin a e ame kap soâ li at adre kunâ he ka ecmak. 32 Ke ietü hmetu oge me he ka ha? anyin ae ca úcû bi úen kõnya he ka haiö Gideona, me Baraka, me Samasona, me Jefetha, me Davita, me Samuela me ta je perofeta : 33 waleji tavat adre me hom hwenbâ je dökhü ge labageju, me mâdrâ hwakecin ae wisa, me hu ta je hna ha bânâ, me hlöng ta je hnyimen liona, 34 me omoko maniny meic, me kec möt únyi hnyi hele vat, me hna ohwegi ödra a ödra sényin, me hwege hnyi vat, me oveseâ je utbavat. 35 Haba omomo, me adre me kap je kokidra adre omelö hmetu thö : ke haba keihen adre me oveci ödra, ke adre me ca kap bi hna omelö ; m' adre me he ka lu möt hmetu ae beönua : 36 k' adre me cubec keihen ge úhiö me úkûc, eke, adre me cö 'dra me ip ödra hnyi uma ceat : 37 adre me lûâ keihen ge veto, k' adre me gilö lu ödra, k' adre me cubic ödra, k' adre hling' ödra ge hele vat : k' adre me he baú me je úkhaú a unen mamoe me got ; ödra theduoc, me vec, k' adre okongu 'dra 38 (hnyat a ca úcû hmeledrany ködra), k' adre me he baú hnyi ta je hnyebuba, me ta je bucen, me ta je op, me ta je dok ae hokong hnyi hmeledrany. 39 Haba hnyat eling hia adre me lung so hnen anyidra labageju, ke ca hu gadra je hna ha bânâ, 40 ke haba Khong ame penapena únyi ae beönua hnân hobi köta, m' adre me ca he bi ka bekhöt e ka hi' öta.

HNYIMAKAN 12.

A NYIN a wale ame tet igigili öta tavat ohnatho a ödra se hia, me so ate me he minya ka hna degecâ ta je hmak hiä, me hulö, wale at ame ohveli öta, ke ate me he ka wadring me hokhnyokâ úölogot a e hnyi hnyimaköta, 2 me ö Iesu at ame hwân me obekhötâ labageju ; waleji at ame hokhnyokâ satauro, k' ame ca oúnyihnathoâ hmehma, únyi hnyi senyin adre me ip hnyi hnyimakan, ke e ame laba ju hnyi ke

keihen metân theron anyin Khong. 3 Anyin ae so öbun e únykúme e, at ame hokhnyokâ hnödra hna ivinö hwege m' ödra hnen tavat ae kong, wâ e nye sényin me monumonu je hnyekubun. 4 Öbun tiga ca hia but hagutâ ke ne o but ame hingölö dröbun hnyi hnöbun hna hagutâ hulö : 5 ke öbun e hnying ut hna úne wale ame úsabö m' öbun helâ me je lakon, ka habe, Nökuk lö, ca oúnyibâúâ hna nâ hnen Than,

Ke ca monumonu bi, e ka thawö u ; 6 Anyin a haba at ame hnyokâ hnen Than, me e ame nâ,

Ke e ame osöâ lakon e ame kap. 7 Öbun e hok hnyok hobi kâu hna ná ; haba Khong, me ame ânyâ köbun helâ me lakon ; anyin a ie nokon ame ca nâ e hnen kamen? 8 Ke adre ne ca kun' öbun ka hnyi hna ná, waleji a vheno hnen je lakon hia, awe, öbun je lakon gethen, ke ca je hing lakon bi. 9 Ke wale minya eang, e hu köta ehac lakamen unyita, he ka n' öta, ke ate me ogan' ödra : hawa, ate me ca he ka löng hoton beönuainy Kamen ta je hanu, m' ate me möt? 10 Anyin adre me n' öta hnyi je bong ae wakhalet helâ me wedra ; ke e ame n' öta m' ate me so, m' ate me he ka tha kap mē. 11 Ke haba ta je hna ná hia, me, adre me ca únykúme bi a hnân osenyinâ, ke hnân bi hlöuhlöu, ke hwaban e, ame kû thö wan hnahic wale hwakecin ae wisa ködra adre n' ödra hnen e. 12 Anyin a wale hai thö je hnyam ame him, me je bouca ae mat ; 13 me owisa but ta je gethen hobi kâu je cabun, me me ca he ka khikhin can ae mat, ke so bi he ka hwege hmetu bi.

14 Hnu hoton d' öbun úsoköu unyin tavat hia, me hwakecin ae kap, e ba at ame he ka wâ Than e ka hia e : 15 ke wâ wia ju, wâ e nye hu ke at ame ca o ka hnyi ibetengiö baú anyin Khong ; wâ e nye kû thö iwân ae hiny he ka oveci öbun, me ame he ka kong ut tavat ae se hia hnen e ; 16 wâ e nye hu ke at bi únyi monu, me at thothom бага helâ me Esau, waleji at ame ham hwajekhon atö he ka úco újeú. 17 Anyin ae khan' öbun a hwaban e, e ame weny hmetu he ka hu hna hahnahicâ, ke adre höciâ e (anyin a e ame okhodrut wâ gethen deny ietra), ke so bi e ame elâm wia e me li deköien.

18 Anyin a öbun e ca o but ka hnyi bucen ae úcû he ka kâlâ waleji ame hlá ge meic ke ne o but ame hlit, me menekholom.

HEBERU 13.

me weneú, 19 me hwan khoto, me meainy hofuc ; waleji a löng ut tavat me adre me khöu a ga me ca ha hmetu hofuc ködra : 20 anyin ae ca khan' ödra he ka hokhnyokâ hna hûna, ka habe, Ke a ne kâlâ bucen hnen ke meno bi, adre me he ka lûa e ge veto ; 21 hnân outen gan hmâ únyi ame manen, me me haingö Mose, ka habe, Inya oge me ot gan hmâ me gâ uk : 22 ke so bi, öbun e o but ka hnyi bucen Ziona, ke ka hnyi taun anyin Khong ae möt, wale Jerusalemainy drany, ke ka ta je angela a ca hnân aú, 23 ke ka hnyi úkhacaköu ae bekhöt, ke ekalesiainy watö wale adre me sihnalimi'dra hnyi drany, ke ka Khong At owisa tavat hia, me ka ta je hanon tavat ae wisa hwakecidra adre obekhötâ, 24 ke kö Iesu at ame úsoköuâ hnyi úhinhnyökou ae teb únyi, ke ka hnyi dra hnân dukâiâ, k' ame ha ta je únyi ae nua hon drö Abela. 25 Wâ ju eâu öbun, ke ca he ka hna degecâ at ame ha hofuc. Anyin a ne ca kec möt tavat eji adre me hna degecâ at ame kou ödra eang hmeledrany, awe, e ca khan' öta hmönyin he ka kec möt, öta ka he ka hotuta ka at ame kou únyi hnyi drany : 26 waleji at ame obwebwelâ hmeledrany ge ifucin ehac : ke e ame hia but ha bânâ walang ang, ka habe, Oge me he ka okhaca hmejijingâ, ca hake hmeledrany thibi, ke drany minya bi. 27 Ke haba bongon hofuc ang, ka habe, Okhaca biju, me ame ha a g' adre me he ka hom dö ta je únyi adre me hmejijingâ, helâ me ta je únyi adre hia but op, me me he bi ka tethmâ ta je únyi adre ca hia but hmejijingâ. 28 Anyin a wale, ate me kap dökhu ae ca khan' ödra he ka obwebwelâ, me so ate me he ka hu ibetengiö baú, m' ate me he ka ányâ huliwa ame he Khong ka senyiná, me oganá e me ot : 29 anyin a haba Khonguta, me meic ame han hmönyin.

HNYIMAKAN 13.

E SO e tethmâ ibetengiökou unyin hnyo me lakeiny. 2 Ca hnying bi he ka betenge ge ta je atkanyua : anyin a haba keihen, me adre me kap ta je angela helae, k' adre me ca únykúme bi. 3 Únykúme ju öbun tavat adre me c' ödra, helâke adre tha c' öbun m' ödra ; únykúme ju tavat adre me ovecâ, anyin a tiga öbun minya hnyi unyin. 4 E so e he tavat hia he ka öúnyihnathoâ hna faipoipo, me hna mokut ae ba hnyikongon : anyin ame he

Khong ka öhnaúhang' ödra adre me bi únyi monu, me tavat adre me venöu áiân ke at. 5 Ca he öbun ka munyi hnyokâ mone ; sekubun ju ge ta je unyi öbun e hu : anyin a e ame hia but ha, ka habe, Oge me ca he bala he ka hnö u, ke oge me ca he balua ka hna degeci u. 6 Anyin a wale e khan' öta he ka ha hwegiâ, ka habe,

Haba Than, me wale thibi e at ame hadruc nya, oge me ca he ka ot, Ieú ke únyi ae khana at he ka ányâ könya ?

7 Únykúme ju tavat adre me tu' öbun, waleji tavat adre me ha köbun hofuc hwan Khong ; únykúme ju obiny hwakecidra, me úcúcübongo ju anyidra labageju. 8 Haba Iesu Keriso, me, ame ca wia bala, et, me hnyi bong ang, me nyiele balua. 9 E so adre me ca hom monu öbun hnen ta je hna úne ae se hia me ve bongon : anyin ae so adre me he ka otethmâ hnyok hnyi ibetengiö baú ; ca hnen ta je jeú waleji ae ba troban ka tavat adre me vheno ta je únyi e. 10 E hu but gata taben hut, waleji ae ca úcú ka tavat adre me huliwa hnyin uma menâ he ka hnyi han únyi hnyin. 11 Anyin adre me thong hnyi hoton hnyaba unyin ta je meno, wale adre me hom drödra ka hnyi dok ae kap me hnân hudiny hulö, hnen at bihut ae beönu. 12 Anyin a wale haba Iesu minya ame hom vec hnyi hoton homagöule me me he ka okábâ tavat únyi ge dren bi. 13 Anyin a wale e so ate me didrö kâu ka hnyi hoton hnyaba, me hokhnyok hnyi hna baikongoâ e. 14 Anyin ae ba anyita taun ae tet hmâ eang, ke ate me elâm ke taun ame he ka manen dut nyiele. 15 Anyin a wale e so ate me hudo bala hudiny oganá Khong a deny e, wale wan ta je esongodita ame háiâ ien. 16 Ke ca he öbun ka hnying he ka mádrâ so me betenge : anyin a wale je hut Khong ame senyiná. 17 Löng ju öbun hoton tavat adre me tu' öbun, me nom ju ködra ; anyin adre me hmákâ hobi kâu ta je hanubun, helâke hanymödra he ka thu hmetu ge ta je monu ; m' adre me he bi ka ányâ e me senyin, ke ca bi me vec : anyin ae ba troban eling hobi köbun.

18 Hic d' öbun hobi köhmun : anyin a öhmun e únykúme ae hu but gahmun únykúm sa ae so, ke wehmun he ka so hwakecihmun hnyi ta je únyi hia thithö. 19 Ke inya oge me újöngi öbun hwege he ka ányâ e, m' adre me logot he ka hnö nya but köbun.

IAKOBO 1.

20 Ke haba Khongon úsoköu, waleji at ame hom hmetu but Tuhöta Iesu úheny hnyi hna mok, wale at ae nua ame tuö ta je mamoe, hnen dren úhinhinköu a nyiele balua, 21 e so e ame he ka wia wisai öbun hnyi ta je huliwa ae so he ka ányá weny, me huliwa eú hnyita, únyi hnân kú senyin hnyi hnyimakan, a deny Iesu Keriso ; e so e unyin hmanenang nyiele nyiele balua. Amen.

22 Ke inya oge me újôngi öbun hnyat

me lakeiny, ka habe, më löng ju hofuc hnân ná : anyin oge hia but sit okhulitá köbun.

23 Khan' öbun dö a g' adre thöng Timoteo liamekeiny möta ; e ka ie o, me öhmu me he ka iouny m' öbun.

24 Anyik italofa ka tawat adre me tu' öbun, me ta je wakap hia. Haba tawat Itali, me adre me italofa m' öbun.

25 E so e unyibun hia thithö ibetengiö baú. Amen.

TUSI ANYI

IAKOBO.

HNYIMAKAN 1.

INYA Iakobo athnyabainy Khong me Than Iesu Keriso, anyik italofa ka ta je tribu a twelv adre vese ehee.

2 Hnyat me lakeiny mönya lö, e so öbun e he ka únykúme a hnân senyin gan hmá e ka o köbun ta je úcúbic ae ve bongon ; 3 anyin ae khan' öbun a g' ame okúá hokhnyok he ka cubec anyibun labageju. 4 Ke so ame he hokhnyok ka huliwa bekhötá, m' öbun e he ka bekhöt me wisa, ke ba únyi ae hia.

5 A ne ke at gabun ae ba metá gan, me so e ame sumátá unyin Khong, at ame ham gáná ka tawat hia thithö, k' ame ca ú bi ; me adre me he ka ham káu. 6 Ke so e ame sumat hnyi labageju, ke ba loloá : anyin a haba at ame lolo, me úcú me waköiöiny köiö ame ou ang dö me húnyúnye but. 7 Ke ca he at eling ka únykúme a e ame he ka hu ke únyi únyi ge Than ; 8 e at ame lolo hnyok, k' ame okokok hnyi deny ta je gethen hia thithö.

9 E so ame senyin liamekeiny ae theduc hnyi hna ogörányá e : 10 ke so ka at tren omjeú he ka senyin hnyi hna ohnyikáná e : anyin a e ame he ka hia helá me vongon lnaönying. 11 Anyin ame utö seúnö me ang ae kahwa hömnyin ; me ame ie melea thö önying, me ame kölu but vongon, ke ame hia but hmanenanginy ; ke heláe ame he ka hia at tren omjeú hnyi deny ta je gethen.

12 Hnabic hnen at ame hokhnyoká úcúbic : anyin a at ka hia but cubecá, me e ame he ka hu koranainy möt, wale a ha báná Than ka tawat adre me hnyok káu.

13 Ca he ke at ka ha, at ka cubecá e, ka habe, adre cubic nya únyi ge Khong : anyin e pason he ka cubec Khong ge únyi ae kong, ke e ame ca cubec minya ke at : 14 ke adre me ve cubec tawat, a g' adre lili ödra hnen je wedra bi ae kong, me iyawá. 15 Ke e ka erkin dut weny ae kong me ame hnokoá but hulö : ke e ka at hnathu but hulö me e ame hnokoá but mok. 16 Ca monu öbun hnyat me lakeiny mönya a ounykúmik. 17 Haba ta je bwihlany hia ae so me ta je hna ham báúá ae hmanenang, me únyi ethö ge Kamen melam, waleji ame ca ok, ke ba ong haten hwiö gan. 18 E ame hnöku öta ge hwan hofuc ae hnathu hoton weny, m' ate me he ka heláke je wan a bán ge ta je únyi e ame op.

19 Hnyat me lakeiny mönya a ounykúmik lö, e khan' öbun dut e. Ke so e he tawat hia ka ie löng, me bec he ka fuc, me bec he ka hmönyin : 20 anyin a ca hnân he ka öküá hwakecin ae wisa anyin Khong, hmönyin anyin at. 21 Anyin a wale, degec ut ikiki hia me monu ame si but, ke kap ju ge hnyok ae menyik hofuc adre tá, wale ae khana he ka omelö je hanubun. 22 Ke ányá th' öbun hoton hofuc ke ca löng thibi, a heláe öbun e ka omonu öbun bi. 23 Anyin a ne ke at ame löng hofuc me ame ca mádrá bi, e úcú e me at ame

IAKOBO 2, 3.

selâdrâ hnyimakan hnyi uselat : 24 anyin a e ame ka wâ e, me ame hmetu but ke ame ie hnying ut bongon e bi. 25 Ke haba at ame selâdrâ hnyi hnanyibu ae wisa waleji ame hn' öta, me tet hmâ hnyin, ca at ame löng me hnying bi, ke at bi ame ânyâ me huliwa, ame he ka hnahic at ang hnyi anyin huliwa. 26 A ne hu ke at ame ûnykûme a e ame hmi, ke e ame ca noc bi bohmen ke e ame omonoâ hnyekon bi, awe, haba hmi anyin at e, me ûnyi baû bi. 27 Walang hwakecin hmi ae kalaöt me ba hnyikongon hnyi hnyimakan Khong a Kamen, ka habe, he ka senâ je nakahme me je safac hnyi anyidra vec, me hamen he ka tuö e, me me ca hu hnyikongon hnen hmeledrany.

HNYIMAKAN 2.

HNYAT me lakeiny mönya lö, ca he öbun ka wâhmakhmeto at hnyi hna hom labageju anyin Tuhöta Iesu Keriso, a Tuhan hmanenang. 2 Anyin a ne didrö ke at ka hnyi anyibun ûkhacaköu, ae hu wen banyen a gol, ke ûkhaû ae mec, ke ame dit minya ke at ae theduoc me ûkhaû ae kong; 3 me öbun e wâhmakhmeto at ame khaû so, me ha kâu, ka habe, Laba ju eang hnyi dok ae so; ke haingöbun ka at ae theduoc, Tot ju u e, ame ne, Laba ju eang hmelen taben li cak; 4 hawa, öbun e ca oûnyihnatho ke at hon ke at, m' öbun hnyat owisa ae kong je ûnykûmenödra? 5 Hnyat me lakeiny a oûnykûmik lö, löng ju öbun; hawa, ame ca ûca hnen Khong watheduoc eang hmeledrany he ka tren omjeû hnyi labageju, m' adre me he ka hu dökhu waleji e ame ha bânâ ka tavat adre me hnyok kâu. 6 Ke öbun e oûnyükongo ta je theduoc. Hawa, ame ca okongu öbun hnen tavat tren omjeû, k' adre me lili öbun ka hnyi taben owisa? 7 Hawa, adre me ca haikongoâ ien ae so waleji adre wenyö iöbun hnyin? 8 Ke so bi öbun e ne löng hoton hnanyibu ae beönua, helâ me hna sihnalimen, ka habe, U me he ka betenge ge at ame laba hakekenyi u helâ me u bi, m' öbun e ânyâ ling so: 9 ke öbun e ne wâhmakhmetö tavat, me öbun e ânyâ ling monu, ke hwâdâ thö ge hnanyibu, a öbun hnyat hanyâûâ hnanyibu. 10 Anyin a haba at ame he ka löng hoton je hnanyibu hia, k' ame hanyâûâ thibut khaca, me helâke a hanyâûâ hia but. 11 Anyin a haba at, waleji ame ha, ka habe, Ca he ka

bi ûnyi monu, me ame ha minya, ka habe, U ca he ka ûhlingö. Ke u je ne ca bi ûnyi monu, ke u at ûhlingö bi, me u at ame hanyâûâ hnanyibu. 12 E so öbun e ha hofuc, ke so öbun e huliwa, helâ me hnyat adre me he ka owis' ödra bi ge hnanyibu ame hna bâûâ. 13 Anyin a haba at ame ca betenge, me adre me ca he bi ka betenge gan hnyi hna ûhnei: anyin ame hobeluâ ibetengiö hnyi ûhnei.

14 Hnyat me lakeiny mönya lö, ieû troban a ne ha ke at, a ga hu gan labageju, k' ame ca hu bi ta je huliwa? hawa, e khana labageju eling he ka omelö e? 15 A ne he thu ke liamekeiny a бага ame ne momo, ke ba jeû gadrin hnyi ke bong me ke bong, 16 ke ke at gabun ame ha ködrin, ka habe, He thö me hnahic, kahwa ju, me sekomp dö; ke öbun e ca ham bi ködra ta je ûnyi ae ûcû ka unyin; ieû troban e? 17 Ke helâe labageju, e ka ca tha e me huliwa me a ka mok ut. 18 Eke, ame he ke at ka ha, ka habe, E hu but gam labageju, ke hu but inya gak ta je huliwa: omanenâ thö kõnya ânyâm labageju ae ba huliwa hnyin, ke oge me he inya ka omanenâ hnen anyik je huliwa. 19 U me kap, ka habe, Khaca thibi Khong; e so e: je demoni minya adre me kap me öbubuny. 20 At ae monu lö ca bekhanö u ae ûnyi baû bi labageju e ka ba huliwa? 21 Hawa, adre ca haiwisai Aberahama a kamöta ge ta je huliwa, hnyi hnen hna hudi Isaaka a nokon hnyi hon tap? 22 U me wâ a g' ame tha huliwa labageju me anyin ta je huliwa, ke ame obekhötâ labageju hnen ta je huliwa; 23 me ame hwâdâ thö hofuc adre sit, ka habe, Aberahama ame labageju ka Khong, me adre me haiâ e kâu hnân hwakecin ae wisa; me adre me hwenyi ien e, ka habe, Ihuminy Khong. 24 Awe, öbun e wâ but a g' adre me haiwisa at hnen ta je huliwa, ke ca hnen thibi labageju. 25 He helâe minya, adre ca haiwisai Rahaba momo hnyi gethen ge ta je huliwa hnyi hnen hna kap soâ li at ecmak me kun' ödrü hnyi ke gethen bi? 26 Anyin a helâke mok ut unyin, e ka ba hanu, me helâe minya labageju, a mok ut e ka ba huliwa.

HNYIMAKAN 3.

HNYAT me lakeiny mönya lö, ca he ka se hia tavat ûne gabun, anyin ae khan' öta a g' ate me he ka hu hnaûhangö ae gan. 2 Anyin ate thö hia thö

hnyi ta je únyi ae se hia. A ne ca thö at hnyi hofuc, awe, e wisa at e, ke e khana he ka tha hom úhnyúkongo unyin. 3 Wâ bi, ate me ip fao hnyi hnyimen ta je hors, m' adre me he ka löng hotuta, me ate me tha wia hia je unyidra. 4 Wâ bi minya ta je hu, eja ke ne a ne gan dut, ke ame ou ang ge ang ae hwege, adre wia but hnen wi ae úhnyúkong helâ me weny tuhan hu. 5 Ke helâe minya bohmen únyi ae úhnyúkong hmönyin, ke e ame hobeluâ ta je únyi ae gan. Wâ bi úganiny hnyot ame hlâ ge wahleúhleúiny meic ae úhnyúkong! 6 Meic bohmen: haba bohmen me at ae nua ka ányâ hulö unyin je outhunyita, k' ame okongoâ unyin hia, me thong hia möt ang, ke haba meiciny gena, me ame thong bi e. 7 Anyin adre me ohnamâ ta je meno ae ve bougon me ta je meno ame gâ, me ta je únyi ame iyâú, me ta je únyi ae möt eú hnyin köiö, adre hia but ohnamâ ta je únyi e ge metâ anyin at: 8 ke ca khana bi ke at he ka ohnamâ bohmen; haba monu e, me ame ca menâ, ke unöngötö ge únyi hnân mekiny. 9 Ate me haisoâ Khong a Kamen hnen e; ke hnen e minya ate me hangâ at, wale adre me op e me we Khong: 10 k' ame didrut únyi hnyi hnyimen a khaca hna haisoâ, me hnaúhangö. Hnyat me lakeiny mönya lö, e ca úcú he ka ányâ ta je únyi helâe. 11 Hawa, ame pupua köiö hnam, me köihiny únyi hnyi hna pupua a khaca? 12 Hnyat me lakeiny mönya lö, hawa, e khana imeta he ka wa wan elaiö, me vine he ka wa wan imeta? ke helâe ame ca o köiö hnam me köihiny únyi hnyi hna pupua a khaca.

13 Ewa at unyibun ae metâ k' ame wâ únykúme? e so e ame he ka omanenâ anyin ta je huliwa ge hwakecin bi ae so, me hwakecin ae menyik me metâ. 14 Ke a ne hu gabun eú hnyi je hnyekubun ihuhnyinköu ae hiny me imoukôu, me ca he bi ka hobelöu, ke ca thoi bi ka hofuc ae hnathu. 15 Haba metâ eang me ame ca o únyi ethö, ke hwen hmeledrany, me unyin, me demoni. 16 Anyin a haba dok ae hu ihuhnyinköu me imoukôu, wale dok ae hu hnyin imonumunony me ta je huliwa hia thithö ae kong. 17 Ke haba metâ únyi ethö wale a bán me ba hnyikongon, k' ame úsoköu, me menyik, me ie löng, k' ame unöngöt ge ibetengiö me je wan ae so, ke ba lolo, ke ba iyawâ. 18 Ke haba wan hwakecin ae wisa, me adre me tä hnyi úsoköu hnen tavat adre me okúâ úsoköu.

HNYIMAKAN 4.

Ú NYI ua ta je vat, ke únyi ua ta je úkúc unyibun? hawa, ca únyi ge ta je webun ae kong ame vat hnyi ta je ong outhunyibun? 2 Öbun e weny ke ca hu bi: öbun e hlingö, me behnyekon, ke ca khan' öbun he ka hu: öbun e úkúc me vat; e ca hu bi gabun anyin öbun e ca sumâtâ. 3 Öbun e sumâtâ ke ca hu bi anyin öbun e sumâtâ monoâ, möbun e he ka oumo ta je únyi e hnyi ta je webun ae kong. 4 Öbun tavat bi únyi monu, hawa, e ca khan' öbun a iwahnaihmiöny me Khong he ka hanen hmeledrany? Anyin a wale haba at ame behe ka hanen hmeledrany me wale iwahnaihmiöny me Khong. 5 Hawa, öbun e únykúme a g' adre ha báúâ hna sihualimen? Hawa, ame weny me ihuhnyinköu hanu, a ame ip eú huyi je hnyekuta? 6 Ke e ame bi hanen ibetengiö baú. Anyin a wale hna ha, ka habe, Khong ame hagutâ tavat bi gan, me ham ibetengiö baú ka tavat a ödra hnyikânâ. 7 Anyin a wale löng ju öbun hoton Khong; ke hagutâ but diabolo, me e ame he ka kec únyi gabun. 8 Hakekeny dö ka Khong ke e ame he ka hakekeny köbun. Hinyem but öbun tavat hulö; ke obosoâ but je hnyekubun tavat lolo hnyok. 9 E so öbun e he ka vec, me tenge thungaú, me tenge: e so he ka wia anyibun hluma ka hnyi tenge thungaú, me anyibun senyin ka hnyi hnyok ae hmak. 10 Ohnyikön' öbun ju hnyi hnyimakan Than, ke e ame he ka ogöranyi öbun.

11 Hnyat me lakeiny lö, ca úbaiöbunköu. Haba at ame háiâ liamekeiny, me únykúme liamekeiny mē, e ame háiâ hnanyibu, me únykúme hnanyibu: ke u je ne únykúme hnanyibu m' u ca at bi ame löng hoton hnanyibu, ke at bi ame únykúme. 12 Khaca thibi at ame ham hnanyibu, wale at ae khana he ka omelö me omoko; ke u ia at ame únykúme ke at?

13 E, öbun tavat öbun e ha, ka habe, Haba bong ang me nyi ate me he ka he ka hnyi taun eling, me laba eling hnyi khaca luna, he ka úcú me heleú omjeú; 14 ke so bi e ca khan' öbun únyi ame he ka o nyi. Isú anyibun möt. Öbun hainy meic, ame manen hnyi úen ae okhulit, me ame hia but. 15 Ke walang únyi ae so he ka ha, ka habe, A ne weny Than, ate me he ka möt; me ányâ únyi eang, me únyi e. 16 Ke walang ang öbun e senyinâ anyibun je hobelöu: e monu hia ta je senyin helâe.

I. PETERU 1.

17 Anyin a wale, haba at ae khana he ka ânyâ so, k' ame ca ânyâ bi, wale hulö bi kâu.

HNyimakan 5.

E, ÖBUN watren omjeû, tenge thö me kuku can ta je vec ame he ka o köbun. 2 E amam but tang omjehebun, ke ame an je khaüöbun hnen oûnyi. 3 A vi but anyibun gol me sileva, ke adre me he ka bi ohnathoâ köbun hnen viiny, k' ame he ka an vibun helâ me meic. Öbun e hia but ûkhöünâ anyibun tang omjeû hnyi je bong a biliny. 4 Wâ bi, ame hongot göranyai hwaban ae úcú ka tavat adre me huliwa waleji adre me menoibun je hnyei, ke öbun e behânâ ge iyawâ: ke ame aat dö hnyi li hnyikönyen Than tuhan sabaoth hwahongot hwan tavat meno. 5 Öbun e hia but laba sot eang hmeledrany me ânyâ webun; öbun e hia but hat je hnyekubun hnyi bong úhlingö. 6 Öbun e hia but hangâ, öbun e hia but hlingâ at ae wisa; ke e ame ca hagut' öbun.

7 Anyin a wale hnyat me lakeiny lö, hokhnyok ju ke ne o but ame o thö Than. Wâ bi, haba at belök ame halubahingen okoman hna belök únyi eü hnyi kânâ, me hokhnyok ke ne o but ame hu we a bân me we a biliny. 8 E so öbun e hok hnyok minya ju; ke otethmâ ju je hnyekubun: anyin ae hakekeny jut he ka o Than. 9 Hnyat me lakeiny lö, ca iulitköüâ ju, m' adre me ca he ka hang' öbun bi; wâ bi at ame owisa ame tot eü hnyi je hwanuma. 10 Hnyat me lakeiny lö, hom dö je perofeta hnân tulut köbun hnyi vec me hokhnyok, waleji tavat adre me ha hofuc hnyi

ien Than. 11 Wâ bi, ate me únykúme hnödra hnahic adre me hokhnyok: öbun e hia but löng ge hokhnyok anyi Jobu, ke öbun e hia but wâ hna bi obiny Than, a g' ame seön Than, k' ame betenge gan hmâ.

12 Hnyat me lakeiny mönya lö, walang únyi ae únyi hnathu hon ta je nyi hia, ka habe, ca khemanyin bi, ca háiâ drany, ke hmeledrany, ke ke únyi bi: ke so he ka hake ha eke me eke, ke hobun e ba, me e ba; wâ öbun nye ü but ka hnyi hnaúhangö.

13 Hawa e hu at ame vec unyibun? e so e ame hic. E hu at ame senyin? e so e ame khumöng ogânâ Khong. 14 E hu at ae mok unyibun? e so e ame hawâ wahingatiny ekalesia me adre me he ka hic hobi kâu, me hú e ge wakaco hnyi ien Than: 15 ke haba hic hnyi labageju, me ame he bi ka omelö komok, k' ame he Than ka otilâ thö e; ke a ne hia but ânyâ ta je monu, me ame he ka thang ut gan. 16 Anyin a wale, uomanenâköüâ anyibun ta je hulö, ke hic dö ke at hobi kâu ke at, m' öbun e he ka möt. E hu troban ae gan hmâ únyi hnyi hic hijin at ae wisa hwa-keciu. 17 At helâ m' öta Elia, ke e ame hic újöng me me ca he ka ta we; me ame ca ta we ka hnyi hon kânâ hnyi kun ta huna ke siks ta tehi. 18 Ke e ame hic hmetu, me ame ta but we únyi hnyi drany, me ame kú thö ta je jeü únyi hnyi kânâ.

19 Hnyat me lakeiny mönya lö, a ne monu ke at únyi hnyi hnathu, k' ame ohmetuhmetoâ e hnen ke at; 20 me so e ame wâhmakhmeto, a haba at ame ohmetuhmetoâ at ae kong únyi hnyi anyin monu me e ame omelö hanon únyi hnyi mok, k' ame he ka tube ta je hulö ae se hia.

TUSI A BÂN ANYI

PETERU.

HNyimakan 1.

INYA Peteru aposetolo anyi Iesu Keriso, oge me sihnalimen ka ta je atkanyua adre me ve se ka hnyi Poneto, me Galatia, me Kapadokia, me Asia, me Bithunia, 2

tavat adre me úca hoton hna wâbânâ hnen Khong a Kamen adrem, únyi ge hna okabâ ge Hanu, he ka löng hoton e, me dukâiâ hnen drö Iesu Keriso: E so e unyibun ibetengiö baú, me úsoköu ae gan hmâ.

3 E so he ka haisoâ Khong me Kamen

I. PETERU 2.

Tuhöta Iesu Keriso, at a hnöku öta hmetu, hoton anyin ibetengiö ae gan, ka hnyi geju ae möt, hnen möt hmetu thö a Iesu Keriso únyi hnyi hna mok, 4 ka hnyi weúhúneny ame ca he bi ka bobot ke ba hnyikongon, k' ame ca aú but, wale adre me ip hnyi drany hnân hobi köbun, 5 k' adre me tu' öbun hnen man maniny Khong deny labageju ka hnyi möt adre me penapena he ka omanená hnyi úen a biliny. 6 Wale öbun e senyin gan hmâ hnyin, ke so bi öbun e ne hmak hnyi je úcúbic ae ve bongon hnyi ong úen walang ang, a ne úcú, 7 m' adre me he ka wâ hna ohnathoá anyibun labageju ae únyi hnathu hon gol, ke so bi adre cubec e ge meic, m' adre me he ka haisoá me ogánâ me olungâ e ka manen dut Iesu Keriso: 8 waleji öbun e ca wâ, ke öbun e hnyok kâu, eja ke ne öbun e ca wâ walang ang, öbun e labageju kâu, ke öbun e senyin gan hmâ hmönyin ae ca hnân ha, ke ti hmanenang: 9 ke öbun e kap obiny anyibun labageju, wale melen je hanubun. 10 Ame elâm me hnö möt eling hnen ta je perofeta, tavat adre perofeta ibetengiö baú ame he ka o köbun: 11 adre me elâm úen me bongon e waleji a hnen Hanon Keriso eú hnyi je hnyekudrin hna kú, waleji hnyi hnen hna haimemenâ bánâ ta je vec anyin Keriso, me je hmanenang ame he ka hnu hoton. 12 Adre me omanená ködra a g' adre ca huliwan ta je únyi eling ködra, ke so bi köbun, waleji adre haimemenâ köbun walang ang hnen tavat adre me khetâ köbun úthumetu ae so únyi ge Hanu Kap adre kunâ únyi hnyi drany; waleji a ta je únyi ame weny ta je angela he ka selâdrâ.

13 Anyin a wale, húkâlâ ju wen je hnyekubun, me hmâkâ thö, me ti geju ke ne o but ka hnyi ibetengiö baú wale adre me he ka oá köbun e ka manen dut Iesu Keriso; 14 e so öbun e tha úcú me tavat úling, ke ca he öbun e tha úcú me webun kâú adrem, waleji k' öbun tiga menekholom: 15 öbun e he ka kap hnyi ta je hwakecibun hia helâ me úkapiny e at a haw' öbun; 16 anyin adre hia but sihnalimen, ka habe, Okabi öbun ju, anyin a iny kap. 17 Ke öbun e ne hawâ Kamen, wale at ame ca wâhmakhmetoá tavat, me at ame ve hnö tavat helâ me huliwa anyin ke at me ke at, awe, ot ju hnyi úen öbun e tiga laba atkanyaua: 18 anyin ae khan' öbun a g' adre ca úco anyibun möt hwaban ta je únyi ame he ka bobot, wale sileva me gol, únyi

hnyi hwakecibun ae monu a n' öbun hnen lakamöbun; 19 ke so bi únyi ge dren Keriso ae gan hwaban, helâ me nokon mamoe ae ba hnyikongon me ba monuiny: 20 waleji adre wâ bánâ adrem, k' at tiga ca bi taben hmeledrany, ke adre omanená but hobi köbun hnyi je bong a biliny walang ang, 21 tavat öbun e labageju ka Khong a deny e, waleji at ame omelö thö e únyi hnyi hna mok, me hâam kâu hmanenang; me me he ka e unyin Khong anyibun labageju me geju. 22 Öbun e hia but okalaötâ je hnyekubun hnyi hnöbun hna löng hoton hnathu ke ne o but ka hnyi ibetengiö ae ba thoi hnyin ka hnyat me lakeiny, anyin a wale ibetengiökou ju öbun ge hnyok ae ba hnyikongon: 23 anyin adre hnöku öbun hmetu ca únyi bi hnyi wan ame he ka bobot, ke so bi ge wan ame ca he ka bobot hnen hofuc hwan Khong ae möt me tethmâ nyiele balua. 24 Anyin

A helâ me hna önying tavat hia thithö, Ke haba hmanenanginy at, me helâ me vongon hna önying.

Ame meleca önying, k' ame kölu but vongon:

25 Ke haba hofuc hwan Than, me ame tethmâ nyiele balua. Ke wale hofucin úthumetu ae so adre me khetâ köbun.

HNYIMAKAN 2.

A NYIN a wale degec ut öbun hwakecibun hia ae kong, me iyawö hia, me ta je thoi, me ihuhnyinkou, me úhaiö hia, 2 beweny d' öbun debai a cökiny hanu ae ba thoi hnyin, helâ me ta je mending a teb o, m' öbun e he ka húhúö thö gan ka hnyi möt; 3 öbun e ne hia but drem cubecâ a ga betenge bi Than: 4 k' öbun e he kâu wale veto ae möt, ke a degec hnen tavat, ke a úca hnen Khong, ke gan hmâ hwaban, 5 ke adre me up öbun minya göranyai a je veto ae möt hnân umen hanu, m' öbun e tavat bihut ae kap, he ka hudo ta je hudiny hanu, wale ae so ka Khong únyi ga Iesu Keriso. 6 Anyin adre me ha hnyi hna sihnalimen, ka habe,

Wâ bi, inya oge me ip hnyi Ziona veto hnân kopiny adre úca, ke gan hmâ hwaban:

Ke ame ca he ka hmehma at ame labageju kâu.

7 Anyin a wale, haba únyihnathuiny, me hobi köbun a hnyat labageju: ke haba

I. PETERU 3.

hnyat adre me ca labageju, me wale bi ang,

Haba veto ame degec hnen tavat up uma,

Me adre hia but ânyâ hnân ban kopiny. 8 me

Veto hnân othöâ, me kic hnân öüo ; anyin adre me thö thö hnyi hofuc, anyin adre me ca labageju : ke adre me ip ödra hnân ûnyi eling. 9 Ke öbun thibi dö adre me úca, ke hnyat bihut anyin Khong, ke hnyei ae kap, ke tavat a je hing lakeiny Khong, m' öbun e he ka omanená je hwakecin ae ti so anyin at ame haw' öbun ûnyi hnyi lit ka hnyi anyin melam hnân lâiâ : 10 waleji a ca aten dökhü ehac, ke aten bi dökhü dokhon Khong walang ang : waleji a .tavat adre ca betenge gadra, ke adre betenge bi gadra walang ang.

11 Hnyat a oûnykûmik lö, inya oge me újôngi öbun a ta je atkanyua me tavat menâ tot, ka habe, úsákâüö but öbun me ta je weny unyin ae kong, je ûnyi ame vat me hanu ; 12 e so e úcû hwakecibun hnyi hnyimakan Aten ta je hnyei ; m' adre me ca he ka haikongu öbun helâ me tavat ae kong hwakecidra, e so adre me he ka ogânâ Khong hnyi bonginy senâ, at ka he ka wâ anyibun ta je huliwa ae so.

13 Löng hoton ju öbun ta je hnanyibu hia anyin at, can Than : ame ne ka than tot ae nua ; 14 ame ne ka ta je gavena, tavat e ame kunâ he ka bi hwaban ka tavat adre me ânyâ monu, me hnân ogânâ tavat adre me ânyâ so. 15 Anyin a wale weny Khong, m' öbun e he ka ohnyiböâ hwen monu anyin tavat ae ca metâ ge anyibun huliwa ae so : 16 helâ me tavat, adre hna bâüâ but, ke ca wia hnöbun hna he baü me hnân tube úokonguny, ke so bi he ka bi athnyabainy Khong. 17 Ogânâ thö tavat hia thithö. Betenge ju ge hnyat me lakeiny. Ot ju ka Khong. Ogânâ thö than tot.

18 Lathnyaba lö, löng ju hoton latuhöbun me ot ; ca hake ka tavat ae so me menyik, ke ka tavat minya ae hwahwacit. 19 Anyin a walang ûnyi ae so, a ne ke at ame hokhnyokâ vec, hnyi ûnykûm sa ka Khong, ke adre me ovecâ ke ba can. 20 Anyin a ewa ûnyi hnân hobelöu, öbun ka he ka hokhnyokâ hna kulup öbun can anyibun ta je monu? ke öbun e ne hokhnyokâ vec can hwakecibun ae so, wale ûnyi ae so ka Khong. 21 Anyin adre haw' öbun kâ e : anyin a Keriso ame hom vec minya hobi köbun, me ham köbun tulut, m' öbun

e he ka cet hwadeny li hnyetcan : 22 waleji a at ame ca hnyi ânyâ hulö, ke ba minya thoi adre wâ hnyi hnyimen : 23 waleji adre öü, ke ame ca hnyi fuc bi ; k' adre ovecâ, ke e ame ca ha ooti ödra hmetu ; ke e ame ka hna e bi ka at owisa hnathoâ : 24 waleji at a hake vaden anyita ta je hulö ge unyin hon üö, m' ate me he ka möt ka hwakecin ae wisa, anyin ate me mok ut ûnyi hnyi hulö ; anyin adre me omeli öbun ge hwadeny hnân ta je osö. 25 Anyin a öbun e he monu ehac helâ me ta je mamoe adre monon gethen ; ke walang ang öbun e hmetuhmetu ka At tuö mamoe, me Pispiny ta je hanubun.

HNYIMAKAN 3.

HELÂE minya öbun omomo löng ju hoton laöiöbun ; m' adre me he ka hnehmelâ ge hwakecin laöiödra ae so, ke ca hnen bi hofuc, a ne hu tavat gadra adre me ca löng hoton hofuc ; 2 at ka wâ hwakecibun ae ba hnyikongon, me ot. 3 Haba theibibun, me so e me ca theibâ unyin, wale he ka hûle bät me theibâ gol, me khavâ je úkhaü ; 4 ke so bi he ka omecâ at ae iyong eü hnyi hnyok, wale úkhaü ame ca he ka bobot, wale hnyok ae menyik me ilemuk, wale ûnyi ae ûnyi hnathu hmönyin hnyi hnyimakan Khong. 5 Anyin ame ka omeci ödra helâe hnen omomo ae kap ehac, hnyat adre me labageju ka Khong, ke adre me löng hoton laöiödra : 6 ke helâe Sara ame löng hotu Aberahama, k' ame hawâ e, me than : ke öbun je lakon, öbun ka he ka mádrâ so, me ca outen bi ke ûnyi hnân outen.

7 Obaga lö, e so öbun e helâe, tha laba me laöiöbun hoton metâ, ke ogânâ momo, anyin a e kaia ae sényin, ke öbu me he ka tha hu ibetengiö baúiny möt ; waleling me me ca he ka ovhelâ hijibun je hic.

8 Walang obiny, e so öbun e he hia ka tha hnyok, me vec betenge, me tha hnyok helâ me je liamekeiny, me sang betenge, me hnyok ae hnyikânâ : 9 ca bi hwaban monu ge monu, me újao ge újao ; ke so bi hahnahicâ ; anyin adre haw' öbun kâe, m' öbun e he ka hnahic. 10 Anyin a

Haba at ame weny möt,

K' ame bewâ je bong ae so,

Me so e ame noc bohmen hnyi monu,

Ke li esongodiny wâ e nye fuc thoi :

11 E so e ame saü but ûnyi hnyi hulö, me mádrâ so ;

I. PETERU 4.

E so e ame elâm úsoköu, me hnu hoton e.
12 Anyin a e li emâkan Than hon tavat ae wisa,
Ke li hnyikönyen ame löng hijidra je hic:
Ke e bi hnyimakan Than hon tavat adre me ânyâ hulö.
13 Ke ie at ame he ka okongu öbun, öbun e ne hwege ka hnyi so? 14 Ke öbun e ne vec can hwakecin ae wisa, hnöbun hnahic: ke ca ot bi ge hnödra hna ootâ, ke ca hlohlo bi; 15 ke okabâ ju Keriso eü hnyi je hnyekubun me me Than bi: ke laba penapena bala öbun he ka thu ködra hia tavat adre me hnei öbun ge bongon labageju wale eü hnyibun, ke so bi hnyi menyik me ot; 16 ke e hu gabun únykúm sa ae so; waling me me hmehma ju tavat adre me haikongo hwakecibun ae so unyin Keriso: anyin adre me haikongu öbun. 17 Anyin ae so but, a ne weny Khong, m' öbun e he ka vec can so öbun e ânyâ, ke kong bi e can hulö öbun e ânyâ. 18 Anyin ae okhaca hom vec Keriso can hulö, wale ae wisa me hwaban tavat ae ca wisa hwakecidra, me me he ka lili öta ka Khong: adre hlingâ e hnyi unyin, ke adre omelö e hnyi hanu; 19 ke únyi hnyi e, e ame he but me khetâ ka ta je hanu hnyi hnyin uma ceat, 20 waleji a tavat adre me ca úling ehac, hnyi úen lingvec ae beü hmâ anyin Khong ame halubahingen hnyi úö Noa, ke e ame penapena hu, waleji adre omelö hnyat ae wakhalet hnyin, a ödrin eit hnyi köiö: 21 wale thibi e hnyi úhöúcú ae bnathu at ame omeli öbun minya walang ang, a bapataiso, ca únyi bi ge hna hneü degecâ ikikiny unyin, ke so bi he ka hnö ge únykum sa ae so ka Khong hnen möt hmetu a Iesu Keriso; 22 wale hnyi ke keihen a metân Khong, ke a ölö hnyi drany ai: ke ame löng hoton hnen ta je angela, me tavat musi, me ta je man.

HNYIMAKAN 4.

ANYIN a wale haba Keriso ame hom vec hnyi unyin, e so öbun e tet metâ me hnyok helâe; anyin a hia but mok degec hulö hnen at ame hom vec hnyi unyin; 2 m' öbun e ca he hmetu ka möt ka hnyi ta je weny at, hnyi úen a tiga öbun hnyi unyin, ke so bi ka hnyi weny Khong. 3 Ame ne soju hna ânyâ weny Aten ke je hnyei, hnyi je úen a hia but, waleji adre me vheno wigelue, me je weny ae kong, me

hwen hmiâ waina, me mede, me ta je bijeü ae kong, me hmi ka ta je hnatheat ae ikiki: 4 ke adre me láiâ ge ca tha wadring a öbun m' ödra ka hnyi imedioköu ae ti kong, ke adre me haikongu öbun: 5 ke adre me he ka ve ha hwakecidra bi kâu at ame he ka hnö tavat ae möt me tavat ae mok. 6 Ke can e adre me khetâ úthumetu ae so ka tavat ae mök, m' adre me he ka hnei ödra hnyi unyin helâ me at, k' adre möt hnyi hanu helâ me Khong.

7 Ke e hakekeny jut obiny ta je únyi hia thithö: anyin a wale metâ th' öbun ke hmâkâ thö me hic: 8 ke hon ta je únyi hia, e so öbun e ibetengiököu; anyin ame he ibetengiö ka tube ta je hulö ae se hia. 9 Imetenyimwi ju ke at ka ke at, ke ca ulidro bi; 10 helâ me hna ve kap bwihlany, e so he ka úhuliwaköu, helâ me tavat tuö soâ ibetengiö baü anyin Khong ae se hia bongon; 11 a ne fuc ke at, fuc dö helâ me hofuc hwan Khong; a ne huliwa ke at, huliwa helâ me man ame ham ge Khong: m' adre me he ka ogânâ Khong hnyi ta je únyi hia thithö ga Iesu Keriso, e unyin hna ogânâ, me musi nyiele nyiele balua. Amen.

12 Je oúnykúminy lö, ca he öbun ka láiâ ge úcúbic helâ me meic unyibun ame o he ka cubic öbun, helâke me únyi ae teb únyi ame o köbun: 13 ke so bi senyin d' öbun anyin öbun e tha hom vec me Keriso; m' öbun e he ka senyin gan hmâ e ka manen dut anyin hmanenang. 14 Adre ne haikongu öbun can ien Keriso, hnöbun hnahic; anyin ame laba unyibun Hanon hmanenang me Hanon Khong. 15 Ke ca he ke at gabun ka vec anyin a e at úblingö bi, me at venöu, me at ame ânyâ monu, me at ame hngele baü ka ta je únyi anyin keihen: 16 ke a ne vec ke at anyin a e Kerisiano ca he ka hmehma; ke so e he ka ogânâ Khong hnyi ien e. 17 Anyin a walang úen dut he ka úhnei hwân hnyi uma umen Khong: ke ame ne hwân unyita, ieü obiny ka tavat adre oúnyibâüâ úthumetu ae so anyin Khong? 18 Ke a ne huliwa but he ka omelö tavat ae wisa, ame he ka manen ua at ame ca ot me at ae kong? 19 Anyin a wale e so ka tavat adre me vec hoton weny Khong he ka ânyâ hwakecin ae so me hna je hanudrin kâu at ae hnathu, a At ame op.

II. PETERU 1.

HNYIMAKAN 5.

INYA oge me sihwegiâ wahingat unyibun, inya minya ang ke hingat, me at ohnatho je vec anyin Keriso, me at ame he ka hnyi hu hmanenang ame he ka manen: 2 Tuö ju hna hat mamoe e unyibun, me bi homakan, ca ge musi, ke so bi ge weny, hoton Khong; ke ca únyi ge behu omjeú, ke so bi ge hnyok ame weny; 3 ke ca he ka hwen thanâ je hanymöbun, ke so bi hamöbun he ka bi tulut ka hnahat mamoe. 4 Ke e ka manen dut Taben tavat tuö mamoe, me öbun e he ka hu korona ae hmanenang ame ca he ka hia but. 5 Helâe minya öbun hnyat ae teb únyi, löng ju hoton wahingat. Eke, öbun hia thithö lö, weikâ ju hwakecin ae hnyikânâ he ka uhuliwaköu: anyin a Khong ame hagutâ tavat bi gan, me ham ibetengiö baú ka tavat ae hnyikânâ oúnykúmidra. 6 Anyin a wale, ohnyikön' öbun ju hnyi hmelen hnyamen Khong ae man, me me he ka ogöranyi öbun hnyi úen ae úcú; 7 hna but káu anyibun ta je hmak hia thithö, anyin a e ame únykúmi öbun. 8 Metâ

but öbun, ke hmákâ thö: haba iwahnai-hmiöny möbun, wale diaboló ame ngenú helâ me liona ame kuku, k' ame heleú haniny: 9 hwege bala ju öbun ka hagutâ e hnyi anyibun labageju, anyin ae khan' öbun a g' ame aat dö unyin je liamekeiny möbun eang hmeledrany ta je vec helâe. 10 Ke haba Khong hwecin ibetengiö baú hia, wale ame haw' öbun ka hnyi anyin hmanenang ame ca ba balua unyin Keriso, öbun ka um dö vec hnyi úen ae okhulit, me wale at ame he ka obekhöti öbun, me otethm' öbun, me ohwegi öbun. 11 E unyin musi nyiele nyiele balua. Amen.

12 Oge hia but sihnalimen ökhulitâ köbun únyi ge Silevana, ke oge me únykúme ae liamekeiny ae hnathu, hnân he ka sihwegi öbun me ohnatho, ka habe, wale ibetengiö baú ae hnathu anyin Khong; tethmâ ju öbun hnyin e. 13 Haba ekalesia hnyi Babulona, wale adre me tha úca möbun, me ame italofa m' öbun; ke helâe minya Mareko a nökek. 14 Italofaköu ju öbun ge úcimhnyimakinny ibetengiö.

E so e unyibun hia thithö úsoköu, öbun tavat unyin Keriso.

TUSI A LOINY ANYI

PETERU.

HNYIMAKAN 1.

INYA Simona Peteru athnyaba me apösetolo anyi Iesu Keriso, oge me sihnalimen ka tavat ae hu gadra labageju ae únyi hnathu helâ m' öhmun hnyi hwakecin ae wisa unyin Khonguta me At úhömeli a Iesu Keriso: 2 e so adre osehia unyibun ibetengiö baú me úsoköu hnyi hna wâhmakhmetoâ Khong me Iesu Keriso a Tuhöta; 3 anyin a e ame hia but ham köta ta je únyi hia hnyi möt me hwakecin ae úcú me Khong, hnen maniny man, únyi ge hna wâhmakhmetoâ e, at ame ha öta ge anyin hmanenang me hnyok so; 4 ke can thibi e, e ame ham köta ta je hna ha bánâ ae únyi hnathu me gan hmâ hmönyin; m' öbun e he ka hnyi vhenó hwakecin Khong, hnen e, öbun tavat kec ge hwakecin ae kong eang hmeledrany únyi ge weny

Khong. 5 Eke, can thibi e, e so öbun e he ka ti hwege hnyi je huliwa hia, me bi hanen hnyok ae so ka hnyi anyibun labageju; me bi hanen metâ ka hnyi hnyok ae so; 6 me bi hanen hom úhnyúkongo ka hnyi metâ; me bi hanen hokhnyok ka hnyi hom úhnyúkongo; me bi hanen hwakecin ae úcú ka Khong ka hnyi hokhnyok; 7 me bi hanen hnyokâ hnyat me lakeiny ka hnyi hwakecin ae úcú me Khong; me bi hanen ibetengiö ka hnyi hnyokâ hnyat me lakeiny. 8 Anyin a ne e unyibun ta je únyi e, k' ame ne se, me wale ame he ka wi' öbun m' öbun e ca hnyat baú bi, ke ca hnyat bi adre me ca wâ, hnyi hna wâhmakhmetoâ Tuhöta Iesu Keriso. 9 Anyin a wadröu but at ae ca tren ta je únyi e, ke hadedak, k' ame hnying hna obosoâ únyi hnyi anyin ta je hulö ehac. 10 Anyin a wale, hnyat me lakeiny lö, hwege th' öbun he ka ohwádâ

II. PETERU 2.

hna haw' öbun, ke hna úc' öbun : anyin a öbun e ne ányá balua ta je únyi e me öbun e ca he balua ka thö : 11 anyin a helâe adre me he ka ti hn' öbun he ka dit ka hnyi dökhua ame ca ba balua a dokhon Tuhöta At a omeli öta, a Iesu Keriso.

12 Anyin a wale oge me he ka laba penapena he ka öünykúmi öbun ge ta je únyi e, ke so bi e khan' öbun, me tethmâ hnyi hnathu e unyibun. 13 Ke inya oge me únykúme ae so könya he ka sihwegi öbun ge hnök hna öünykúmi öbun, e me tiga inya hnyi uma menâ eang ; 14 e khandö nya ae logot oge me he ka uny degecâ but umök uma menâ, helâ me hnen Tuhöta Iesu Keriso hna omanenâ könya. 15 Eke oge me he ka hwege huliwa me me khan' öbun únykúme bala ta je únyi eang, iny ka mokcu. 16 Anyin a öhmun e ca hnu hoton ta je vekhet thoi anyin tavat ae metâ, waleji hnyi úen öhmun e omanenâ köbun man me ioiny Tuhöta Iesu Keriso, ke öhmun e hnyi wâ anyin hmanenang. 17 Anyin ae hu but gan únyi ge Khong a Kamen hna ogânâ me hmanenang, waleji ame o kâu hwan hofuc únyi hnyi hmanenang ae nua, ame ha, ka habe, Walang Nökuk a öünykúmik oge me senyin kâu : 18 ke öhmun e hnyi löng hofuc e únyi hnyi drany, waleji ke tiga öhmun unyin hnyi hon bucen ae kap. 19 Ke e hu but gahmun hofuc adre perofeta adre ti ohnathoâ ; ke so öbun e únykúme wia ka hnyin, helâ me ka lamepa ame umumelam hnyi dok ae lit, ke ne o but hnyi haolany, ke ame o thö okhú lany eú hnyi je hnyekubun : 20 ke öbun e wâhmakhmetoâ a bán, ka habe, haba je hna perofeta hia thithö hnyi hna sihnalimen, me, ame ca manen baú bi. 21 Anyin ame ca o ke hna perofeta ehac únyi hnyi weny at, ke ame ha tavat únyi ge Khong, ke a huliwan je hnyekudrin hnen Hanu Kap.

HNYIMAKAN 2.

KE ame o thö minya ta je perofeta thoi ehac unyin tavat, ke helâe ame he ka hu tavat úne thoi unyibun, tavat adre me he ka okúâ duöngâ ta je imoukôu ae hnaúhangö, me he ka ivinöâ Than at ame úcú ödra, adre me okúâ ködra bi hnaúhangö ae logot. 2 Ke se hia tavat adre me he ka hnu hoton anyidra hwen iwadedök ; me adre me he ka haikongoâ hnathu únyi gadra. 3 Ke adre me he ka úcú öbun ge hwaban hofuc ae thoi, anyin adre me beh-

nyekudra omjeú : ke haba hna he ka bi hwaban ködra ehac, me, ca bec bi, ke haba hnaúhangö adre ip hobi ködra ame ca ta mokut bi. 4 Anyin ame ne ca betenge Khong ge ta je angela hnyi úen adre me ányá hulö, ke e ame khú ödra ju hnyi gena, k' ame hn' ödra but ka hnyi je thop ao menekholom, he ka tu' ödra ke ne o but hnyi úhnei ; 5 ke ame ca betenge bi ge hmeledrany ehac, ke ame omeli Noa me hnyat minya a seven, at ame khetâ hwakecin ae wisa, hnyi úen e ame oâ uoú ka hnyi hmeledrany ae kong ; 6 ke ame ohnaúhangöâ li taun Sodoma me Gomora, me ohia, me wia me hnabadröu, me e ame ip hnân haten ka tavat adre me he hmetu ka ányá hwakecin ae kong ; 7 ke ame omeli Lota at ae wisa hwakecin, ame vec hnyekon ge hwakecin tavat ae kong ae ikiki 8 (anyin a haba at e ae wisa hwakecin, me ame tha laba m'ödra, me wâ, me löng, me ohmâkâ hnyekon ae wisa hnyi je bong ge anyidra ta je huliwa ame hanyâúâ hnanyibu) : 9 e khana Than hwakecin hna omelö tavat ae wisa hwakecidra ae úcú me Khong únyi hnyi ta je úcúbic, me he ka ip me hnân hwaban tavat ae ca wisa hwakecidra ke ne o but hnyi bong owisa ; 10 ke nua bi tavat adre me hnu hoton weny unyin ae kong, me öünyibâúâ musi. Tavat adre me ca ot, ke tavat hwege ányá wedra, adre me ca ot he ka haikongoâ ta je musi : 11 ke haba ta je angela ae nua hnyi hwege me man, me adre me ca ha hnaúhang' ödra bi hnyi hnyimakan Than. 12 Ke haba tavat ang, me helâ me ta je meno ae ba hnyekudra, k' adre hnöku ödra helâ me omeno hnân noc me hlingâ, adre me haikongoâ ta je únyi ae ca khan' ödra, ke adre me he ka hamödra hia hnyi hnödra hna ohia, 13 k' adre me he ka vec hnân bi hwaban hnödra hna ovecâ ; tavat adre me únykúme ae so he ka mede monu hnyi selany, ödra je thatúnyi, ke hnyat ae hu hnyikongon, adre me senyinâ anyidra je thoi k' adre me tiga tha han m'öbun hnyi bijeú ; 14 a unöngötö je emaködra ge bi únyi monu, ke ca khan' ödra bi he ka menâ mádrâ hulö ; ke adre me iyawâ tavat adre me ca tethmâ bi ; ke haba je hnyekudra, me khenen hnyi hwakecin behnyekon ; ödra je hnyat ha hnaúhangöâ ; 15 ödra hnyat adre me hna degecâ gethen ae wisa, k' adre me he monu, k' adre me hnu hoton gethen de Balaama nöku Beora, waleji at ame hnyokâ hwaban hwakecin ae ca wisa ; 16 ke adre me oú e can anyin monu : ke ame fuc asina ae hum

II. PETERU 3.

ge ifucin at, me thawâ hwen monu anyin perofeta. 17 Ödra je hna pupua köiö ae hme, ke ta je hai ame oüang dö; adre hia but ip hobi ködra lit ae menekholom. 18 Anyin adre me fuc bi gan me hobelöu monu, adre me iyawâ tavat adre me hap kec dö ge tavat adre me laba hnyi monu, ge ta je weny unyin, me bi únyi monu; 19 adre me ha bánâ ködra bi a g' adre me he ka hn' ödra báúâ, ke so bi haba ödra, me lathnyabainy hwakecin ae ikiki; anyin a haba at ame hom úhnyúkongoâ ke at, me wale at eling ame bâ bi kâu. 20 Anyin adre ne hia but kec únyi hnyi ta je únyi ae kong hnyi hmeledrany únyi ge hnödra hna wâhmakhmetoâ Than At úhömeli a Iesu Keriso, ke adre me vhet hmetu hnyin me hom úhnyúkongo, awe, e kong obiny hynat eling hon can. 21 Anyin ae so ködra adre ne ca hia but wâhmakhmetoâ getheniny hwakecin ae wisa, hon hnödra hna wâhmakhmeto, me hmetuhmetu únyi hnyi hnanyibu ae kap adre me ham ködra. 22 Ke ame aat dö ködra helâ me ong vejec ae hnathu, ka habe, Ame hmetu thö kuli ka hnyi hnen hna hmita, k' ame hmetu thö buaka a ka hia but söü ka hnyi hmudra he ka seset hnyin.

HNHYIMAKAN 3.

HNYAT a oúnykúmik lö, walang tusi a loiny inya oge me sihnalimen köbun; ke haba hnyi li tusi a lo hia, me oge me sihwegîâ je hnyekubun ae hnathu me oúnykúmi öbun; 2 m' öbun e he ka únykúme thö ta je hofuc a bán hwan ta je perofeta ae kap, me hnanyibu anyin Than At úhömeli a deny anyibun ta je aposetolo: 3 a böbun he ka wâhmakhmeto únyi eang a haba hnyi ta je bong a biliny, me ame he ka o tavat úhiö me úhlumöny, k' adre me he ka he hoton ta je wedra bi ae kong, 4 me ha, ka habe, Ewa hna ha bánâ a g' ame he ka o? anyin a hwân dö hnyi úen mokut a lakamöta adrem, me ame tethmâ bala ta je únyi hia thithö, waleji hwân hnyi hna op ta je únyi hia. 5 Anyin ae wedra bi he ka hnying únyi eang, ka habe, walethö drany kâü adrem, me hmeledrany minya, waleji adre tetracöâ ge köiö ke únyi hnyi köiö hnen hofuc hwan Khong; 6 ke can e haba uouú ame ohia hmeledrany waleji adrem: 7 ke haba drany me hmeledrany walang ang, me adre hia but ip únyi ge hofuc eling hnân hobi kâu meic, k' adre

me ip bi ke ne o but hnyi bong owisa me lnaúhangö anyin tavat ae ca úcü hwakecidra me Khong.

8 Hnyat a oúnykúmik lö, ca he öbun ka hnying hofuc ang a khaca, ka habe, haba hnyi hnyimakan Than, me bong a khaca helâ me wan thauzan ta je huna, ke haba ta je huna a wan thauzan, me úcü thibi me bong a khaca. 9 E ca bec bi Than hnyi hnen hna ha bánâ, helâ me únykúmenen keihen, ka habe, e bec; ke e ame hok hnyoki öbun beú hmâ, e ca weny bi ame he ke at ka hnaúhangö, ke so bi adre me he hia thithö ka ietra. 10 Ke ame he ka o bong bonginy Than helâ me at venöu; ke ame he ka hia drany me hmuhmu ae gan hmâ hnyi bong eling, ke ame he ka köiö but ge kahwa ae gan hmâ ta je únyi hia thithö, ke adre me he ka thong degecâ minya hmeledrany me ta je únyi adre huliwan hnyin e. 11 Ke can ame he ka hia ta je únyi e, me ieu hwakecin ae úcü köbun? hawa e ca so öbun e he ka tavat ae hnathu hnyi hwakecin ae kap me hwakecin ae úcü me Khong, 12 me tavat halubahingen me webun he ka o but bong bongon Khong, wale ame he ka thong drany me me he ka oköiâ e, ke ame he ka köiö but ge kahwa ae gan hmâ ta je únyi hia thithö? 13 Ke hoton hnen hna ha bánâ, ate me halubahingen drany a teb únyi me hmeledrany a tebúnyi, wale ame he ka laba hnyin hwakecin ae wisa.

14 Anyin a wale, hnyat a oúnykúmik lö, haba öbun tavat öbun e halubahingen ta je únyi e, hwege thö, m' adre me ö 'bun dö hnyi úsoköu ae ba hnyikongon me hnân haikongu öbun hnyi hnyimakan. 15 Ke únykúme ju öbun a haba hok hnyok beú hmâ anyin Tuhöta me wale möt, helâ me hna sihnalimen köbun ga Paulo liamekeiny m' öta a oúnykúmita, hoton metâ adre ham kâu; 16 ke helâe hnyi anyin ta je tusi ame ha hnyin ta je únyi e; ke wale thibi e ke je hofuc ae hmak he ka wâ tremângâ, adre wia hnen tavat adre ca ná me tavat loloâ, helâe minya ke je hna sihnalimen, m' adre me ka ohnaúhang' ödra bi. 17 Anyin a wale hnyat a oúnykúmik lö, ö 'bun áu, anyin ae khan' öbun dut ehac wâ öbun nye ta hnyi hnöbun hna tet hmâ e, e ka lili öbun ge monu anyin tavat ae monu. 18 Ke húhúö th' öbun hnyi ibetengiö baú me wâhmakhmetoâ Tuhöta At úhömeli, a Iesu Keriso. E unyin hmanenang walang ang me nyiele balua. Amen.

IOANE.

HNYIMAKAN 1.

HABA únyi ae únyi hnyi can waleji öhmun e löng me wâ ge je emaköhmun, me wâ hmâ, me kâlâ ge je hnyamöhmun, hnyi Hofucin Möt 2 (ke a manen dut möt, k' öhmun e hia but wâ me ohnathoâ, me thumetu öbun ge möt a nyiele balua bi, waleji ae unyin Kamen, k' adre me omanená köhmun): 3 ke öhmun e omanená köbun únyi öhmun e wâ me löng, m' öbun e he ka tha laba m' öhmun : eke, ke öhmun e tha laba me Kamen me Nokon a Iesu Keriso : 4 ke öhmun e sihnalimen ta je únyi ang, me me hwâdâ but anyita senyin.

5 Ke walang úthumetu öhmun e hia but löng únyi gan, me haimemenâ köbun, ka habe, Khong thibi melam, ke ba ju ke ong lit unyin. 6 Ate ne ha, ka habe, ötin e tha laba mē, k' ate me vheno bi hnyi lit, awe, ate me thoi, k' ate me ca ânyâ hnathu : 7 ke ate me ne he hnyi melam, helâ me e hnyi melam, awe, ate me tha laba ke at me ke at, k' ame hneú degecâ anyita ta je hulö hia thithö hnen drö Iesu a Nokon. 8 Ate me ne ha, ka habe, e ba anyita hulö, awe, ate me ka iyaw' öta, ke ba hnathu unyita. 9 Ate me ne omanená anyita ta je hulö, me e at ae hnathu ke wisa he ka hna degecâ bi anyita ta je hulö, me hneú degecâ ta je hwakecita hia thithö ae ca wisa. 10 Ate me ne ha, ka habe, ate me ca hia but hnyi ânyâ hulö, awe, ate me wia e me at thoi bi, ke haba hwan hofuc, me ca eú hnyi je hnyekuta.

HNYIMAKAN 2.

JE lakuk lö, inya oge me set köbun ta je únyi e, m' öbun e ca he ka ânyâ hulö. Ke a ne ânyâ hulö ke at, me hu but gata Úhadruö unyin Kamen a Iesu Keriso at ae wisa : 2 ke e thibi hut can anyita ta je hulö; ke ca hake öta thibi, ke can minya

bi hmeledrany hia thithö. 3 Ke walang haten a ga khan' öta e, ka habe, ate ne löng hoton anyin hnanyibu. 4 Haba at ame ha, ka habe, e khanö nya but e, k' ame ca löng bi hoton anyin ta je hnanyibu, awe, e ame thoi, ke ca e bi eú hnyi hnyekon hnathu : 5 ke haba at ame löng hoton hwan hofuc, me hnathu adre hia but obekhötâ eú hnyin at e hnyok ka Khong. Waleling me me khan' öta a öta but eú hnyi hnyekon : 6 haba at ame ha, ka habe, e ame laba eú hnyi hnyekon, me úcú kâu he ka he helâ me úheny.

7 Hnyat a oúnykúmik lö, oge me ca sihnalimen köbun hnanyibu a teb únyi, ke so bi hnanyibu adrem, waleji öbun e hu únyi hnyi can: haba hnanyibu adrem, me waleji hofuc öbun e löng. 8 Wale hmetu ang, inya oge me set köbun huanyibu a teb únyi, wale ae hnathu gan me gabun; anyin ame hia tot menekholom, ke ame umu-melam walang ang melam ae hnathu. 9 Haba at ame ha, ka habe, e but hnyi melam, ke ame húkötíâ bi liamekeiny mē, awe, e bala bi hnyi lit ke ne o but walang ang. 10 Haba at ame betenge ka liamekeiny mē, e but hnyi melam, ke ba únyi hnân othoâ gan. 11 Ke haba at ame húkötíâ liamekeiny mē, e bala hnyi lit, k' ame he hnyi lit, ke ca khana hnen hna he ka hnyin, anyin ame öwadruâ li emakan hnen lit.

12 Inya oge me set köbun je wanakat, anyin adre hna degecâ anyibun ta je hulö únyi hnyi ien. 13 Inya oge me set köbun je kamen anyin ae khan' öbun e, waleji únyi hnyi can. Inya oge me set köbun wahidröu, anyin a öbun e hwege hon at ae kong. Oge hia but set köbun je wanakat, anyin ae khan' öbun Kamen. 14 Oge hia but set köbun je kamen, anyin ae khan' öbun at, waleji únyi hnyi can. Oge hia but set köbun wahidröu, anyin a öbun hwege, k' ame tethmâ eú hnyibun hofuc hwan Khong, ke öbun e tubun hon at ae

I. IOANE 3.

kong. 15 Ca he öbun ka hnyokâ hmeledrany, me ta je únyi eang hmeledrany. A ne ke at ame hnyokâ hmeledrany, me ba bi hnyok ka Kamen eú hnyi hnyekon. 16 Anyin a haba ta je únyi hia thithö eang hmeledrany, wale behnyekon ta je únyi hnyi unyin, ke behnyekon hnen li ecmak, ke hobeluâ monoâ möt ang, me ca únyi ge Kamen, ke únyi eang hmeledrany. 17 Ke haba hmeledrany, me ame he bi ka hia, me ta ge weny ka hnyin: ke ame he ka tethmâ nyiele balua at ame mádrâ weny Khong.

18 Je wanakat lö, haba awa ang, me obiny: ke helâ me hnöbun hna löng a g' ame he ka o iwahnaihmiöny me Keriso, ke se hia je iwahnaihmiöny me Keriso walang ang; waleling me manen köta a haba awa ang, me obiny. 19 Adre me he but unyita, ke so bi ca lahanöta ödra; anyin adre ne je lahanöta, me adre me ne hia but tethmâ unyita: ke adre me he but, me me manen dut a ca je lahanöta ödra hia. 20 Ke so bi adre me hú öbun únyi ge At ae Kap, ke manen köbun ta je únyi hia thithö. 21 Oge me ca sihnalimen köbun anyin ae ca khan' öbun únyi ae hnathu, ke so bi, anyin ae khan' öbun e, ke anyin ame ca o thoi únyi hnyi hnathu. 22 Ewa at thoi, ca e at ame ha, ka habe, ca Keriso bi Iesu? Haba at ame ivinöâ Kamen me Nokon, me wale iwahnaihmiöny me Keriso. 23 Haba at ame ivinöâ Nokon, me hia but Kamen unyin: ke haba at ame haimemenâ Nokon, me e but unyin minya Kamen. 24 Ke haba öbun, me so ame laba bala eú hnyi je hnyekubun hofuc öbun e löng hnyi can. Ame ne he ka e bala eú hnyi je hnyekubun hofuc öbun e löng únyi hnyi can, me öbun e he ka laba balua bi unyin Nokon me unyin Kamen. 25 Ke walang hna ha bánâ waleji e ame ha bánâ köta, möt ame ca ba balua. 26 Oge hia but sihnalimen ta je únyi e köbun ge tavat adre beomonu öbun. 27 Ke haba öbun, me ame tethmâ unyibun hna osúâ waleji öbun e kap únyi gan, ke ca únyi hnathu köbun ame he ke at ka n' öbun; ke haba hnen hna osúâ ame n' öbun hnyi ta je únyi hia, ke e hnathu e, k' ame ca thoi bi, ke helâe, e ame n' öbun, ke so öbun e tethmâ hnyin. 28 Ke walang ang je wanakat lö, laba ju eú hnyi hnyin; me me hu gata hnyok ae hwege, e ka manen dut, m' ate me ca he ka hmehma hnyi hnyimakan e ka o but. 29 A ne khan' öbun a e at ae wisa, awe, e khan' öbun minya a g'

adre hnoko únyi gan tavat hia adre me ányâ hwakecin ae wisa.

HNYIMAKAN 3.

WÂ bi úganiny ibetengiö waleji a ham köta Kamen, m' adre me he ka ha' öta me je lakon Khong: ke öta e. Waleling me me ca khan' öta hnen hmeledrany, anyin ae ca khan' ödra e bi. 2 Hnyat a oúnykúmik lö, öta je lakon Khong walang ang, ke tiga ca manen bi bonguta nyiele. Ke e khan' öta, ka habe, e ka manen dut, me ate me he ka helâ mē; anyin ate me he ka wâ cicöâ e. 3 Ke haba ödra hia ae hu gadra geju eang, me, adre me okabi ödra bi, helâ mē ae kap. 4 Haba ödra hia adre me ányâ hulö, me adre me hanyâúâ hnanyibu: ke haba hna hanyâúâ hnanyibu, me wale hulö. 5 Ke e khan' öbun a g' ame manen dut me me he ka hom degecâ hulö; ke ba anyin hulö. 6 Haba at ame laba eú hnyin e ame ca mádrâ hulö: haba at ame ányâ hulö, me ame ca hia but wâ e, ke ame ca wâhmakhmetoâ e. 7 Je wanakat lö, ca he ka omonu öbun hnen ke at: e wisa at ame ányâ hwakecin ae wisa, helâ mē ae wisa: 8 únyi ge diabolö at ame ányâ hulö; anyin ame ányâ hulö diabolö únyi hnyi can. K' a manen dut Nokon Khong, me me he ka ohia ta je huliwa anyin diabolö. 9 Ame ca ányâ hulö at adre hnokoâ únyi ge Khong, anyin ame laba eú hnyi hnyekon wan gan; ke e ca khana he ka ányâ hulö, anyin adre hnokoâ únyi ge Khong. 10 Únyi hnyi e, me manen dut lakon Khong me lakon diabolö: anyin a ca únyi ge Khong at ame ca ányâ hwakecin ae wisa, me at minya ame ca betenge me liamekeiny mē. 11 Anyin a walang úthumetu öbun e löng únyi hnyi can, ka habe, hamöta he ka ibetengiököu: 12 ca helâ me Kaina, a únyi ge at ae kong, k' ame hlingâ keiny. Ke can ieú e ame hlingâ e? Can ae kong anyin bi ta je huliwa, ke wisa bi ta je huliwa anyin keiny.

13 Hnyat me lakeiny lö, ca he bi ka hlohlo e ka húkoti öbun hnen aten hmeledrany. 14 E khan' öta, a ate me hia but didrö únyi hnyi mok ka hnyi möt, anyin ate me betenge ge je liamekeiny. Haba at ame ca betenge, me e bala bi hnyi mok. 15 Haba at ame húkotiâ liamekeiny mē, me e thibi at úhlingö; ke e khan' öbun dut a haba at úhlingö, me ba bi möt ame ca ba

I. IOANE 4.

balua eú hnyi hnyekon. 16 Ke manen köta ibetengiö anyin a e ame hamen ham anyin möt hnân hobi köta: me úcú minya köta he ka ham anyita möt hnân hobi káu je liamekeiny. 17 Haba at ae hu ta únyi eang hmeledrany, k' ame wâ liamekeiny mē ae theduoc, k' ame thelöng oúnykúminy gan, me ame he ka kâmâu hnyok ka Khong ka laba eú hnyin at e? 18 Je wanakat lö, ca he öta ka betenge thibi ge hofuc, me bohmen; ke so bi hnyi huliwa me hnathu. 19 Hnen e ate me he ka wâhmakhmeto a úheta hnyi hnathu, k' ate me he ka cubec je hnyekuta hnyi hnyimakan, 20 hnyi únyi ame haikongu öta hnen hnyekuta: anyin ae beönua bi Khong hon ta je hnyekuta, me khana ta je únyi hia thithö. 21 Hnyat a oúnykúmik lö, a ne ca haikongu öta hnen je hnyekuta, me hu but gata hnyok ae hwege ka Khong; 22 ke haba únyi ate me sumâtâ me ate me hu but gan, anyin ate me löng hoton anyin hnanyibu, me ányâ ta je únyi ae so hnyi hnyimakan. 23 Ke walang ang anyin hnanyibu, ka habe, hamöta he ka labageju ka hnyi ien Nokon a Iesu Keriso, me ibetengiököu, helâ me hnanyibu a ham köta. 24 Ke haba at ame löng hoton anyin ta je hnanyibu, me ame laba eú hnyi hnyekon, ke e minya eú hnyi hnyekon. Ke hnen bi e, me ate me wâhmakhmeto a e ame laba eú hnyi hnyekuta, únyi ge Hanu e ame ham köta.

HNYIMAKAN 4.

HNYAT a oúnykúmik lö, ca kap bi ta je hanu hia, ke cubec ju ta je hanu, hawa, únyi ge Khong ödra: anyin ae se hia ta je perofeta thoi ame o ehe hnyi hmeledrany. 2 Hnen únyi ang öbun e wâhmakhmetoâ Hanon Khong: haba ta je hanu hia adre me ha, ka habe, a o but Iesu Keriso hnyi unyin, me wale hanu únyi ge Khong: 3 ke haba ta je hanu adre me ca haiö Iesu, me ca únyi bi ge Khong ödra: ke wale hanon iwahnaihmiony me Keriso, waleji öbun e löng a g' ame he ka o; ke e bi walang ang hnyi hmeledrany. 4 Je wanakat lö, únyi ge Khong öbun, ke öbun hwege hudrin: anyin ae beönua at eú hnyi je hnyekubun, hon at eú hnyi hmeledrany. 5 Ödra lahanen hmeledrany, anyin a wale adre me hwen hmeledrany, ke ame ling ödra hnen hmeledrany: 6 Öhmun tawat únyi ge Khong: ke ame ling öhmun hnen at ame

wâhmakhmeto Khong; ke ame ca ling öhmun hnen at a ca únyi ge Khong. Hnen únyi e ate me wâhmakhmeto hanu ae hnathu, me hanu ae monu.

7 Hnyat a oúnykúmik lö, e so ate me he ka ibetengiököu: anyin a únyi ge Khong ibetengiö; ke adre hnoko únyi ge Khong ödra hia adre me hnyi betenge, ke adre me wâhmakhmeto Khong. 8 Haba at ame ca hnyi betenge bi, me ca khana bi e hnen Khong; anyin a Khong ibetengiö. 9 Adre hia but omanená köta ibetengiö anyin Khong, waleji hnyi hnen Khong hna kunâ ka hnyi hmeledrany Nokon a khaca, m' ate me he ka möt únyi gan. 10 Wale thibi ang ibetengiö, ca hnöta hna hnyok ka Khong, ke so bi hnen hna hnyok köta, me hna kunâ Nokon hnân hut can anyita je hulö. 11 Hnyat a oúnykúmik lö, a ne betenge gata Khong helâe, hamöta he ka ibetengiököu. 12 E ba bala at ame wâ Khong: ate ne ibetengiököu, me Khong ame laba eú hnyi je hnyekuta, ke adre obekhötâ anyita ibetengiö káu eú hnyita: 13 ke e khan' öta a ate me laba eú hnyin hnyekon, ke e bi eú hnyi je hnyekuta, anyin a e ame ham köla Hanon. 14 Ke öhmun e hia but wâ me ohnatho, a ga kunâ Nokon hnen Kamen he ka omelö hmeledrany. 15 Haba at ame he ka ha, ka habe, Iesu Nokon Khong, me Khong ame laba eú hnyin, ke e bi eú hnyi hnyekon. 16 Ke ate me wâ me labagejoâ ibetengiö anyin Kong köta. Haba Khong, me ibetengiö; ke haba at ame laba hnyi ibetengiö, me ame laba hnyi hnyekon Khong, ke Khong eú hnyi hnyin. 17 Hnen thibi ang adre me obekhötâ ibetengiö unyita, m' ate me he ka hu hnyok ae hwege hnyi bong owisa: anyin a öta tha úcú mē eang hmeledrany. 18 E ba ot hnyi ibetengiö: k' ame obâ degecâ ot hnen ibetengiö ae bekhöt, anyin ae tren vec ot; k' adre ca obekhötâ at ame ot, hnyi ibetengiö. 19 Ate me betenge, anyin a e ame bân ka betenge gata. 20 E ka ha hnen ke at, ka habe, Oge me hnyokâ Khong, k' ame húkotiâ liamekeiny mē, me at thoi bi: anyin a haba at ame ca betenge ka liamekeiny mē, ame wâ, me ca khana he ka hnyokâ Khong, ame ca wâ. 21 Ke walang hnanyibu ae hu gata únyi gan, a haba at ame hnyokâ Khong, me ame he ka betenge minya ge liamekeiny mē.

·II. IOANE.

HNYIMAKAN 5.

ADRE hnokoâ únyi gë Khong hnyat adre me kap, ka habe, Iesu thibi Keriso : ke haba at ame hnyokâ at a hnokoâ, me ame he ka hnyokâ minya at e ame hnokoâ. 2 Hnen thibi ang e manen köta a g' ate me betenge ka lakon Khong, anyin ate me hnyokâ Khong k' ate me löng hoton anyin ta je hnanyibu. 3 Haba hnyok ka Khong, me wale thibi ang, a g' ate me löng hoton anyin ta je hnanyibu : e ca hmak anyin ta je hnanyibu. 4 Anyin ame hwege hon hmeledrany únyi a hnokoâ ge Khong : ke walang hwege ae hwege hon hmeledrany, wale anyita labageju. 5 Anyin a ie at ae hwege hon hmeledrany, hawa ca at bi ame kap a Nokon Khong thibi Iesu Keriso? 6 E thibi at eji ame o hnyi köiö me dra, Iesu Keriso ; ca hake hnyi köiö, ke köiö me dra. 7 Ke Hanu at ame ohnatho, anyin ae hnathu Hanu. 8 Anyin a ödrin kun hnyat ödrin e ohnatho, wale Hanu, me köiö, me dra : ke khaca thibi, kun eling. 9 Ate ne kap hna ohnathoâ únyi ge at, e beönua hon e hna ohnathoâ únyi ge Khong : anyin a walang hna ohnathoâ únyi ge Khong, a e ame ohnathoâ Nokon. 10 Haba at ame labageju ka Nokon Khong, me e hu but eú hnyi hnyekon hna ohnatho : haba at ame ca labageju ka Khong, me ame hai thoiâ e ; anyin a e ame ca hia but kap hnen Khong hna ohnathoâ Nokon. 11 Ke walang hna ohnatho, a Khong ame ham köta möt ae ca ba balua, ke únyi ge Nokon möt eling. 12 Haba at

ae hu but gan Nokon, me hu but gan möt ; ke haba at ae ca hu gan Nokon Khong me ca hu bi kâu möt.

13 Oge hia but sihnalimen ta je únyi e köbun tavat öbun e labageju ka ien Nokon Khong, me me khan' öbun ae hu but gabun möt ae ca ba balua. 14 Ke walang hnyok ae hwege ate me hu kâu, a öta ka he ka sumâtâ ke únyi helâ me weny, me ame ling öta : 15 ke a ne khan' öta a e ame ling öta hnyi hnöta hna sumâtâ, me e khan' öta ae hu but gata minya ta je únyi ate me sumâtâ gan. 16 A ne ke at ame wâ liamekeiny më ame ânyâ hulö adre me ca mekiny, me e ame he ka sumâtâ, ke Khong ame he ka ham kâu möt hobi kâu at ame ânyâ hulö a ca hnân mekiny. E hu hulö hnân mekiny : oge me ca ha a e ame he ka khöüâ e. 17 Haba ta je hwakecin hia ae ca wisa bi, wale hulö : ke e hu hulö bi a ca hnân mekiny.

18 E khan' öta bi a g' ame ca ânyâ hulö hnen at adre hnokoâ únyi ge Khong ; ke ame tuö e hnen at eji a hnokoâ únyi ge Khong, ke ame ca kâlâ e hnen at ae kong. 19 E khan' öta a úheta unyin Khong, ke hmeledrany hia thithö ame mokut unyin at ae kong. 20 Ke e khan' öta a g' ame hia but o Nokon Khong, ke a hia but ham köta hna wâhmakhmeto, me me khan' öta e at ae hnathu, ke öta but eú hnyi hnyekon at ae hnathu, wale eú hnyi hnyekon Nokon a Iesu Keriso. Wale Khong ae hnathu, me möt ame ca ba balua. 21 Je wanakat lö tu' öbun ju ge ta je hnatheat.

TUSI A LOINY ANYI

IOANE.

INYA hingat oge me sihnalimen ka ishola adre úca me lakon, hnyat oge me hnyok ködra hnyi hnathu ; ke ca hake inya bi, ke ödra hia minya ae hnyi khan' ödra hnathu ; 2 únyi hnyi hnathu ame laba eú hnyita, k' ame he ka e unyita nyiele balua : 3 ame he ka e unyita, ibetengiö baú, me ibetengiö, me úsoköu únyi ge Khong a Kamen, ke únyi ga Iesu Keriso

a Nokon Kamen, hnyi hnathu me ibetengiö.

4 Inya oge me senyin gan hmâ, anyin oge me wâ a ga vheno hnathu ke je lakom, helâ me hnanyibu ate me kap únyi ge Kamen. 5 Ke walang ang oge me újôngi u ishola, ca helâke oge me set köu hnanyibu a teb únyi, ke so bi hnöta hna hu únyi hnyi can, a g' ate me ibetengiököu. 6 Ke

III. IOANE,

walang ibetengiö, ka habe, ate me he ka hnu hoton anyin ta je hnanyibu. Walang hnanyibu öbun e löng únyi hnyi can, m' öbun e he ka vheno e. 7 Anyin ae se hia tavat iyawö eang hmeledrany, hnyat adre me ca hmehmelâ a ga o Iesu hnyi unyin. Haba at eling ame omono, ke iwahnai-hmiöny me Keriso. 8 Ö 'bun aú, wâ e nye hia but gabun ta je únyi öhmun e hia but huliwan, ke so öbun e kap hwaban ae unöngöt. 9 Haba at ame úne k' ame ca tethmâ hnyi hna úne anyin Keriso, me Khong ame ca laba unyin : ke haba at ame tethmâ hnyi hna úne anyin Keriso, me hu

but gan Kamen me Nokon minya. 10 E ka o ke at köbun, k' ame ca hom bi hna úne eang, me cã he ka kap e ka hnyi um-öbun je uma, ke ca italofa bi mē: 11 anyin a haba at ame italofa mē, me ame hnyi hanen anyin je huliwa ae kong.

12 E hu but gak ta je hofuc ae se hia he ka sihnalimen köbun, ke ca bewek he ka set hnyi peipa me köiö sisit, ke so bi oge me gejon he ka o but köbun, me úhne-namö iohnyimak, me me hwâdá anyibun senyin. 13 Ame italofa köu hnen lakon ke momo adre úca.

TUSI A KUNINY ANYI

IOANE.

INYA hingat oge me set kö Gaio a oúnykúmik, at oge me hnyok kâu hnyi hnathu.

2 Oúnykúmik lö, oge me khöúâ me u me sot, me hwege anyâm helâ me ihwegien hanom. 3 Anyin oge senyin gan hmâ waleji ge ioiny hnyat me lakeiny me ohnathoâ hnathu gam, helâ me hnâm hna vheno hnathu. 4 E ba anyik senyin ae nua hon iny ka he ka löng a ga vheno hnathu hnen lakuk.

5 Oúnykúmik lö, u me ânyâ huliwa ae hnathu hnyi hnâm hna ânyâ hia ka je hnyat me lakeiny, me ta je atkanyua minya: 6 a tavat adre me ohnatho hnyi hnyimakan ekalesia ânyâm ibetengiö: ke u me he ka ânyâ so, u ka he ka su ödra hoton hwakecin ae úcú ka Khong hnyi hnödra hna he. 7 Anyin adre he can Ien, ke ba únyi adre me hom ge Aten ke je hnyei. 8 Anyin a wale e úcú köta he ka kap soâ tavat helâe, m' ate me he ka tha huliwan hnathu.

9 Oge me set ka ekalesia: ke haba

Dioterefe, at ame benua hudrin, me ame ca köp öhmun. 10 Anyin a wale, oge ne o, oge me he ka únykúme ta je únyi e ame ânyâ, ame bifuci öhmun ge ta ge hofuc ae kong: ke ca soju ta je únyi eling, ke e ame ca kap minya bi hnyat me lakeiny, ke e ame thawâ tavat adre me wedra he ka kap, me ob' ödra ge ekalesia. 11 Oúnykúmik lö, ca hnu hoton únyi ae kong, ke so bi únyi ae so. Únyi ge Khong at ame ânyâ so: haba at ame mâdrâ monu, me e ame ca wâ Khong. 12 Haba Demetio, me adre me ohnathoâ hnen tavat hia, ke hnen minya hnathu bi: eke, öhmun minya öhmun e ohnatho; ke e khanö u a e hnathu hnö-hmun hna ohnatho.

13 E hu gak ta je únyi ae se hia he ka sihnalimen köu, ke ca wek he ka set köu ge köiö sisit me pen: 14 ke inya oge me gejon he ka ie iouny möu, ke ötu me he ka úhnenamö úhnyimaköu. E so e unyâm úsoköu. Je lahanöta ödrin e italofa möu. Inya oge me ve italofa ka je lahanöta.

TUSI ANYI
J U D A.

INYA Juda athnyabai Iesu Keriso, liamekeiny me Iakobo, oge me set ka tavat adre haw' ödra, me laoünykúminy Khong a Kamen, tavat adre tu' ödra hobi kö Iesu Keriso: 2 e so e si but unyibun ibetengiö baú, me úsoköu, me ibetengiö.

3 Hnyat a oünykúmik lö, oge me wek hmönyin he ka set köbun ge möt adre ham gáná köta, k' ame újöngi nya hnyekuk he ka set köbun me sihwegi öbun, m' öbun e he ka hwege úsabö úöhwege hobi káu labageju, waleji adre tha ham ka tavat ae kap. 4 Anyin ame dit duöug keihen, a hnyat adre ip ehac hnân hobi káu hnaúhangö eang, hnyat adre me ca outen Khong, k' adre me wia ibetengiö baú anyin Khong ka hnyi hwakecin ae ikiki, k' adre me ivinöa Tuhöta a khaca a Than Iesu Keriso.

5 Inya oge me wek he ka oünykúmi öbun, ke so bi e khan' öbun wia but ehac, ka habe, haba Than ame omelö tavat únyi hnyi hnyei Aigupito, ke hwaban e, e ame ohia tavat adre me ca labageju. 6 Ke haba ta je angela waleji adre me ca tethmä hnyi hanymödra ae gan hmá, ke adre me hna degecá hing hnyabadra, me e ame hia but c' ödra hnyi menekholom a nyiele balua ke ne o but bong owisa a bong ae gan. 7 Helá me Sodoma me Gomora me je taun igigilö adre me tha hwakecidra me bi únyi monu, k' adre me hnu hoton ke je unyin bi, me adre me ip ödra hnân haten, k' adre me hang' ödra ka hnyi meic ame ca he bi ka mok. 8 Ke heláe minya tavat ang, adre me bwi me oikikiá unyidra, k' adre höciá tavat musu, k' adre haikongoá wahmanenang. 9 Ke haba Mikaela angela ae nua ame úöhwege me diabolö k' ame iwatretra ge unyi Mose, me ca hwege he ka haikongoá e, ke e ame ha, ka habe, Hamen bi Than he ka thawö u. 10 Ke haba ödra ang, me adre me hiakongoá ta je únyi ae ca khan' ödra: ke haba ta je únyi ae khan' ödra hoton unyin, helá me ta je

meno ae ba hnyekudra, me adre me hang' ödra hnyi ta je únyi e. 11 E kölö gadra! anyin adre me vhenö gethen de Kaina, me patrutrua ka hnyi monu anyi Balaama hnân hwaban, me mok hnyi ivinö anyi Kora. 12 Haba ödra ta je okongon hnyi anyibun bijeúiny ibetengiö, ödra ka tha hnyi bijeú m' öbun, ödra tavat tuö mamoe adre ha ödra bi, me ca ot; ödra je úlá ae ba köien, ame ou ang dö; ödra je úö ae ba wan hnyi úen he ka wa, a olo mok, adre oc dö me iwán; 13 ödra je waköioiny köio ame khutu, a húlúlú hangöc dö je únyi hnân ohmehm' ödra; ödra ta je okhú adre me he monu, ke adre hia but ip hobi ködra bi litiny menekholom ame ca ba balua. 14 Ke haba Enoka, waleji a seveniny hwân ga Adamu, ame perofeta minya ka tavat ang, ka habe, Wá ju ame he ka o Than tha e me anyin wakap a je ten thauzan, 15 he ka bi hwaban ka tavat hia thithö, me he ka ohwádá ka tavat adre ca outen Khong, anyidra ta je huliwa ae ca úcú ka Khong, waleji adre ányá me ca ot ka Khong, me ta je hofuc ae hwahwacit waleji a ha gan tavat ae kong adre me ca outen Khong. 16 Ödra tavat ulit, me tavat fuc, adre me he hoton ta je wedra ae kong (ke ame fufuc je hnyimödra) k' adre me ogáná at me me hu troban bi ködra.

17 Ke haba öbun, laoünykúmik lö, únykúme ju öbun je hofuc waleji ame ha ehac je aposetolo anyin Tuhöta Iesu Keriso; 18 adre ha köbun, ka habe, Ame he ka o hnyi úen a biliny tavat úhiö, adre me hnu hoton ta je wedra ae ca úcú me Khong. 19 Ödra e tavat adre me okúá imouköu, adre me hwen unyin, ke ca hu bi Hanu. 20 Ke haba öbun, laoünykúmik, up öbun dö göranyai hnyi anyibun labageju ae ti kap, me hic hnyi Hanu Kap, 21 ke tu' öbun ju hnyi ibetengiö anyin Khong, ke halubahingen ju öbun ibetengiö baú anyin Tuhöta Iesu Keriso, ke ne o but ka hnyi möt ame ca ba balua. 22 Ke betenge ju

HNA OMANENÂ 1.

öbun ka keihen tavat adre me loloá ; 23 ke omelö thö keihen, me lili ödra ju únyi hnyi meic ; ke betenge ju ka keihen me ot, ke ikikiá thö úkhaú ame okongoá hnen unyin.

24 Ke so e unyin at ae khana he ka tu' öbun, wá öbun nye ü but, me omanen' öbun ae ba hnyikongon hnyi hnyimakan

anyin hmanenang me senyin ae gan, 25 e so e unyin Khong a khaca, At a omeli' öta a deny Iesu Keriso a Tuhöta, hmanenang, me mec, me musu, me man, hwan adrem balua, me walang ang, me nyiele balua. Amen.

HNA OMANENÂ KÖ IOANE.

HNYIMAKAN 1.

WALANG hna omanená anyi Iesu Keriso, waleji hnen Khong hna ham káu he ka omanená ka lathnyabainy, wale ta je únyi ame he ka ie o : ke e ame kuná me omanená e deny anyin angela ka athnyabainy a Ioane ; 2 waleji at ame ohnathoá hofuc hwan Khong, ke hna ohnatho hnö Iesu Keriso, a ta je únyi hia e ame wá. 3 Hnahic hnen at ame aú, me tavat adre me löng hofuc adre perofeta, me löng hoton ta je únyi adre sihnalimen hnyin : anyin ae hakekeny jut ün.

4 Inya Ioane oge me set ka ta je ekalesia a seven hnyi Asia : E so e unyibun ibetengió báu, me úsoköu únyi gan, at a e walang ang, ke káu adrem, ke ame he ka o ; me únyi ge ta je Hanu a seven hnyi hnyimakan anyin theron ; 5 me únyi ga Iesu Keriso at ohnatho ke hnathu, wale atöiny tavat úhedra hnyi hna mok, ka tuhan ta je than hnyi hmeledrany. E so e unyin at ame betenge gata, k' ame thang degecá anyita ta je hulö únyi ge dren ; 6 k' ame wi' öta me me dökhü me hnyat bihut ka Khong a Kamen ; e so e unyin hmanenang me dökhü nyiele nyiele balua. Amen. 7 Wábie ame he ka o hnyi ta je úlá ; k' ame he bi ka wá e hnen ta je ecmak hia, me tavat waleji adre me dá e ; ke ame he ta je tribu hia eang hmeledrany ka tenge thungaú gan. Eke, Amen.

8 Inya ang Alefa me Omega, haingen Than a Khong, a inya ang, ke inya káu adrem, ke inya at ame he ka o, At ae khana hia.

9 Inya Ioane, liamekeiny m' öbun me tha inya m' öbun hnyi vec, me dokhu,

me hok hnyok únyi Iesu, oge mwi but hnyi bomene Patamo ien, can hofuc hwan Khong me hna ohnathu Iesu. 10 Inya but hnyi Hanu hnyi bong bonginy Than, ke oge me löng hnyi hotuk hofuc ae gan helá me hwan khoto, ame ha, ka habe, 11 Haba ta je únyi u je wá, sihnalimen ju hnyi ke tusi, me kuná ka ta je ekalesia : wale Efeso, me Semurina, me Peregamo, me Thuataira, me Saradi, me Filadelefa, me Laodikea. 12 Ke oge me hwiö he ka wá hofuc ame fuc könya. Ke oge me hwiö thö, me oge me wá je taben lamepa gol a seven ; 13 ke e hnyi wanben je taben lamepa a seven ke at helá me Nokon at, a khavá úkhaú ame beú ke ne o but hnyi hnyeúcan, ke ame weiká úlainy ge wen a gol. 14 Ke haba ban me leúnen ban, me hau helá me leúnen mamoe, ke helá me kiona ; ke helá me bahlân meic li emakan ; 15 ke helá me bras ae hadröngöc li can, heláke adre le hnyi meic ae gan ; ke haba ifucin, me helá me hwan köio ae se hia. 16 Ke e hu hnyi hnyamen a metân, je okhú a seven : ke ame o hnyi hnyimen hele vat a lo homakan ae so hwan : ke haba hnyimakan, me helá me seúnö ae hadröngöc hmönyin. 17 Ke oge me wá e, me oge me ta hnyi hmelen li can helá me at a mokcu. Me e ame ip hnyamen a metân huk, me ha, ka habe, ca ot ; Inya ang a bân me biliny, 18 ke at ae Möt ; ke oge hia but mok, ke wá bi iny möt nyiele nyiele balua, ke e hu gak je kiiny mok me Hedis. 19 Anyin a wale sihnalimen ju ta je únyi eji u me wá, me ta je únyi walang ang, me ta je únyi ame he ka o nyiele ; 20 walang bongon ae iyong a ta je okhú a seven waleji u je wá hnyi hnyamök a metök, me je taben lamepa gol a seven.

HNA OMANENÄ 2.

Haba je okhú a seven, me wale ta je angela anyin ekalesia a seven: ke haba je taben lamepa a seven u je wá, me wale ta je ekalesia a seven.

HNYIMAKAN 2.

SIHNALIMEN ju ka angela anyin ekalesia hnyi Efeso, ka habe,

Walang ta je únyi ame ha hnen at ame kát ta je okhú a seven hnyi hnyamen a metán, wale at ame he hnyi wanben je taben lamepa gol a seven: 2 E khanö nya ányám ta je huliwa, me ányám vec, me hnám hna hok hnyok, me hnám hna húkotiá tavat adre me bi únyi monu, ke u je cubec hnyat adre me ha, a ödrin ta je aposetolo, ke ba bi, ke u me wá a ödra tavat thoi; 3 ke u je hok hnyok me lingvec can iök, ke u me ca sényin bi. 4 Ke so bi e hu gak únyi ang gam, a u me hna degecá wem a bán. 5 Anyin a wale únykúme ju hnám hna ta hnyin, me ietra ju, me ányá thö ta je huliwa a bán; ke a ne ba, oge me he ka o köu he ka hom taben ányám lamepa únyi hnyi hnen, u ka ca ietra. 6 Ke hu gam únyi ang a u me húkotiá ta je huliwa anyin at Nikolao, waleji oge me hnyi húkotiá. 7 Haba at ae hu hnyikönyen löng ju hna ha hnen Hanu ka ta je ekalesia. Haba at ame ton, me oge me he ka ham köu he ka han únyi hnyi úöiny möt, walethö hnyi Paradaiso anyin Khong.

8 Ke sihnalimen ju ka angela anyin ekalesia hnyi Semurina, ka habe,

Walang je hofuc ame ha hnen at a bán ke a biliny, waleji a mokcu ke a möt hmetu thö. 9 E khanö nya ányám ta je huliwa, me ányám theduoc (ke u me tren ta únyi), me bi gan anyin tavat adre me ha, a ödra tavat Juda, ke ba bi, ke sunago ödra a umö Satana. 10 U ma ca outen ta je únyi ame he ka oveci u: wá bi, ame he diabolo ka khúá keihen gabun ka hnyi uma ceat, m' adre me he ka cubic öbun: ke ame he ka libenyita je bonginy vec a öbun. U ma hnathu ju ke ne o but ka hnyi mok, me oge me he ka ham köu koronainy möt. 11 Haba at ae hu hnyikönyen, long ju hna ha hnen Hanu ka ta je ekalesia. Haba at ae hwege, me ame ca he ka vec hnen mok a loiny.

12 Ke sihnalimen ju ka angela anyin ekalesia hnyi Peregamo, ka habe,

Walang ta je hofuc ame ha hnen at ae

hu gan hele vat a lo hoinakan ae so hwan: 13 E khanö nya dok u me laba hnyin, wale hnyi theron anyi Satana: ke u je kát hmá iök, me ca ivinöá labageju könya, waleji hnyi je bongu bongu Anetipa ae hnathu, at ame ohnathu nya, waleji adre hlingá unyibun, hnyi dok ame laba hnyin Satana.

14 Ke e hu gak ke ta je únyi gam, anyin ae hu but unyám keihen tavat adre me kát hna úne anyi Balaama, waleji at ame ná kö Balaka he ka ip únyi hnán othöá hnyi hnyimakan Isaraela, waleji he ka an ta je únyi adre hudo ka ta je hnatheat, me he ka bi únyi monu. 15 Ke e hu minya unyám keihen tavat adre me kát heláe ta je hna úne anyin tavat Nikolao. 16 Anyin a wale ietra ju; e ka ba, oge me he ka ie o köu, me vat m' ödra ge hele vatiny hnyimök. 17 Haba at ae hu hnyikönyen, löng ju hna ha hnen Hanu ka ta je ekalesia. Haba at ame ton, me oge me he ka hán ge mana ae iyong, ke oge me he ka ham káu ke veto ae hau, ke e hnyi veto ien a teb únyi adre set, ae ca khana at, ke so bi at ame kap.

18 Ke sihnalimen ju ka angela anyin ekalesia hnyi Thuataira, ka habe,

Walang ta je únyi ame ha hnen Nokon Khong, at ae hu li ecmak helá me báhlán meic, ke helá me bras ae hadröngöc li can: 19 E khanö nya but ányám ta je huliwa me ibetengiö me labageju, me hnám hna bi atök, me ányám hok hnyok, ke beönua ányám ta je huliwa a biliny hon a bán. 20 Ke so bi e hu but gak únyi eang gam, a u je hna ka momo jia Jezebela, at ame ha ka habe, e perofeta momo; ke e ame úne me cubec je atök he ka bi únyi monu, me hnyi an je hna hudo ka ta je hnatheat. 21 Ke oge me ham káu úen he ka ietra; ke e ame höcö he ka ietra anyin je bi únyi monu. 22 Wá bi oge me khúá ka hnyi hna mokut walang ang me tavat adre me bi únyi monu mē, me me vec gan hmá thö, at ka ca ietra anyin ta je huliwa. 23 Ke oge me he ka hlingá lakon ge mok; ke ame he ta je ekalesia ka khan' ödra, ka habe, inya ang at ame elám ta je únykúme me ta je hnyok: ke oge me he ka ve ham köbun hoton anyibun ta je huliwa. 24 Ke inya oge me ha köbun je ke keihen hnyi Thuataira, wale tavat ae ca hu gadrin hna úne eling, ke ca khan' ödra hwakecin ae dit anyi Satana, helá me hnödra hna hat oge me ca ip hubun ke hok. 25 Ke ká hmá ju öbun ta je únyi öbun e hu, ke ne

IINA OMANENÄ 3.

o but oge me o. 26 Ke haba at ame ton, k' ame vheno anyik ta je huliwa ke ne o but obiny, me oge me he ka ham kâu musi hon ta je hnyei: 27 ke e ame he ka musi ödra ge osö fao, helâ me hnödra hna sa omomono je kaia kânâ; helâji me hnök hna kap únyi ge Kamök; 28 ke oge me he ka ham kâu okhú lany. 29 Haba at ae hu hnyikönyen, löng ju hna ha hnen Hanu ka ta je ekalesia.

HNyimakan 3.

KE sihnalimen ju ka angela anyin ekalesia hnyi Saradi, ka habe,

Walang ta je únyi ame ha hnen at ae hu je Hanu a seven anyin Khong, me je okhú a seven: E khanö nya but ányâm ta je huliwa, wale ae hu iâm a u möt, k' u mok bi. 2 Hmâkâ thö, ke ohwegiâ thö ta je kolon a ta je únyi ame he but ka mok: anyin oge me ca wâ ányâm ta je huliwa a g' adre ohwâdâ hnyi hnyimakan Khonguk. 3 Anyin a wale únykúme ju hwakecin hnâm hna kap me löng; ke kât hmâ ju e me ietra. Ke u je ne ca hmâkâ, me oge me he ka o helâ me at venöu, k' ame ca he ka khanö u úen oge me he ka o hnyin köu. 4 Ke e hu but gam tavat ae wakhalet hnyi Saradi, k' adre me ca hia but okânâ anyidra je úkhaú: me adre me he ka tha he mönya k' adre khaú hau; anyin a ödra úcú. 5 Haba at ame ton, me adre me he bi ka okhaúâ helâe ge je úkhaú ae hau; ke oge me ca he ka kot degecâ ien hnyi tusiny möt, ke oge me he ka ha ien hnyi hnyimakö Cica, ke hnyi hnyimakan anyin ta je angela. 6 Haba at ae hu hnyikönyen löng ju hna ha hnen Hanu ka ta je ekalesia.

7 Ke sihnalimen ju ka angela anyin ekalesia hnyi Filadelefa, ka habe,

Walang ta je únyi ame ha hnen at ae kap, ke hnathu, at ae hu gan ki anyi Davita, at ame khöng, ke ba at ame he bi ka hlöng, k' ame hlöng, ke ba bi at ame he ka khöng: 8 E khanö nya but ányâm ta je huliwa (wâ bi oge hia but ip hnyi hnyimâkâm hwanuma adre hia but khöng, ke ba at ae khana he ka hlöng), a g' ame hu gam man ae úhnyúkong, ke u je löng hoton hok hofuc, me ca ivinöâ bi iök. 9 Wâ bi, oge me he ka ham keihen hanen sunago anyi Satana, wale a tavat adre me ha, ka habe, Ödra tavat Juda, ke ba bi, k' adre me thoi; wâ bi, oge me he

ka wi' ödra, m' adre me he but jem he ka khudrung hnyi hmelen li cam, ke adre me he ka khana a oge me hia but betenge gam. 10 U je tuö hofucin hnök hna hok hnyok, anyin a wale, oge me he bi nya ka tuö u hnyi úen úcúbic, wale ame he ka o ka hnyi hmeledrany hia thithö, he ka cubec tavat adre me laba eang hmeledrany. 11 Oge me he ka ie o: kât hmâ ju hnâm hna hu, wâ e nye he ke at ka húgúnâ ányâm korona. 12 Haba at ame ton, oge me he ka wia me hnân hmolominy uma kap umen Khonguk, ke e ame ca he hmetu ka didrut: ke oge me he ka sihnalimen hnyi hon at eling ien Khonguk, me ien taun anyin Khonguk, wale Jerusalem a teb únyi, ame utut únyi hnyi drany únyi ge Khonguk, me iök minya a teb únyi. 13 Haba at ae hu hnyikönyen, löng ju hna ha hnen Hanu ka ta je ekalesia.

14 Ke sihnalimen ju ka angela anyin ekalesia hnyi Laodikea, ka habe,

Walang ta je únyi ame ha hnen Amen, at ohnatho ae hnathu me wisa, waleji a at a hwân ta je únyi hia thithö a op hnen Khong: 15 E khanö nya ányâm ta je huliwa, a u ca katebu bi me ca kahwa minya bi: u na katebu ju, a ne kahwa minya bi. 16 Wale me inye he ka hmitö u únyi hnyi hnyimök, anyin a u mage, ke ca kahwa bi me ca katebu minya. 17 Haingâm. Iny tren ta únyi, ke hu omjehek ut, ke ba ke únyi ae hia gak; ke ca khanö u bi nakaem, me kong, me theduoc, me wadröu. me he thu: 18 anyin a wale oge me ha köu he ka úco gak gol adre degec tiren hnyi meic, me u me tren ta únyi; me je úkhaú ae hau, m' u me he ka khavâ, me me ca manen bi hmehma wale he thu a u: me bubunyin ecmak hnân botro kâu li emâkâm, me u me bwela but. 19 Oge me nâ me kot tavat oge me betenge gadra: anyin a wale, hwege th' öbun me ietra ju. 20 Wâ bi, inya oge me tot hnyi hwanuma me seseto: e ka hu at ame löng ifucik me khöng ut hwanuma, me oge me he ka didrö kâu, me tha han mē, ke tha e mönya. 21 Haba at ame ton, me oge me he ka ham kâu he ka tha laba mönya hon anyik theron helâji me inya oge me tuk, me oge me tha laba me Cica hon anyin theron. 22 Haba at ae hu hnyikönyen löng ju hna ha hnen Hanu ka ta je ekalesia.

HNYIMAKAN 4.

HWABAN ta je ûnyi e, oge me wâ, ke wâ bi adre hia but khöng hwanumen drany, ke haba hofuc a bân oge me löng helâ me hwan khoto ame fuc kõnya, me ha, ka habe, Ölö thö kââng, me oge me he ka omanenâ köu ta je ûnyi ame he ka o nyiele. 2 Ke oge me ie dit ka hnyi Hanu: ke wâ bi, e hu theron adre ip hnyi drany, ke ke at ame laba hon theron; 3 ke helâ me veto jasepi me sadio at ame tabâ; ke haba wajileufat ame wâdrâ igigilö theron, ke ame manen dut helâ me semerado. 4 Ke twente foa je theron igigilö theron: ke oge me wâ hon ta je theron wahingat a twente foa ödrin e ve tabâ, k' ödrin e khavâ je ûkhaü ae hau, k' ödrin e bicâ je korona gol. 5 Ke ame he but úheny hnyi theron je hucuce, me je hofuc, me hendreng. Ke seven ta je lamepa ame hlâ hnyi hnyimakan theron, wale je Hanon Khong a seven; 6 ke e hnyi hnyimakan theron köiö ae alai helâ me uselat; ke e hnyi wanben theron k' ödrin e igigilö theron vak ta ûnyi ae möt, k' ödrin e unöngöt ge je ecmak hnyi hnyimakan me boton. 7 Ke haba ûnyi ae möt a bân, me helâ me liona, ke haba ûnyi ae möt a loiny, me helâ me nokon kau, ke haba ûnyi ae möt a kuniny, me hu hnyimakan helâ me at, ke haba ûnyi ae möt a vakiny, me helâ me aeto ame gâ. 8 Ke haba je ûnyi ae möt a vak, me ve hu gadrin je labenyidrin a siks, ke ödrin unöngöt hnyi je ke keihen ke eü hnyin ge je ecmak; ke ödrin e ca menâ hnyi lany me lit he ka ha, ka habe, E kap, e kap, e kap Than a Khong, At ae khana hia, waleji adrem, ke walang ang, ke ame he ka o. 9 Ke e ka he je ûnyi ae möt ka ogânâ, me ogöranyâ, me ole ka at ame tabâ theron, wale ae möt nyiele nyiele balua, 10 me ame he wahingat a twente foa ka ta but hnyi hnyimakan at ame tabâ theron, me khudrung kâu, waleji at ae möt nyiele nyiele balua, me khûâ anyidrin je korona hnyi hnyimakan theron me ha, ka habe, 11 U thibi ae úcû, Than a Khonguhmun, he ka kap hna ogânâ, me hna ogöranyâ, me man: anyin a u je op ta je ûnyi hia thithö, ke haba ta je ûnyi e me hobi kâu wem, ke u je op minya.

HNYIMAKAN 5.

KE oge me wâ hnyi hnyam a metân at ame laba hon theron, tusi adre set hnyin me hoton, adre ohmâ haten ge je hna ohmâ a seven. 2 Ke oge me wâ angela ae hwege ame khetâ ge ifucin ae gan, ka habe, le at ae úcû he ka lau tusi, me khöng je hna ohmâ haten? 3 Ke ba at hnyi drany, ke ba minya hnyi hmeledrany, ke ba minya eü hnyi hmelen hmeledrany ae khana he ka lau tusi me wâ e. 4 Ke oge me tenge gan hmâ, anyin ae ba at adre wâ ae úcû he ka lau tusi, me wâ e: 5 ke haba ke at hnyi wahingat ame ha kõnya, ka habe, Ca tenge: wâ bi, e hwege Lionainy tribu Juda, Khûen anyi Davita, he ka lau tusi, me khöng je hna ohmâ haten e a seven. 6 Ke oge me wâ hnyi wanben theron, me vak ta ûnyi ae möt, me hnyi wanben wahingat, ame tot ke Arenio, helâke adre hia but hlingâ, seven je faoiny, ke seven je emakan, wale je Hanon Khong a seven, adre kunâ ka hnyi hmeledrany hia thithö. 7 Ke e ame o but me hom e ûnyi hnyi hnyamen a metân at ame tabâ theron. 8 Ke e a hia but hom tusi, haba je ûnyi ae möt a vak, me wahingat a twente foa adre me tha ta ju hnyi hnyimakan Arenio, e ve hu gadra je kitara, me je kaia gol ae unöngöt ge je utö ae bo so, wale je hic hijin wakap. 9 Ke adre me khumöngö khumöng a teb ûnyi, ka habe, U thibi a u úcû he ka hom tusi, me khöng je hna ohmâ haten: anyin adre hlingö u, ke u je úco hobi kâu Khong ge drâm tavat ûnyi hnyi ta je tribu hia thithö, me je hwen hnyei, me je hnyei me tavat, 10 me wi' ödra hnân dökhu me tavat bihut hobi kâu Khonguhmun; ke adre me musi eang hmeledrany. 11 Ke oge me wâ, me löng ifucin ta je angela ae se hia igigilö theron, me ta je ûnyi ae möt me wahingat; ke haba úshiaidra me helâ me ten thauzan ta je ten thauzan, ke je thauzan ta je thauzan; 12 ke adre me ha hnen ifucin ae gan, ka habe, E úcû ka Arenio waleji adre hlingâ he ka kap man, me tang omjeü, me metâ, me tang hwege, me hna ogöranyâ, me hna ogânâ, me hna haisoâ. 13 Ke oge me löng ta je ûnyi hia adre op ethö hnyi drany, me hnyi hmeledrany, me eü hmelen hmeledrany, me eü hnyi köiö, me ta je ûnyi hia thithö hnyi je dok eling, adre me ha, ka habe, E so

HNA OMANENÂ 6, 7.

e unyin at ame taba theron, me Arenio minya, hna haisoa, me hna ogöranyâ, me hna ogânâ, me man nyiele nyiele balua. 14 Ke haingen vak ta únyi ae môt, ka habe, Amen. Me ame ta ju wahingat me khudrung.

HNYIMAKAN 6.

KE oge me wâ Arenio ame khöng khaca hnyi je hna ohmâ haten a seven, ke oge me löng ke at hnyi je únyi ae môt a vak ame ha helâ me úlunginy hendreng, ha habe, Aiö u. 2 Ke inya oge me wâ, ke wâ bi, hors ae hau, ke hu cafana unyin at ame tabâ; ke adre me ham kâu korona: me e ame he but, k' ame ton, k' ame he bi ka ton.

3 Ke e a hia but khöng hna ohmâ haten a loiny, me oge me löng únyi ae môt a loiny, ame ha, ka habe, Aiö u. 4 Me ame o but ke hors ae dra: ke adre me ham ka at ame tabâ he ka hom úsaköu únyi eang hmeledrany, m' adre me he ka úhlingödra köu ödra: k' adre me ham kâu hele vat ae gan.

5 Ke a hia but khöng hna ohmâ haten a kuniny, me oge me löng únyi ae môt a kuniny ame ha, ka habe, Aiö u. Ke inya oge me wâ, ke wâ bi hors ae hlit; ke hu tulut adre únö hnyi hnyamen at a tabâ. 6 Ke oge me löng hnyi wanben ta je únyi ae môt a vak helâke ifucin at, ame ha, ka habe, Ama okhaca unöngöt tulut ge hwit hwaban denari a khaca, ke okun unöngöt tulut ge bali hwaban denari a khaca; ke ca okongo bi wakaco me waina.

7 Ke a hia but khöng hna ohmâ haten a vakiny, me oge me löng ifucin únyi ae môt a vakiny ame ha, ka habe, Aiö u. 8 Ke inya oge me wâ, ke wâ bi hors ae löhau: ke Mok ien at a tabâ: ke Hedis ame tha he hoton. Ke adre ham ködrumusi he ka hlingâ ke keihen hmeledrany a vakiny, ge hele vat, me hmiâ, me mok, me je meno ae úhúlú hnyi hmeledrany.

9 Ke a hia but khöng hna ohmâ haten a thabúnginy, me oge me wâ hnyi hmelen taben hut je hanon tavat adre hlingâ can hofuc hwan Khong, me can hnödra hna ohnatho: 10 ke adre me ha hwegiâ, ka habe, Taböny Than lö, at ae kap me hnathu, ke ne o but kehö u me ca he ka hnö me bi hwaban dröhmun hon tavat adre me laba eang hmeledrany? 11 Me adre me ve ham ködra ke úkhaú ae hau; ke adre me ha

ködra, ka habe, adre me he ka halubalingen úen ae okhulit, ke ne o but ame bekhöt dö je aten huliwa a hanödra, me ta je liamekeiny m' ödra, wale a tavat adre me he ka hlingâ helâ me ödra.

12 Ke oge me wâ e ame khöng hna ohmâ haten a siksiny, me ame gan hmâ but hwiöi; me ame hlit ut seúnö helâ me mano a leúnen meno, ke haba tehi hia, me helâ me dra; 13 ke haba ta je okhúiny drany, me ame kökölu but ka hnyi hmeledrany, helâ me úö meta ame khúâ degecâ wan ae tiga but, a jijingâ hnen ang ae hwege. 14 Ke adre me vhec dö drany helâ me tusi adre vhec; ke adre oc hia ta je bucen me je bomene únyi hnyi hnen bi. 15 Ke haba ta je thaniny hmeledrany, me ta je tuhan, me je taben vat ae nua, me tavat tren omjeú, me tavat ae hwege, me ta je athnyaba hia, me tavat he baú hia, adre me ve ikhölö hnyi je hmonop me je khúth hnyi ta je bucen; 16 me adre me ha ka ta je bucen me je kic, ka habe, Öbun na kölu takú öhmun ju, me öiyongi öhmun dut ge hnyimakan at ame laba hon theron, me únyi minya ge tang hmönyin anyin Areniö: 17 anyin a o but bongudra bong ae gan hmâ hmönyin hnyin; ke ie at ae kbaaa he ka tot.

HNYIMAKAN 7.

KE hwaban e oge me wâ je angela a vak ödrin e tot hnyi vak ta ke keihen hmeledrany, k' ödrin e kât vak ta ang hnyi hmeledrany, me me ca he ka hwege ang ka hnyi hmeledrany, me köiö, me ke úö a khaca. 2 Ke inya oge me wâ ke angela ame o jimeyö, ke e unyin hna ohmâ haten anyin Khong ae môt: ke e ame hongot ge ifucin ae gan ka je angela a vak waleji adre ham ködrin he ka okongo hmeledrany me köiö, 3 ame ha, ka habe, Ca okongo bi hmeledrany, me köiö, me ta je úö, ke ne o but öhmun e ohmâ haten lathnyabainy Khonguta hon je baridra. 4 Ke oge me löng úseidra tavat adre ohmâ haten, me ödrin wan haded ke fâte foa thauzan tavat adre me ohmâ haten, únyi hnyi ta je tribu hia anyin lakon Isaraela.

5 Twelv thauzan tavat adre ohmâ haten únyi hnyi tribu anyi Juda:
Ke twelv thauzan únyi hnyi tribu anyi Reubena:
Ke twelv thauzan únyi hnyi tribu anyi Gada:

HNA OMANENÂ 8.

6 Ke twelv thauzan únyi hnyi tribu anyi Asera :
 Ke twelv thauzan únyi hnyi tribu anyi Nafatali :
 Ke twelv thauzan únyi hnyi tribu anyi Manase :
 7 Ke twelv thauzan únyi hnyi tribu anyi Simeona :
 Ke twelv thauzan únyi hnyi tribu anyi Levi :
 Ke twelv thauzan únyi hnyi tribu anyi Isakara :
 8 Ke twelv thauzan únyi hnyi tribu anyi Zebulona :
 Ke twelv thauzan únyi hnyi tribu anyi Josefa :
 Ke twelv thauzan adre ohmâ haten únyi hnyi tribu anyi Beniamina.
 9 Hwaban ta je únyi e inya oge me wâ, ke wâ bi, tavat ae se hia hmönyin, wale ae ca khana ke at he ka aû, a ödra únyi hnyi ta je hnyei hia, me ta je tribu, me tavat, me je hwen hnyei, adre me tot hnyi hnyimakan theron, ke hnyimakan Arenio, k' adre khavâ je úkhaû ae hau, ke e hnyi je hnyamödra je lan pama ; 10 ke adre me ha hwegiâ, ka habe, Haba möt me únyi ge Khonguta at ame laba hon theron, me únyi ge Arenio. 11 Ke haba ta je angela, me adre me útitilen igigilö theron, me igigilö wahingat ke ta je únyi ae möt a vak ; me adre me ta ju hnyi hnyimakan theron me khudrung ka Khong, 12 me ha, ka habe, Amen : Hobi kâu Khonguta hna haisoâ, me hmanenang, me metâ, me ole, me hna ogânâ, me man, me hwege nyiele nyiele balua. Amen. 13 Me ame ha ke at hnyin wahingat, ame ha könya, ka habe, Ie tavat eang adre me khavâ je úkhaû ae hau, ke úhedra ua ? 14 Ke haingök kâu, ka habe, Than lö, e khanö u. Me e ame ha könya, ka habe, Ödra ang adre me he but únyi hnyi vec ae gan hmâ, ke adre me hneú anyidra je úkhaû, me ohauâ hnyi dren Arenio. 15 Anyin a wale ödra but hnyi hnyimakan theron anyin Khong ; ke adre me bi athnyabainy hnyi lany me lit hnyi umen uma : ke haba e at ame tabâ theron, me e ame he ka tubi ödra ge umen uma menâ. 16 Adre me ca he hmetu ka mekihnânem, ke adre me ca he minya ka beic ; ke ame ca he ka li ödra hnen seúnö me kahwa : 17 anyin ame he Arenio ka hat ödra, waleji a e hnyi wanben theron, ke e ame he ka lili ödra ka hnyi köiöiny möt ame pupua : ke ame he Khong ka

kot degecâ ta je deköiö hia únyi hnyi ta je emaködra.

HNYIMAKAN 8.

KE a hia but khöng hna ohmâ haten a seveniny, me ame ba ju hwan hnyi drany hnyi haf awa. 2 Ke oge me wâ je angela a seven waleji ödrin e tot hnyi hnyimakan Khong ; ke adre me ham ködrin ta je trutru a seven.

3 Me ame o but ke angela me tot hnyi taben hut, e unyin taben meic a gol ; me adre me ham gâná kâu je utö ae bo so, me me he ka tha ip e me je hic hijin wakap hia thithö hnyi taben hut gol hnyi hnyimakan theron. 4 Me ame ölö thö hainy utö ae bo so tha e me je hic hijin wakap hnyi hnyimakan Khong únyi hnyi hnyamen angela. 5 Haba angela ame hom taben meic ; ke e ame öunöngötâ ge meic únyi hnyi taben hut, me khûâ ka hnyi hmele-drany : me ame o but je hendreng, me je hofuc, me je hucuce, me hwiöi.

6 Me haba je angela a seven ödrin e penapena he ka tuö trutru, wale hnyat ae hu je trutru a seven gadrin.

7 Ke ame tûâ thö trutru hnen angela a bân, me ame ta but we ae wahma me meic adre úhaniken me dra, me adre me khûâ ka hnyi hmele-drany : me adre me thong degecâ ke keihen a kuniny hmele-drany, k' adre thong minya ke keihen a kuniny je üö, k' adre thong hna önying hia ae hât.

8 Ke ame tûâ thö trutru hnen angela a loiny, ke helâke adre khûâ but bucen a gan ame hlâ ge meic ka hnyi köiö : me ame dra but ke keihen köiö a kuniny ; 9 me ame mokcu ke keihen a kuniny ta je únyi ae möt eú hnyin köiö ; ke adre me ohia miuya ke keihen a kuniny ta je hu.

10 Ke ame tûâ thö trutru hnen angela a kuniny, me ame kölu but ke okhú ae gan hmâ únyi hnyi drany, ame hlâ helâ me okúnú, ke ame kölu but ka hnyi ke keihen a kuniny ta je wagewe, me je an ame pupua ; 11 ke haba ien okhú, me Únyi ae hiny : me ame hiny jut ke keihen a kuniny ta je köiö ; ke se hia tavat a mok ge je köiö únyi hnyi úhinyin.

12 Ke ame tûâ thö trutru hnen angela a vakiny, me adre me kot ke keihen a kuniny seúnö, me ke keihen a kuniny tehi, me ke keihen a kuniny ta je okhú ; waleling me me menekholom but je ke keihen a kuniny,

HNA OMANENÄ 9, 10.

ke ame ca melam hmetu ke keihen a kuniny bong, ke helâe minya ge lit.

13 Ke oge me wâ me löng ke aeto ame gâ hnyi wanben drany, k' ame ha ge hwan ae hwege, ka habe, Ekölö, ekölö, ekölö ge tavat adre me laba hnyi hmeledrany únyi hnyi ifucin ke ta je trutru ame he ka tûâ biju hnen ta angela a kun.

HNHYIMAKAN 9.

KE ame tûâ thö trutru hnen angela a thabúnginy, me oge me wâ ke okhú ame kölu únyi hnyi drany ka hnyi hmeledrany: ke adre me ham kâu kiiny hmonop ae dit hmönyin; 2 me ame o thö hai únyi hnyi hmonop, helâ me hainy meic ae gan hmâ; me ame hlit ut seúnö me ethö hnyi wanben ge hainy hmonop. 3 Me ame o but ta je wahamon ka hnyi hmeledrany únyi hnyi hai; ke adre hom ködra man, helâji me maniny ta je sekopioiny hmeledrany. 4 Ke adre ha ködra m' adre me ca he ka okongoâ önyinginy hmeledrany, me ke únyi ae hât, me ke tûö a khaca, ke so thibi tavat ae ca hu gadra hna bi haten anyin Khong hon ta je baridra. 5 Ke adre hna ködra a adre me ca he ka hling' ödra, ke so bi he ka oveci ödra hnyi thabúng ta tehi: ke haba anyidra vec, me helâ me vecin at ame dâ sekopio. 6 Ke ame he tavat ka elâm mok hnyi ta je bong eling, ke adre me ca he ka wâ; ke adre me he ka bemok, ke ame he mok ka kec gadra. 7 Ke haba je unyin ta je wahamon me helâ me hors adre penapena hnân vat; ke haba hon je bödra me helâ me je korona gol, ke haba je hnyimaködra me helâ me je hnyimakan at. 8 Ke hu gadra leúnen bödra helâ me leúnen ban omomo, he haba je nyudra me helâ me nyon ta je liona. 9 Ke e hu gadra ta je úkhaúen úlainy helâ me úkhaúen úlainy a fao; ke haba úhmu-hmuiny je labenyidra me helâ me úhmu-hmuiny je kariota me je hors ae se hia adre me wadring ka hnyi vat. 10 Ke hu je hmokunödra helâ me je sekopio, me je údöiny; ke e hnyi je hmokunödra man he ka okongo tavat hnyi thabúng ta tehi. 11 Ke tuhödra angelainy hmonop ae dit hmönyin: haba ien hnyi hwen Heberu Abadon, ke hnyi hwen Heleni, me Apoluon.

12 A um dö ke Ekölö: wâ bi lo biju li Ekölö ame he ka o.

13 Ke ame tûâ trutru hnen angela a siksiny me oge me löng ke hofuc únyi hnyi

je baitoiny taben hut gol hnyi hnyimakan Khong, 14 ame ha ka angela a siksiny ae hu trutru, ka habe, Thang ut ta je angela a vak adre ca hnyi wagewe ae gan a Euferrati. 15 Me adre me thang ut ta angela a vak, waleji adre penapena hobi kâu awa, me bong, me tehi, me huna, m' odrin e he ka hlingâ ke keihen a kuniny tavat. 16 Ke haba úseiny tavat vat a tavat tabö hors, me lo li ten thauzan ta je thauzan: oge me löng úseidra. 17 Ke helâe oge me wâ je hors hnyi hna omanená, me tavat adre me tabâ ae hu úkhaúen úlainy meic, me uakini, me teio; ke haba ban ta je hors me helâ me ban ta je liona; ke ame o únyi hnyi je hnyimödra meic, me hai, me teio. 18 Ke adre me hlingâ ke keihen a kuniny tavat ge kun ta únyi eling ae mekiny, wale meic, me hai, me teio ame o únyi hnyi je hnyimödra. 19 Anyin a haba maniny ta je hors me e hnyi je hnyimödra me je hmokunödra: anyin a helâ me je on je h moku-nödra ke hu ban; ke adre me okongoâ hnen je únyi e. 20 Ke haba kolon tavat adre ca hlingâ bi ge ta je mok eling, me adre me ca ietra bi ta je huliwa anyin je hnyamödra, a g' adre me khudrung ka ta je demoni, ke je hnatheat gol, me sileva, me bras, me veto, me utö; a ta je únyi ae ca khan' ödra bwele, me löng, me he: 21 ke adre me ca ietra ge hnödra hna úhlingö, me bi khong, me bi únyi monu, me venöu.

HNHYIMAKAN 10.

KE oge me wâ ke angela ae man ame utut úheny hnyi drany, ame khavâ úlä; ke e wajileufat hnyi hon ban, ke helâ me seúnö hnyimakan, ke haba li can me helâ me li hmolom a meic; 2 ke e hnyi hnyamen ong tusi adre lau: ke e ame uto köiö ge can a metân, me hot ge can a meny; 3 ke e ame ha hwegiâ helâ me ifucin liona: ke e ame fuc, me ame lung je hendreng a seven. 4 Ke hnyi úen ame lung je hendreng a seven, me oge me he bi ka sihnalimen: me oge me löng hofuc únyi hnyi drany, ka habe, Okeceâ ju haten ta je únyi a ha je hendreng a seven, ke ca sihnalimen bi. 5 Ke haba angela wale oge me wâ ame tot hon köiö me hot, me ame ogöranyâ hnyamen a metân hnyi drany ai, 6 me khemanyin ge at ae möt nyiele nyiele balua, waleji a at ame op drany me ta je únyi a e hnyin, me hmeledrany me ta je únyi a e hnyin, me

HNA OMANENÂ 11.

köiö me ta je únyi a e hnyin, ka habe, E ba hmetu úen : 7 ke hnyi ta je bonginy ifucin angela a seveniny, e ka he bi ka túâ trutru, me ame he ka umo ju únyi ae iyong anyin Khong, hoton úthumetu ae so e ame haimemenâ ka lathnyabainy a ta je perofeta. 8 Ke haba hofuc oge me löng únyi hnyi drany, me ame ha hmetu könya, ka habe, He thö ka hom tusi adre lau waleji hnyi hnyamen angela ame tot hon köiö me hot. 9 Me oge me he thö ka angela me ha kâu, a e ame he ka ham könya ong tusi. Me e ame ka könya ka habe, Hom dö, me an ju ; ke ame he ka hiny hnyi hnyekom, ke so bi ame he ka hnebwia hnyi hnyimâm helâ me hani. 10 Me oge me hom ong tusi únyi hnyi hnyamen angela, me an dut ; me ame hnebwia hnyi hnyimök helâ me hani : ke oge me hia but an me ame hiny jut hnyi hnyekuk. 11 Me adre me ha könya, ka habe, E úcú köu he ka perofeta hmetu ge tawat me ta je hnyei me ta je hwen hnyei me ta je than ae se hia.

HNYIMAKAN 11.

KE adre me ham könya hlowe helâ me uci : ke ke at ame ha könya, ka habe, Todrö, tuluto ju uma kap umen Khong, me taben hut, me tawat adre me khudrung eú hnyin. 2 Ke haba hnyeule hoton uma kap, hnen ju, ca ke ka tuluto ; anyin adre hia but ham e ka ta je hnyei : ke adre me he ka uto taun ae kap hnyi ta je tehi a fâte tu. 3 Ke oge me he ka hna ka li at ohnathunya he ka perofeta hnyi ta je bong a wan thauzan tu haded ke sikste, adre khaú ödru ge mano ae gan nân. 4 Walang li elaiö, me li taben lamepa ame tot hnyi hnyimakan Khongon hmeledrany. 5 Ke a ne he ke at ka beokongu ödru, me ame o but meic únyi hnyi li hnyimödrü he ka thong je iwahnaihmiöny m' ödru : ke a ne beokongu ödru hnen ke at, e úcú he ka hlingâ helâe minya at e. 6 E unyidru man he ka hlöng drany me me ca he ka ta we hnyi ta je bonginy perofeta a ödru ; ke e hu gadru man hon ta je wagewe he ka wia me me dra, me he ka kot hmeledrany ge ta je mok hia helâ me wedru. 7 K' ödru ka hia but umo hnödrü hna ohnatho, me ame he meno at ame o but únyi hnyin hmonop ae dit hmönyin ka vat m' ödru, me ton hudru, me hling' ödru. 8 Ke haba li unyidru ame mokut hnyi getheniny taun ae gan, haba

ien hoton hanu, me Sodoma, me Aigupito, waleji adre osatauroâ hnyin Tuhödrü. 9 Ke haba keihen úheny hnyi ta je hnyei me ta je tribu me ta je hwen hnyei, me tawat adre me wâ li unyidru hnyi kun ta bong me haf, ke adre ca hna but he ka konâm li unyidru hnyi erkemok. 10 Ke haba tawat adre me laba eang hmeledrany, me adre me senyin gadru me hobâ ; ke adre me he ka úhamköuâ ta je bwihlany ; anyin a li perofeta eling ödru me ovecâ tawat adre me laba eang hmeledrany. 11 Ke hwaban kun ta bong ke haf, me ame dilic ödru hnen hanuiny möt, ke ödru me todrö ; me ame o but ot ae gan hmâ ködra adre me ö 'dru. 12 Me ödru me löng hofuc ae gan hmâ únyi hnyi drany ame ha ködrü, ka habe, Ölö thö kâang. Me ödru me ölö thö hnyi dranyai hnyi úlá ; k' ame ö 'dru hnen je iwahnaihmiöny m' ödru. 13 Ke hu hwiöi ae gan hnyi awa eling, me ame ü but ke keihen a libenyitainy taun ; ke haba hwiöi, me ame hlingâ tawat a seven thauzan : me ame ot je kolon, m' adre me ogânâ Khongon drany.

14 A um dö Ekölö a loiny, wâ bi, ame he ka ie o Ekölö a kuniny.

15 Ke adre túâ trutru anyin angela a seveniny ; me ame o je hwan hofuc ae gan hnyi drany, ame ha, ka habe, Haba dökhü dokhon hmeledrany, me adre hia but wia hnân hobi kâu Tuhöta me Keriso a anyin : me e ame he bi ka musi nyiele nyiele balua. 16 Haba wahingat a twente foa, hnyat ödrin e tabâ anyidrin je theron hnyi hnyimakan Khong, me ödrin e ta ju hnyikânâi, me khudrung ka Khong, 17 me ha, ka habe, Öhmun e ole köu Than a Khong, Ataekhanahia, a u walang me kâú adrem ; anyin a u je hia but hom manâm man ae gan hmâ, ke u je musö. 18 Ke ame hmönyin ta je hnyei ke ame o but ânyâm hmönyin, ke úen he ka úhnö tawat adre mokcu, me he ka ham hwaban ka lathnyabaem a ta je perofeta, me wakup, me tawat adre me okabâ iâm, tawat ae úhnyúkong me tawat ae gan ; me he ka ohnaúhangöi ödra adre me ohnaúhangöâ hmeledrany.

19 Ke adre me khöng uma kap umen Khong walethö hnyi drany ; me ame manen dut hnyi umen uma tangen anyin úhinyköu ; me ame o but je hucuce, me je ifucin, me je hendreng, me hwiöi, me we wahma ae gan.

HNYIMAKAN 12.

ME ame manen dut hnyi drany ke haten ae gan; wale momo at ame khavâ seünö, ke hnyi hmelen li can tehi, ke e hnyi hon ban korona a je okhû a twelv; 2 ke ame erkin dut me ame vec hnyekon, ke ame tenge ge vec me me he ka hnokoâ but. 3 Me ame manen dut ke haten minya hnyi drany; ke wâ bi, wale drakona ae gan ae dra, seven je ban, ke ten je faoiny, ke seven je korona hon je ban. 4 Ke e ame lelö tilâ hnen hmokunen ke keihen a kuniny ta je okhûiny drany, me ame khûâ ka hnyi hmele drany: ke haba drakona ame tot hnyi hnyimakan momo, waleji ame he but ka hnokoâ, me me he ka an nokon e ka o. 5 Haba momo ame hnokoâ but da, at ame he ka musö ta je hnyei hia thithö ge osö fao: ke adre ie kap nokon ka Khong, hnyi anyin theron. 6 Me ame kec ut momo hnyebuba ai, ke e hu gan eling dok a penapena Khong, m' adre me he ka hat eling hnyi ta je bong a wan thauzan tu haded ke sikste.

7 Ke e hu vat hnyi drany: haba Mikaela me anyin je angela ame vat me drakona; ke drakona me anyin je angela adre me vat m' ödra; 8 ke ödra ca hwege bi, ke ba hmetu bi hnödra hnyi drany. 9 Me adre me obâ but drakona ae gan, wale on adrem, adre hwenyi ien Diabolo, me Satana, at ame omonoâ hmele drany hia thithö; adre obâ but ka hnyi hmele drany, ke adre tha obâ e me anyin ta je angela. 10 Ke oge me löng hofuc ae gan hmâ hnyi drany ame ha, ka habe, A o but walang ang möt, me man, me dökhü dokhon Khonguta, me musi minya anyin Keriso a anyin: anyin adre hia but obâ at ame haikongoâ je liamekeiny m' öta, wale at ame haikongu ödra hnyi hnyimakan Khonguta hnyi lany me lit. 11 Ke adre me hwege hon únyi ge dren Arenio, me hofuc adre me ohnatho; ke adre me ca hnyokâ anyidra möt ke ne o but mok. 12 Anyin a wale senyin dö ta je drany, me tavat adre me laba hnyin. Ekölö ge kânâ me köiö: anyin ame utut köbun diabolo, ke gan hmâ anyin wathethöt, anyin ae khana but ae okhulit biju üen.

13 Ke a wâ but drakona a g' adre hia but obâ e ka hnyi hmele drany, me e ame ovecâ momo at ame hnokoâ da. 14 Ke adre me ham ka momo li labenyin aeto ae gan, me me gâ únyi hnyi hnyimakan on ka

hnyi hnyebuba a hnen, ke adre hat eling, hnyi üen a khaca, me je üen, me haf üen. 15 Haba on ame hmita hoton momo köiö únyi hnyi hnyimen helâ me wagewe, me me he ka wekhet ut momo hnyi wagewe. 16 K' ame hadrua momo hnen kânâ, k' ame memang ut kânâ me utâ wagewe a walâ drakona únyi hnyi hnyimen. 17 K' ame hmönyin drakona ka momo, me he but he ka vat me je kolon a je mâtrâniny momo, tavat adre me löng hoton hnanyibu anyin Khong, k' adre kât hmâ hna ohnathu Iesu:

HNYIMAKAN 13.

KE e ame tot hon öny hnyi köiö. Ke inya oge me wâ meno ame o únyi hnyi köiö ae hu je faoiny a ten, ke je ban a seven, ke e hnyi hon je fao je korona a ten, ke je ien bi gan ka Khong, hon je ban. 2 Ke haba meno oge me wâ, me helâ me lepad, ke haba je can me helâ me je can bea, ke haba hnyimen me helâ me hnyimen liona: ke drakona ame ham kâu maniny man, me anyin theron, me musi ae gan. 3 Ke oge me wâ ke ban adre hia but kot helâke ame he but ka mok; ke haba hnân khû ame moko, me a metu but: k' ame láiâ hmele drany hia hoton meno; 4 ke adre me khudrung ka drakona anyine ame ham maniny man ka meno; ke adre me khudrung minya ju ka meno, haingödra, ka habe, Ie at ae úcü me meno? ke ie at ae khana he ka vat mē? 5 ke adre me ham kâu hnyem, me ame ha ta je únyi ae gan, me je bi gan ka Khong; k' adre me ham kâu man he ka huliwa hnyi fâte tu je tehi. 6 Me e ame memang ut he ka bi gan ka Khong, he ka haikongoâ ien me umen uma menâ, wale tavat adre me laba ethö hnyi drany. 7 Ke adre me hna kâu he ka vat me wakap, me he ka hwege hudra: ke adre me ham kâu musi hon ta je tribu hia, me tavat, me hwen hnyei, me ta je hnyei. 8 Ke ame he ka khudrung ju kâu ödra hia adre me laba eang hmele drany, waleji tavat adre ca set je iödra hnyi tusiny möt anyin Arenio waleji adre hlingâ hwân hnyi hna bi taben hmele drany. 9 A ne hu hnyikönyen ke at löng ju. 10 A ne ke at ame he ka hom bâ, me adre me he ka hom hwenbâ e: a ne ke at ame hlingâ ge hele vat, me adre me he ka hlingâ e ge hele vat. Wale hok hnyok me labageju anyin wakap.

HNA OMANENA 14.

11 Ke oge me wâ ke meno minya ame o ûnyi eû hnyi kânâ ; e hu li fao helâ me arenio, ke e ame fuc helâ me drakona. 12 Ke e hu gan man hia maniny meno a bân hnyi hnyimakan. Ke e ame kunâ hmeledrany me tavat adre me laba hnyin he ka khudrung ka meno a bân, waleji a ga metu but hnân khû ehac ame moko. 13 Ke e ame ânyâ ta je haten ae gan hmâ, wale me me kunâ meic ûnyi hnyi drany ka hnyi hmeledrany hnyi hnyimakan tavat. 14 Ke e ame iyawâ tavat adre me labâ hmeledrany ge ta je haten adre hna kâu he ka ânyâ hnyi hnyimakan meno ; ame ha ka tavat hnyi hmeledrany, a adre me he ka theatâ me me we meno, waleji ae hu aat ge hele vat, k' ame môt. 15 Ke adre hna kâu man he ka ha melen hnatheat me me we meno, me me he hnatheat a we meno ka fuc, me kunâ he ka hlingâ tavat hia adre me ca hnyi khudrung ka hnatheat a we meno. 16 Ke e ame kunâ tavat hia thithô, tavat ae ûhnyûkong me tavat ae gan, tavat tren omjeû, me ta je theduoc, tavat adre hna bâûâ, me ta je athnyaba, m' adre me he ka bi hatôdra hnyi hnyam a metôdra ame ne je baridra ; 17 me me ca he ka khana ke at he ka bihwaban omjeû me úcû hmetu, ke so bi at ae hu haten, wale ien meno, ame ne numerainy ien bi. 18 Walang metâ. Hamen at ame wâ ûnykûme he ka aû numerainy meno ; anyin a wale numerainy at : ke haba numerainy, me, Siks haded ke sikste siks.

HNYIMAKAN 14.

KE oge me wâ, ke wâ bi Arenio ame tot hon bucen Ziona ke e unyin tavat a wan haded ke fâte foa thauzan, ke adre hia but sihnalimen ien, ke ien Kamen hnyi hon je baridra. 2 Ke oge me löng hofuc ûnyi hnyi drany, helâ me hwan je wagewe ae se hia, ke helâ me hwan hendreng ae gan : ke haba hwan oge me löng, me helâ me hwan tavat adre me khumöngö anyidra ta je kitara : 3 ke adre me khumöngö helâke khumöng a teb ûnyi hnyi hnyimakan theron, ke hnyi hnyimakan je ûnyi ae môt a vak ke wahingat : ke ba at ae khana he ka nâ khumöng e, ke so thibi tavat eling a wan haded ke fâte foa thauzan, tavat adre me úco ûnyi hnyi hmeledrany. 4 Ödrin je hnyat a ca hamödrin okongu ödrin unyin omomo ; anyin a ödrin so. Ödrin je hnyat adre me hnu hoton Arenio

ka hnyi je dok ame he hnyin. Ödrin je hnyat adre úco unyin tavat, me hnân wan a bân hobi kâu Khong me Arenio. 5 Ke ba thoi adre me wâ hnyi je hnyimödra, anyin ae ba hnyikongudrin.

6 Ke oge me wâ ke angela minya ame gâ ethö hnyi wanben drany, ke unyin e úthumetu ae so ame ca ba balua he ka khetâ ka tavat adre me laba hnyi hmeledrany, ke ta je tribu, ke ta je hwen hnyei, ke tavat ; 7 ke e ame ha ge ifucin ae gan, ka habe, Outen ju Khong, me ham kâu hna ogânâ ; anyin a o but ûen ûhnei gan : ke khudrung ju kâu at a op drany, me hmeledrany, me köiö me je an ame pupua.

8 Ke ame he hoton e ke angela, at a loiny, k' ame ha, ka habe, A û but, A û but Babulona ae gan, waleji at ame kunâ ta je hnyei hia he ka ijem wainainy tang hmönyin hnyi bi ûnyi monu a e.

9 Ke ame he hotudru ke angela a kuniny, k' ame ha ge ifucin ae gan, ka habe, A ne hu at ame khudrung ka meno, ke we e, k' ame kap haten e hnyi hon bariny, a ne hnyi hnyamen, 10 wale at ame he minya ka ijem wainainy tang hmönyin anyin Khong, wale adre penapena ke adre me ca úhaniken, hnyi kaiainy anyin tang hmönyin ; ke adre me he ka ovecâ e hneu meic me teio hnyi hnyimakan ta je angela ae kap, ke hnyi hnyimakan Arenio : 11 ke ame sâ göranyai nyiele balua hainy hna oveci ödra ; ke adre me ca menâ bi hnyi lany me lit tavat adre me khudrung ka meno ke we e, me tavat hia adre me kap haten ien e. 12 Wale hok hnyok anyin wakap, tavat adre me löng hoton hnanyibu anyin Khong, me labageju kö Iesu.

13 Ke oge me löng hofuc ûnyi hnyi drany ame ha könya, ka habe, Sihnalimen ju, ka habe, Hnahic hnen wamok, tavat adre me mok unyin Than hwân walang ang : eke, ame ha Hanu, m' adre me menâ thö ûnyi hnyi anyidra ta je huliwa ; anyin ame tha hnu hotudra anyidra ta je huliwa.

14 Ke oge me wâ, ke wâ bi, ûlâ ae hau ; me ke at ame laba hon ûlâ helâ me ke nokon at, ame bicâ korona gol, ke e hnyi hnyamen hele hnân subö hwit ae so hwan. 15 Ke haba ke angela ame didrut ûnyi hnyi hnyin uma kap, ame ha ge hwan ae gan ka at ame laba hon ûlâ, ka habe, Inâ but ânyâm hele hnân subö hwit, me subâ but ; anyin a o but ûen he ka subâ ; anyin ae ti hmahmat ut hmeledrany. 16 Haba at ame laba hon ûlâ ame inâ but ka hnyi

HNA OMANENÄ 15, 16.

hmeledrany anyin hele hnân subö hwit; me a meno but hmeledrany.

17 Ke haba ke angela ame didrut únyi hnyi uma kap ethö hnyi drany, ke huminya gan hele hnân subö hwit ae so hwan. 18 Ke haba ke angela ame didrut únyi hnyi taben hut, ae hu man gan hon meic: ke e ame ha ge hwan ae gan ka at ae hu hele hnân subö hwit ae so hwan, me ha, ka habe, Inâ ju ânyâm hele hnân subö hwit ae so hwan, me meno je de vine hnyi hmeledrany; anyin ae mat hmönyin je wan vineiny. 19 Haba angela ame ina but anyin hele hnân subö hwit ká hnyi hmeledrany, me meno vineiny hmeledrany, me khúâ but ka hnyi hna hlic vine wale únyi hnân hlic vine ae gan hmâ anyin tang hmönyin anyin Khong. 20 Ke adre me uto ju hnyi hna hlic vine hnyi hoton taun, me ame hingölö but dra únyi hnyi hna hlic vine ke ne o but hnyi töiny hnyimen hors, ke haba úlauen me khaca thauzan ke siks haded je satadia.

HNYIMAKAN 15.

KE oge me wâ ke haten hnyi drany ae gan me hnân láia, a seven je angela ae hu je mok a biliny a seven, anyin adre umo hnyi hmönyin anyin Khong.

2 Ke oge me wâ köiö helâ me uselat adre úhaniken me meic; ke ödra minya tavat adre me hwege hon meno, ke hon we e, ke hon numerainy ien e, ke adre me tot hnyi köiö uselat, ke ve hu gadra je kitara anyin Khong. 3 Ke adre me khumöngö khumöng anyi Mose athnyabainy Khong, ke khumöng minya anyin Arenio, ka habe, E gan hmâ ke hnân láia ânyâm ta je huliwa, Than a Khong Ataekhanahia; e wisa me hnathu dem je gethen, u Tuhan ta je dö. 4 Than lö, ie at ame ca he ka ot me ogânâ iâm? anyin a hake u ke thibi at ae kap; anyin ame he ka o ta je hnyeï hia thithö he ka khudrung hnyi hnyimákâm; anyin adre hia but omanená ânyâm ta je huliwa ae wisa.

5 Ke hwaban e inya oge me wâ, ke wâ bi adre me khöng ut hnyi drany uma kapiny uma menâ at ame ohnatko: 6 me ame didrut únyi hnyi hnyin uma kap je angela a seven, ke hu gadrin je mok a seven, ödrin e theibâ veto ae alai me hadröngöc, ke ödrin e oweikâ je úlaidrin ge wen a gol. 7 Ke haba ke at hnyi je únyi a vak a möt ame ham ka je angela a seven

je kaia a seven ae unöngöt ge tang hmönyin anyin Khong ae möt nyiele nyiele balua. 8 Me ame unöngötö uma kap ge hai únyi hnyi hmanenang anyin Khong, me únyi hnyi maniny man; ke ba at ae khana he ka didrö ka hnyi uma kap, ke ne o but ame hwádâ thö je mok a seven anyin je angela a seven.

HNYIMAKAN 16.

KE oge me löng ifucin ae gan hnyin uma kap ame ha ka je angela a seven, ka habe, He th' öbun ka hingälâ je kaiainy tang hmönyin anyin Khong ka hnyi hmeledrany.

2 Me ame he but at a bán me hingälâ anyin kaia ka hnyi hmeledrany; me ame o but anyû ae kong me ikiki ka hnyi hon tavat ae hu gadra haten meno, ke hon tavat minya adre me khudrung ka at ae we e.

3 Haba at a loiny ame hingälâ anyin kaia ka hnyi köiö; me me wia e me helâ me dren komok; me ame mokcu ta je únyi hia ae möt eü hnyi köiö.

4 Ke haba at a kuniny ame hingälâ anyin kaia ka hnyi je wagewe, me je an ame pupua; me ame dra but. 5 Ke oge me löng angelainy je köiö ame ha, ka habe. U thibi Wisa, a u walang ang me adrem. u At ae Kap, anyin a u je bi hwaban helâe: 6 anyin a adre me hingälâ dra dren wakap me ta je perofeta, ke u je habelidra ge dra: ae úcú ködra. 7 Ke oge me löng taben lut ame fuc, ka habe, Eke, Than a Khong Ataekhanahia lö, e hnathu me wisa hnâm je hna bi hwaban.

8 Ke haba at a vakiny ame hingälâ anyin kaia ka seúnö; me adre hna kâu he ka le tavat ge meic. 9 Me ame blâ tavat hnen kahwa ae gan: me adre me haikongoâ ien Khong wale at ae hu man hon ta je mok e; ke adre me ca ietra bi me he ka ogânâ e.

10 Ke haba at a thabunginy ame hingälâ anyin kaia hon theron anyin meno; me ame menekholom but dokhon dökhü; ke adre me hohoc je bohmödra ge vec, 11 ke adre me haikongoâ Khongon drany can anyidra ta je vec me hnödra je anyû; ke adre me ca ietra bi ta je hwakecidra.

12 Ke haba at a siksiny ame hingälâ anyin kaia ka hnyi wagewe ae gan Euferate; me ame hme thö köiö, m' adre me he ka penapena ke gethen deny je than

úhedra e jimeyo. 13 Ke oge me wâ je hanu ae kong a ödrin kun helâ me je rana ödrin e he but únyi hnyi hnyimen drakona, me únyi hnyi hnyimen meno, me únyi hnyi hnyimen perofeta thoi: 14 anyin a ödrin je hanu anyin je demoni, ödrin a ányâ je haten; wale ödrin e he ka ta je than hia hñin hmeledrany he ka úkhacaköu ödra ka hnyi vat hnyi bong ae gan bonginy Khong Atae-khanahia. 15 (Wâ bi, oge me he ka o helâ me at venöu. Hnahic hnen at ame hmâkâ, me tuö anyin je úkhaú, wâ e nye he ka he thu, m' ödra wâ thö anyin hmehma.) 16 Ke ödrin e úkhacaköu ödra hnyi dok adre hwenyi ien hwen Heberu, ka habe, Amagedo.

17 Ke haba at a seveniny ame hingâlâ anyin kaia ethö hnyi wanben; me ame o but hwan ae gan únyi hnyi uma kap, únyi hnyi theron ame ha, ka habe, Adre hia but ányâ: 18 me ame manen dut je hucuce, me je hofuc, me je hendreng; ke e hu hwiöi ae gan hmâ, e ba khaca a helâe hwân ehac ge ibi hu at hnyi hmeledrany, e ba hwiöi ae gan me hwege helâe. 19 Me ame subâ kunâ but taun ae gan, k' ame ü but je taun hnyi je hnyei: ke adre me únykúme Babulona taun ae gan hnyi hnyimakan Khong he ka ham kâu kaiainy wainainy anyin tang hmönyin. 20 K' ame kec dö je bomene hia, k' adre me ca wâ hmetu je bucen. 21 Ke ame ta but únyi anyi drany ka hnyi hon tavat we wahma he gan hnâ, haba ihmakiny je owe, me helâ me khaca talan: k' ame haikongoâ Khong hnen tavat can mok eling a we wahma; anyin ae gan hmâ hmönyin mok e.

HNYIMAKAN 17.

KE ame o thö ke at hnyin je angela a seven hnyat ae hu gadrin je kaia a seven, k' ame ha könya, ka habe, Aiö u, oge me he ka omanená köu hna bi hwaban ka momo hnyi gethen, at ae nua, k' ame laba hon je köiö ae se hia; 2 ke ta je thaniny hmeledrany adre me bi únyi monu mē, k' ame monu aten hmeledrany hnen wainainy anyin bi únyi monu. 3 Ke e ame hum nya hnyi Hanu ka hnyi hnyebuba: me oge me wâ momo ame laba hon meno ae dra, e unöngöt ge je ien bi gan, ke hu je ban a seven, ke je fao a ten. 4 Haba momo, me ame khavâ úkhaú ae udru-drâ hlit ke dra, ke a theibâ ge gol me je

veto ae gan hwaban me je penina, ke e hu hnyi hnyamen kaia gol, ke unöngöt ge je únyi ae ikiki, a ta je únyi ae kong únyi hnyi anyin bi únyi monu, 5 ke e hnyi hon bariny ien adre sihnalimen, ka habe, E IYONG, BABULONA AE GAN, HINYEN OMOMO HNYI GETHEN, KE TA JE ÚNYI AE IKIKI HNYI HMELEDRANY. 6 Ke oge me wâ momo ame monu a ijem dren wakap, ke dren tavat adre me ohnathu Iesu. Ke oge me wâ me oge me láiâ gan hmâ. 7 Haba angela ame ha könyâ ka habe, Anyin a ieü u me láiâ? Oge me he ka ha köu bongon ae iyong anyin momo, me meno a taben, ae hu je ban a seven me je faoiny a ten. 8 Haba meno u me wâ, me, ka e bi ehac, ke ba bi walang ang; ke e ame he ka ölö úheny eü hnyi hmonop ae dit hmönyin me he but ka hnyi hnaúhangö. Ke ame he ka láiâ hnen tavat adre me laba hnyi hmeledrany, tavat adre me ca hia but set je iödra hnyi tusiny möt hwân hnyi hna bi taben hmeledrany, ödra ka wâ meno, a e bi ehac, ke ba bi walang ang, k' ame he ka o. 9 Ke walang hnyok ae hu metâ hnyin. Haba je ban a seven, me wale je bucen a seven, wale momo ame laba hon: 10 ke wale je than a seven, a ü but thabúng, ke ka e bi khaca, ke tiga hia bi khaca; ke e ka o but, me úcú kâu he ka mē laba. 11 Ke haba meno a ka e bi ehac, ke ba bi walang, wale at a ka eitiny ke hanen hnyat a seven; ke e ame he ka he ka hnyi hnaúhangö. 12 Ke haba ta je faoiny a ten u je wâ, me, wale je than a ten, hnyat ae tiga ca hu gadrin dökhü; ke adre hnz ködrin musi helâke me je than, tha ödrin me meno, hnyi awa a khaca. 13 Khaca thibi je hnyekudrin, ke ödrin e ham manidrin man me anyidrin musi ka meno. 14 Ame he hnyat eling ka vat me Arenio, ke ame he Arenio ka hwege hudrin, anyin e Tuhan ta je tuhan, me Thaniny ta je than; ke amo he tavat a tha ödra mē ka hwege, tavat adre hawâ, me tavat adre úca, me tavat ae hnathu. 15 Me e ame ha könya, ka habe, Haba je köiö u je wâ, waleji ame laba hon momo hnyi gethen, wale je tavat, me tavat ae se, me je hnyei, me je hwen hnyei. 16 Ke haba je faoiny a ten u je wâ, ke meno, me wale hnyat ödrin e he ka hûkotiâ momo hnyi gethen, me söh e, me ohethuâ, me an viny, me thong degecâ hnyi meic. 17 Anyin a Khong ame ip eü hnyi je hnyekudrin he ka ohwâdâ weny;

HNA OMANENÂ 18.

me he ka tha hnyok, me ham dôkhudrin dôkhu ka meno, ke ne o but ame hwâdâ je hofuc hwan Khong. 18 Ke haba momo u je wâ, me wale taun ae gan, wale at ame musô je thaniny hmeledrany.

HNYIMAKAN 18.

KE hwaban ta je ûnyi e, inya oge me wâ ke angela minya ame utut ûheny hnyi drany, ae hu musi ae gan; ke ame melam hmeledrany ge anyin hmanenang. 2 Ke e ame ha ge hwan ae hwege, ka habe, A ü but, a ü but Babulona ae gan, k' adre wia e hnân hnyaban ta je demoni, me uma umen ta je hanu hia ae kong, me uma umen ta je meno hia ame gâ ae ikiki k' adre hûkotiâ. 3 Anyin a ü but ta je hnyei hia ge wainainy tang hmönyininy bi ûnyi monu anyin momo; ke ame bi ûnyi monu mē je than eang hmeledrany, k' ame tren omjeû tavat ûcû eang hmelen ge maniny hna osenyinâ unyin momo.

4 Ke oge me löng ke hofuc minya hnyi drany ame ha, ka habe, Lakeik lö, he but ge momo, m' öbun e ca hnyi hanen anyin je hulö, me me ca o köbun anyin je mok: 5 anyin a o but hnyi drany anyin ta je hulö, ke Khong ame ûnykûme anyin ta je monu. 6 Bi hwaban ju kâu helâ me hnen hna ham, ke olo ju bi hwaban kâu hoton anyin huliwa: ke olo ju ûhaniken kâu hnyi utkaia e ame ûhaniken. 7 E gan hmâ hnen hna hamen ogânâ e bi, me ka osenyinâ unyin, awe, ânyâ thö kâu helâe ge vec me hlöuhlöu: anyin a haingen eû hnyi hnyekon, ka habe, Inya oge me laba a momo than, k' iny ca safac bi, ke oge me ca he ka wâ hlöuhlöu. 8 Anyin a wale ame he ka o kâu anyin je mok hnyi bong a khaca, wale mok, me hlöuhlöu, me hmiâ; ke adre me he ka thong degecâ e hnen meic; anyin ae hwege Than a Khong at ame bi hwaban kâu. 9 Ke ame he je thaniny hmeledrany tavat adre me bi ûnyi monu me tha senyin mē ka tenge thungaû can ödrin ka wâ hainy hna thong e, 10 ke ödrin e tot sâkâû anyin a ödrin e outen anyin vec, me ha, ka habe, Ekölö, ekölö ge taun ae gan a Babulona, taun ae hwege! anyin ame o but hwaban köu hnyi awa a khaca. 11 Ke ame tenge thungaû gan hnen tavat ûcû hnyi hmeledrany, anyin ae ba hmetu at ae khana he ka ûco je omjedredra; 12 wale omjeû gol, me sileva, me je veto ae gan hwaban, me je penina, me

mano lino ae ûhnyûkong nân, me mano ae udrudrâ hlit, me silek, me mano ae dra; me je utö ae bo so hia, me je kaia hia a nyon elefan, me je kaia utö hia ae gan hwaban, me bras, me fao, me veto out; 13. me kinamo, me amomo, me je ûnyi ae bo so, me muro, me libanu, me waina, me wakaco, me falawa ae so, me hwit, me je meno, me je mamoe; me je hors, me je kariota, me je unyin; me je hanon at. 14 Ke a he but gam bi je wan ame weny hnyekom, ke hia but gam ta je ûnyi hia ae senem me meic, k' ame ca he hmetu tavat ka wâ bala. 15 Ke ame he tavat ûco ta je ûnyi e, waleji hnen momo hna otre ni ödra ka tot sâkâû, anyin a ödra outen anyin vec, adre me tenge thungaû; 16 me ha, ka habe, Ekölö, ekölö ge taun ae gan, waleji ame khavâ mano lino ae ûhnyûkong nân, me mano ae udrudrâ hlit, me dra, me otheibâ ge gol, me je veto ae gan hwaban, me je penina! 17 anyin adre ohia but hnyi awa a khaca tang omjeû ae gan hmâ helâe. Ke ame tot sâkâû ta je tuhan hu, me tavat adre me kec ehe hnyi köiö, me je aten hu, me tavat adre me huliwa hnyi köiö, 18 me ha, ödra ka wâ thö hainy hna thong e, ka habe, Ewa taun ae ûcû me taun eang ae gan! 19 Me adre me khaû dröu ka hnyi je bödra, me hongot, me tenge thungaû, ka habe, Ekölö, ekölö ge taun ae gan, at ame otre ni ödra hia ge omjeû tavat ae hu hudrin hu eû hnyi köiö ûnyi ge ûnyi hnathuiny! ke adre otheduocâ e hnyi awa a khaca. 20 U ma senyin dö gan drany lö, me öbun wakap, me ta je aposetolo, me ta je perofeta; anyin a Khong ame hia but bi hwaban kâu cabun bi.

21 Ke haba ke angela ae hwege ame hom veto helâke me veto adre omomono ae gan me khûâ ka hnyi köiö, me ha, ka habe, Helâe minya adre me he ka hagutâ Babulona taun ae gan, ge hna khûâ ae hwege, ke adre me ca he hmetu ka wâ e bala. 22 Ke adre me ca he hmetu ka löng unyâm hwan tavat khumöngö kitara, me ta je ûnyi khumöng, me tavat adre me tûö köwi, me tavat adre me tûö khoto; ke adre me ca he hmetu ka wâ unyâm at ame huliwan je huliwa; ke adre me ca he hmetu ka löng unyâm hwan veto hnân camamâ; 23 ke ame ca he hmetu ka umumelam hnyi wanbâm bâhlân lamepa; ke adre me ca he hmetu ka löng hnyi wanbâm ifucin li at ödre tep faipoipo: anyin a haba tavat ûcû unyâm, me ödrin e beönua hnyi hmele-

drany : ke adre me omonoâ ta je hnyei hia ge ânyâm je bibihwakecin. 24 Ke adre me wâ gan dren ta je perofeta me wakap, me tavat hia adre hia but hlingâ hnyi hmeledrany.

HNYIMAKAN 19.

KE hwaban ta je ûnyi e inya oge me löng helâke hwan tavat ae se hia ethö hnyi drany adre me ha, ka habe, Haleluya ; E unyin Khonguta möt, me hmanenang, me man : 2 anyin ae hnathu me wisa hnen hna bi hwaban ; anyin a hia but bi hwaban ka momo hnyi gethen ae nua, at ame okongoâ hmeledrany ge anyin bi ûnyi monu, ke a hia but bi hwaban kâu can dren lathnyabainy. 3 Ke adre me ha hnathu, ka habe, Haleluya. Ke ame hai göranyai nyiele nyiele balua hainy momo. 4 Ke haba wahingat a twente foa, ke ta ûnyi a vak ae möt, me ödrin e ta ju me khudrung ka Khong at ame tabâ theron, me ha, ka habe, Amen ; Haleluya. 5 Me ame o but hofuc ûnyi hnyi theron, ka habe, Ogânâ thö Khonguta öbun je lathnyabainy, me tavat adre me outen e, tavat ae ûhnyûkong me tavat ae gan. 6 Ke oge me löng helâke hwan tavat ae se hia, ke helâke hwan ta je köiö ae se hia, ke helâke hwan hendreng ae gan hmâ ame ha, ka habe, Haleluya : anyin a Than a Khonguta Ataekhanahia ame musi. 7 E so ate me senyin me hobâ, ke so ate me ham kâu hna ogânâ : anyin ame o but Arenio he ka faiipoipo, ke a hia but âiân hamen penapena e. 8 Ke adre me hna kâu he ka khavâ mano lino ae ûhnyûkong nân ae hadröngöc ke ba hnyikongon : anyin a haba mano lino, me wale hwakecin ae wisa anyin wakap. 9 Ke haingen kõnya, ka habe, Sihnalmimen ju, ka habe, Hnödra hnahic adre me hawâ ka hnyi bijeûiny faiipoipo anyin Arenio. Ke haingen kõnya, ka habe, Wale hofuc ae hnathu hwan Khong. 10 Me oge me ta ju hnyi hmelen li can he ka khudrung kâu. Ke haingen kõnya, ka habe, Ohe, u ma ca ânyâ : anyin a iny athnyaba möu me je liamekeiny möu, tavat adre hom hna ohnathu Iesu : khudrung ka Khong : anyin a haba hna ohnathu Iesu me wale hanon hna operofeta.

11 Ke oge me wâ drany adre khöng ; ke wâ bi hors ae hau, ke haba li ien at ame tabâ e me Wisa me Hnathu ; ke e ame lnei me vat hnyi hwakecin ae wisa. 12

Haba li emakan, me bâhlân meic, ke se hia je korona hon ban ; ke hu ien adre set wale ae ca khana hnen at, ke ka hake e thibi. 13 Ke adre okhaûâ e ge ûkhaû adre osisi-drâ ge dra : ke adre me ha ien, ka habe, Logo anyin Khong. 14 Me ame he hoton, je utbavat hnyi drany, adre me tabâ je hors ae hau, adre khavâ mano lino ae ûhnyûkong nân, ae hau me ba hnyikongon. 15 Ke ame o but ûnyi hnyi hnyimen hele vat ae so hwan, me me he ka kot kâu ta je hnyei : ke e ame he ka musi ödra ge osö fao : ke e ame ututo hnyi hna hlic vineiny tang hmönyin ae gan anyin Khong Ataekhanahia. 16 Ke e ame khavâ khaûen, ke adre set ke ien hnyi jevan, ka habe, TUHAN TA JE TUHAN ME THANINY TA JE THAN.

17 Ke oge me wâ ke angela ame tot hnyi seûnö ; ke e ame ha ge hwan ae gan, ame ha ka ta je meno ame gâ ethö, ka habe, Ai öbun ka ûkhacaköu ka hnyi bijeû ae nua anyin Khong ; 18 m' öbun e he ka an viny ta je than, me viny ta je taben vat, me viny tavat ae hwege, me viny ta je hors me tavat adre me tabâ, me viny tavat hia thithö, tavat adre hna bâûâ me ta je athnyaba, me tavat ae ûhnyûkong me gan.

19 Ke oge me wâ meno me ta je thaniny hmeledrany, me anyidra je utbavat adre me ûkhacaköu he ka vat me at ame tabö hors me anyin utbavat. 20 Me adre me kât meno ae hiny ; me perofeta thoi minya waleji at ame ânyâ ta je haten hnyi hnyimakan, hnân omono tavat adre me kap haten meno, m' ödra minya adre me khudrung ka at ae we e : ke adre me khû' ödru meli ödru ka hnyi nem a meic ame hlâ ge teio : 21 ke adre me hlingâ je kolon ge hele vat anyin at a tabö hors, wale hele vat ame o but ûnyi hnyi hnyimen : k' ame sekon dö je meno ame gâ hia ge je unyidrin.

HNYIMAKAN 20.

KE oge me wâ ke angela ame utut ûheny hnyi drany, ke e unyin kiiny hmonop ae dit hmönyin, ke e hnyi hnyamen tö fao ae gan. 2 Ke e ame kât drakona, wale on ehac, a wale Diabolo me Satana, me ame ca e ke ne o but hnyi wan thauzan je huna, 3 me khûâ e ka hnyi hmonop ae dit hmönyin, k' ame hlöng e, k' ame ohmâ haten hon, me me ca he hmetu ka omonoâ ta je hnyei, ke ne o but ame bekhöt je huna a wan thauzan : ke hwaban e, e ûcû

he ka thang hmetu but e hnyi ûen ae okhulit.

4 Ke oge me wâ je theron, me hnyat ödrin e laba hon, ke adre me hna ködrin he ka hnei : ke oge me wâ minya je hanon tavat adre subâ je nyidra can hna ohnathu Iesu, ke can hofuc hwan Khong, ke tavat adre me ca hnyi khudrung ka meno, me at a we e, ke adre me ca hnyi kap haten hon je baridra ke hon je hnyamödra ; ke adre me möt, k' adre me tha musî me Keriso ke ne o but hnyi je huna a wan thauzan. 5 Ke haba je kolon tavat adre me mokcu, me adre me ca möt hmetu bi ke ne o but ame bekhöt je huna a wan thauzan. Wale möt hmetu a bân. 6 E hnahic ut me kap tavat adre me hnyi hanen möt hmetu a bân : e ba maniny mok a loiny ködrin ; ke adre me he bi ka tavat bihut ka Khong me Keriso, ke adre me he ka tha musî mē ke ne o but hnyi je huna a wan thauzan.

7 Ke e ka bekhöt dö je huna a wan thauzan, me adre me he ka thöng Satan hmetu but úheny hnyi uma ceat, 8 me ame he ka o but ka omonoâ ta je hnyei wale hnyi vak ta ke keihen hmeledrany, wale Gog me Magog, he ka úkhacaköu ödra ka hnyi vat : ke helâ me önyin köiö úseidra. 9 Ke adre me ölö thö me dedo hmeledrany, me igigilö hunuma anyin wakap, me taun ae oúnykúminy : ke ame o but meic únyi hnyi drany me thong degeci ödra. 10 Ke adre me khúö diabolö at ame omonu ödra ka hnyi nem a meic me teio, waleji a hnen minya meno me perofeta thoi ; ke adre me he ka oveci ödra hnyi lany me lit nyiele nyiele balua.

11 Ke oge me wâ theron ae gan ae hau, me at ame tabâ, ke ame kec hnyi hnyimakan hmeledrany me drany ; ke ca manen bi ke dok hobi ködrü. 12 Ke oge me wâ wamok, tavat ae gan me tavat ae úhnyükong adre me útitilen hnyi hnyimakan theron ; me adre me khöng ut je tusi, ke adre khöng ke tusi bi a wale tusiny möt : me adre me hnö wamok ge ta je únyi adre sihnalimen hnyi je tusi, hoton anyidra ta je huliwa. 13 Ke haba köiö, me ame ham hmetu tavat adre mok hnyin ; ke mok minya, me Hedis, ödrü me ham hmetu tavat adre mok unyidru : me adre me ve hnei ödra hoton anyidra ta je huliwa. 14 Me adre me khúö mok me Hedis ka hnyi nem a meic. Wale mok a loiny, a nem a meic. 15 Ke e ka manen dut khaca waleji adre ca sihnalimen hnyi tusiny möt

me adre me khúâ but e ka hnyi nem a meic.

HNYIMAKAN 21.

KE oge me wâ drany a teb únyi me hmeledrany a teb únyi : anyin a hia but drany a bân me hmeledrany a bân ; ke ba hmetu bi köiö. 2 Ke inya oge me wâ taun ae kap, Jerusalema a teb únyi, ame utut úheny hnyi drany únyi ge Khong, adre penapena helâ me hlu ame he ka faipoipo, adre theibâ e hobi kâu áian. 3 Ke oge me löng hofuc ae gan únyi hnyi theron ame ha, ka habe, Wâ bi, e unyin tavat uma menâ umen Khong, ke e ame he ka laba unyidra, ke adre me he ka lakeiny, ke ame he Khong ka tha e m' ödra, k' ame he ka Khongudrin : 4 ke e ame he ka kot degecâ ta je deköiö hia únyi hnyi ta je emaködra ; ke ba hmetu bi mok ; ke ba hmetu bi hnyok ae hmak, me tenge, me vec : a hia but ta je únyi a bân. 5 Ke ame ha at ame laba hon theron, ka habe, Wâ bi, oge me he ka ohâtâ ta je únyi hia thithö. Ke e ame ha, ka habe, Sihnalimen ju : anyin ae hnathu me wisa ta je hofuc e. 6 Ke haingen könya, ka habe, Adre hia but ányâ. Inya Alefa me Omega, wale hwân me obiny. Oge me he ka ham báuâ köien möt ame pupua ka at ame beic. 7 Ame he ka hu ta je únyi e hnen at ame ton ; me oge me he ka Khongon, ke e ame he ka nökek. 8 Ke haba tavat adre me ot, ke tavat adre me ca labageju, ke tavat ae ikiki, ke tavat úhlingö, ke tavat bi únyi monu, ke tavat tren khong, ke tavat adre me hmi ka je hnatheat, ke tavat hia adre me thoi, me ame he ka hu hwajekhöüdra hnyi nem ame hlâ ge meic me teio ; wale mok a loiny.

9 Ke ame o but könya ke at hnyi je angela a seven hnyat ae hu je kaia a seven ae unöngöt ge je mok a seven a biliny ; me e ame úhnenamö mönya, me ha, ka habe, Aiö u, oge me he ka omanená köu hlu áian Arenio. 10 Me e ame hum nya hnyi Hanu ka hnyi bucen ae gan me beü göranyai, me omanená könya taun ae kap wale Jerusalema ame utut únyi hnyi drany únyi ge Khong, 11 ke hu hmanenanginy Khong hnyin : ke haba melaminy me helâ me veto ae gan hmâ hnönyin hwaban, ke helâ me veto jasepi ae alai : 12 ke hu hak veto ae gan me beü göranyai ; ke hu je homagöüle a twelv, ke twelv ta angela hnyi je homa-

HNA OMANENÄ 22.

göule ; k' adre me sihnalimen je ien hnyin, wale je ien je tribu a twelv anyin lakon Isaraela : 13 kun ta homagöule jimeyö ; ke kun ta homagöule hnyi hwadrö ; ke kun ta homagöule hnyi hwaiöu ; ke kun ta homagöule jimeü. 14 Ke twelv ta taben hak veto hnyi taun, ke haba hnyi je taben eling e hu je ien je aposetolo a twelv anyin Arenio. 15 Ke haba at ame ûhnenamö mönya, me hu gan hlowe gol hnân tuluto taun, me je homagöuleiny, me je haginyy veto. 16 Ke tha úcú vak ta baten taun, ke tha úcú ibeüen me úlauen : ke e ame tuluto taun ge hlowe, twelv thauzan je setadia : ke tha úcú thibi ibeüen, me úlauen, me ibeüen göranyai. 17 Ke e ame tuluto haginyy veto, me wan haded ke fâte foa je kubit, hoton tulutiny at, wale angela. 18 Ke haba hna up haginyy, me je veto jasepi : ke haba taun, me gol ae so, helâ me uselat ae alai. 19 Ke adre ohmanenangâ ge je veto ae gan hwaban bia taben haginyy taun. Jasepi taben a bân ; safairo a loiny ; kalekedoni a kuniny ; semerado a vakiny ; 20 sadonuki a thabûnginy ; sadio a siksiny ; kerosolite a seveniny ; berulo a eitiny ; topazio a naininy ; kerosopala a teniny ; uakini a eleveniny ; amethusa a twelwiny. 21 Ke haba je homagöule a twelv, me je penina ling a twelv ; úsa khaca penina je homagöule : ke haba getheniny taun, me gol ae so helâ me uselat ae alai. 22 Ke ba uma kap oge me wâ e : anyin a Than a Khong Aekhanahia me Arenio uma kapiny. 23 Ke ca únyi hnathu bi seüno me tehi he ka omelamâ taun ; anyin ame omelamâ e henen hmanenanginy Khong, ke lamepainy Arenio. 24 Ke ame he ta je hnyeï ka he hnyi melaminy : ke haba je thaniny hmeledrany, me adre me sukhöünâ anyidra hmanenang ka hnyin. 25 Ke adre me ca he ka hlöng je homagöuleiny hnyi lany (ke ba lit e) : 26 ke adre me he ka sukhöünâ ka hnyin hmanenanginy ta je hnyeï me hna ogânâ : 27 ke ame ca he ka hnyi dit kâe ke únyi ae kong, me at ame ânyâ ikiki me thoi : ke hake ödra thibi tavat adre sihnalimidrin hnyi tusi anyin Arenio a tusiny möt.

HNYIMAKAN 22.

KE e ame omanenâ kõnya wagewiny köiö möt ae alai helâ me uselat, ame di hnyi theron anyin Khong me Arenio, 2 hnyi wanben getheniny. Ke e hnyi li

baten wagewe úöiny möt, at ame wa wan a twelv je bongon, ke ame wa hnyi je tehi hia : ke haba ta je lan úö me hnân omelö ta je hnyeï. 3 Ke ba hmetu bi hnaûhangö : ke ame he ka e bi hnyi wanben theron anyin Khong me Arenio ; 4 ke ame he je lathnyabainy ka huliwa kâu ; ke adre me he ka wâ hnyimakan ; ke e hon baridra ien. 5 Ke ame ca he hmetu ka lit ; ke ca únyi hnathu bi ködra lamepa, memelaminy seüno ; anyin a he Than a Khong ka melamidra : ke adre me he ka musi nyiele nyiele balua.

6 Ke haingen kõnya ka habe, Wale hofuc ae wisa me hnathu : ke haba Than a Khongon ta je hanon je perofeta ame kunâ anyin angela he ka omanenâ ka lathnyabainy ta je únyi ame he ka ie o. 7 Hnahic hnen at ame löng hoton ta je hofuc adre perofeta hnyin tusi ang.

8 Ke inya Ioane at ame löng me wâ ta je únyi e. Ke hnyi úen oge me löng me wâ, me oge me ta ju hnyi hmelen li can angela, at ame omanenâ kõnya ta je únyi e. 9 Me e ame ha kõnya, ka habe, Ohe, ca ânyâ, iny athnyaba möu me je perofeta a je liamekeiny möu, me tavat adre me löng hoton hofuc hnyi tusi ang : khudrung ju ka Khong.

10 Ke haingen kõnya, ka habe, Ca ohmâ haten ta je hofuc adre perofeta hnyin tusi ang ; anyin ae hakekeny jut úen. 11 Haba at ae ca wisa, me ame he bala bi ka ca wisa : ke haba at ae ikiki, me ame he bala bi ka ikiki : ke haba at ae wisa, me ame he bala bi ka ânyâ wisa : ke haba at ae kap, me adre me he bala bi ka okabâ. 12 Wâ bi, oge me he ka ie o ; ke e unyik hwaban, he ka ve ham ka tavat e úcú me anyidra ta je huliwa. 13 Inya Alefa me Omega, wale bân me biliny, a can me obiny. 14 Hnahic hnen tavat adre me hneü anyidra ta je úkhaú, me me úcú ködra he ka he ka hnyi úöiny möt, me he ka dit ka hnyi je homagöuleiny taun. 15 Eü hnyi hoton ta je kuli, me tavat tren khong, me tavat bi únyi monu, me tavat úhlingö, me tavat adre me hmi ka je hnatheat, me tavat hia adre me weny me mãdrâ thoi.

16 Inya Iesu oge hia but kunâ anyik angela he ka thumetu öbun ge ta je únyi e hobi kâu ta je ekalesia. Inya khüen me Nöku Davita, ke okhú lany ae hadröngöc.

17 Ke haingen Hanu me hlu a teb fai-poipo, ka habe, Aiö u. Ke so ame ha minya at ame löng, ka habe, Aiö u. Ke

HNA OMANENÂ 22.

haba at ae beic, me he but jem : ke haba hnyi tusi ang, me ame he Khong ka ohia
at e weny, me hom bâûâ ju kôïöiny möt. jekhon hnyi üöiny möt, me ûnyi hnyi taun

18 Inya oge me ha wia ka tavat hia ae kap, wale adre me sihnalimen hnyi tusi
adre me löng ta je hofuc adre me perofeta ang.

hnyi tusi ang, ka habe, A ne he bi ke at 20 Haba at ame ha wia ta je ûnyi eang,
ka bi hanen ta je hofuc e, me ame he minya me e ame ha, ka habe, Eke : oge me he ka
Khong ka bi hanen kâu ta je mok adre ie o. Amen : Than lö, Iesu, aiö u.

sihnalimen hnyi tusi ang: 19 ke a ne ke 21 E so e unyin wakap ibetengiö baú
at ame ohia ke ong hofuc adre perofeta anyin Than Iesu. Amen.

Richard Clay & Sons, Limited, London & Buncay.